


# ახეული

ლიტერატურული ჟურნალი

N3, 2018



გულნაზ გვალია:

„ნოდარ ნულიძისკირი —  
„თუთარჩელა“



გაბეირნება

დიდგორისკან



„უცნობი ჰერბერტი“

რეჟიაზ ინანიშვილის სახელობის  
ლიტერატურული კონკურსი



ბელა ლობჯანიძე – „ლაზარეს დაბადება“



# ანეული

№3. (№22) ოქტომბერი. 2018 წ.  
ლიტერატურული  
ფენიანი

ალექსანდრე ყაზბეგი-170	
თანბო ავსაჯანიშვილი ალექსანდრე ყაზბეგის ლოცვა სამების ტაძარში .....	3
პთეფი სამ დბდმი	
თაბახ შიშაძეანიშვილი „მკვდარი იმედი მე არ მეკუთვნის“ .....	4
პთეფია	
ჩათაპან შანბანი .....	5
პბბბა	
ლახ ხახიანიშვილი ას ოთხმოცი მარგალიტი .....	7
პთეფია	
მახინა შანიძე .....	14
ბიბლან ჭინჭახიანი .....	17
ილია ილიანი .....	19
ინტერვიუ – „ანეულის“ სტუმარია ექიმი თამარ შავგულიძე .....	21
მახინა ნონიაშვილი დავით შემოქმედელის მოთხრობები .....	26
იბთი ლექსი	
მიხაილ თაბანიშვილი სულო, ილოცე! .....	30
თაბბბანი	
უცნობი ჰერბერტი – ქს. იანუშ პაშერბი ესაუბრება ზბიგნეე ჰერბერტს .....	31
ზბიბნავ ჰახბახხი პოლონურიდან თარგმნა რუსულიდან კიკალეიშვილი – დომუხოვსკიმ .....	35
მახილ ხახინიანი მამაცი ნაზარი სომხურიდან თარგმნა მაცყალა გეურქოვა-საკიანიმა .....	38
საანი შიხაზანი რჩეული იგავები „ბუსთანიდან“ სპარსულიდან თარგმნა ალ. ელერდაშვილმა .....	42
პთეფია	
მახინა პაპანიშვილი .....	44
ნილი ხახანიანი .....	46
ნილოლოზ ხახანიანი .....	46
ლუიზა ბოჩკოვა-ზვიჩია კიდეე ერთი ახალი წიგნი .....	48
პბბბა	
ლილია ჟიხოშვილი-სახციხანიშვილი ქართული საკაზმით შეზავებული ამბავი .....	49
მან იპანიანი ორი მინიატურა .....	52
ლილია ბოჩკოვა-ზვიჩია ლაზო ზამბახიძე, ჯუმბერ ჯიშკარიანი .....	55
ილცისპიტელის ჩანაწიბბი	
მიხაილ ლანიანიშვილი ბებონეი და იმისი საციქველ-ჯამ-ჭურჭელი (დასასრული) .....	56
ბილიბი დანიანიშვილი დროა, გასცდეს საქართველოს ფარგლებს .....	59
წიბბილი	
სათანა ხაპანიანი „შეიყვარეთ სიყვარული“ .....	60
ბანიზ ბპანი ნოდარ წულეისკირი – „თუთარჩელა“ .....	63
იპანი ჰაბახიანი მოგონებათა სკივრიდან .....	66
ინციბბი	
თაბახ შიშაძეანიშვილი მხატვარი ნიკალას სოფლიდან .....	67
პთეფია	
ბილიბი პახთანიანი .....	69
თანბო ავსაჯანიშვილი .....	70
თაბახ შიშაძეანიშვილი .....	72

ISSN 1987-9717

ენციკლედ-საგანმანათლებლო საზოგადოება „ანელი“

---

---

ენციკლედ „ანელი“ ახსებელი  
ლიტერატურული გაერთიანება:

რედაქციის ბალანსიკა  
თამარ მიქაძე  
თეზის უთმელიკა  
ლელია ქიტოშვილი –  
სასლთეს უცვიშვილი  
თემურ ჩალაბაშვილი  
მანანა ჩიტიშვილი  
ნინო ჩიტიშვილი  
თამარ ხმალაძე  
ივანე ჯავარიკა  
ჯუბა ლეგელი  
ქუშუბერ ჯიშკარიანი

მთავარი რედაქციი

თამარ შაიშვილი

პასუხისმგებელი რედაქციი

სოფიო ჯავარიკა

ლოგოს ავტორი

ბიოგრაფიული ინფორმაციი

გაზეთის პირველი გვერდი: ბელა ლომინიძის ფინანსური ნაშრომი „ფინანსი“

გაზეთის ბოლო გვერდი: ბიბლია და ილია იბრაჰიმიძე

კონტაქტის ტელეფონი: 551 00 50 58

რედაქციის ინტერნეტფოსტა: [aneuli@mail.ru](mailto:aneuli@mail.ru)

ენციკლედში გამოქვეყნებულ მასალებზე პასუხისმგებელია ავტორი

ენციკლედის დაბეჭდილია სოციალური მედიის სახეში, შშმ პირების მონაწილეობით

თანამ ავსაჯანიშვილი



ალექსანდრე ყაზბეგის ლოცვა  
სამების ტაძარში

წმინდა სამების ტაძრად მოველ, აქ დავსახლდები,  
წუთისოფლიდან ვირიყები და ვიდევნები,  
მოველ ტაძარში, სად სახლობენ თემის კაცები,  
დეკანოზები, ხევის გმირნი, ხევისბერები.  
ო, ღვთისმშობელო, მაინც მოველ, მაინც გადავრჩი,  
მე, ფიქრი შენი, მიწა შენი, შენი წილხვედრი,  
წმიდათაწმიდა უფლის გამზრდელ შენს თბილ


კალთაში

დღეს ლოცვითა და სიხრულით მეც ჩავიშლები.  
მუდამ უდაბურ და გაუვალ გზებით ნათეთქვი,  
მეც სამშობლოდან ღმერთისაკენ ბილიკს კვკალავდი,  
საქართველოზე დარდის თოვლით ასე გავეთორდი –  
მამულზე დარდით ნაადრევად გავჭაღარავდი.  
მე უარვეყავი რუსთა მეფის მედალ-ჩინები,  
მე უარვეყავი სხვა სიმდიდრე, ყალბი ტიტული.  
ეს წმინდა ჯვარი, საქართველოს ეს მზის სხივები,  
იმედ-ნუგეშად გულზე მქონდა სულ დაკიდული.  
მთელი ცხოვრება ვიყავ მწყემსი, ვიყავ სარქალი,  
დრო იყო მგლობის, ძალადობის, ძარცვის, ქურდობის.  
ღვთისგან ბოძებულ ნიჭისა და კალმის ფარ-ხმალით  
მეც საქართველოს დიდების გზას წინ

მიუუძღვოდი...

მეც შემიფარე ღვთისმშობელო, შენი ტაძრით,  
მტერთა ჩემთაგან სამშობლოდან დღეს ვიდევნები.  
ვიცი, საბჭო და საკრებულო ისევ აქ არის  
დეკანოზების და სულმნათი ხევისბერების...

# პოეტი სამ დროში...



„მკვდარი  
იმედი  
მე არ  
მეკუთვნის“...

„მკვდარი იმედი მე არ მეკუთვნის“, – ეს ხმა წინა საუკუნიდან მოარღვევს სივრცეს... ეს ხმა პოეტის ალამია! თემურ ჩალაბაშვილის დიდი რწმენაა. შორეული ათასწლებიდან ტალღად მომსკდარი და ცრემლად გარდასახული.

ეს ხმა „დაცოტავებულ სამშობლოში“ წრიალებს, იღეწება „ცალუღელა სევდის კალოები“... ვინ ვართ და რანი ვართო? – პოეტის გულის ხმაური იზრდება და იზრდება, რეკვიემს ემსგავსება.

დაცოტავებული სამშობლოს რეკვიემია პოეტი... დიდგზამოვლილი, უხსოვარ სივრცეებად ქცეული და ჩაკარგული, ჩამღერებული... ამ სივრცეებში...

დაცოტავებული სამშობლოს სევდაა პოეტი! და ცრემლი – მისი სავიზიტო ბარათია... სინანულია ჩვენს სულში ცრემლად მომწყვდეული ქართველობის, სარწმუნოებისა და დიდი ისტორიის გამო. ცრემლით ნაფერებია ოშკი და ხახული, „სინანულის ცრემლში დგანან ისევ ქართლის მთები“ და განწირული და მღუპარია მიწა... ამ დროს იწყება საუბარი გულთან...

„რანი ვიყავით და რანი ვართო“... – თემურ ჩალაბაშვილი ცრემლში საკუთარ ბედისწერას ძერწავს და ამ ბედისწერით სამშობლოს ბედისწერას აცნაურებს.

პოეტი, რომელიც სამშობლოზე მდიდარი არასოდეს ყოფილა და რომელიც სამშობლოს სამ დროში დაატარებს, სამ დროში აერთიანებს – წარსულში, აწმყოსა და მომავალში...

სამშობლოს ბედისწერასთან გადაჯაჭვა შემთხვევითი არ არის... როცა უგულებელყოფილია ქართული მწერლობის ტრადიციები, როცა ილიას გზა გამრუდებულია... მწერლობას ავტორიტეტი დააკარგვინეს, ზენობრივი იდეალი მოუსპეს... ამ დროს

ყველაზე მწარედ პოეტმა უწყის, თუ „რა სცოდნია დაკარგული სამშობლოს განცდას“...

როგორი ტკივილია, როცა „სულ სხვა ხალხი მომრავლდა, სხვა ყაიდის, სხვა რჯულის“... სხვაგნებურებით, ჯერ კიდევ რევაზ ინანიშვილმა გვითხრა სინანულით...

იქნებ სიმღერაც ლალი და სევდიანი იმიტომ დაგვყვა? გრიგოლ რობაქიძემ – „ჭეშმარიტად აკაკის ღიმილი ქართველთა სულის სუნთქვას აცნაურებდაო“... ეს სულის სუნთქვა სევდის ღიმილი იყო პოეტისა...

როგორც „მრავალჟამიერი“, ძალზე მხიარული და თან ნალვლით შეფერილი სიმღერა...

ეს ნალვლი დაკარგული სამშობლოს განცდაა ჭეშმარიტი პოეტისა საქართველოში...

„ხელთ გეცლება სამშობლო, მახლას შენი ნაწერი“... – ამბობს თემურ ჩალაბაშვილი და „სულთან ჭიქის ჭახუნით“ მარტოობას უნაპირდება...

პოეტობა მხოლოდ ტექსტების წერა არ არის... პოეტობა სულში სანთელია, რომელიც ყველას ხვედრი არ არის, რომელიც ჩუმად იწვის და უხილავ ნათელს ტოვებს... ხილულად!

შემთხვევით მოვკარი ყური, ამას წინათ თემურ ჩალაბაშვილისთვის „სახალხო სიყვარულის“ საპატიო სიგელი მიუციათ... მას არ სჭირდება ხელოვნური წოდებები და სიგელები! სახალხო სიყვარული ისედაც აქვს – ხალხის პოეტს და მისი გულისნადების მცნობს...

...თემურ ჩალაბაშვილი თაობებს შორის დარღვეული კავშირის სამანია...

ყველგანაა, სადაც ახალგაზრდობაა და ახალგაზრდული სიტყვა ჟღერს... სადაც „ილიაა – შუბლი საქართველოსი“ და ეროვნული იდეალები.

მახსენდება სიმონ ჩიქოვანის სიტყვები გალაკტიონზე: „საქართველო იყო მისი ოჯახი, მისი მშფოთვარე სულის სამყოფელი და მისი სიმღერის საგანი. ის მუდამ ატარებდა გულის სიღრმეში დაბინდულ ქლიავისფერ მამულის ხატებას“...

მე თემურ ჩალაბაშვილზე ასე ვიტყვოდი, ის მუდამ ატარებს გულის სიღრმეში დაბინდულ იისფერ კაკასიონს, კავკასიონის ხატებას, რომელიც მშობლიურ ძველანაგაში ბავშვობიდან მამის ბეჭებით გადაზომა...

და თუ პოეზიამ უნდა გადაარჩინოს სიტყვა ქართული და „ხანდახან ლექსითაც მარცხდება ურჩხული“... ამიტომაც მკვდარი იმედი არ ეკუთვნის პოეტს....

თამარ შაიშველაშვილი

სურათი: ზაზა ჩუბინიძის ნახატი

ჩეთივან მუნბაიია



შეეწირები ყვავილი ნაყოფს

ტყემლის ყვავილის თეთრი გვირგვინი,  
როგორც პეპელა ისე ფარფატებს,  
გაიძარცვება ხე მომღერალი,  
დაემსგავსება ბავშვის ნახატებს...  
რას ფიქრობ ნეტა, პატარძალივით,  
თეთრად რომ გვმოსავს აპრილის ღამე?!  
როცა ყველა ხის გესმის ძახილი...  
ანდა მდინარე დახაზავს ღარებს,  
როცა ნაყოფი ჯერ არ მოგისხამს,  
სავსე ხარ ზრუნვით და ნეტარებით...  
რას ფიქრობ ნეტა, დრო რას მოგიტანს?  
ჩიტებს ალერსით წაეტანები...  
და ჟღერტულებენ შენს მხრებზე, ტანზე,  
ბელურები და გულწითელები...  
შემოგნატრიან ალვის ხეები,  
წიფლიანები, მუხა-თელები.  
შენ ალბათ ფიქრობ, რომ გაზაფხულმა,  
ტახტზე დაგსვა და გიწოდა მზის ხე  
და სულ ვერ ამჩნევ მაისის ნიავს,  
შენს გაქურდვას რომ ჩუმჩუმად იწყებს...  
თეთრი ყვავილი ფრიალებს, გოდებს  
და უსასრულო სამყაროს ერწყმის  
მერე ნაყოფი ავივსებს ტოტებს  
და არ იქნები სხვასავით ბერწი.  
შეეწირები ყვავილი ნაყოფს,  
ეს იყო შენი სიცოცხლის აზრი  
და შემოდგამენ მერე ტყემლებით  
სავსე კალათებს დახლებზე ბაზრის.  
ასე მოკვდება ოცნება ქარში  
და სილამაზე ფულზე გაცვლილი...  
წამოვა სეტყვა – ვაგნერის მარში...  
და დასრულდება, რაც გაქვს განცდილი.

\* \* \*

ამ გადარეულ ღამეებს ვფიცავ,  
შენ, დედამიწავ, ვერ მივხვდი, რა გსურს!  
მე, როგორც მინდვრის გვირილა მიწას,  
ისე მომწყვიტეს უეცრად წარსულს.

შენ მიპასუხე, საიდან ჩნდება,  
მოწმენდილ ცაზე ღრუბელი შურის?!  
მერე შავდება და ნება-ნება,  
მიიძურწება ნელი და ჩუმი.

ამ გადარეულ ღამეებს ვიცნობ,  
უძილობის და დარდის ჯადოქრებს,  
ამოღი მთვარე, გიყურო ვინძლო,  
ცრემლებმა გული ღამის გამოხრეს.

ეს ღამეც გატყდა, ვით ძველი ციხე,  
იყო შფოთი და დავიდარაბა,  
შენთვის გავხსენი, სამყაროვ, კლიტე,  
შენთვის ვალებდი, მზეო, დარაბას!

ამ გადარეულ ღამეებს ვფიცავ,  
შენ, დედამიწავ, ვერ მივხვდი, რა გსურს?!  
თორემ მე, როგორც გვირილა მიწას,  
ისე მომწყვიტეს უეცრად წარსულს.

შენ მიდიხარ...

ტანჯვა წვეთავს ჩემი თვალის უპეთაგან,  
და ცრემლები დამდენია სისხლის,  
მეასეჯერ ვეკითხები საკუთარ თავს,  
ეს რა მოხდა? რატომ ანდა რისთვის?

ყველაფერი, ისედაც ხომ ტრაგიკული,  
სევდიანი, დარდიანი იყო?!  
თავიდანვე ასე იყო განწირული,  
ჩვენი ერთად ყოფნის მზე და სითბო.

ვერ მივხვდეთ დიდ საჩუქარს განგებისას,  
წყდება ზევსი, უსაშველოდ წყდება;  
ეს რა ცუდი უფსკრულები დამესიზმრა,  
შინით ზორბა ურჩხულების წყება...

შენ მიდიხარ, შენი ხმა კი ჩემთან რჩება,  
წუთისოფელს ეთხოვები ტანჯვით,  
უსიცოცხლო ნუთუ შენი თვალებია?  
ნუ მოკვდები, გეხვეწები, დარჩი!

\* \* \*

ქარებო, ერთხელაც მითხარით,  
რა ხდება ამ ზეცის გადაღმა?!  
ცუდად რომ ამიხედეს სიზმარი,  
არა ვარ, არა ვარ თანახმა.

არა ვარ, არა ვარ თანახმა,  
უბრალოდ მეძინოს ლოგინში,  
თუ ვინმემ სიმშვიდე დამიფრთხო,  
არ მინდა არავის ბოდიში.

მოდით და... თუ გინდა მე გეტყვი,  
ეს ზვრები რატომაც გადახმა,  
იმდენად არ მიყვარს სიყალბე,  
წესებზეც არა ვარ თანახმა.

ავდრებო, ერთხელაც მითხარით...  
მაინც ხომ მზე გიფრთხოთ სიმშვიდეს?!  
ამიტომ ავი და ბოროტი,  
წესით ხელს ვერ უნდა მიშლიდეს.

ქარებო, ერთხელაც მითხარით,  
რა ხდება ამ ზეცის გადაღმა?!  
არ მახსოვს ეგ ცუდი სიზმარი,  
არ მინდა... არა ვარ თანახმა.

### გასეირნება დიდგორისკენ

აი, აქ იდგა ურდო ილღაზის,  
ქარიც ჩამდგარა აქვე, დიდგორთან,  
ნამი ციმციმებს, ვით ქვა ძვირფასი,  
მტერი ცრემლებით ტირის თითქოსდა...  
ჩანდა დავითის ლანდიც მანგლისთან,  
რას უქადიან ფელამბარები?\*

ლაშქარს მომხდური როგორ დაღლიდა?!  
ახსოვდათ ქვეყნის დანაბარები.  
ნიჩბისის ხევით მივყვები მზის სხივს,  
ჭენებით მიმყავს ცხენი დიდგორთან,  
ნეტა მესიზმროს დიდი დავითი,  
სიცოცხლის ბოლოს რაზე ფიქრობდა...  
.....

\* ფელამბარები – წინასწარმეტყველნი

\* \* \*

ქარიშხალს დარჩა მეფობა,  
ბობოქრობს, ყველას აშინებს...  
მე ბედისწერის არ მჯერა,  
კარებს ვუკეტავ მაშინვე;

თუმცა, ტრიალებს მხეცივით,  
მიღეწ-მოღეწა ტოტები,  
გაუთრევ-გაუთელია  
კვირტები – მარტის ნოტები...

გულწასულია ბულბული,  
ველარ გალობდა ნეტარად,  
ანგელოზს ჩასძინებია,  
ვისაც ეს დილა ებარა...

### წითელი ყვავილი

რადგან ცუდად მაქვს სიტყვა დაცდილი,  
მე გეფერებით ჩუმად, უთქმელად,  
ქარშიც და მზეშიც უკვე განცდილი,  
ჩემო თელავ და ჩემო ურთხმელავ –

წარსულზე დარდი ალბათ ჩაივლის,  
ძეძვის ტოტებზე ქარი ბანცალებს  
და დაკაწრული ეკლით ყვავილი,  
თითქოს სულიდან ამომაცალებს.

### შენ აღარ ხარ...

მწიფდა ქლიავი... თითქოს მხატვარმა,  
შავ-შავ ლაქებად გააკრა ცაზე,  
ქროდა ნიავი... და შემოდგომის  
ჭრელმა ბალებმა ნაყოფით სავსემ,  
მამოგზაურეს ოცნების რთველში,  
შენც იქ დამხვდი და გოგრების ოქროც...  
მოდით, პატარა ქონი მოეძებნოთ,  
სიყვარულისთვის, სანამდე მოთოვს.  
დაგკმაყოფილდეთ სხივის სითბოთი,  
სანამ ამ ქვეყნად ჯერაც ვარსებობთ,  
ამბობდი, მოთოვს... მცირედს ვითხოვდით...  
მაინც გაგვწირეთ, წლებო თარსებო.



## ცხა ხახიაშვილი



„ადრე სადღაც წამიკითხავს: ადამიანის სული მკვლევლობის დროს იყოფაო. არა და არა – არასწორია ფიქრობდე, რომ შენი სული მხოლოდ შენ გეკუთვნის. ის ნაწილებადაა გაყოფილი და ბევრია მისი წილხვედრი: ოჯახი, საყვარელი, მეგობრები.

ერთ დღეს გადავწყვიტე, რომ მიხდოდა ჩემი სული მხოლოდ ჩემი ყოფილიყო და შევცდი. ჩემი სულიც იყო გაყოფილი, ას ოთხმოც ნაწილად გაყოფილი“.

### ას ოთხმოცი მარგალიტი

ლარისა კისრის გარშემო შემოხვეული სიმძიმით ცხოვრობდა. ეს ყველაფერი ამ ყელსაბამის ბრალი იყო, რომელსაც არასდროს იშორებდა. გრძელ, უხილავ ძაფზე წამოცმული ას სამოცდაცხრამეტი მარგალიტი ყოველ შემხვედრს თვალს სჭრიდა. სარკისებრის არეკლილ სინათლეს გულგრილად გვერდს ვერავინ უვლიდა, ვერც ჩაუვლიდა. სწორედ ამ მოპარული სხივით იქცეოდა პირველად ყურადღებას. თუმცა ერთი სიმართლე იყო – მართლაც, შთამბეჭდავი სანახავი იყო ლარისას გრძელ კისერზე მოხვეული სამკაული. თეთრი მარგალიტი ფერმკრთალ კანს ყველაზე ნაზი ქსოვილის მსგავსად ედებოდა. სათუთად მფლობელს ეაღერებოდა. ყოველი შემხვედრი მზერას ჯერ მარგალიტებს აყოლებდა, შემდეგ ახალგაზრდას სინაზისა და სინატიფით აღფრთოვანებულის ყურადღება ლარისას მოკლე, მუქ, ქერა თმას თვალებად მიჰყავდა. თუ გაუმართლებდა და მისი მკრთალი ცისფერი თვალების შეთვალეირებას მოასწრებდა, მას ველარასდროს დაივიწყებდა. იღბლიანი იდუმალი სილამაზის შესახებ ხშირად მოყვებოდა. იმედსაც დაიტოვებდა, რომ კვლავ იხილავდა. გონებაში კიდევ მრავალჯერ დახატავდა. დროის განმავლობაში შეცვლიდა, შეალამაზებდა, არევდა, აამღვრევდა და მისგან მხოლოდ მაშინ განთავისუფლდებოდა, როდესაც საბოლოოდ დაივიწყებდა და გააცნობიერებდა, რომ წარმოსახვაში სრულიად სხვა ადამიანს უყურებდა. ასე დაიკარგებოდა კვლავ ლარისა მორიგის გონებიდან.

ეს რუტინა უსასრულოდ გრძელდებოდა და არც დასრულდებოდა მანამ, სანამ არ შეივსებოდა, სანამ სამკაული ას მეოთხმოცე მარგალიტით არ შეივსებოდა.

ლარისას ეს ყველაფერი არ ანაღვლებდა. მან

იცოდა, რომ ეს მუნჯი, ჩახლეწილი ხმა, რომელსაც ყელსაბამი ყოველი მოძრაობის დროს გამოსცემდა, არავის ესმოდა. ყოველ მარგალიტს საკუთარი ტონალობა ჰქონდა და გამალებით ცდილობდა საკუთარი ამბის მოყოლას. ყოველთვის გაუჩერებლად ლაყობდა, მაგრამ ერთი მეორეს არ უთმობდა, წინ არ უშვებდა, ყველა ერთად მღეროდა. ეს ხმა არ ჰგავდა ხმებში გამლილ სიმღერას, ყოველი ბგერა ერთმანეთს ერეოდა, ისინი ერთ მთლიანს ვერ ქმნიდნენ, სივრცეში ქაოსურად იფანტებოდნენ და ბოლოს უგზოუკვლოდ იკარგებოდნენ.

არც ლარისამ იცოდა დანამდვილებით რა აზრ-ჩობდა, რას ვერ ეგუებოდა, თუმცა სიმძიმის მიუხედავად, წინ ამაყად, წელში გამართული მიიწევდა. ეს ყელსაბამი იყო ერთდროულად ბედის საჩუქარი და წყევლა მისთვის. ხანდახან დაღლილს ძალიანაც უნდოდა შემოეგლიჯა, მოეშორებინა, ყოველი მარგალიტის იატაკზე დაშვების ხმა საითთაოდ მოესმინა. მობეზრებული თვალს გააყოლებდა შეშინებულებს, მათ მგლოვიარე ნოტებს მოუსმენდა და მანამ არ დაკმაყოფილდებოდა, სანამ სიცარიელე თეთრს არ ჩაყლაპავდა, სანამ სამარადისო სიჩუმე არ დაისადგურებდა. გამბედაობას ვერ პოულობდა, როგორი ძლიერიც არ უნდა ყოფილიყო ეფემერულად მოსული ჟინი, ის სიმამაცეს ვერ ანიჭებდა. დარწმუნებული იყო ლარისა, რომ, როგორც კი მის კისერს მოხვეული მახრჩობელა გველი მოშორდებოდა, ყველაფერი შეიცვლებოდა, დამძიმებული სივრცე ძველებურად დარბილდებოდა, დრო კვლავინდებურად კამკამა მდინარეს დამეგავსებოდა, დაკარგულ სიმსუბუქეს მოიპოვებდა და ნიავს უსასრულობისაკენ გაჰყვებოდა. მაგრამ უნდოდა ლარისას ეს ყველაფერი?

დანადვილებით არ იცოდა და ეშინოდა, ლარისას სინუმედ ქცეული ხმების ძალიან ეშინოდა.

ან როგორ იცხოვრებდა ლარისა ამ ხმების გარეშე? ის ხომ უკვე დიდი ხანია გახდა მისი განუყრელი მეგზური. არა, ასე ვერ მოიქცევა. მას პასუხისმგებლობა აქვს და ვერ გაიქცევა. წვიმიან ამინდში მიმავალი კვლავ ცდილობს გაერკვეს, რამდენიმე სიტყვა მაინც გაარჩიოს. ამოდ, იღლება, გადახურულ სკვერში შესასვენებლად მარტო ჯდება.

სადამოს წვიმის ყურება ყველაზე მეტად ამშვიდებს გრძელი დღის შემდეგ გადაღლილ ლარისას. წვიმის წვეთების დაცემის ხმა ყოველთვის ფარავს. ყველაფერი მისი ასარჩევი რომ ყოფილიყო, დიდ ქალაქში ცხოვრებას არასდროს დათანხმდებოდა. მას არ მოსწონდა ხალხმრავლობა, უამინდობის გამო გადაჭედილი ქუჩები და გამონაბოლქვის სუნითა და ღრიალით გაჟღენთილი ჰაერი. ხო, ასეთ ამინდს განსაკუთრებით არ უხდება ხმაური. სულ სხვანაირი სანახავი იქნებოდა ცარიელი, ნისლად ჩამოწოლილი ნესტის სუნით სავსე თბილი ქუჩა, სულ სხვა სურნელი დატრიალებოდა.

ეს სკვერი დიდი ხნის წინ ამოიჩნია. დილით აქ გაჩერება შეუძლებელი იყო. წრედ დალაგებული სკამებისაკენ მიმავალი კიბე დღე სხვადასხვა ვაჭრით ივსებოდა. ყველას საკუთარი საქონელი ჰქონდა და ყოველი მათგანი ერთმანეთს ავისმსურველ მხერას ესროდა, ყოველ გამგელს კი მოწიწებით, თვალებით სთხოვდა სწორედ ის ამოერჩია და მისი დახატული ტილო თუ ხელნაკეთი სამკაული შეეძინა. სკვერი გადახურული იყო, ამიტომ ვაჭრებს წვიმა არ აშინებდათ.

თუმცა მათაც ჰქონდათ ერთი საერთო – მათ ეშინოდათ, უფულოდ სახლში დაბრუნების ყველას ძალიან ეშინოდა.

ლარისას უყვარდა მოძველებული ნივთების დათვალიერება და სწორედ ცნობისმოყვარეობამ აიძულა, პირველად ჩვიდმეტი წლის გოგონა აქ მოსულიყო. დანახულმა მოლოდინს გადააჭარბა. ყოველ ნივთს აკვირდებოდა, ნახატებთან რამდენიმე წუთი ჩერდებოდა და თვითონაც არ იცოდა, ამღვრეულ ფერებში რას ეძებდა. მას ესმოდა ყოველი გასაყიდად გამზადებული ნივთის ხმა და ეჭვიც არ ეპარებოდა, რომ ყველას ჰქონდა საკუთარი ამბავი, რომლის მოყოლასაც ლამობდა.

ყველა შეეჩვია დამკვირვებელი, ახალგაზრდა ქერა გოგონას ყურებას. ბევრს აღიზიანებდა მოუსვენრის ცქერა, მაგრამ თქმას ვერავინ უბედავდა. თუმცა ერთ დღეს მომხდარის შემდეგ ლარისა აქ დღე აღარასდროს გამოჩენილა. იმ დღეს მას ჯერ კიდევ გრძელი თმა და ას სამოცდათხუთმეტი მარგალიტი ამშვენებდა:

ზაფხულის ერთ ცხელ დღეს ლარისას უხეში, თვალეზაწითლებული კაცი გამოელაპარაკა. მისთვის არ დარჩენილა შეუმჩნეველი, რომ არავინ ყურ-

ადლებას არ აქცევდა ტილოებს, მაგრამ გოგონას გრძელ კისერს გულგრილი ვერავინ უყურებდა, კაცი ჯერ ევედრებოდა, ევაჭრებოდა, სამკაული ყიდვას სთავაზობდა, ბოლოს დაჟინებით, ღრიალით მოსთხოვა, სამკაული მოეხსნა, ლარისამ არ გაუგონა. გაავებულს ბრაზი მოერია. მაგრამ ვერაფერს გააწყოდა. ცივი უარის გარდა ვერაფერი მიიღო. ასე დარჩა მარგალიტებით დამშვენებული ყელსაბამი კვლავ ლარისას კისერზე, თუმცა ამ დღის შემდეგ გააცნობიერა, რომ ეს სილამაზე შეიძლებოდა საფრთხე ყოფილიყო მისთვის, ამიტომ სკვერში მხოლოდ დამე მოდიოდა.

ბავშვობიდან ყოველთვის წვრილი ქუჩები იზიდავდა და ხშირად ირჩევდა გზებს, სადაც შეიძლებოდა დაკარგულიყო. არა იმიტომ, რომ საკუთარი სახლი არ უყვარდა. თვითონაც ვერ აეხსნა, თუ რატომ უნდოდა, დაჟინებით ყველა ქუჩა შეესწავლა. ცნობისმოყვარეობას აბრალებდა, მაგრამ ერთი ნათელი იყო – ის ვერასდროს იკარგებოდა, რადგან ყოველთვის ხვდებოდა მას, ვისაც ეს გზაც უკვე აეთვისებინა. სინამდვილეში, ის უბრალოდ ცარიელ ყველასათვის უცნობ ადგილს ეძებდა. ადგილს, რომელიც მხოლოდ მისი იქნებოდა და არავის უწილადებდა.

ასეთი ადგილები მხოლოდ სიზმარში ენახა. ხო, ყველა სიზმარი მხოლოდ მას ეკუთვნოდა. ყოველი დამე საძინებელში გრძელი განათებული დერეფნის გამოჩენით იწყებოდა. პირველად მისი დანახვისას შეეშინდა, საბანში გაეხვია, ქუთუთოები ერთმანეთს მაგრად მოუჭირა და დაიძინა. შემდეგ გამბედაობა მოიკრიბა, გაჰყვა და მიყვებოდა უსასრულოდ, მთელი დამის განმავლობაში ხან ერთ მოსახვევს ირჩევდა, ხან მეორეს. ლაბირინთში გახვეული ციციანთელას წააგავდა და დაძრწოდა მანამ, სანამ მზის სხივები მის სინათლეს არ გადაფარავდა.

და მაინც, ნესტიან ქუჩაში, სახლისაკენ მიმავალმა ლარისამ იცოდა პასუხი კითხვაზე, თუ რატომ ვერ შეეგუებოდა ამ სიძიმის გარეშე ცხოვრებას. ეს პასუხი მაშინ იპოვა, როდესაც პირველად მიხვდა, რომ სიხარულით ფრთებშესხმული მუდამ მიწაზე ეცემოდა. დიდხანს აღმაფრენი გრძნობით ტკობის საშუალებას არავინ აძლევდა.

ეცემოდა, მიწას უყურებდა, ტიროდა, ოხრავდა, დახმარებას ითხოვდა. არავინ მოდიოდა და კვდებოდა, ლარისა სასოწარკვეთისაგან მიწაზე დავარდნილი კვდებოდა.

მისი ნაზი სხეული არ იყო შექმნილი აქაურობისათვის და სწორედ ეს მძიმე სამკაული აბრუნებდა დედამიწაზე. მასში იმალებოდა ძალა, რომელიც ლარისას წელში გამართვის საშუალებას აძლევდა, რომლის წყალობითაც მის ზურგს ყოველი გამკვლევი თვალს აყოლებდა.

ლარისამ დიდი ხნის წინ გააკეთა არჩევანი. ტკივილისაგან ხორცშესხმული, ცრემლებისაგან ფორმირებულ ბალადაში ცხოვრებას, მუდმივად გონების გამაპობელ ხმაურში არსებობა არჩია. სამაგი-

ეროდ? ის მუდამ მზად იქნება მორიგი დარტყმისათვის. ჰყავს ოჯახი, მეგობრები, მაგრამ ვერავის იმ ტკვილს ვერ პატიობს, რომელიც ოდესღაც მათ გამო განეცადა. ბევრის ატანა მოუწია ლარისას – დამცირების, იმედგაცრუების – ყველაფრის, რისი ატანაც უწევთ ადამიანებს, თუმცა ლარისა არ იყო ჩვეულებრივი ადამიანი. მან ეს იცოდა და მშობლიურ სადარბაზოში ნელი ნაბიჯით აღიოდა.

ლარისა კისრის გარშემო შემოხვეული სიმძიმით ცხოვრობდა. იცოდა ლარისამ, რომ მოვიდოდა დრო, როდესაც სამართალი იხეიძებდა და სწორედ იმ წუთს ორად გაიხლიჩებოდა. ერთი ნაწილი – ფილანთროპი ცრემლებად დაიღვრებოდა, მეორე კი – სამართლიანი, თავდადებული მუკს მაგრად შეკრავდა და ნანატრი გამარჯვების ჟამით დატკბებოდა. ხო, ეს მაშინ მოხდებოდა, როდესაც ლარისაც გაიქცეოდა, ას მეთნმცე მარგალიტად გადაიქცეოდა და მორიგ ადამიანს კისრის გარშემო სიმძიმედ მოეხვეოდა.

175

ვის ესმის შენი ყველაზე კარგად ლარისა? – ეს ხმა პირველად შემოესმა მაშინ, როდესაც სახლში დაბრუნებულს აღარ ეყო ძალა საწოლამდე მისულიყო და მუხლებზე დაეცა. იატაკზე ნამსხვევებად დაიშალა. სწორედ, დამსხვრეულ სარკეს წააგავდა მისი სხეული.

ბუნებას ესმოდა. სიბნელეში ტალღებად დაშლილი, წვრილი ოხვრა მხოლოდ ბუნებას ესმოდა. პასუხს სეტყვის სახით უბრუნებდა. იწვა ლარისაც იატაკზე და უკუნითის დამარღვეველ ჭექას თვალს ადევნებდა. ის თავისუფალი არ იყო და ვერც ვერასდროს იქნებოდა. რა მოხდა? ლარისამაც გააცნობიერა, რომ მისი სული მხოლოდ მას არ ეკუთვნოდა, როგორც ბებიის სული, რომლის სამახსოვროდაც მხოლოდ თეთრი მარგალიტებით შემკული სამაჯური დარჩა. სიკვდილიც მართლაც არის საზარელი. ბევრისთვის ის ცეცხლს ჰგავს, გონებაში გაჩაღებული, დაუნდობელს. ლარისასთვის კი ეს ცეცხლი მთელს სხეულს მოდებული გენიაა. იწვის იატაკზე წამოწოლილი ლარისა და ვერაფერს გრძნობს. სწორედ ყველა გრძნობას წვავს ეს ცეცხლი და არაფერს ტოვებს გარდა ცარიელი სხეულისა, უსულო ფიტულისა.

ჭექა გრძელდება, ლარისა ჯერ კისრის გარშემო შემოხვეული სიმძიმით არ ცხოვრობს. გაშლილ, ყვავილებით სავსე მდელოში გაბნეულ მთვარის სხივს ჰგავს. იატაკზე წევს და მკრთალ სინათლეს თვალს ადევნებს. სახლში არავინ არის – არც მამა, არც დედა, ყველა წასულია. ლარისაც ბებიის სახლში იყო, უკანასკნელად ნახა. არ უყვარს მიცვალებულების ყურება. როგორ შეიძლება ყველაფრის ასე გაწელვა? – ფიქრობდა მთელი დღე, ჭირისუფლის მაყურებელი ლარისა. რატომ არის ამდენი ხალხი? რატომ გადაიქცა ეს დღე, რომელიც ნაწილებად

მშლის, დღესასწაულად? დაუსრულებელ ღრეობად? – ეს კითხვები იმდენად საშინელი მოსასმენი იყო, რომ ერთადერთი შეილიშვილი ცრემლებს ვერ იკავებდა. ყველას თავს არიდებდა და ტიროდა. ლარისა ყველასაგან მალულად, თავჩაღუნული ტიროდა.

გრძელი, ტალახში ამოსვრილი შავი კაბა არ ანაღვლებდა. სახლისაგან მოშორებით, ბოსტანში ხის ძირში ჩამოჯდა. სწორედ იმ ხის ძირში, სადაც ბებია გაუჩერებდად საკუთარი ახალგაზრდობის შესახებ უყვებოდა. წვიმა. მთელი ეზო ატალახებულყო. ლარისა ფოთლებს გრძელ თითებში ათამაშებდა და ფიქრობდა. უნდა გადაწყვიტო, ვინ გინდა იყო ლარისა! მართლაც იხლიჩებოდა თვალბნაწითლებული ტალახსა და სასიამოვნო ნესტის სურნელს შორის. ბაგეებს ერთმანეთს მაგრად უჭერდა. ყოველი სიტყვა დაეკარგა. ეშინოდა ლარისას და აკანკალებულ ხელებში ფოთლებს ათამაშებდა – თუ ხმამაღლა აღიარებდა, რომ ბებიის სიკვდილმა მასშიც რაღაც მოკლა, ტალახში, ხის ფესვებთან ერთად ჩაიძირებოდა, მაგრამ ესეც არ იყო ბოლომდე სიმართლე – ბებია საკმაოდ მოხუცი იყო. დაღლილს ხშირად წამოცდენია, რომ აღარ შეეძლო ცხოვრება. იქნებ ასე იყო უკეთესი? – ვერც ამას ამბობდა ხმამაღლა, რადგან მისი ბაგეებიდან წამოსულ სიტყვებთან ერთად ცვრიან ბალახში დაიკარგებოდა.

არ ახსოვს, როგორ შევიდა ბებიის საძინებელში, როგორ გამოემშვიდობა შეკრებილ სტუმრებს, რა მოიმიზეზა სახლში წასასვლელად, როგორ დაბრუნდა შინ – საერთოდ არაფერი ახსოვს მძიმე წვეთების და ჭექის გარდა.

მხოლოდ მაშინ მოეგო გონს, როდესაც ხელი ასწია და იატაკზე დაცვენილი მარგალიტების ხმა გაიგონა. კვანძი უეცრად გაიხსნა. აკვირდებოდა, უყურადღებოდ როგორ იბნეოდა იატაკზე და თითქოს ყოველი დაცემის ხმა მოხუცის ჩავლილი დღის შესახებ უყვებოდა. მას შეეძლო სამუდამოდ დაევიწყებინა ყოველი ნაწილი და სწორედ ასე გადაწყვიტა, როდესაც ოთახიდან გავიდა.

ცრუწმენების ნაკლებად სწამდა, მაგრამ რატომღაც ბებიის ნაჩუქარი სამაჯურის გაწვევტა სწორედ ბედის ნიშნად ჩათვალა. ხო, სწორედ მოხუცის ძველ სკივრში აღმოაჩინა რამდენიმე წლის წინ ლარისამ მტკვრით დაფარული სამაჯური. იმ დღის შემდეგ ხელიდან აღარ მოუხსნია და ახლა, როდესაც სამუდამოდ მოიშორა საოცარი სიმსუბუქე იგრძნო. არ მოეწონა, ლარისას ცარიელი ხელის ყურება არ მოეწონა.

ოთახში რამდენიმე წუთში შავი ძაფით დაბრუნდა. დანამდვილებით არ ვიცი, რამდენი ხანი მოანდობა ყველა მარგალიტის შეგროვებას, მაგრამ მანამ არ შეუდგა სამკაულის აწყობას, სანამ არ დარწმუნდა, რომ არც ერთი არ გამორჩა. ხო, ცნობისმოყვარემ მათი რაოდენობა დიდი ხნის წინ გადაითვალა – სამაჯური ას სამოცდათოთხმეტ მარგალიტს ითვილდა.

განერვიულებულს, გრძელი დღის შემდეგ აკანკალებული ხელების დამორჩლება უჭირდა, მაგრამ მაინც მთელი ღამის განმავლობაში მარგალიტებს ძაფს უყრიდა, წმენდდა, ითვლიდა და ერთს ოცნებობდა არც ერთი დაეკარგა, ყველა შეეგროვებინა. ხო, ლარისამ მისი გაშვება არ გადაწყვიტა. ის ყოველთვის იქნებოდა მისი მეგზური და გაჰყვებოდა თან მანამ თვითონ ასე მოისურვებდა.

თუმცა ამ ღამეზე გადაწყვეტილების მიღმა კიდევ ერთი რამ იმალებოდა – ლარისამ პირველად მოინდომა საკუთარი სულის პატრონი მხოლოდ თვითონ ყოფილიყო და შეცდა, დაბნეული ლარისა ძალიან შეცდა.

– ას სამოცდა თხუთმეტი – ხმამალა წარმოთქვა და შეცბა. ნუთუ შეეშალა? არა, შეცდომა გამორიცხული იყო. ზუსტად ახსოვდა, რომ რამდენჯერმე ას სამოცდათოთხმეტი მარგალიტი დაეთვალა. ალბათ, უბრალოდ შეცდომა იყო. ყოველ შემთხვევაში, ასე უნდოდა, რომ ყოფილიყო.

ამ დღის შემდეგ ლარისა კისრის გარშემო შემოხვეული სიმძიმით ცხოვრობდა და ამბობდა, ლარისა ყოველ უთქმელ, დაკარგულ სიტყვას უშიშრად ამბობდა.

#### 176-177

ას სამოცდათექვსმეტე მარგალიტი ლარისამ სიზმარში ნახა, მაგრამ არ იცოდა. ისრები ღამის სამ საათს აჩვენებდნენ. შიში არ უგრძობია. უბრალოდ თვალეები გაახილა და გაიღვიძა. რამდენიმე წამი, შეიძლება წუთიც იწვა გაუნძრევლად. მშვიდად, გაწონასწორებულად სუნთქავდა. რატომღაც არ შორდებოდა შეგრძნება, რომ საკუთარ თავს ზევდანი უყურებდა. მართლა გამოფხიზლდა? დროში დაიკარგა. გაუნძრევლად იწვა და სიზმრიდან გადმოსული ბურუსის გაფანტვას თვალს ადევნებდა.

ადრე სულ სხვანაირად იქცეოდა – გრძელი სიზმრის შემდეგ საბანში ეხვეოდა და ყველაფერზე ფიქრობდა ნანახის გარდა.

...დღეს, ქუჩებში დაკარგვის შემდეგ, სახლში დაბრუნებლმა გრძელი სამკაული მოიხსნა და მარგალიტები თავიდან გადათვალა.

– ას სამოცდათექვსმეტი – დამარცვლა, მშვიდად თქვა, ამჯერად ზედმეტი მარგალიტის აღმოჩენამ აღარ გააკვირვა, მაგრამ, როდესაც კვლავ გაიკეთა უცნაური შეგრძნება დაეფულა. სამკაული ჩვეულზე მძიმე ეჩვენა. თითქოს არ უნდა მოშორებოდა. ამ ღამეს არ უნდა მოეხსნა – ჩვეულად მსუბუქი, ჰაეროვანი ქსოვილის მსგავსი ქვეულიყო ჯიუტ სახრჩობელად. რაც უფრო ცდილობდა მოეხსნა, მით უფრო ძლიერ ეხვეოდა. შეეშვა. ახლა ამ ყველაფერზე არ ფიქრობდა. მხოლოდ დღე ნანახი ანადვლებდა.

გამოღვიძების შემდეგ მარგალიტების დათვლა აღარ სჭირდებოდა, ამჯერად იცოდა ლარისამ, რომ კისერს ას სამოცდათექვსმეტი მარგალიტი უმშვენებდა.

ხო, ჯანლის გაფანტვის შემდეგ ლარისა მიხვდა, რომ ას სამოცდათექვსმეტე მარგალიტი სიზმარში ნახა, სახლში დაბრუნების შემდეგ აღმოჩენილი კი ნომრად ას სამოცდათექვსმეტე იყო და რეალობამ აჩუქა. ამჯერად ის კვლავ დაიკარგა რეალობასა და სიზმარს შორის და გაება, ლარისა მარგალიტებით მოჭვდილი ობობის ქსელში გაება.

რეალობა ასეთი იყო – შუადღე გრილი, დეკემბრის შუა რიცხვები.

ვაჭრები ჩვეულზე ადელვებულნი ჩანდნენ. ნაცნობი სახის მოახლოვება არც კი შეემჩნიათ. ყველა ყურადღებას მხოლოდ ვიღაც მაღალ, უცნობი მამაკაცს აქცევდა. ცოლისათვის საჩუქრად ნახატის შეძენა განეძრახა. უეჭველი მყიდველის გამოჩენამ კი ყველა ააფორიაქა.

მაღალ, უცნობს, გარშემო ვაჭრები ეხვეოდნენ. ზოგი იღიმოდა, ზოგი თავს აბრალებდა. ყველა ყურადღები მიქცევას ცდილობდა და ერთმანეთს შურით უყურებდა.

როგორი იყო ეს ყველაფერი? – ამაზრზენი. ქერა, წითელ კაშნიან ლარისას ებრალოებოდა ყოველი ვაჭარი, მაგრამ ვერაფერს გააწყობდა, ამიტომ მოშორდა და ნახატების დათვალიერებას შეუდგა.

– როგორ მოგწონს ეს ყველაფერი? – ჩაფიქრებული უცნობის ბოზმა, მჭეჭარე ხმამ გამოაფხიზლა.

– რას გულისხმობ? – რა თქმა უნდა, იცოდა, რაზეც ლაპარაკობდა.

– დაივიწყე.

– კეთილი. – თავაზიანად სცადა საუბრის დასრულება.

– აქ, ხშირად დადიხარ.

– ნახატების დათვალიერება მიყვარს.

– კარგია, შენნაირი აქ ცოტა დადის.

– მე კი სულ მეგონა, რომ აქ არასასურველი სტუმარი ვიყავი.

– რატომ?

– თითქმის ყოველ დღე მოვდივარ. ალბათ, ბევრი ფიქრობს, რომ სადაცაა რაიმეს შევიძენ. მე კი კვლავ მივდივარ და მოვდივარ. მორიგ იმედგაცურებასთან ერთად – უცნობი ვერ ხვდებოდა ამ სიტყვების თქმისას ლარისას თავისი თავი ეზიზღებოდა თუ უყვარდა.

– რა გქვია?

– ლარისა. შენ?

– ალექსანდრე. ლარისა, შეიძლება ერთი ამბავი გაამბო?

– რა თქმა უნდა.

– ხატვა ყოველთვის მიყვარდა და სულ ვფიქრობდი, რომ შემეძლო, დაუსრულებლად მეხატა. ბავშვი ვიყავი. მშვიდი ცხოვრება მიზიდავდა და მუდამ დაფრინავდი, ნახატიდან, ნახატში, ფერიდან – ფერში – აშკარა იყო, რომ დიდხანს ეძებდა ადამიანს, რომელსაც ამ სიტყვებს გაანდობდა. ყოველი ბგერა გულწრფელი იყო. სასიამოვნოდ ლაპარაკობდა. – ერთ დღეს ჩემი მშობლების ლაპარაკს შევესწარი.

რამდენი წლის ვიყავი? არ მახსოვს. ჩვიდმეტის, თვრამეტის. რა მნიშვნელობა აქვს მაშინ გავიგე სიტყვები, რომელმაც გული ძალიან მატკინა – მაგის მხატვრობა არავის სჭირდებაო... ვერ აგიღწერ რა ვიგრძენი, როდესაც ეს გავიგონე. იცი. რა იყო ყველაზე მტკივნეული? გაცნობიერება იმისა, რომ ჩემს ოცნებას არავინ იზიარებდა.

– მიწაზე მძიმედ დაეცი. – თავისდაუნებურად წამოცდა. მოსაუბრე ლარისას ბაგეებს ვერ ხედავდა. სახის გარშემო შემოხვეული, წითელი, შალის კაშნე მალავდა. მხოლოდ გრძელ ქერა თმასა და თვალებს უყურებდა.

– ასეც შეიძლება. მოკლედ ამ ამბის შემდეგ აქ ვარ. არ ვცდილობ. ვინმეს კეთილგანწყობა ან სიბრალული მოვიპოვო. – არ ტყუოდა, ყოველი სიტყვა წყალზე კამკამა იყო – უბრალოდ მინდა – სიტყვა გაწყვიტა. შესაფერისი წინადადება ვერ მონახა.

– გინდა, დაამტკიცო, რომ მხატვარი ხარ.

– მართალი ხარ.

– იცი, ჩემი აზრით, შენი მშობლები მართლები იყვნენ. შენი მხატვრობა არავის არ სჭირდება. – უცნობს, თვალებში ელვა აენტო, თითქოს ისევ ის ახალგაზრდა ბიჭი იყო და მიწაზე მეორედ დაეცა, ლარისამ კაშნე სახისაგან მოიშორა. ლაპარაკი მშვიდად განაგრძო – ხატვა შენ გჭირდება! ეს შენი ცხოვრებაა. ამ ყველაფერს იმიტომ აკეთებ, რომ შენი სამყარო შექმნა. არ აქვს მნიშვნელობა, რას იტყვიან სხვები. ვიცი, მესმის რთულია გაცნობიერო, რომ არავინ იზიარებს შენს ოცნებას. მაგრამ შეხედე შენს ნახატებს – თავის ფრთხილი მოძრაობით საკუთარი ტილოებისაკენ მიანიშნა – ისინი მართლაც ძალიან კარგები არიან, თითქოს შენი ცხოვრების შესახებ ყვებიან.

უცნობი თითქოს თავიდან დაეცა, მაგრამ დაცემის შემდეგ ადგა, ლარისას გაწოდებული ხელის წყალობით კვლავ ფეხზე დადგა.

– ჩემი წასვლის დროა. იმედია კიდევ შეხვდებით – ლარისამ იგრძნო, რომ უცნობი მადლიერების გამოხატვას ცდიდა და უხერხულობისათვის თავის არიდება ამჯობინა.

– დროებით შეხვედრამდე. დიდი...

– არ არის საჭირო – სიტყვა გააწყვიტინა.

ლარისა სახლის გზას კმაყოფილი დაადგა.

– შეჩერდი! – შეცბა – სამკაული მომიყდი. – მოხუცი ზანტი ვაჭარი ლარისას დაეწია.

– არ ვყიდი.

– გემუდარები. რაც გინდა წაიღე. ორი კვირაა არაფერი გამიყიდა.

– ვწუხვარ, მაგრამ არ შემიძლია.

– წყევლო! ახლავე მომიცი. – მოხუცი სამკაულის წართმევას აპირებდა, როდესაც ალექსანდრე გამოჩნდა და ხელის ძლიერი მოძრაობით მოიშორდა.

– დიდი...

– არ არის საჭირო. არ გაბრაზდე. არავის

უთხრა ამ ამბის შესახებ. – ალექსანდრემ სიტყვა გააწყვიტინა.

– მესმის. არავის ვეტყვი – სქელი კაშნეთი სახე კვლავ დამალა.

ორივე თავის გზას გაუყვია.

სახლისაკენ მიმავალმა ლარისამ ორი რამ იცოდა – აქ დღე აღარასდროს მოვიდოდა, სახლში მისულს კი ყელზე კიდევ ერთი მარგალიტი დახვდებოდა.

ამ ამბავმა ლარისას ას სამოცდამეჩვიდმეტე მარგალიტი აჩუქა, რომელიც სავსე იყო ყოველი ალქსანდრეს ბაგიდან ამომავალი ბგერით, რომელიც ლარისას ესმოდა, მაგრამ, რომელიც იმარხებოდა, ილღოს სხეულში ძალიან ღრმად იმარხებოდა.

სიზმარი ასეთი იყო:

დღე თბილი, ივლისის მიწურულს წააგავდა.

ამჯერად გრძელ დერეფანს დაუსრულებელ ლაბირინთამდე არ მიუყვანია. სწორედ იმ ნახატებით სავსე ქუჩაში აღმოჩნდა, რომელსაც ყოველთვის ათვალთვლებდა. ვაჭრები ჩვეული თავაზიანობით მიესალმნენ, თუმცა ლარისა როგორც დღე, ასევე ღამე ხედავდა, თუ რა იმალებოდა ამ ღიმილის უკან – სასოწარკვეთილი ვედრება. ბევრი ნახატი მართლაც დამამახსოვრებელი იყო, მაგრამ მათ, ვინმე იშვიათად თუ ყიდულობდა. რატომ? მიზეზი მარტივი იყო – არავინ თვლიდა, რომ აქ რაიმე ღირებულის ნახვა იყო შესაძლებელი. რამდენიმე კეთილსინდისიერი თუ მიაქცევდა ყურადღებას ოფლიან, მზისაგან სახე აწითლებულ ვაჭრებს. ათვალთვლებდნენ მათ და თავს ვალდებულად თვლიდნენ რაიმე შეეძინათ.

ლარისა სიზმარში სწორედ იმ ვაჭარს გამოელაპარაკა, რომელმაც დღე შეაშინა. დანამდვილებით ვეღარ იხსენებს, რა უთხრა ან რა ჰკითხა. ერთი ახსოვდა, რომ მისი სახელი იყო იყო და გაყოლა შესთავაზა. მანაც დაუფიქრებლად, უშიშრად მის ნახატში შეაბიჯა.

ნახატი უცნაური იყო – ფერები მუქი, შტრიხები გამოკვეთილი, დეტალები დახვეწილი, მაგრამ მას რაღაც აკლდა. აკლდა ის, რაც ალექსანდრეს ჰქონდა და ილღოს ვერასდროს ექნებოდა. სიტყვას ვერ პოულობდა ამ თვისების აღსაწერად, მაგრამ ნახატში შეხვლის შემდეგ უკან დასაბრუნებელი გზა აღარ ჩანდა. ლარისამ კვლავ ახალი ადგილი იპოვა, რომელიც მისი არ იყო, არც ილღოსი იყო და იმედია, ოდესღაც, რომელიმე კეთილსინდისიერი ადამიანის იქნებოდა.

ამ სიზმარმა ლარისას ას სამოცდამეთქვსმეტე მარგალიტი აჩუქა, რომელიც სავსე იყო ყოველი მუხვი სიტყვით, ყოველი ხმაურით, რომელიც ილღოს უნდოდა მისი ყოფილიყო, მაგრამ ვერასდროს იქნებოდა.

სხეულის დამორჩილება შეძლო. ბურუსი გაიფანტა. სამკაულის მოხსნა და გადათვლა აზრადაც აღარ მოსვლია. ამჯერად ყოველი მოძრაობის დროს ყოველი მარგალიტი ხმაურობდა, ყაყანებდა და ვერ ლაგებოდა.

წყალი შეისხა. გამოფხიზლდა, მაკრატელი აიღო და დაგრძელებული, ქერა თმა დაიმოკლა. ყოველ თმის ღერთან ერთად თითქოს უფრო თავისუფლად სუნთქავდა. ასე გააგრძელა მანამ, სანამ არ დარწმუნდა, რომ შემსუბუქდა.

დაიძინა.

ლარისა კისრის გარშემო შემოხვეული სიმძიმით ცხოვრობდა და უსმენდა, დაუსრულებელ, ქაოსურ ხმებს უსმენდა.

178-179

რაც უფრო მძიმდება ყელსაბამი, მით უფრო ძლიერდება ხმები. ლარისას ავიწყდება, ვინ არის. ის მთლიანია და აღარ ახსოვს არაფერი საკუთარ თავის შესახებ. იმდენად ძლიერია ხმა, რომ გარშემო სხვა ყველაფერს აყრუებს. „რისი თქმა უნდათ“, „რას მეუბნებიან“, „მე რატომ ამირჩიეს?“ – ეს თავში შემოჭრილი კითხვები ბასრ ნამსხვევებს ჰგავანან. სხეულს ესობიან, მაგრამ ბოლოს არ უღებენ. უბრალოდ, რაღაც ნაწილს ართმევენ. ისინი არ წააგავდნენ ლეშის გარშემო შემოხვეულ მწერებს, რომლებიც მხოლოდ სხეულის ნარჩენებით იკვებებოდნენ, არამედ მომაკვდავი სხეულის გარშემო მოხვეულ ყვავებს, რომლებიც მტაცებელი ცხოველებით, ელოდნენ, სხეულის დაცარიელებას მოუთმენლად ელოდნენ.

მოსალამოვდა. ქუჩები ცარიელია. დეკემბრის თვე იწურება.

უყვარდა ლარისას, როდესაც საკუთარ სუნთქვას ხედავდა. ლამაზად თოვდა. ოდესღაც თოვლიც უყვარდა მაშინ, როდესაც თვითონ იყო და არა მარგალიტებით მოჭვდილ ქსელში გაბმული მსხვერპლი. გაუგრძელდა ქუჩაში სიარული. ძველებურად განათებულ ლამპიონებს ყურადღებას აღარ აქცევდა, გაფანტულ ჩრდილებს ცეკვა-ცეკვით არ მიჰყვებოდა. ცხვირს სქელ, შალის წითელ კაშნში სამკაულს კი – ხაკისფერი ლაბადაში მალავდა.

არც გახსენებია, თუ რა დღე იყო დღეს, სად იყვნენ წასულები მისი მშობლები. ნუთუ მართლა წყველა ეს სამკაული? დღეს, ლარისას ბებიას დაასაფლავენ. ჯერ მხოლოდ რამდენიმე დღე გასულიყო, მაგრამ ესეც დაივიწყა. უგზო-უკვლოდ დაკარგული ხმებით გაბრუნებულმა ლარისამ ყველაფერი დაივიწყა.

მის გონებაში ყველაფერი ასე დაიხატა:

მგლოვიარეები ჯერ დაშლას არ აპირებდნენ. დაესწრებოდნენ ადამიანის მიწასთან შერწყმას. თოვლი მიწასთან ერთად დაეშვებოდა ახალ მომზადებულ საფლავში, მიცვალებულს გამოემშვიდობებოდა, შეასხენებდა, რომ ის მისი შვილი იყო და მუდამ ემასოვრებოდა. საფლავის ადგილი ბებიას დიდი ხნის წინ შეერჩია, როგორც საფლავის ქვაზე გამოსახული სურათი, როგორც სიკვდილი, რომელზეც წლების განმავლობაში ოცნებობდა. ბებიას საყვარელი მეუღლის გვერდით ასაფლავებენ. შეხვდებიან კი

ისინი ერთმანეთს? არავინ იცის.

საფლავის ქვას ახალაყვავებული თეთრი ყვავილებით რთავს ასაკთან შედარებით ახალგაზრდა დედა. ტირის დაკარგულ მშობელს და ყოველი ნიჩბის დარტყმის დროს ფიქრობს ყოველ დღეზე, რომელიც დედასთან ერთად გაატარა და ყოველ ღამეზე, როდესაც უნდოდა მის გვერდით ყოფილიყო. თუ დღეზე ფიქრობდა ცრემლი თოვლში სწრაფად ეშვებოდა, მაგრამ თუკი ღამეზე – მაშინ თვალებიდან წამოსული გამომშრალ ლოყაზე იკარგებოდა. – ასე გაუშრა ცრემლი შავებში ჩაცმულს.

რეალობა ლარისას დახატული სურათისაგან განსხვავებული იყო:

ლარისას დედა მესაფლავეს შორიდან უყურებდა, სახეზე ცრემლებმეშრალი დაკარგულ მშობელზე კვლავ ფიქრობდა. არ თოვდა. სინუქმეში იჯდა ტანჯული და რამდენიმე წუთის წინ გაგონილი სიტყვები მოსვენებას არ აძლევდა. „სჯობს შვილმა ნახოს მშობლის სიკვდილი“. – ამ ყველაფერზე არასდროს უფიქრია და თვითონაც არ იცის, რატომ დაფიქრდა.

მოსიყვარულე დედას საკუთარი თავი შეხიზლდა, როდესაც გააცნობიერა, რომ ფიქრობდა, რომ ლარისას სიკვდილზე ფიქრობდა.

ხო, დედის შფოთვამაც იპოვა ლარისას კისერზე ადგილი. ას სამოცდა მეთვრამეტე მარგალიტის სახით, რომელიც სავსე იყო ყოველი მისი შიშით, შფოთვით, რომელიც არ იყო კეთილშობილი. დედასაც ეშინოდა, სულის კიდევ რამდენიმე ნაწილად გაყოფის ძლიერ ეშინოდა.

მიდიოდა ნაცრისფერ საღამოს სახლში ლარისა და ვერ აცნობიერებდა, რომ მას არავინ ელოდებოდა.

– ლარისა – პასუხი არ ისმის – ლარისა! – უცნობი ხმას უმატებს. ხმებში დაკარგულ ლარისას საკუთარი სახელი ესმის, მაგრამ ვერ ხვდება ნაცნობია თუ არა ეს ხმა მისთვის.

– გაბრიელ. – გაბრიელის თვალისაგან მომავალი სითბო ზამთრის სიცივეში გამოკვეთილად ჩანდა. ყოველთვის სავსენი იყვნენ მისი მწვანე თვალები. გაოცებულ ლარისას ნელი ნაბიჯით უახლოვდებოდა და იღიმოდა.

გაბრიელს ეამა, ნაცრისფერ საღამოს წითელ კაშნიან ლარისას პოვნა ძლიერ ეამა.

– რა სასიამოვნოა შენი აქ ნახვა. წლებია ერთმანეთს აღარ შეხვდებოდით.

– სკოლის შემდეგ.

– არ შეცვლილხარ. რამდენი წელი გავიდა.. ოთხი? ხუთი?

– ექვსი. – გაელიმა.

– ხომ გახსოვს, რიცხვებს ვერასდროს ვიმასოვრებდი. ისევე იქ ცხოვრობ?

– კი.

– მიგაცვილებ.

– სეირნობა ძველებურად გიყვარს? – გაულიმა და თავით ანიშნა გაპყლოდა.

– რა თქმა უნდა, განსაკუთრებით შენთან სეირნობა...

წამიერად დაავიწყდა ყოველი ხმა, დაავიწყდა ლაბადაში დამალული მარგალიტი. ალბათ, რამდენიმე წლის შემდეგ ეს დღე, რომ გაეხსენებინა იტყოდა – დამავიწყდა ვინ ვიყავიო. არა, სინამდვილეში. სწორედ გაბრიელის დანახვისას გაახსენდა, ვინ იყო და თუნდაც რამდენიმე წუთით გახდა ის ალალი, სიცოცხლით სავსე გოგონა, რომელიც ლამპიონებით განათებულ, ჩაბნელებულ ქუჩებში წვიმასა და თოვლს ეალერსებოდა.

– ლარისა, როგორ ხარ?

– კარგად გაბრიელ. შენ?

– არა მიშავს.

– იცი, ხშირად ვფიქრობ სკოლაზე. მასხოვს, თუ როგორი შეკრული კლასი ვიყავით. ერთხელ მითხრეს ერთმანეთს სკოლის დამთავრების შემდეგ დაკარგავთო. არ დავიჯერე. პატარა, მიაბიტი გოგო ვიყავი და შევიძულე, შევიზიზღე ის ბაგე, რომელმაც ეს სიტყვები წარმოთქვა.

გაბრიელი რამდენიმე წამის განმავლობაში დუმდა.

– ბოდიში უნდა მოგიხადო.

– შენ დამნაშავე არ ხარ.

გაბრიელი ამ შეხვედრას დიდხანს ელოდა. დიდი ხნის განმავლობაში შენახული სიტყვების გასანთავისუფლებლად მოემზადა. ღრმად ამოისუნთქა:

– მასხოვს, ყოველთვის ყველა საკუთარ გულის ტკივილს გიყვებოდა. ყველაზე ერთგული მეგობარი იყავი, მაგრამ ყოველთვის მინდოდა შეკითხა. შენ რა გაწუხებდა?

– გაბრიელ...

– სულ ვფიქრობდი, რომ შენც გინდოდა, რომ ერთ დღესაც შენთან მოსულიყო ვინმე და ეკითხა, რამე ხომ არ გაწუხებდა, რამის თქმა ხომ არ გინდოდა, მაგრამ ყოველთვის თვლიდი, რომ ამის დრო არ იყო და ბოლოს რა მოხდა. ეს ყველაფერი შენც დაგავიწყდა. მე არასდროს დამივიწყებინა და არც არასდროს დაგივიწყებ. ჩემო მოუშორებელი ჭრილობა იქნები... – გაბრიელს საუბარი უჭირდა, კანი უხურდა, მისი ყოველი სიტყვა გულწრფელი იყო...

– საკმარისია.

– მინდოდა მოვსულიყავი, მენახე, მაგრამ არ ვიცოდი, რა მოხდებოდა. ყოველთვის ძლიერი ვერ იქნები.

– შეწყვიტე.

– ბევრჯერ მინახავს, როგორ იღვრებოდა ცრემლებად სხვა შენს პირისპირ, მაგრამ შენ? შენ არასდროს არავინ გეკითხებოდა რას მალავდი. მაპატიე. – გაბრიელი თვალს ვერ უსწორებდა – მაპატიე, რომ შენ გვერდით არ ვიყავი, რომ არ გამოვჩნდი, როდესაც...

არ შემეძლო. დამსხვრეულს ვერ გნახავდი.

..მუჭი შეკრა. პასუხს ელოდა და, როდესაც სიჩუმის შემდეგ ლარისას დაბნეული, უგრძობი სახე ნახა, შეეშინდა.

– არ მესმის, რაზე ლაპრაკობ.

გაბრიელი შეცბა. მან არ იცოდა, რომ ლარისა კისრის გარშემო შემოხვეული სიმძიმით ცხოვრობდა, არც ლარისამ იცოდა, რომ ახლა ლაბადის ქვეშ ას სამოცდაცხრამეტი მარგალიტი ამშვენებდა. სავსე სიბნელედ ქცეული სინათლითა და სიცარიელეში დაკარგული ხმებით, თუმცა მას ახლა კისრის გარშემო მოხვეული სიმძიმე ნაკლებად ადარდებდა. მუცლის ღრუში შეუჩერებელ, დაუნდობელ ტკივილს გრძობდა.

არ იცოდა გაბრიელმა, რა ეპასუხა...

– ლარისა. სამი წლის წინ შენი შვილი, ივანე, მშობიარობისას გარდაიცვალა.

180

\* \* \*

ლარისა კისრის გარშემო შემოხვეული სიმძიმით აღარ ცხოვრობდა ისევე, როგორც ივანე, რომელიც არასდროს დაბადებულა და, როგორც მოხუცი ბებო, რომელსაც არასდროს ეცხოვრა.

\* \* \*

დღე თბილი, ივლისის მიწურული:

– გამარჯობა. – მშვიდობიანი დღე. – უცნობ, წარმოსადგე მამაკაცს ალექსანდრე თავაზიანად მიესალმა.

– ამ ნახატს რამდენად აფასებთ? – საჩვენებელი თითით ახალდასრულებული, ჯერაც გაუმშრალი ტილოსაკენ მიუთითა.

...ალექსანდრემ არ იცოდა, რა ღირდა ეს ნახატი. ან შეელოდა თუ არა მას ოდესმე. გრძელ ტილოზე გამოსახული მუქი ქერათმიანი ქალის ტურჩები და ცხვირი წითელ კაშნეში იყო დამალული. კისერს მარგალიტებით შემკული სამკაული უმშვენებდა. დიდხანს ხატავდა ალექსანდრე ყოველ მარგალიტს და გაუკვირდა, როდესაც შეამჩნია, რომ ყოველი მათგანი ერთმანეთისაგან განსხვავებული იყო. ერთი კი განსაკუთრებით მოსწონდა, ის ნომრად ას მეოთხმოცე იყო და საოცრად ჰგავდა ლარისას მკრთალ თვალებს.

– მაპატიეთ. ეს ნახატი არ იყიდება.

– სამწუხაროა. ლამაზი ნამუშევარია. – უცნობმა სიგარეტს სიამოვნებით მოქაჩა – რა ჰქვია?

– ას ოთხმოცი. ას ოთხმოცი მარგალიტი.

დასასრული

პოეზია

მახინა მანიძე



ისევ დავიწეროთ ჯვარი!

(მეუღლეს)

როცა გამეყრება სული,  
როცა ვესტუმრები ზეცას,  
მინდა, სიყვარულის ნიშნად,  
ისევ თეთრი კაბა მეცვას!

მხოლოდ სიხარული თოვდეს,  
შვებით დაეფრინავდე ცაში,  
წლები არ მახსოვდეს ავად,  
ვერცხლად გაჩენილი თმაში.

შენ კი... არ იჩქარო მოსვლა,  
ჩემი ნუ გექნება ჯვარი,  
იქაც დაგიცდი!... და მერე  
ისევ დავიწეროთ ჯვარი!

\* \* \*

იები მოსულან, როგორ ვერ შევნიშნე?!  
ჩუმად მილიმოდნენ გუშინ,  
ისევ ტკივილები გამიახლეს,  
ხსოვნად შერჩენილი გულში.  
თავბრუდახვეული, სურნელს დავეწაფე,  
ასე რად ვამსგავსებ დედას?  
მგონია, მის სულშიც მარტია და  
ისევ გაზაფხულად ფეთქავს.  
წლები წარსულიდან მოძიბრუნეს,  
იებს, გულში ჩაკრულს, ვხედავ,  
სანამ ვარ – გაზაფხულად იყვავილებს,  
სანამ ვარ – სულ იცოცხლებს დ ე დ ა!

\* \* \*

მე ისე მინდა სიცოცხლე ახლა,  
თუ ღმერთმაც მაღლი გამოიმეტა,  
ისევ ერთგულად ვზილო უღელი  
და შვილებს შევრჩე ზვალის იმედად.  
არ დავიჩოქებ იმედჩაკლული,  
ვერ შემაშინებს წლების მატება,  
იმ სიძნელესაც გავუმკლავდები,  
ჩემს ძაღლონეს რომ აღემატება...

თავგადასავალი

მითხრა საწუთრომ, ტიალმა,  
იცხოვრე ცივსა ქვაზედა!  
მომკიდა ტვირთი საძნელო,  
მემძიმა სუსტსა მხარზედა.  
ეგონა, შევშინდებოდი,  
რა არ მომაბა თავზედა?!  
სულ აღმა-დაღმა მატარა  
ნისლში ჩაკარგულ გზაზედა.  
თავს შევუძახე, არ შედრკე  
საწუთროს მუქარაზედა!  
სიკეთის ყველა ამბავი  
გადავიხდინე თავზედა.  
ჩემის მარჯვენით ვიპურე,  
თვალი არ მეღვა სხვაზედა,  
თხოვნა-მუდარით არავის  
არ მივდგომივარ კარზედა.  
წყვილი სანთელი დავანთე,  
ნიკორას წყვილსა რქაზედა,  
მოვხანი, თესლი ვაბნე,  
ძილს არ ვკარობდი თვალზედა!  
თუ მტერი გამოჩნდებოდა,  
სულ ხელი მეღო ხმაზედა,  
მიფრთხოდა პირსისხლიანი,  
მირბოდა უკუ გზაზედა!  
შვილები უხვად დავზარდე,  
ნაფერი თავის გვარზედა,  
ყველას თავყანი ვაჩვიე  
უფლისა წმინდა ჯვარზედა!  
ჩემსავით ნანაც ვამღერე  
თვით ანგელოზთა ხმაზედა,  
გავმრავლდით, ახლა ბევრნი ვართ  
მაღლიან ქვეყანაზედა!  
ეპეი, წუთისოფელო, მხედავ? –  
მიტომც ვარ ჯანზედა,  
გამიშვი, დიდხანს ვიარო  
წინაპრის ნაკვალავზედა!



## მამულის განთიადი

რა განთიადი გაქვს?! ეპეი, მამულო,  
დღეს, შენთვის ნამღერი, ტოროლას ჰანგი ვარ,  
შენ გულის ფეთქვა ხარ, სიცოცხლის იმედი,  
მე კი ამ იმედით ამაყი დავდივარ.

ვაზი ვარ და ჩემი ცრემლების ნაკადი,  
მთის ბროლის მძივებად გულმკერდზე გაპკურე,  
ყანა ვარ გაშლილი, თავნაყარ ჯეჯილის  
და ბელის სიუხვით გავსებ და გაპურებ.

წყარო ვარ ანკარა, ცელქი და რაკრაკა,  
ვჩქარი მწყურვალეს მოვიკლა წყურვილი,  
ხან მდელოს ია ვარ, ხან არწივს ვედრები,  
ზეცაში აფრენის მიჩნდება სურვილი.

დილის ცვარ-ნამი ვარ, ბალახის სილაღე,  
მზის ოქროს სხივი ვარ მდელოზე ნატყორცნი,  
ჯიხვი და არჩვი ვარ კლდის წვერზე შემდგარი,  
შენს მთათა მწვერვალებს იქიდან დავკოცნი!

მთვარე ვარ, ღამითაც ნათელით დავცურებ,  
მხრებზე სულ ციმციმა ვარსვლავად გეყრები,  
წვიმა ვარ, ზეციდან კურთხევად მოსული,  
და დამსკლარ გულმკერდზე მირონად გელვრები!

ზვარი ვარ, ქარვისფერ მტევნებად ასხმული  
და ღვინო, ნაკურთხი, ბარძიმით შესმული,  
შენს ბედზე მლოცველი ერთგული შვილი ვარ,  
ხარი ვარ, ნიკორა, გუთანში შებმული!

სიცოცხლე მაისობს, ბავშვივით შეგხარი,  
მე ამ სიხარულით ზეცაში მფრენი ვარ,  
სხვა რაღა ვინატრო, მითხარი, მამულო,  
შენ ჩემი გქვია და მე კიდევ შენი ვარ!

## მინდვრის ყვავილებო!

როგორ მომენატრეთ, მინდვრის ყვავილებო?!...  
ჩემში უთქვენობით მწუხრის დაისია,  
ახლა გაზაფხულმა ისევ მოგიყვანათ,  
მარტის სიკეკლუცე ეშხით აგივსიათ.  
თავბრუ დამახვიეთ მძაფრი სურნელებით,  
გარეთ საოცარი დრო და ამინდია,  
გულში შემოიჭრა სხივი სიყვარულის,  
გრძნობა ნაზამთრალი თქვენთვის ამინთია.  
სანამ ცოცხალი ვარ, ასე მეყვარებით,  
დღეს ხომ თქვენი ხილვით დარდი დამიკარგეთ,  
ოღონდ... ამ ქვეყნიდან როცა ზეცად წავალ,  
მოდით და საფლავი იქაც დამიქარგეთ....

## გულო ჩემო

გული ბევრჯერ გამებზარა,  
განა მართლა ქვითკირია?!  
მარტო დარდი კი არა და  
სიხარულიც მიტირია.  
ხან დიდ ტკივილს ველარ ვგრძნობდი,  
ხან პატარა წყენაც მკლავდა,  
მიკვირს, გული პაწაწინა,  
ამდენს როგორ გაუმკლავდა?  
გულო ჩემო, გოლიათო,  
მაგრამ, ზოგჯერ, ჩიტის გულო,  
მე სიცოცხლის იმედი მაქვს,  
ოღონდ... შენ არ მიორგულო!

## დილის დალოცვა

მზიანად გათენებული,  
გეწიოთ მადლი დილისა,  
სიმშვიდე გამოგყოლოდეთ  
ღამის ნეტარი ძილისა!

სითბო არ გამოგლეოდეთ  
ციდან ნაფენი სხივისა,  
გესმოდეთ ლალი ტიტინი  
აკვნად მწოლარე ჩვილისა!

მუდამ გემატოთ ღღეები  
სიხარულის და ღვინისა,  
ღმერთმა დალოცოს ოჯახი,  
გამზრდელი ბევრი შვილისა!

კვლავაც გქონოდეთ იმედად  
სავსე ბელელი ფქვილისა,  
გიკურთხოთ შთამომავალი  
მადლმა – ზედაშის ღვინისამ!

მტერიც თუ სადმე გამოჩნდეს,  
მაფხიზლებელი ძილისა,  
ისეთი თვალთ გიმზერდეთ,  
თქმა ველარ შეძლოს ძვირისა!

გაძლიერდით და გამრავლდით,  
ღღენი არ ნახოთ ჭირისა,  
ლოცვა არ შემოგკლებოდეთ  
უფლისა ენა – პირისა!

## მარად აკვანთან!

ცაზე მთვარე ამოგორდა, ღუმან თეთრი მთები,  
ჩემს ანგელოზს, საიმედოდ, გაუშლია ფრთები.  
ლაქრის სიო, ცელქი სიო, ტოტებს ჩუმად არხევს  
და სურნელი ღვინობისთვის, ისევ თავბრუს მახვევს...  
ცას გვირგვინად მოხდენია, ღრუბლის თეთრი ფთილა,  
მინდა ტრფობის ხელით მივწვდე და შევეხო ფრთხილად,  
მაგრამ ღამე ისე ღნება, როგორც ნაზი ფიფქი  
და არ მაძლევს მოსვენებას ზმანება და ფიქრი...  
კვლავ ჩამესმის გარდასული, მშვიდი წლების ექო:  
– რაც ეწამე, რაც ეწვალე, ნუთუ აღარ გეყო?  
ლამაზ წუთებს მართმევს წლები, მიაქვს ნება–ნება  
და სურნელი სიჭაბუკის, უგზოუკვლოდ ქრება..  
მახსენდება უდარდელი, უმფოთველი ხანა,  
აკვნის გვერდით მუხლჩაზრილი, დედის ტკბილი ხანა,  
ისიც მახსოვს, ოცნებებში, როგორ ვმლიდი აფრებს  
და რა კრძალვით მიყვებოდნენ უსასრულო ზღაპრებს...  
...წლების შემდეგ იმ აკვანთან, ისმის ჩემი ხანა,  
ახლა უკვე ჩემთვის დადგა, შფოთიანი ხანა,  
შვილი ჩემი, ოცნებებში, ლაღად შლიდა აფრებს  
და ახლა მე ვუყვებოდი ლამაზ–ლამაზ ზღაპრებს.  
შევეჭიდე აღმართ–დაღმართს, დამიმძიმდა ტვირთი,  
დავიღალე, ამოსუნთქვაც გამიჭირდა თითქმის,  
კალო ჩემი, პურით სავსე, ვლეწე, მარჯვედ ვლეწე  
და სიკეთის ყველა მტერი ბნელეთს გადავხვეწე...  
გული მაინც არ მისვენებს და უფრო მეტს ითხოვს,  
რაც მინდოდა, რაც მეწადა, ვერ მოვასწარ თითქოს,  
მაგრამ ის, რაც მე შევძელი, ერთ ქალად ხომ ღირდა?  
რადგან ჩემი კალთის სითბო, ოთხ მზედ ამობრწყინდა!!!  
ღმერთო ჩემო, სხვა რა გთხოვო, თუ არ ჭირთა თმენა,  
დამილოცე ხვალინდელი ზეცად აღმაფრენა,  
რომ ჩემს შემდეგ, შვილი ჩემი, კვლავ აკვანთან იჯდეს,  
მამულისთვის რუსთაველს და თამარ მეფეს

ზრდიდეს!

კვლავ ემატოს საქართველოს ბევრი გმირთაგმირი,  
წარსულს გაჰყვეს ყველა დარდი, ყველა გასაჭირი,  
ამიყვავე ფუძე ჩემი, ჩემი სახლის ეზო,  
მომეც ძალა, რომ სიკეთე, მეც სიკეთით მეზღოს.  
...და სიცოცხლეს, ვალმოხდილი, როცა დავასრულებ,  
რაც შეგთხოვე, ყველა ნატვრას, თუკი ამისრულებ,  
მაშინ ალბათ, სიხარულით, მეცხრე ცაზე ავალ  
და იმქვეყნად გულსავსე და უდარდელი წავალ...  
ციდან მთვარე ჩამოგორდა... ისევ ღუმან მთები...  
ჩემს ანგელოზს საიმედოდ, გაუშლია ფრთები...

# ბიბლია ჭინჭახაული



\* \* \*

მწყემსი ვარ, ღამენათევი,  
დარდი და დაღლა გროვდება,  
ყინვა და ქარი მაწუხებს,  
როგორც უდღოდ ცხოვრება.  
შორს, მწვერვალებზე, ნისლი ჩანს,  
ჩემ ჭირად გამოქროლდება,  
მე მაინც სამშობლოში ვარ,  
ბევრი კი ტანჯვით შორდება.  
ამ მიწას დედის სითბო აქვს,  
სხვაგან არ განმეორდება;  
ამიტომ არ ვარ ბედგრული,  
არც ცრემლი ჩამომგორდება!

\* \* \*

ასაკთან ერთად დღითიდღე  
სიკვდილზე ფიქრიც მატულობს,  
ალბომში გეძებ წუხილით,  
ბავშვობავ, გადაკარგულო!  
მე ველარ გნახავ ბედნიერს,  
ჩემო სამშობლოვ, ტანჯულო!  
ამისთვის მსურდი, სიცოცხლეც,  
ძალ-ღონეც ჩამოხარჯულო!  
სჯულო, შენც გაქუცმაცებენ,  
წმინდა ქალწულის დარგულო...  
მკვდარნი ვერ დაცოცხლდებიან,  
ცოცხალთა გული არ გულობს!  
რა გეშველება, ქვეყანავ,  
გაჩენის დღიდან ჩაგრულო?!

\* \* \*

მედგრად სამშობლოვ!  
უტკბესო თავზე,  
ბევრს უნდა შენთვის მოუსავლეთი,  
ჩემი თაობა გეხვევა ტანზე,  
როგორც ჯავშანი ვეფხვის ნაფლეთი.

ისევ თავიდან იწყება დაღლა,  
რომ შენარჩუნდეს შენი თილისმა...  
გაეხსნა გულზე მტერს ძველი დამლა –  
რომ ვერ დაგიპყრო და მიგითვისა.

კი არ იწყება, ბრძოლა გრძელდება,  
დაუსაბამო და უსასრულო,  
სიკვდილი როგორ გაგვიძინელებს,  
ვიდრე გვახსოვხარ, ჩვენო წარსულო.

არ დაგვიკარგავს სუნი და გეში,  
ღირსების განცდა საქართველოთი,  
ძველი თაობა გეკვრება მკერდში,  
შენგან ნაწოვი ხსენის გემოთი.

მტკიცედ, სამშობლოვ!  
უტკბესო სულზე!  
სიყვარულია შენი თილისმა,  
ჩვენი ჭალარი გეხვევა წყლულზე,  
როგორც ნაჟური შენზე ფიქრისა.

ასაკს მომდგარი საღამოს გამო  
ვჩქარობთ და არ ჩანს კაცი პირველი,  
ვიდრე სცემს გული უკიდევანო,  
გვაღირსეთ ბრძოლა გასაკვირველი.

## სიყმაწვილე

ჯოხის ცხენზე შემომჯდარი რისხვით  
მივერეკები,  
ეს ჭინჭრები თათრებია, ეს ნარები – ლეკები,  
წიკების ხმალთა თავებს ვაცლი, ვებრძვი  
თავგამეტებით,  
სამშობლოს მტრებს არ ვახარებ ცხენით, ხმალთა  
კვეთებით...  
ჰაი დედას, სიყმაწვილეც, როგორ არ მემეტები!

\* \* \*

გახსოვს? წყაროსთან გაგიცან,  
მთებს უხდებოდი ზღაპრულად...  
მერე დრო სადღაც გაიქცა,  
გზებს ცრემლი მიმოაჰკურა.  
სიცილი... ბანქო... წაგება...  
მწვანე წიგნი და ლექსები,  
კვლავ მოვალ, აღარ დამხვდება,  
არც ის დრო, აღარც მწვემსები.  
გახსოვს დაისი, საფირონს  
იზარნიშებდა იაღონ?  
ვინ დაგვიბრუნებს კვლავ იმ დროს?..  
ეჰ, დღეებო ტიაღონ!  
ჩვენ შორის იდგა ერთი მთა,  
ცხენდაცხენ ხშირად ვლახავდი,  
მოგქროდი სულის ექიმთან,  
შენ თუ ვერ... შენს სახლს ვნახავდი.  
გახსოვს ქეიფი, თენება,  
ცალკე სმა სათათბიროდა;  
ღვინო რომ იგრძნეს ვენებმა,  
რიჟრაჟზე თქმული პირობა?  
ან გრძნობა – ბავშვი მესამე,  
ჩვენთან რომ დათამაშობდა?  
რა მწარედ გამოვესალმეთ,  
რა ნაღვლიანად დაგვშორდა!  
ჩვენს წმინდა მთებზე გაგიცან,  
იმ წყაროსავით ცქრილა,  
მაშინ ეს გულიც მთად იქცა  
და იმ დღემ ამაბრიალა.  
იმ გორზე ვშლიდი პურმარილს,  
ფიქრს ლაჟვარდებში მიყავდი,  
წყაროც იქ იყო, ქურანიც,  
ცასთანაც ახლოს ვიყავი.  
ვეფერებოდი მთა-ველთა,  
შენით მომწონდა ქვეყანა!  
და რიყე თეთრი, ღამეთა,  
ჩემს განვლილ წლებში ეყარა...  
და როცა გრძნობა განაზდა,  
მეგონე ზეცის ნაწილი...  
რას ვიფიქრებდი, ანაზდად,  
ცოლს დაირქმევდი ყმაწვილი?!  
...დღეს კი კახეთის მინდორზე  
შევხვდით, შევცბით და გავხვედით;  
აღარ, მე გითხარ იმ დროზე,  
აღარც შენ... ჩუმად წახვედი.

ვაჟას

ვინ გადათვალა გრძნობები,  
გაბედა სიტყვა ჭკვიანი?  
რამდენი უსახელოა,  
რა მცირე – სახელიანი!  
(ეს, ალბათ, საიდუმლოა,  
არც შენ გვითხარი მთლიანი).  
ვაჟავ, შემინდე, დაკოცნენ  
შენი წაწალნი, იანი;  
რა მექნა, აღარ შემეძლო,  
კვდებოდი სურვილიანი.  
მინდოდა, მკერდში ჩამეკრა,  
მთელი მთა ყვავილიანი,  
რომ ვერ შევძელი, ლურჯთვალას  
ვუკოცნე ბაგე ცვრიანი,  
ღმერთმა გიცოცხლოს სამშობლო,  
სრულად, მიწიან-ციანი!  
იქნებ ღვთისშვილიც იყავი,  
გვეგონე ადამიანი...  
ყველასამც განაცდევინა  
ეს აღტაცება ფრთიანი,  
რა ცოტას ნიშნავს „მიყვარსო“  
ან „გაგიჟებით ტრფიალი“...

\* \* \*

კრავობა არ მსურს, შემჭამენ მგლები,  
არც მგლობა მინდა – ბოროტებაა,  
ვერც შუალედურ წერტილზე ვდგები,  
მკვეთრი ცხოვრება ჩემი ნებაა.

ამ დილემასთან შემტვრევა ფრთები,  
ვერაგინ ამბობს უკეთეს წამალს,  
კრავად ვიქნები – ტანჯვით მოვკვდები,  
მგლურად ვიქნები – ჯოჯოხეთს წავალ.

არც ერთი მინდა და არც მეორე,  
არც შუალედის ნელთბილი ყოფა,  
ჯობია, ვგავდე იმ ძველ მეომრებს,  
ვინც მტერს უტირა დედა და ყოფა,

ვინც გაცხარებას ურჩევდა ბატკნებს,  
წყლის ამღვრევაში ცილს რომ სწამებდნენ,  
სადაც ბოროტი სიკეთეს ავნებს,  
იქ უნდა სჭექდე და არ დანებდე.

## საქართველო – სამოთხე

მე ვინ დამანათლებს სიტყვას ენამზიანს,  
შენ რომ აგსახავდნენ, მათ ვერ შევედრები,  
თავად ბუნებაა დიდი პოეზია,  
ვერხვის შრიალია შენზე შედეგები.  
მიწვივ გომღერიან წმინდა წყაროები,  
ლოცვით მხურვალეთი გლოცავს მთების სიო,  
სირით დახუნძლულან ტოტთა თაროები,  
უნდა ვუგალობოთ დიდი მერმისიო.  
სხივთა სიმებია მზიდან სამოთხემდე,  
უკრავს სამყარო და შენზე ილოცება,  
უფლის ნაკურთხია, ამ მთებს შემოხედე,  
ცვარი სამყურაზე – ზეცით მირონცხება.  
უნდა მოვიკრიბო ძალა ღვთისმიერი,  
გული გატეხილი კვლავაც ვაჯანმრთელო,  
კრძალვით მოვიარო ამერ-იმიერი,  
გმაღლობ დედობისთვის, ჩემო საქართველო...

\* \* \*

არწივის ბუდეში ვზივარ,  
არ ვახამხამებ თვალებსა,  
შორეთს გავცქერი გულჯავრით,  
თან ვეფერები მთა-ველსა,  
ჭანგებით ველარას ვმეველი,  
აჭრიან თითო მტკაველსა...  
სამშობლო – ჩემი გულ-ღვიძლი,  
მიირთვეს, მოიხმარესა,  
გამიჩანაგეს ყოველი,  
ფერი უცვალეს არესა.  
საქმეს ვერ შევლის კალამი,  
ხმალი თუ არვინ გაღესა,  
...თურმე ცხოვრება მოითხოვს  
ზოგჯერ ბართლომეს ღამესა!

\* \* \*

იყო შემოხვედრა,  
თბილი შემოხედვა,  
შემდეგ – გარინდება,  
თვალის არიდება,  
ძველის გახსენება  
ტკბილად გვარიგებდა,  
გული ვერ შევცვალეთ,  
ღუმიღს არიგებდა.

## ჯიჯა ჯიჯანი



### \*ლაღეთა

ვაი იმ ბარათს, მე რომ ვერ წამიკითხა,

შენ რომ დაულამდი – ვაი იმ ღღესო.  
ვაი იმ ცრემლს, ლექსები რომ შეიმშრალა,  
შუა გზიდან მობრუნებულს – ვაი იმ გზებსო!

ღრომ მოიშუშა ყველა ჭრილობა, ღრო განიკურნა.  
უძირო ჭიდან ვხაპავ საცერით, წყალს წყალი  
გასდის –  
ვაი იმ ლექსსო.  
არცა რომ სტკივათ, არცა რომ სცივათ –  
იმ დაშლილ ღღებს,  
იმ წაშლილ წლებსო!..

ფრთებჩამოყრილი...  
მე ახლა მხოლოდ ლაღეთას ვეძებ,  
ნაოცნებარს... ვაი იმ ფრთებსო!

ბუნარში ცეცხლი გააჩაღოს...  
სადა ხარ, ამირმ?  
ახლა ერთია, სულ ერთია,  
წახვალ თუ მოხვალ.  
ყველა სიტყვიდან ღუმიღი მესმის,  
ყველა სიტყვიდან ტკივილი ჟონავს.

ჩემი თავი სად შევაფარო,  
ვკითხავ სამყაროს,  
ან ჩემი სიტყვა როგორ დავმალო?

გამოვაცალო ყველა ღოღი  
ჩემს ძველ სტრიქონებს,  
სახლს ავაშენებ, ახლა მხოლოდ ლაღეთა მინდა –  
სახლი ქვიშაზე!

მოძევენება წაშლილ კვალსავით, საიო!  
ცრემლს რომ დატბორავს,  
იმ შავზღვასავით, საიო!

რა დააბრუნებს გაქცეულ სიტყვებს –  
დუმღმეყრილებს,  
გაცვეთილ ლანჩებს კვალცი არ შერჩათ  
იმ ძველი გზების.

ირინოლამ თქვა, დელა მარინოლამო,  
დარჯოლმა მითხრა, დიაშ დარჯოლმა, საიო!  
დალი ფუსდამ თქვა, \*საი ოდიო, საიო!

ბუნარი ცეცხლში, ცრემლი კვამლში, ჭერი ღამეთა,  
კარს ნუ გამიღებ, დამტოვე ბნელში, ჩემო ლაღეთა,  
აშენებადღე დანგრეულო, კედელო ჩემო,  
შენ ახლა ჩემზე უფრო გარეთ ხარ.  
ასე მიწერდნენ, ვიდრე წამშიდნენ,  
და ამომშიდნენ ბედის წიგნიდან,  
ასე დავღამდი დაღამებამდე, ასე მიჩვენეს  
გზა კარისაკენ,  
ვაი იმ კარებს, იმ კარის მცველებს –  
ამ უმწიფარ და უწიგნურ ლექსებს!..

თავშენახული ვინმე ხარო, ჩრდილიდან  
არ გამოდინხარო...  
იყურე, მაგრად მოკუმე ბაგე –  
სიტყვა არ წამოგცდეს,  
სიტყვა, რომელიც არ იკითხება.

გულიდან წვეთავს, საიო!  
ცრემლიდან ჟონავს, საიო!

ირინოლამ თქვა – შენ რად მეგონე?  
დარჯოლმა მითხრა – შენ რად მეგონე?  
დალი ფუსდამ თქვა – შენ რად მეგონე?

გამოვაცალო ქვა-ლოდები  
ჩემს ძველ სტრიქონებს,  
სახლს ავაშენებ,  
ახლა მხოლოდ ლაღეთა მინდა,  
სახლი ქვიშაზე.

გვიანი სიტყვა ადრე წამომცდა –  
სახლი ქვიშაზე!

შინიდან შინ ვბრუნდები...

ეს რა სახლია – შვიდი სახლის სახელი აქვსო,  
ეს რა სახლია – ცხრა ციური ნათელი აქვსო,  
შენ კი ვინ ხარო, შვიდი სნებით სნეული ხარო.  
რომელმა მითხრა, რომელმა მკითხა?

რას ეუმაღავდი?  
სხვა სასახლეთა შევრჩი დარბაზებს,  
მოღალატე ვარ,

თავს ვუღალატე!  
ბოლო სიტყვიდან თავს ვერ გამოვყოფ,  
აზრი არა აქვს,

ჩავრჩი ამ ლექში.  
ეს ამოდენა ნიაგარი რად მინდოდა  
ამ მყრალ გუბეში?

– გათოკილი ვარ ამ არარაში.  
\*ამირმ, გეძახი!

ახსენი ჯაჭვი – ჯაჭვი არ არის,  
გალოკავს რკინას ყურშა-ძაღლი,  
ძაღლიც არ არის,  
მზეო, მზე თუ ხარ, ამოდი ცაში და  
მზეც არ არის.

თქვენი ჩრდილი ვარ, სად ვეძებო  
საჩრდილობელი,  
უარყოფილმა ვწერო ლექსები – უარმყოფელი.

მე ახლა მხოლოდ ლაღეთას ვეძებ,  
იმ ქონს ვეძებ, კოჟრივით რომ მიწას ატყვია,  
სახურავით ცა რომ გახია!


ცას დავამჩნიო ჩემი ცეცხლის კვამლიო,  
მზეს დავამჩნიო შენი ჩრდილის კვალიო!

სიტყვა გამექცა – შინ მივდიოდი, საიო!  
გზა ვიწრო იყო – შინ მივდიოდი, საიო!  
ჩემს თავს გამოვცდი – შენც გამოგტოვე, საიო!

.....  
ლაღეთა (სვან.) – ღამის გასათევი, სულის  
მოსათქმელი ადგილი წუთისოფლოურ გზებზე;

ამირმ (სვან.) – მითიური ამირანი;  
საი ოდი საი – რეფრენი სვანური სიმღერის.

„ოქტომბერში (წიფობას)  
დავდივართ სვეტიცხოველში  
და სანთელს  
ვუნთებთ  
„პაწა სალოცავთან“...



„ანეულის“ სტუმარია – ექიმი თამარ შავგულიძე

დაიბადა ქუთაისში, პედაგოგების ოჯახში. სკოლის პერიოდიც ქუთაისში გაატარა. თბილისის სახელმწიფო სამედიცინო ინსტიტუტი 1983-84 წლებში დაამთავრა. მას შემდეგ მუშაობს ექიმ-კარდიოლოგად და ოჯახის ექიმად.

მისთვის განსაკუთრებით ძვირფასია ვორკუტაგამოვლილი მამის – შოთა შავგულიძის მოგონებები, რომელიც წიგნადაც გამოიცა – „ერთი რწმენით გავლილი ფაშისტური და კომუნისტური დილემები“.

ბევრი რამ ახსოვს მამისგან, ოჯახის რელიკვიაა მისი ყოველი ფოტო თუ წერილი. საგულისხმოა, რომ მამა ჯერ კიდევ გერმანელებთან ტყვედ ყოფნისას გრივოლ რობაქიძემ გადაარჩინა. მოგვიანებით ვორკუტის საპატიმროში დიდ მწერალთან, ლევან გოთუასთან ერთად აღმოჩნდა. მანვე ჩამოიტანა საქართველოში ლევან გოთუას ხელშეწავლები სახარება.

– გვიამბეთ მამის პიროვნულ თვისებებზე...

– მამას იმ დროს უკვე გავლილი ჰქონდა ფაშისტური საკონცენტრაციო ბანაკები და არანაკლებ სასტიკი კომუნისტური დილემები. ვორკუტიდან ამინისტიით დაბრუნებულს გაუუქმეს დიპლომი (დამთავრებული ჰქონდა თბილისის სახელმწიფო უნივერსიტეტი, ისტორიის ფაკულტეტი), აუკრძალეს ცხოვრება მშობლიურ ქალაქ ქუთაისში და იმყოფებოდა ჩეკას ზედამხედველობის ქვეშ. გაუშვეს ხარაგაულის რაიონში (სოფელი ვერტყვიჭალა), სკოლაში, გერმანულის მასწავლებლად. იქ შექმნა ოჯახი, განმეორებით დაამთავრა ისტორიის ფაკულტეტი, ამჯერად დაუსწრებლად, და დაბრუნდა ქუთაისში, ქალაქში კვლავ არ მისცეს ცხოვრების უფლება და გარეუბანში, გუმბათჰესის დასახლებაში ვცხოვრობდით.

მუშაობდა ქალაქის მეორე ბოლოში, რიონჰესის სკოლაში. ამბობდა, ჩემს ქალაქს ყოველდღე გზად მაინც ხომ გავივლიო.

მამას ჰქონდა საოცარი იუმორის გრძნობა, იყო სასიამოვნო მთხრობელი, ერთსა და იგივეს არასოდეს იმეორებდა. მისთვის ყველაზე ფასეული ადამიანური ურთიერთობები იყო, ჰყავდა მრავალფეროვანი სამეგობრო წრე, ყველა სფეროში, ყველა ფენაში, თითოეული მათგანი ერთნაირად ძვირფასი იყო მისთვის. დიდ პატივს მიაგებდა წინაპრებს და ჩვენგანაც იგივეს

ითხოვდა. განსაკუთრებულად ემზადებოდა აღდგომის დღესასწაულისთვის, შვილებთან და შვილიშვილებთან ერთად მიდიოდა წინაპართა საფლავებზე და ულოცავდა მიცვალებულთა სულებს (იმ დროში სხვაგან ვერც იდღესასწაულებდი აღდგომას).

ბავშვობაში მამა გვიჩვენებდა წასაკითხ ლიტერატურას, შეგვაყვარა პოეზია, სამეზობლოში სახელდახელოდ გვიწყობდა კონკურსს მხატვრულ კითხვაში. რომ წამოვიზარდეთ, წასაკითხად და შემდეგ სადისკუსიოდ გვაძლევდა ფილოსოფიურ ლიტერატურას. მისი საყვარელი წიგნი იყო გოეთეს „ფაუსტი“, პერიოდულად კითხულობდა თავიდან ბოლომდე. ამბობდა, სხვადასხვა ასაკში განსხვავებულად შევიმეცნებთო. იყო უკიდევანო ოპტიმისტი, რაც უნდა პრობლემა ყოფილიყო ოჯახში, მასთან თუ განვიხილავდით, მაშინვე ვგრძნობდით, რა წვრილმანი იყო ის და როგორ მარტივად შეგვეძლო გვერდის ავლა. თითქოს „უპრობლემოდ“ ცხოვრობდა, არ მახსოვს მისგან ჩივილი, რომ რამე აწუხებდა, ან ვინმესთვის რამე ეთხოვოს, ეს მას არ ახასიათებდა. დროს ფეხდაფეხ მიყვებოდა, მის ირგვლივ მუდამ ახალგაზრდები იყრიდნენ თავს. მოუთხრობდა მათ ნამდვილ ისტორიას, რაც საბჭოთა წიგნებში არ ეწერა დაკრძალვის დღეს ჩემთვის სრულიად უცხო ადამიანები, მეტწილად ახალგაზრდები, ცრემლით აცილებდნენ ბოლო გზაზე.



ლეო თევდორაძე, შალვა მალლაკელიძე, დავით კვიციანიშვილი, შოთა შავგულიძე (ვორკუტა)

**– მამის ნაამბობი ალბათ გენსომებათ, როგორ გადაარჩინა ის გრიგოლ რობაქიძემ...**

– თავიდან გვიყვებოდა გერმანიაში ტყვეობის პერიოდს. მამა გრძნობდა, რომ მუდამ ჩეკისტების სამიზნე იყო, და რომ წამოვიზარდეთ, მხოლოდ შემდეგ დაიწყო თხრობა საბჭოთა დილემების წლებზე.

გესტაპოს ციხეებიდან ერთ დღესაც გამოიყვანეს კავკასიელები, დააპურეს, დაბანეს, მისცეს ახალი ტანსაცმელი, დაათვალიერებინეს ვერმანტი. იქმნებოდა ბერგმანის ბატალიონი, შესთავაზეს ცხოვრების კარგი პირობები, მამა ამბობდა, იქ ნათელი გახდა რომ გვამზადებდნენ საბჭოთა ხალხის წინააღმდეგ საბრძოლველად, მე და რამდენიმე თანამემამულემ სასტიკი უარი ვთქვით და ჩავგვეს კარცერში შვიდი თვითო, შემდეგ გადაიყვანეს ვილჰელმსაფენის საკონცენტრაციო ბანაკში, მას „ცოცხალთა სასაფლაოს“ ეძახდნენ. ამუშავებდნენ სილის კარიერზე (გამართლდა მამას ვარაუდი, ბერგმანის ბატალიონის გადარჩენილი წევრები ზედამხედველებად ჰყავდათ საკონცენტრაციო ბანაკებში).

მამასთან ერთად იყვნენ: აკაკი მუხაშავრია (ცნობილი ექიმის, გელა მუხაშავრიას მამა), შალვა ჯაში, აპოლონ ჯანელიძე. ერთ დღეს ხელში ჩაუვარდათ ჟურნალ „დი ვოხეს“ ნაწილი, სადაც იყო გრიგოლ რობაქიძის სტატია სათაურით „ჭეშმარიტი ქართველი“.

გადაწყვიტეს, მიეწვდინათ ხმა. დაწერეს წერილი, სადაც მამა წერდა, რომ, საქართველოში, უნივერსიტეტში მოუსმენია მისი ლექციები, დაწერეს ასევე ვინ საიდან იყო და რომელ ბანაკში იყვნენ. ახლა მთავარი იყო, წერილი მისულიყო მწერლამდე. ზედამხედველებს შორის იყო სამოც წელს მიტანებული ვილჰელმ ციმერმანი (იმ წელს მეზღვაური ვაჟიშვილი დალუპვია), განათლებული, თან კეთილი ადამიანი ყოფილა. მას აჩვენეს ჟურნალი და მოუყვინ გრიგოლ რობაქიძის ცხოვრებასა და შემოქმედებაზე. ვილჰელმი დაინტერესდა, ქართველებს დიდი ადამიანი გყოლიათო, მის „გველის პერანგს“ ვიშოვი

და აუცილებლად წავიკითხავო. მან დიდი რისკის ფასად შეძლო წერილის გაგზავნა. ამის თაობაზე არაერთხელ დაჰკითხეს ქართველები, თუ როგორ მოახერხეს წერილის გაგზავნა, ყველაფერმა მშვიდობით ჩაიარა. მალე შედეგიც დადგა, ქართველები გადაიყვანეს გლეხებთან სამუშაოდ. ეს გადარჩენას უდრიდა

მამას შემდგომში არაერთხელ ჰქონდა მცდელობა, მაღლობა შეეთვალა გრიგოლ რობაქიძისთვის, ვერ მოახერხა. მას შემდეგ, რაც მე და ჩემი და დედები გავხდით, ოქტომბრის თვეში (წიფობას) ყოველწლიურად დავდივართ სვეტიცხოველში, სანთელს ვუნთებთ „პაწა სალოცავთან“, მაღლობას ვწირავთ დიდი მწერლის, საამაყო მამულიშვილის სულს, ამით მამაჩემის ანდერძსაც ვასრულებთ.

მამა მიამაგრეს სოფელ ჰიუდეში, ჰაინრიხ ლიუნინგის ოჯახში დამხმარედ. ქალაქში გაზრდილი იყო, სოფელს ზაფხულობით თუ ნახავდა ბებიასთან. ჰაინრიხის ოჯახი კეთილად შეხვდა. მამამ გერმანული იცოდა, არცთუ ურიგოდ, ასწავლეს: ხვნა-თესვა, თიბვა, პირუტყვის მოვლა. ესუმრობდნენ, დიპლომანი გლეხი გახდით. მამა გვიამბობდა, როგორ მუშაობდა გათენებიდან დაღამებამდე ოჯახის ყველა წევრი. ჰაინრიხის მეუღლე მარიამ ჰენტენმანი, მისი და ტერეზია და დამხმარე გოგონა კლარა. ერთხელაც ტერეზიას მეუღლე, ავგუსტ დეტერსი, სამხედრო საზღვაო ფლოტის ოფიცერი, შვებულებით ჩამოვიდა, მაშინვე ჩაიცვა სამუშაო ტანსაცმელი და შეუდგა საქმეს. აღმოჩნდა ჭადრაკს თამაშობდა კარგად, შემდეგ დღეებში გადადებდა საქმეს გვერდზე და მამას ჭადრაკს ეთამაშებოდა. წასვლისას დაიბარა, შოთას ტყვეობა შეუმსუბუქეთო. გვიამბობდა, ასევე, როგორ ზრუნავდნენ მასზე. ჰაინრიხმა მამა სტომატოლოგთან წაიყვანა, მან კბილის ამოღება გადაწყვიტა, ჰაინრიხმა სასტიკი უარი თქვა კბილი იქნებ გადავარჩინოთ, უნდა ვუმკურნალოთო და სამი დღე ატარა სხვა სტომატოლოგთან ქალაქ დამეში, გადაარჩინა კიდევ, ექიმმა ფული არ აიღო, ომის მსხვერპლია და უსამართლობა იქნება, გასამრჯელო რომ ავიღო. ომის მიწურულს, წამოსვლისას, მარიამმა საგზალი გაუმზადა, ეკლესიიდან დაბრუნებულმა უთხრა: დღეს მხოლოდ შენზე ვილოცე, ქვეყანა არეულია, ღმერთს შევევედრე, მშვიდობით დაგაბრუნოს შენს ოჯახშიო და თვალცრემლიანი დაემშვიდობა. ბევრი მოგონება წამოყვა მამას, რომელსაც ნაწილ-ნაწილ გვიამბობდა და, ვფიქრობ, კიდევ დარჩა მოსაყოლი.

მამა იქვე, ომის პერიოდშივე ერთმანეთისგან კარგად არჩევდა, სად იყო გერმანული ფაშიზმი, და სად გერმანელი ერი თავისი დიდი კულტურით, შრომისმოყვარეობითა და სამართლიანობით.

გავიდა წლები... ოთხმოცდაათიანი წლების ბოლოს, როცა წერილის გაგზავნა შეიძლებოდა, მამამ გააგზა-



ვნა სამადლობელი წერილი სოფელ ჰიუდეში. სამწუხაროდ, ჰაინრიხი, მარია, ტერეზია, კლარა ცოცხალი აღარ იყვნენ, მაგრამ მათმა შვილებმა გადმოცემით იცოდნენ მამას შესახებ, ასევე სოფელში რამდენიმე ადამიანს კარგადაც ახსოვდა, თავისი იუმორით და ჭადრაკის თამაშით.

– **მამათქვენმა საქართველოში ლევან გოთუას ხელშეწვევები სახარება ჩამოიტანა, სად ინახება ახლა ის სახარება და რას გიამბობდათ ლევანზე, რომელმაც მამას „გმირთა ვარამის კაცი“ უწოდა?**

– ქართველი ხალხი კარგად იცნობს დიდებული მწერლის შემოქმედებას, ჩვენი ოჯახი, მამას მონათხრობით, ლევან გოთუას იცნობს ასევე, როგორც დიდ ქართველს, რომლის მთელი ცხოვრება – ყოველი დღე იყო ბრძოლა ქვეყნის თავისუფლებისათვის, არა მარტო კალმით. მან სიცოცხლის სამი მეოთხედი ციხეებში გაატარა. მესამედ დაპატიმრების შემდეგ ვორკუტაში ჩაიყვანეს. ლევან გოთუა სულიერად აძლიერებდა იქ მყოფ პოლიტპატიმრებს, რომლებიც სამშობლოს სიყვარულისთვის იხდიდნენ ხარკს კატორღული შრომით და კატორღული ყოფით. თვითონაც პატიმარი, იბრძოდა მათი პირობების გაუმჯობესებისთვის. ხელმძღვანელობდა საგაფიცვო კომიტეტს იგორ დობროშტანთან ერთად.

1955 წლის მაისში ვორკუტის პატიმარ-მემახტეთა საყოველთაო გაფიცვამ შედეგი მოიტანა. ლევანი წერს ძმას სანდროს: „რუდენკოსა (სსრკ უმაღლესი სასამართლოს თავმჯდომარე) და ჩემმა საუბარმა ორ საათს გასტანა. ვისაუბრეთ საბჭოთა კავშირის არასწორ პოლიტიკაზე პოლიტპატიმრების მიმართ, კერძოდ, უდანაშაულო პოლიტპატიმრებზე, ემიგრანტებზე, ბანაკებში არაადამიანური რეჟიმის არსებობაზე, სისასტიკეზე, ჩეკისტების თვითნებობაზე, უდანაშაულო მსხვერპლზე, დაბოლოს, ისიც დავაცოლე – ურიცხვი გამშრალი, გამიშვლებული, კახექსიური, დაკნინებული და მეობადაკარგული ადამიანი ისეთივე მძიმე სანახავია, როგორც წალეკილი და გაოხრებული სამყარო. რუდენკო ძალიან ყურადღებით მისმენდა და ყოველი სიტყვა დიდ შთაბეჭდილებას ახდენდა მასზე“. („მნათობი“ 9, 1990, გვ. 28).

მამა იგონებდა, მოკლე დროში ტანსაცმელზე კატორღელის ნომრები ჩამოგვხსნეს, თმისა და უღვაშის ტარების ნება დაგვრთეს, კვება გაგვიუმჯობესეს, პატიმრებს, რომლებსაც პატიმრობის ვადა გასული ჰქონდათ, სამშობლოში დაბრუნების ნება დართეს,

თავისუფალ დასახლებაზე გაგვიყვანეს, დაიწყეს საქმეების გადახედვა და პატიმრების თანდათანობით განთავისუფლება.

„ლევანი საქართველოდან არცთუ იშვიათად იღებდა ამანათს. მიღების დღეს ზეიმი ჰქონდათ ქართველებს, იგი მოიწვევდა ყველას უკლებლივ და თავისი ხელით გააწყოდა სუფრას. ცდილობდა,

ქართული იერი მიეცა მისთვის. – დღეს მე ვარ მასპინძელი – იტყოდა და მეტწილად ფეხზე იდგა. მართალია, ისიც კუჭცარიელი იყო, მაგრამ იშვიათად თუ გადასწვდებოდა საჭმელს. სიამოვნებდა, ბიჭები რომ მაღიანად შეექცოდნენ. ამანათიდან მალე აღარაფერი რჩებოდა, გარდა გადანახულისა, რომელიც ღამის ცვლაში მომუშავე მეგობრებისთვის იყო განკუთვნილი“.

იქ მყოფმა ქართველებმა კარგად იცოდნენ ლევან გოთუას ფასი. თურმე ჩექმა გასცვეთია, მისი ზომა ვერ უშოვიათ, არადა გარეთ თოვლში უწევდა მუშაობა. ამ დროს რამდენიმე მემახტისთვის „ვალინკები“ მიუციათ. მიშა რუხაძეს საგანგებოდ აუღია ლევანის ზომის ჩექმა და მიუტანია მისთვის.

მამასთან, მერვე მაღაროს ბანაკში, 1950 წელს გაჩნდა პირველი და ერთადერთი წიგნი, ლევანის შემოგზავნილი ქართული ოთხთავის ორი ძველი რედაქცია. სამი შატბერდული ხელნაწერის მიხედვით (897,936 და 973 წ. წ.) გამოცემული საქართველოს მეცნიერებათა აკადემიის მიერ 1945 წელს. წიგნი ხელიდან ხელში გადადიოდა, ქართველები იწერდნენ მათთვის სასურველ ადგილებს. „ქართულმა ოთხთავმა მოიარა ვორკუტის უზარმაზარ ტერიტორიაზე განლაგებული მკაცრი რეჟიმის ბანაკები“.

ხუთი წლის შემდეგ, როდესაც ქართველები თანდათან ბრუნდებოდნენ სამშობლოში, წიგნი კვლავ მოხვდა მამასთან, ზურაბ მიქელაძემ გადასცა. იგი ინახებოდა ჩვენს ოჯახში, მამა დიდი რუდუნებით გადმოიღებდა ხოლმე, პირველ გვერდზე რეჩლაგის ბეჭედი ჰქონდა წარწერით: „ПРОБЕЖЕНО“, მეორე გვერდზე ლევან გოთუას ხელწერა, და წარწერა – „მემკვიდრეობით ჩემს ვორკუტელ ძმას შოთას. ზურაბ. 9. 1. 56“. წიგნის ყველა ფურცელი გაყვითლებული, კუთხეებში გაცრეცილი და მთლიანად დალაქული იყო.

მამამ გადაწყვიტა, წიგნი დაბრუნებოდა მის პირველ მფლობელს და გადასცა ლევან გოთუას სახლ-მუზეუმს.

– **„ერთი რწმენით გავლილი ფაშისტური და კომუნისტური დილეგები“ – ასე ჰქვია შოთა შავგულიძის ახალ წიგნს, რომელიც იმ ეკლიან გზაზე მოგვითხრობს, რაც მან გაიარა საპატიმროებში როგორ წერდა მამა ამ წიგნს?**

– მოგონებები „ერთი რწმენით გავლილი ფაშისტური და კომუნისტური დილეგები“, 90-ანი წლების დასაწყისიდან იბეჭდებოდა გაზეთ „ლიტერატურულ საქართველოში“, ჟურნალებში: „ცისკარი“, „მნათობი“. 90-იანი წლების ბოლოს კი ბატონმა ჯუმბერ ჯიმკარიანმა უშიშროების გაზეთში „სრულიად საიდუმლოდ“ მოგონებები სრულად გამოაქვეყნა. ამით, ერთის მხრივ, „ცენზურა“ გაატარა, მეორეს მხრივ, უშიშროების სამსახურმა თავის ბოროტება თვითონვე



**შოთა შავგულიძის ოჯახი – მეუღლე მიმი ციციშვილი, შვილები – ქეთევანი, თამარი, ცოლისდა მერი**

ამხილა. ასე მოიხადა ქედი ბატონმა ჯუმბერმა ვორკუტელი პოლიტპატიმრების წინაშე, რომელთა დიდ ნაწილს მშობლიური მიწაც არ ეღირსა.

მამას წიგნის ელვერსია შევიძლიათ იხილოთ ელექტრონული ბიბლიოთეკის საიტზე: [saba.com.ge](http://saba.com.ge), უფასოდ.

წლების მანძილზე, როდესაც ჩაეკითხებოდნენ განვლილი ცხოვრების შესახებ, მამა მოკლედ ამბობდა:

„ყურძენს საწინახელში დაწურავენ, ჭაჭას წნეხში გაატარებენ. ამის შემდეგაც კი შეიძლება ყურძენის ერთი მარცვალი სადღაც სასწაულებრივად გადარჩეს. აი, ასეთ პირობებში შევინარჩუნე სიცოცხლე.“

ასევე, სასწაულებრივად გადარჩენილი „ვორკუტელი მეგობრები“ ხშირად იკრიბებოდნენ დავით კვიციანიშვილთან, პეროვსკაიას 13-ში. გადიოდა წლები, ბოლოს თითო-ორიოჯობა დარჩა, და მამამ დაიწყო თხრობა მათ შესახებ. ბატონმა ემზარ კვიციანიშვილმა სთხოვა, გადაეტანა ფურცელზე. და, მამამ ამოიღო კარგად შენახული, თითქმის გადამალული, ძველი დღიურები. ჩანაწერები, წერილები ვორკუტიდან და დაიწყო წერა იმ სისასტიკეზე, რომელიც მძინვარებდა „გულაგის“ მკაცრი რეჟიმის ბანაკებში, კატორღელთა მალარობებში.

არ იყო მარტივი წერის პროცესი, მოგონებებს თან ახლდა განცდები. თითქოს უბრუნდებოდა კატორღულ ცხოვრებას. შახტაში, დასიებული მუხლებით, შიმშილისა და შრომისგან ქანცგაწყვეტილი, თავისი მეგობრის უბედურებას ხედავდა და წერდა. ემოცია იმდენად ძლიერი იყო, ზოგჯერ სიზმარშიც გრძელდებოდა „ვორკუტა“.

ხშირად ამბობდა, იმ დიდ უბედურებაში იყო ბედნიერებაც, ასეთ დიდებულ ადამიანებს რომ შეეხვდი და მათთან ერთად ვზიდე მამულიშვილობის უღელიო.

ლევან გოთუა და დავით კვიციანიშვილი გამორ-

ჩეული იყვნენ პატიმართა შორის. ისინი დანარჩენ პატიმრებს ამხნეებდნენ სულიერად და ფიზიკურადაც პატრონობდნენ. ბატონი დავითის ისედაც მაღლიან პროფესიას, მისი პიროვნული მაღლიც ემატებოდა, არაერთი პატიმარი, თვით სუკ-ის თანამშრომლის ოჯახის წევრიც არაერთხელ გადაურჩენია სიკვდილს. დიდი ავტორიტეტი ჰქონდა და ამ ავტორიტეტს ისევე ქართველი პატიმრების მდგომარეობის შესამსუბუქებლად იყენებდა.

ასევე, აქ იყვნენ „ხალხის მტრებად“ შერაცხული, „სამშობლოს ღალატის“ მუხლით ბრალდებული დიდი ქართველები: ზურაბ მიქელაძე, რეზო ტყავაძე, შალვა ბალარჯიშვილი, სერგო ლორთქიფანიძე, ალექსანდრე მალაქელიძე, მიშა რუხაძე, რომან ბლიაძე, ვალიკო ხუჭუა, მიტო მამულიანიშვილი, დავით ვოლსკი, კოლია მეტრეველი, ნიკო მღებრიშვილი, ვასო შევარდნაძე, ილია ბოჭორიშვილი, გოგი ჭიბერიშვილი, ბენო ხაჟალია, შალვა ჩხეიძე, ლეო თევდორაძე, ვარდენ ჟღენტი, შამილ გუჯეჯიანი, ვალიკო გაბუნია, იოსებ ქავთარაძე, ვიქტორ ჯღარკავა, დავით გაჩავა, კოლია კალაძე.

ეს ადამიანები, ყველანი უკლებლივ „გმირთა ვარამის“ კაცები იყვნენ.

#### – ოჯახი...

– ამჟამად ერთ პატარა სამედიცინო ცენტრში ვმუშაობ. მეუღლე – ნუგზარ ლომაძე პროფესიით მათემატიკოსია, შვილები: ალექსანდრე – 29 წლის, პროგრამისტი, მუშაობს „თი-ბი-სი ბანკში“, ასევე არის ლექტორი თავისუფალ უნივერსიტეტში.

26 წლის მარიამმა დაამთავრა ბიზნეს ადმინისტრირება, მუშაობს განათლების ხარისხის განვითარების ეროვნულ ცენტრში. მისი მეუღლე, ფარნაოზ ხონელიძე პროფესიით მარკეტოლოგია.

ჩემი და, ქეთევანი და მისი მეუღლე მერაბ სვანაძე მათემატიკოსები არიან. ჰყავთ სამი შვილი: მაია მათემატიკოსია, მუშაობს ივანე ჯავახიშვილის სახელობის სახ. უნივერსიტეტში ლექტორად. ლიკა პროგრამისტია. გიორგი – სტუდენტი ასევე მათემატიკის ფაკულტეტის.

#### – სიცოცხლის ბოლომდე მუშაობდა მასწავლებელთა დახელოვნების ინსტიტუტში. კითხულობდა პედაგოგიკაში ლექციებს...

– მამა სიცოცხლის ბოლომდე ჰყავდა უერთგულესი მეგობრები უნივერსიტეტში სტუდენტობის წლებიდან. მისთვის ივანე ჯავახიშვილის სახელობის სახელმწიფო უნივერსიტეტი არა მარტო განათლების კერა იყო, ასევე განსაზღვრავდა ქართველი ერის ცნობიერებას. მისი დიდი სურვილი იყო, ცხოვრება უნივერსიტეტთან დაეკავშირებინა. მაგრამ ვერ მოახერხა, როგორც თვითონ ამბობს: 43 წლის ასაკში შევქმელი დაბურდული ცხოვრების ლაბირინთიდან გამოსვლაო.

სურვილი უფროსმა ქალიშვილმა აუსრულა. დღეს ქეთევანი, მისი მეუღლე და ორი ქალიშვილი მამას საყვარელი უნივერსიტეტის მეცნიერ-თანამშრომლები არიან.

რეაბილიტაციის შემდეგ, როდესაც მიეცა ცხოვრების უფლება მშობლიურ ქუთაისში, დაიწყო მუშაობა სკოლა-ინტერნატში აღმზრდელად და შეუდგა გარდამავალ ასაკში (V – VII კლასებში) ბავშვთა აღზრდის თავისებურების შესწავლას. 17 წელიწადი აკვირდებოდა მათ ქცევებს და სწავლობდა, მუშაობდა „როულ“ ბავშვებთან. რეგულარულად აქვეყნებდა სტატიებს ჟურნალში „სკოლა და ცხოვრება“. წარმატებით დაიცვა დისერტაცია თბილისში. მოსკოვში დისერტაცია გააჩერეს და მამა დაიბარეს. ჩავიდა მზად სამეცნიერო დისკუსიისთვის. სამეცნიერო საბჭოს ნაცვლად დახვდა უშიშროება, მათ ერთხელ კიდევ „გადაამოწმეს“, კითხვები იყო პირად საკითხებზე (მამას რეაბილიტაცია მისცეს 1960 წელს, მისცეს ერთბაშად, ერთი ყუთი მედლები, რაც ომის შემდეგ ვეტერანებს დაურიგდათ, პატიმრობის წლები „გადაუკეთეს“ პედაგოგიურ სტაჟად).

სიცოცხლის ბოლომდე მუშაობდა მასწავლებელთა დახელოვნების ინსტიტუტში. კითხულობდა პედაგოგიკაში ლექციებს. ასევე, ხელმძღვანელობდა საქართველოში რეპრესირებულთა საზოგადოებაში „მემორიალი“ დასავლეთ საქართველოს რეგიონალურ განყოფილებას. ეხმარებოდა რეპრესირებულებს, უგროვებდა და უწესრიგებდა საბუთებს რეაბილიტაციისთვის, პენსიის დასანიშნად.

**– გვიამბეთ თქვენს ცხოვრებაზე, ექიმ-კარდიოლოგ თამარ შავგულიძის გზაზე...**

– მშობლებმა გადაწყვიტეს, ექიმის პროფესია ამერჩია. მე უფრო მინდოდა, იმ კონკურსში გავსულიყავი, ჩემს დროს სამედიცინო ინსტიტუტში ჩასაბარებლად რომ იმართებოდა. არჩევანი მეტწილად მამას მეგობრის, ჭეშმარიტი ექიმის დავით კვიციანიშვილის პიროვნებამ განაპირობა. მამა თავისუფალ ზონაში დავით კვიციანიშვილთან ერთად ცხოვრობდა თითქმის ერთი წელიწადი. თან დაჰყვებოდა, ღამის საათებში როცა ავადმყოფთან მიჰყავდათ. მონაწილე იყო იმ განცდების, რაც ექიმს პაციენტის კარგად ყოფნით ეუფლება.

დღეს დიდი მადლობელი ვარ ამ გადაწყვეტილების. თბილისის სახელმწიფო სამედიცინო ინსტიტუტის დამთავრების შემდეგ დავბრუნდი ქუთაისში და მუშაობა დავიწყე ავტოქარხნის საავადმყოფოში. იქ სამი წელიწადი ვიმუშავე ექიმ თერაპევტად. 80-იან წლებში საბედნიეროდ მედიცინა უფასო იყო, მაგრამ პაციენტებმა მადლიერების ნიშნად იცოდნენ

საჩუქრის მოტანა. მიუხედავად ჩემგან კატეგორიული წინააღმდეგობისა, შექმნილა უხერხული სიტუაცია და სუნამო ამიღია, ყოფილა შემთხვევა, სუნამოს ყუთში თანხაც აღმომიჩინია. ამ დროს მამა სუფრაზე მეგობრებში, თუ სამეზობლო-სანათესაოში აცხადებს, ჩემი შვილი თუ ავადმყოფს დასჭირდება, წამალსაც მიუტანს, არათუ გასამრჯელოს აიღებსო. ერთ დღეს ვუთხარი, გთხოვ, მაინცდამაინც სადღეგრძელოში ნუ იტყვი, რომ გასამრჯელო არ ამიღია-მეთქი და დავიწყე ჩამოთვლა. მამამ შემაჩერა – მე არ მითხრაო.

27 წლის ასაკში შევექმენი ოჯახი, რის გამოც მომიწია საცხოვრებლად თბილისში გადმოსვლა. დავიწყე მუშაობა კარდიოლოგად, ბოლო წლებში შევითავსე საოჯახო მედიცინა, დღეს ჩემთან შემოსული პაციენტი თანხა არ ეძებს გადასახდელად.

მამას თხოვნა – „მე არ მითხრა“, რომელიც მუდმივად მესმოდა, ჩემთვის ჰიპოკრატეს ფიცზე მეტია და მადლობელი ვარ ამისთვისაც.


**– დედა 92 წლისაა, ცხოვრობს ქუთაისში. როგორც მითხარით, აქტიურია აქტიურია იგი, როგორც მოქალაქე, დედა, ბებია... აღბათ ძნელი იქნებოდა, მეუღლის გარეშე ოჯახის გაძღოლა მისთვის...**

– ბატონი ემზარ კვიციანიშვილი წიგნის წინასიტყვაობაში წერს: „კაცურ კაცს შოთა შავგულიძეს ჯოჯოხეთის ცხრავე გარსი თავისი ფეხით აქვს გავლილი, რათა მერე ღვთის შეწევნით, ისევ ათასფრად აბრიალებული სამზეო მოეხილა“...

სწორედ რომ მამას ცხოვრება მთელი სისავსით შეეგრძნო, ამაში დაეხმარა დედა. იგი მათემატიკის მასწავლებელი იყო. ჩვენს ოჯახში სისტემატურად მოდიოდნენ სკოლის მოსწავლეები, მეზობლები და არამეზობლები დასახმარებლად მათემატიკაში, ფიზიკაში, ასტრონომიაში.

მოდიოდნენ ქართულ ლიტერატურაში „თემების“ დასაწერად. ეს საქმე დედას ეკუთვნოდა. მას უყვარს ლიტერატურა, განსაკუთრებით პოეზია. 92 წლის ასაკშიც ახალ ლექსებს იმასწავრებს, მისი ასაკის და ცხოვრების შესატყვისს. ახლაც ეხმარება მეზობლის მე-10 კლასელ მოსწავლეს მათემატიკაში სკოლის პროგრამის დაძლევაში. მე და ჩემი და დღესაც, ნებისმიერ საკითხის გადაწყვეტისას, დედას აზრს ვეკითხებით. ათი წლის წინ მეზობლების სურვილით. ქუჩას შოთა შავგულიძის სახელი მიენიჭა. მეზობლებმა ასე გამოხატეს პატივისცემა ჩვენი ოჯახისადმი, ჩემი მშობლებისადმი.

თამარ შავგულიძე



## დავით შემოქმედელის მოთხრობები

წლების განმავლობაში გახლდით დავით შემოქმედელის რამდენიმე წიგნის რედაქტორი. მოგეხსენებათ, იყო მკითხველი, ბედნიერებაა, რადგან როგორც ამას გურამ დონაშვილის ერთი არაორდინარული, ყველასათვის კარგად ცნობილი პერსონაჟი აცხადებს, იყო მკითხველი, ნიშნავს იქვე საძილე ტომარაში შეყვარებულებთან ერთად და სრულიად არ გრძნობდე მათთან თავს ზედმეტად. იყო რედაქტორი, ვფიქრობ, არანაკლები, მე ვიტყვოდი, თუ მეტი არაა, ბედნიერებაა, რადგან ამ დროს გეძლევა სრულიად ლეგიტიმური უფლებამოსილება, რაც შეიძლება ღრმად ჩაიხედო მწერლის შემოქმედებით სამყაროში, მაქსიმალურად დაიკმაყოფილო მკითხველურ-პროფესიული ცნობისმოყვარეობა, გამაღიძებელი შუშით დააკვირდე პოეტურ ხატებს, სახე-სიმბოლოებს, პერსონაჟებს (ერთი შეხედვით უმნიშვნელო დეტალებს...) და სრულიად არ უქმნიდე ამით დისკომფორტს თავად შემოქმედს, ან გეგონოს, რომ სწორედ ასეა და არა – სხვაგვარად, რადგან რედაქტორის ლეგიტიმური უფლებამოსილება უშვებს ამგვარი ილუზიის არსებობას.

ვინც დავით შემოქმედელის შემოქმედებას იცნობს, უყვარს და აფასებს, მათთვის სასიამოვნო აღმოჩენა იქნება, ალბათ, რომ პოეტი საკმაოდ წარმატებულად მოღვაწეობს პროზაულ ჟანრშიც, ჩვენი წერილის საგანი მწერლის ბოლო წიგნია, სათაურით – „ორმოში“, რომელიც მოიცავს სულ 15 მოთხრობას, რომელთაგან ზოგი უფრო ნოველისათვის დამახასიათებელი ჟანრობრივი თავისებურებითა და მოულოდნელი ფინალით გამოირჩევა. ცალკეული მოთხრობები პერიოდულად იბეჭდებოდა ქართულ ლიტერატურულ ჟურნალ-გაზეთებში („მნათობი“ „ჭოროხი“, „მწერლის გაზეთი“, „ლიტერატურული საქართველო“

და სხვა), წიგნად გამოცემის შემდეგ კი ითარგმნა რუსულ და სომხურ ენებზე და რუსი, სომეხი და უკრაინელი მკითხველის აღიარება და სიყვარულიც მოიპოვა. რუსული თარგმანი ვლადიმერ სარიშვილს ეკუთვნის, ცნობილ პოეტსა და მთარგმნელს, სომხური თარგმანის ავტორი კი სომხურ ლიტერატურულ წრეში ცნობილი მთარგმნელი მაყვალა გეურქოვა გახლავთ, რომელსაც ნათარგმნი აქვს ქართველი კლასიკოსები: ვაჟა-ფშაველა, მიხეილ ჯავახიშვილი, ჭაბუა ამირეჯიბი, ოთარ ჭილაძე და მანც... შემოქმედელს ჩვენში უფრო პოეტად იცნობენ, ვიდრე – პროზაიკოსად. საინტერესო რამაა იმიჯი. რაკი ერთხელ შეიქმნება პიროვნების ირგვლივ თავისებურ ჩარჩოებში აქცევს მის მიმართ საზოგადოებას. ასეა ეს ხელოვანის შემთხვევაშიც. თითქოს მაგიური ძალით მასზეც მოქმედებს, თითქოს რაღაც ნიში მოიძებნა, იქ იგრძნო თავი უკეთ. მაგრამ ამ ნიშის იქითაც არის სასიცოცხლო სივრცე, რომელიც თავისკენ იხმობს და იზიდავს ხელოვანს. და ისიც მიჰყვება შინაგან ხმას, რადგან ზედება, რომ ლირიკის, რითმისა და რიტმის იქითაც ჰქონია სათქმელი მკითხველისათვის. წინამდებარე წიგნი სწორედ მწერლის ამგვარი შემოქმედებითი ღვაწლისა და ძიების შედეგია, საკმაოდ საინტერესო და ნაყოფიერიც.

ვინ არიან დავით შემოქმედელის მოთხრობათა პერსონაჟები? ისინი ჩვენ გვერდით მცხოვრები ჩვეულებრივი ადამიანები არიან, რომელთათვისაც მთავარი არჩევანია, არჩევანი სიკეთესა და ბოროტებას, სიყვარულსა და სიძულვილს, თავისუფლებასა და მონობას, სინათლესა და სიბნელეს შორის. მათი შინაგანი წინააღმდეგობებით აღსავსე ცხოვრების, დრამატული კოლიზიების ფონზე კი ის მარადიული ფასეულობები იკვეთება, რომლებიც განსაზღვრავდა და, იმედი გვაქვს, განსაზღვრავს მომავალშიც კაცობრიობის ბედს, განვითარების გზასა და ისტორიას; განსაზღვრავს მანამ, სანამ იარსებებს ჰუმანიტარული მეცნიერებანი, სანამ იარსებებს ხელოვნება, განსაკუთრებით მწერლობა. ეს უკანასკნელი პოსტმოდერნულ ეპოქაშიც კი, რომლისთვისაც არაფერია უცხო და მიუღებელი, სწორხაზოვანი დიდაქტიკის გარდა, მანც ინარჩუნებს მთავარ ღერძს – ამოიყვანოს ადამიანი (მე კაცისა) ცოდვის ლიდიდან – ორმოდან (წიგნის სათაური „ორმო“ მწერლის გააზრებით ამქვეყნიური დაცემული ცხოვრების პარადიგმულ სახეს წარმოადგენს) და განწმენდის, სულიერი ხსნის გზა უჩვენოს, ან აძებნინოს მანც.

თანამედროვე მწერლობა, შეიძლება ითქვას, იქცა დიდაქტიკად დიდაქტიკის გარეშე. აღარც მწერალია მორალისტი, აღარც ნაწარმოები – ერთმნიშვნელოვნად მორალისტური. ოღონდ ეს კია, თანამედროვე მწერლობა უფრო მოწიფულ, გამოცდილ, დაკვირვებულ მკითხველს საჭიროებს, რომელსაც მით მეტი ფიქრისა და განსჯის საბაბი ეძლევა, რაც უფრო მეტ განვლილ გზს მოითხოვებს კაცო-

ბრიობა წარსულში. დავით შემოქმედელი მკითხველს საზოგადოებასთან, გარემომცველ სამყაროსთან ადამიანის მიმართების იგავურ-ალეგორიულ მოდელებს სთავაზობს, რომელთაც მრავალგვარი ინტერპრეტაცია შეიძლება მოეძებნოს. იგავურ-ალეგორიულია: „ჩიტისა და მგლის ამბავი“, „ორმოში“, „არიმანის ქვეყანა“, ნაწილობრივ „ბაქურა“ და „ცოდვის ტირილი“.

შევეცდები, რამდენიმე მოსაზრება გაგიზიაროთ ზოგიერთი მათგანის შესახებ. იგავი იგავში – შეიძლება ასეც ვუწოდოთ „ჩიტისა და მგლის ამბავს“, რომელიც უცნაურად გარდაცვლილი გურამ სანთებლიძის ერთადერთი თუ უკანასკნელი ნაწარმოები აღმოჩნდა. ის ფაქტი, რომ გურამ სანთებლიძეს გულის არეში ადამიანის ნაპილარები ეტყობოდა, მთელი ქალაქის მითქმა-მოთქმისა და შფოთვის საგანი გახდა. ქალაქი აპოკალიფსური ჟამის ჯოჯოხეთს დაემსგავსა. „უზარმაზარ კოცონზე მოთუხთუხე ქვას ჰკავდა, შიგ ჩაყრილი ადამიანები... უსიტყვოდ იხარებოდნენ“. მიცვალებული კი ისე იწვა, „თითქოსდა, კი არ მომკვდარიყო, არამედ ადამიანებს გაჰქცეოდა და მათზე გულნატკენს გადაეწყვიტა, სამუდამოდ დადუმებულიყო“.

ვინ შეუჭამა გული გურამ სანთებლიძეს? ამ კითხვაზე პასუხს „ჩიტისა და მგლის იგავში“ ვპოულობთ. ჩიტისა და მგლის იგავი კი არის ისტორია ქალისა, რომელიც თავისივე მცდარი არჩევნის მსხვერპლი შეიქნა. ქალს უსაზღვროდ უყვარდა ცისფერთვალა ჩიტი, რომელთანაც არამიწიერ ნეტარებას განიცდიდა, მაგრამ მიწაზე რომ დაეშვა, აღმოჩნდა, რომ მის ირგვლივ ქალები მხოლოდ მგლებზე იყვნენ გამიჯნურებულნი. მგლის ფიზიკური და ცხოვრებისეული შესაძლებლობებით მოხიბლული ქალი ჩიტს სისუსტეს უწუნებს, აიძულებს, მგლად იქცეს, წინააღმდეგ შემთხვევაში მასთან ურთიერთობის გაგრძელებას შეუძლებლად მიიჩნევს. ასე იცვლება ზეცა მიწით, ფაქიზი და ღვთაებრივი სიყვარული – უხეში ვნებით. მგლის ალერსით გულდაკორტნილი ქალი მხოლოდ სიკვდილის პირას მყოფი აცნობიერებს თავის შეცდომას.

საკუთარი არჩევნით – პატიოსანი, მაგრამ, პასიური ცხოვრების წესით, საზოგადოების ძალადობის მსხვერპლია გურამ სანთებლიძეც. საზოგადოდ, არსებობს მსხვერპლისა და მოძალადის ორგვარი სქემა: ან პიროვნებაა მოძალადე და მსხვერპლი – საზოგადოება, ან პირიქით, საზოგადოებაა მოძალადე და მსხვერპლი – პიროვნება. ამ შემთხვევაში საზოგადოებაა მოძალადე პიროვნებისათვის. მსხვერპლისა და მოძალადის პრობლემა კი არამარტო ქართული, არამედ ზოგადად კაცობრიობის პრობლემაა დასაბამიდან დღემდე. ამიტომ ეს არ კეტავს ნაწარმოებს ვიწრო ჩარჩოებში და განზოგადოების საშუალებას აძლევს. თუმცა აქ ვერ ვხედავთ საზოგადოებრივი მორალის დიქტატურის ისეთ მძაფრ, პირდაპირ, უშუალო ზემოქმედებას, როგორც ეს ვაჟა-ფშაველას პიროვნებისა და

საზოგადოების კონფლიქტშია წარმოჩენილი, სადაც საზოგადოებას მისი რჩეული უპირისპირდება არა როგორც მტერი, სიძულვილით ან განსხვავებულობის ამბიციით, არამედ, როგორც მოყვასი, რომელიც შეტეცნების სხვა სიმაღლეზე ავიდა, სხვა სულიერ სივრცეს, სიმაღლეს ეზიარა და რომელსაც სურს, ამ თვალსაწიერიდან დაანახვოს ცხოვრების მიღმა მხარეები თავის თანამომძეთ. აქ კი მწერლის მიზანი მსხვერპლადქცეული პასიური საზოგადოების პრობლემაა, მისი ასახვაა.

ქალიც, ჩიტიც, გურამ სანთებლიძეცა და შემოქმედელის სხვა პერსონაჟებიც საზოგადოების ჩვეულებრივი, რიგითი წევრები არიან. მისდევნენ ცხოვრების დინებას, იღებენ ისეთსავე გადაწყვეტილებას, როგორსაც სხვა დანარჩენი უმრავლესობა. ცდილობენ, ერთმანეთს დაემსგავსონ, არ იყონ მათგან გამორჩეულნი, საკუთარი განსაკუთრებულობა ეჩოთიერებათ, ვერ აცნობიერებენ, რომ სწორედ ინდივიდუალიზმშია ბედნიერება, თვითონვე კლავენ საკუთარ სულში იმას, რაც ლამაზი და სათუთია. გურამ სანთებლიძეც იმ საზოგადოების წევრია, სადაც ყველაფერი თავდაყირაა, ზნეობრივი ორიენტირები ყალბია და მორღვეული. ცრუბედნიერების მამიებელნი კი ნამდვილს თავისივე ნებითა და არჩევნით კარგავენ. სწორედ ეს სულისშემხუთავი ატმოსფერო ხდება გურამ სანთებლიძის უცნაური სიკვდილის მიზეზი. ნიკო ლორთქიფანიძის მინიატურის გმირს გული ნოსტალგიამ დაუფერფლა, აქ კი სანთებლიძის გულს საზოგადოების მერკანტილიზმი, უგულობა, არაადამიანურობა, ამ ყოველივეს მიმართ უხმო პროტესტი ანადგურებს.

მტკივნეული არჩევნის თემას ეხება მოთხრობა „ბაქურა“. მძიმე დარტყმა აკვამ წუთისოფელმა ბაბუა სამსონს. ერთად გამოაცალა ორივე – შვილიცა და რძალიც, მათი კუბოები და პატარა დაობლებული ბიჭი შეაჩენა ხელთ. იმ დღიდან მხოლოდ მერაბის აღზრდა გახდა მოხუცის სიცოცხლის ერთადერთი მიზანი. მაგრამ ერთ დღეს თავად ბაბუა იქცა მერაბისთვის დაუნდობელი ცხოვრების სახედ, ბაბუას თოფი კი იარაღად, რომელიც საყვარელი არსების მსხვერპლად გაწირვას მოითხოვს. უარი თქვა მასზე, ვინც სიცოცხლეს ვირჩევნია, სხვა ძლიერ ვნებას ანაცვალო, ასეთი მძიმე გზავსაყარებიც არსებობს ცხოვრებაში. „ბიჭი მუდამ ოცნებობდა, რომ ბაბუას თოფის ხმით გაეყრუებინა მთელი სოფელი“ (ბაბუა საუკეთესო მონადირედ ითვლებოდა სოფელში, ბაქურას კი ბადალი არ ჰყავდა მეძებრებში). თოფის გასროლის ჟინით კი ბიჭი მუდმივად იყო ატანილი. ბაბუა კი ამის ნებას არ რთავდა. ამასთან, ბიჭს გაგიჟებით, საკუთარ თავზე მეტადაც კი უყვარდა ბაქურა. შემთხვევითი არ არის ისიც, რომ სახელი ბაქურა საყვარელ ძალს ნიშნავს.

სიუჟეტი კი ასე ვითარდება. ძალი მუზობლის ქათამს შეჭამს და გაბრაზებული მეზობელი ჭიშკარს მოადგება. ბაბუა ერთის მხრივ გრძნობს თანადგომასა

და პასუხისმგებლობას მეორე ადამიანის მიმართ, ამასთან შეიცნო, რომ ძალღმა ამ წუთიდან თავისი არსი, დაცვის ფუნქცია დაკარგა, მტაცებლად იქცა, ამ დროს იგი, ბაბუა მკაცრი ბიბლიური დოქტრინის აღმასრულებლად იქცევა („ყოველი ხე, რომელიც არ გამოიღებს კეთილ ნაყოფს მოიჭრება და ცეცხლს მიეცემა“. მათე. თავი 3.10.), იღებს ძალღლის მოკვლის გადაწყვეტილებას. ბაბუა ცხოვრების მკაცრი კანონისა და წესის სასარგებლოდ დადგა, ახლა ის, როგორც არამართო პერსონაჟი, არამედ სიმბოლური სახე ცხოვრებისა შეილიშვილს აძლევს არჩევანის უფლებას. მაგრამ თითქოს ეს არც არჩევანია და სადაც არჩევანსა და იძულებას შორის დგას. მწერალი ექსპრესიულად აღწერს ჟინს ატანილი, ცდუნების წინაშე მდგომი ბიჭის სულიერ თრთოლას, არჩევანის, გადაწყვეტილების მიღების სირთულეს, მისგან გამოწვეულ შედეგს: „შავი ლულა მზის სხივებზე ელავდა. ბიჭს თოფი უსაშველოდ მძიმე ეჩვენა. კინაღამ ხელიდან გაუვარდა. ერთიანად ცახცახებდა. საკუთარი გულის ხმა ესმოდა. ძალა მოიკრება. ბაბუას ხმა თითქოს ძარღვებში გაყინულ სისხლივით შედგდა. ბიჭი მუდამ ოცნებობდა, რომ როგორმე ბაბუას თოფის ხმით გაეყრებინა სოფელი. ბეჭები ეზრდებოდა, თხელი სიფრიფანა მკლავები უმსხვილდებოდა. და სწორედ ახლა, ამ წამს ეძლეოდა საშუალება ნატვრის ასრულებისა, როცა სამიზნედ მის წინ ბაქურა იდგა. ცდუნება გასროლისა იმდენად დიდი იყო, ბიჭი უჩვეულო ჟინმა აიტანა. გაუბედავად თითი სასხლეტს შეახო და... გარინდებული სივრცე თოფის ხმამ შეძრა. ბაქურა თეთრი ღრუბლის ქულასავით ეგდო ჭის ახლო“.

ესროლე! – ხშირად უბრძანებს ცხოვრება ადამიანს. ამ განსაცდელისათვის არამცთუ ბავშვი, ბევრჯერ დიდებიც უმწიფარნი აღმოჩნდებიან ხოლმე. მძიმე ჯვარი აპკიდა ბაბუამ მერაბს. შუა ხანს მიწეული მამაკაცი, რომელმაც კარგ ხანს დაყო უცხოეთში, წარსულში ბრუნდება. სადა, მაგრამ სულისშემძვრელია უკანასკნელი ფრაზა: „კაცი გადაჭრილი ხის მორზე იჯდა, თავი ხელებში ჩაერგო და ტიროდა“. გადაჭრილი ხე თითქოს ადამიანურობის გადაჭრილი ფესვებია, წარსული კი იმისთვის ცოცხლდება, რომ ცრემლითა და ტკივილით განიწმინდოს, აღდგეს დარღვეული პიროვნული მთლიანობა, პირვანდელი ხატი და სიყვარულის მოკლული იდეა.

დაძაბული სიუჟეტითა და სიმძაფრით გამოირჩევა მოთხრობა „ორმოში“. „ორმოს“ პერსონაჟები სიყრმის მეგობრები, განსხვავებული ბუნებისა და ტემპერამენტის ახალგაზრდები არიან. თამაზსა და ნარიმანს პროკლამაციების გავრცელებისათვის აპატიმრებენ. ტუსადებს ციხეში არაადამიანურდ ეპყრობიან. ფიზიკური გადარჩენა მხოლოდ უპირობო მორჩილებით იყო შესაძლებელი.

მოთხრობაში ციხე სიმბოლურად დიქტატორული სახელმწიფოს მინი სქემაა. ციხის უფროსის მზა-

კერულ ჩანაფიქრს საზღვარი არ აქვს. იგი ჯერ ნარიმანის სულიერ გატეხას განიზრახავს, უბრძანებს, ამოთხრილ ორმოში ჩადგეს, თამაზს კი მეგობრის ცოცხლად დამარხვას ავალებს. თამაზი, რომელიც ბუნებით ბედისადმი შემგუებლობით გამოირჩეოდა, ინარჩუნებს ადამიანურ ღირსებას და უშიშრად აცხადებს უარს ბრძანების შესრულებაზე. ციხის უფროსის სამიზნეც ამიერიდან უფრო ძლიერი პიროვნება – თამაზი ხდება. ნარიმანის ადგილს ორმოში ახლა თამაზი იჭერს, ნარიმანი კი მისი მესაფლავე უნდა გახდეს. ცოცხლად გადარჩენილი ნარიმანი ლაქიის სისწრაფით იწყებს მიწის წაყრას მეგობრისათვის. ნარიმანი სუსტი რგოლი აღმოჩნდა. არამზადა. სიცოცხლეს არ იმსახურებს. ციხის უფროსი საბოლოოდ გადაწყვეტს ნარიმანის დასჯას. მაგრამ სასიკვდილო განაჩენი ამჯერად თამაზის ხელით უნდა გამოუტანოს. ნარიმანის ლულულსა და ხროტინს მიწის ბელტები ახშობენ. საღისტური ექსპერიმენტი – იერიში ადამიანის ფსიქიკაზე – წარმატებით სრულდება. ჯალათმა შეძლო დაენგრია ორივეში ადამიანური სხივი (ხატი). შემზარავია ფინალი, სადაც ვხედავთ, როგორ ასამარებს კაცი ადამიანურობას საკუთარ არსში. ციხის უფროსი განსხეულებული ემმაა, აღზევებული სატანური ძალა, რომელსაც ყველა ამქვეყნიურ ბოროტებაზე მიუწვდება ხელი.

კადრი კადრს დინამიკურად ენაცვლება. არჩევნის ზღვარზე მყოფი ადამიანები საბოლოოდ ემმას ემონებიან. თამაზი გადარჩა, მაგრამ სულიერი სიკვდილისგან ხსნის გზა, რაც სინდისის ქენჯნისა და სინანულის გარეშე წარმოუდგენელია, არ ჩანს. ორმო, სადაც ადამიანური ღირებულებები იმარხება, დაცემული ცხოვრების პარადიგმული სახეა. მივიღეთ სიმბოლური სახე, ალუზიური მდგომარეობა, დღევანდელი ჩვენი პოლიტიკური თუ საზოგადოებრივი მოდელისა, საკუთარი ცხოველური გადარჩენის პრინციპით, მორალური პრინციპების უგულველყოფით, ერთმანეთის განადგურებას ვცდილობთ, ამ დროს მესამე ძალა, ყოველივე ამის რეჟისორი კმყოფილია.

და ბოლოს, შევეხები მოთხრობას, რომელიც გამოავნებელ ზემოქმედებას ახდენს მკითხველზე. ეს არის „ცოდვის ტირილი“, საოცარი დინამიკითა და ექსპრესიულობით დაწერილი ნაწარმოები, რომელიც მხატვრული დამაჯერებლობით გადმოსცემს თავზარდამცემ სინამდვილეს იმის შესახებ, თუ როგორ შეიძლება იქცეს ძალაუფლებისა და თავისუფლების სიყვარული (უკიდურესად პოლარიზებული ეს გრძნობები) ერთნაირად სახიფათო და ფატალური საზოგადოებისთვის. როგორ შეიძლება იქცეს კოლექტიური გონი კოლექტიურ უგუნურობად, მსხვერპლი – ჯალათად და ჯალათი – მსხვერპლად, თავისუფლებისათვის მებრძოლი ხალხი კი – უპასუხისმგებლო ბრბოდ.

ერთი ცნობილი საგვარეულო, რომელიც დიდი

გავლენით სარგებლობდა სვანეთში, გადაწყვეტს, ძალაუფლება ჩაიგდოს ხელში და თავი მთის ბატონ-ბატონად გამოაცხადოს. საიდუმლო შეკრებაზე მიღებულ გადაწყვეტილებას ფარულად აცნობებენ ზემო სოფლებში მცხოვრებ გვარლიანებს, დათქმულ დროს კი სახალხო ყრილობაზე იწვევენ ბეროს მკვიდრთ და მათგან დამორჩილებას ითხოვენ, წინააღმდეგ შემთხვევაში ძალისმიერი გზით აპირებენ ანგარიშსწორებას. „თავისუფალი მთიელი ხელებზე ბორკილს, პირზე კლიტეს, ფეხებზე ხუნდებს არ დაიდებს“ (დავით შემოქმედელი), არც სხვას მისცემს ამის უფლებას, თავისუფლებისათვის სიკვდილს ამჯობინებს მონობაში ყოფნას. როგორც ყაზბეგის მოხვედები ვერ ეგუებოდა თავისუფლების გარეშე ცხოვრებას, ნუგზარ ერისთავის ბატონობის უღელს, ისე მიუღებელია სვანების ერთი თემისათვის მეორის გაბატონების სურვილი. მოძალადენი „ცხო ხალხად“ იქცევიან ერთმანეთისთვის – „გავწყდეთ ხალხო და ცხო ხალხს კი ნუ ვიბატონებთ!“ ამ სიტყვებს ონისე წარმოთქვამს სამების ეზოში. ჯამლეთ სალიანიც თავისი გვარის სათქმელს ამბობს, დავიხოცებით და თავისუფლებას არ დავთმობთ. ერთი მგზნებრე მოწოდებაც და თავდაცვის ინსტინქტით გაერთიანებული ხალხი ფოლადის ცივ მუშტად შეკრული ებგერა მოწინააღმდეგეს. „სისხლიან სასაკლაოდ იქცა დილის ცვრით პირდაბანილი ველი. ბროწეულისგულ-ისფრად შეიღება იქაურობა. ომის ღმერთი – არვისი ზეიმობდა“... (დავით შემოქმედელი).

ფრაზით, – „თანატოსს ცივი, ყინულის ხელები შემოეხვია მთისთვის და სასიკვდილო სარეცელზე აწვენდა“, – მწერალი მიანიშნებს, რომ ძმათაშვილელი ომის სახით მთის საკრალურ სიწმინდეს განადგურება ელის. შურისძიების შიშითა და საშუალო მონობისაგან თავდაცვის ბრმა ინსტინქტით მოქმედი სალიანები გადაწყვეტენ, გვარლიანების გვარში არც ერთი მამაკაცი არ დაინდონ, მათ შორის მცირეწლოვანი ბავშვებიც. ექსპრესიული დასაწყისი, ცივი და უსუსური მთვარით განათებული ღამე, მთრახივით დაქნული ბილიკები, მთვარის ნახევარტონები და რუს ჩხრიალი, რომელიც საამბურ რაკრაკად კი არ ჩაესმის ყურს, არამედ, მოშლილი ფანდურის შეუწყობელ ბგერებად, იმთავითვე მოვლენების საბედისწერო განვითარებაზე მიანიშნებს მკითხველს. შურისძიების წყურვილით გამხეცებულ ადამიანთა გაუგონარი სისასტიკის მსხვერპლნი ხდებიან ბავშვები.

გვარლიანების უკანასკნელი ნაშიერი თავშესაფრის თხოვნით სწორედ ჯამლეთ სალიანის მეუღლეს მიაკითხავს. ქალი ბავშვს ჩუმად გადაამალავს, ხოლო როცა ბრბო მისი სახლის ზღურბლს მიადგება, საკუთარ შვილს ჩაუგდებს ხელთ დასაჯიჯგნად. ბრბომ ისე აღისრულა სურვილი, არც კი იცოდა, ვის მოუსწრაფა სიცოცხლე. გულიზარმა თავზარს სცემდა სალიანთა ნამოქმედარი, აძრწუნებდა იმაზე ფიქრი,

რომ გვარლიანთა გვარი უძეოდ უნდა გადაგებულიყო. სისასტიკე ყოველგვარ საზღვარს სცილდებოდა. თავისი ხალხის უმძიმესი ცოდვის გამოსყიდვის გზა ვერა და ვერ გამოენახა, მერე კი მოვლენები თავისთავად წარიმართა... ჩადენილი ცოდვის გამოსყიდვა ისეთი დიდი მსხვერპლგაღებითაც კი, როგორც დედის მიერ საკუთარი შვილის გაწირვაა, სათუთა – ამაზე მეტყველებს რიტორიკული შეკითხვა, რომელიც ნაწარმოების დასასრულს გაისმის: „ცის დასალიერზე სუსტად მოციაგე მკრთალი მთვარე შეძლებდა კი ცოდვით დამძიმებული მიწის განათებას?!“ ნაჩვენებია ადამიანური ფსიქიკის გრადაციები, რაც წამის უსწრაფესად ცვლის ვითარებას, მსხვერპლს მოძალადედ აქცევს და ჯალათობის მსურველს – მსხვერპლად. სახიფათო ზღვარზე შემდგარი ხალხის მასისათვის შემახილიც საკმარისია, რომ ცივ, ბეტონის მასად იქცეს და ყველაფერი ერთბაშად წააღებოს, რაც გზად შეხვდება. ეს ბრბოს ინსტინქტია, გონების დაბნელების ჟამი, რომელიც გულის კარს უხშობს ადამიანებს. პიროვნული ნება ეგზალტირებულთა მასაში ითქვიფება და მექანიკურად იწყებს ქმედებას. ბობოქრობს, იზავთება, ბრძანებას ელის, რომ დაუყოვნებლივ აღასრულოს. ყველას ეშმაკის თითო ქვა უპყრია ხელთ. აღარც თანაგრძნობა, აღარც სინდისის ქენჯნა, აღარც საკუთარ ქმედებაში – დაეჭვება. გულიზარმა მხეცად ქცეულ ბრბოს საკუთარი შვილი გადასცა ჩასაქოლად – ეს კი საკუთარი ხალხის უმძიმესი ცოდვის გამოსყიდვის მაცხოვრისეული გზის აღუზიანა.

ისე კი თავისთავად უნდა შეენიშნოთ, რომ ქართველ ქალთა ლიტერატურულ გალერეას ჰყავს ორი, დღეიდან, ალბათ უკვე, ორი განსაკუთრებული ასული – კოლხი მედეა და სვანი გულიზარი, რომელთაგან ორივე ქართული სულის ანასხლეტია, მარადქალურის გამოხატულება, ოლონდ განსხვავებული, სხვადასხვა რეგისტრშია თითოეული მათგანის საქციელი, ქმედება აყვანილი და სხვადასხვაგვარი კვალიფიკაცია ეძლევა. ერთ შემთხვევაში ქალი, რომელიც საკუთარ შვილებს მოუსპობს სიცოცხლეს შურისძიების მიზნით და, მეორე შემთხვევაში, ქალი, რომელიც საკუთარ შვილს გაიდებს მსხვერპლად, იმისათვის, რომ გამოისყიდოს საკუთარი ხალხის მიერ ჩადენილი უმძიმესი ცოდვა. გულიზარმა მხეცად ქცეულ ბრბოს საკუთარი შვილი გადასცა ჩასაქოლად – ეს კი თავისი ხალხის უმძიმესი ცოდვის გამოსყიდვის მაცხოვრისეული გზის აღუზიანა განლაგვით. აი, ეს იყო ის, რაც მე მინდოდა დღეს თქვენთვის დავით შემოქმედელის მოთხრობების შესახებ გამეზიარებინა და, ვფიქრობ, თავად მოთხრობათა გაცნობა-წაკითხვა გაცილებით უფრო მეტ და საინტერესო საფიქრალსა თუ შთაბეჭდილებას ალგიძრავთ და სიამოვნებას მოგანიჭებთ.

# ერთი ლექსი

## მისიცი თუ მანიშვილი



### სულო, ილოცე...

სულო, ილოცე, მარჯვენა ხელმა არ მიუტანოს მარცხენას ამბად და არ გაიგოს ქვეყანამ მთელმა (ესაა ღმერთის წყალობა ალბათ),

რომ მან გაუღო მტრედებს გალია და აღასრულა ფრინველთა ფიქრი, დავიწყებულნი ნეტარ არიან დაუსაბამო საფლავთა შიგნით.

სულო, ილოცე, მარჯვენა მხარმა არ დაიჩივლოს მარცხენა მხართან და ტკივილი არ უქციოს ხარკად (ტანჯვა არაა სიცოცხლის გარდა),

მისი ნაზიდი რომ ღვთის ჯვარია და თავს ახსენებს ჭრილობა ხშირად, დავიწყებულნი ნეტარ არიან დაუსაბამო საფლავთა შინა.

სულო, ილოცე, მარჯვენა თვალმა ამაოდ არ თქვას მარცხენა თვალთან და სინანულის არ დასწვას ალმა საგანსვენებო აღსავლის კართან,

რომ ჰგავს ანკარა ზეცას მთვარიანს მარადიული განგების მორჩილს, დავიწყებულნი ნეტარ არიან დაუსაბამო საფლავთა ბროლში.

სულო, ილოცე, თუკი გახსოვარ, სასოწარკვეთით არ იგრძნოს გულმა, გულმა, რომელსაც, ვითარც მაცხოვარს, ანგელოზები დასდევენ გუნდად,

რომ სამუდამო დღე და ღამეა იგია მტრების მსახური მუნჯი, დავიწყებულნი ნეტარ არიან დაუსაბამო საფლავთა გულში.

სულო, ილოცე, მომფინე ძილი, ის, ღმერთობამდე კაცს რაც აკლია, (მის წამებაში ყველას აქვს წვლილი, მაინც მის გულში ყველას სახლია),

რომ ამაღლების მექცეს მანიად მე საკუთარი მშვიდობის პიკი, დავიწყებულნი ნეტარ არიან დაუსაბამო საფლავებს იქით.

სულო, ილოცე, ვითარც იაკობს მასიზმრე კიბე ცისკენ აწვდილი, შენ, ჩემეულო თვალთა ციაგო სინათლეს მადლის ჯვრიდან მაწვდიდი,

მზით რომ მოსავდა დედა მარიამს წმინდა ვარსკვლავთა სამეფოს ელჩი, დავიწყებულნი ნეტარ არიან დაუსაბამო საფლავთა მტკერში.


სულო, ილოცე, ცის გახსნის ამბავს თუ მომიტანენ მთაზე მტრედები, თუ საკმეველი პლანეტას განბანს, რომ სარკმელიდან ჩანდეს ედემი,

არა ვთქვა: ჩემი ცისკრის ჟამია, ნასიზმარევი ათასწლის წინათ, დავიწყებულნი ნეტარ არიან დაუსაბამო საფლავთა შინა.

სულო, ილოცე, მარტის პეპლებად აამთოვარე ჩემი სანთელი, წლები განსაცდელს თუ ემსხვერპლება, „წმინდა ქაოსში“ გავიფანტები,

ამაოების ჟღერდეს არიად, – (მე უპასუხო ქვესკნელში ვთვლემდე) დავიწყებულნი ნეტარ არიან ამაღლების და აღდგომის შემდეგ.





უცნობი

ჰერბერტი

პაპის პრელატი ქს. იანუშ პაშერბი ესაუბრება **ზბიგნეჲ ჰერბერტს** – „კალმის შოპენს“, განუმეორებელი შემოქმედებითი და მორალური ავტორიტეტის მქონე, ტოლდაუდებელ პოლონელ პოეტს, ესეისტს, დრამატურგს, ცნობილი პოეტური ციკლის „პან კოვოტოს“ შემქმნელს, რადიო პიესის ავტორს;

ზბიგნეჲ ჰერბერტი თეთრი არწივის ორდენის რაინდი. განათლებით ეკონომისტი, იურისტი და ფილოსოფოსი, სწავლობდა კრაკოვის ხელოვნების აკადემიაში. ოცი ლიტერატურული ჯილდოს მფლობელი. 1960-იანი წლების ბოლოდან ის იყო ლიტერატურული ნობელის ერთ-ერთი ყველაზე სერიოზული კანდიდატი. მისი წიგნები მსოფლიოს 38 ენაზეა თარგმნილი.

მოგ ზაური, მექალთანე, მარტოსული, ემპათიური დამკვირვებელი, ალკოჰოლთნ და საკუთარ დემონებთან მებრძოლი გენიოსი პოეტი, ჰუმანისტი და მოაზროვნე.

**იანუშ სტანისლავ ანტონი პაშერბი** Janusz Stanisław Antoni Pasierb (7.01.1929 ლუბავა – 15.12.1993 ვარშავა) – პოლონელი გამოჩენილი სასულიერო მოღვაწე, მოძღვარი, მეცნიერი, პოეტი, პედაგოგი, კულტუროლოგი და ხელოვნებათმცოდნე;

კათოლიკური თეოლოგიის აკადემიის კარდინალ სტეფან ვიშინსკის სახელობის უნივერსიტეტის სრული პროფესორი, პელპლინის უმაღლესი სასულიერო სემინარიის პროფესორი, მისი უწმინდესობის, რომის პაპის, პრელატი, მრავალი საერთაშორისო და ეროვნული სამეცნიერო ასოციაციის წევრი, მრავალი ჯილდოსა და პრიზის ლაურეატი მფლობელი.

ასევე იყო მრავალი გამოფენის სცენარის ავტორი და ინსპირატორი, კონკურსების ჟიურის წევრი, პოლონეთსა და მის საზღვრებს გარეთ სახელგანთქმული მოქადაგე და ლექტორი, ვისი ბიბლიოგრაფიაც ოთხასზე მეტ დასახელებას მოიცავს, მათ შორისაა რამდენიმე ენაზე თარგმნილი ესეების შვიდი ტომი და თვრამეტი პოეტური კრებული.

**პირველწყარო:** უცნობი ჰერბერტი. საუბრები. ვარშავა. *Zeszyty Literackie*, 2008.

საუბრის ქართული თარგმანი პოლონურენოვანი ორიენტირებული მცირედ შეკვეცილი სახეა.

ჰერბერტის არქივიდან. იბეჭდება კატაჟინა ჰერბერტისა და მემკვიდრეების ნებართვით.

საუბარი, სავარაუდოდ, შედგა 1973 წელს. ავტორიზებულია 1975-ში. (კ. ჰერბერტის ინფორმაცია)

**ქსენდი იანუშ პაშერბი:** „პოლონურის მასწავლებელი“ რომ ვყოფილიყავი, იქნებ საუბარი თქვენს ლექსებში რელიგიური მოტივებიდან დამეწყო, მეტადრე ქრისტიანულიდან.

**ზბიგნეჲ ჰერბერტი:** მაგრამ ჩემს ნაწერებს არა ეს მოტივები, არამედ ფასეულობათა ტაბულა განსაზღვრავს. ეს განმასხვავებს მე პოეტების მომდევნო თაობისგან. ჩემი „ქრისტიანული სკოლა“ ნიჰილიზმისგან თავდაცვავა. მე მინახავს კულტურის სიკვდილი. მინახავს, როგორ იწვის ბიბლიოთეკა. ციკრონი და ბიბლია იმავე ალით იწვის, რითაც Mein Kampf.

ი.პ.: ჩვენი ცხოვრებისეული გამოცდილების ძირი კვდომაა. კულტურის სიკვდილი, ქრისტიანობის სიკვდილი, ღმერთის სიკვდილი... რაოდენ მძლავრად

უნდა გქონდეს გადგმული ფესვები იმაში, რაც ცოცხალი და სიცოცხლის მომცემია, რომ სასოწარკვეთაში არ ჩავარდე.

ზ.პ.: ოჯახი და რელიგია... ეს განგვსაზღვრავს ჩვენ. პოლონეთში განსაკუთრებით გვაქვს რელიგიისადმი ემოციური დამოკიდებულება. რელიგიისადმი მგრძნობიარე ადამიანად ბებიათ გამხადა, სომეხმა, მშვენიერი ყურებითა და ლამაზი კანით... ის თექვსმეტი წლის იყო, როდესაც პაპაჩემზე დაქორწინდა, ცნობილ ადვოკატზე, რომელიც ინგლისიდან ჩამოვიდა და სიცოცხლე თვითმკვლელობით დაასრულა. ოცდაორი წლის ქვრივი დატოვა. მამაჩემი პოზიტივისტი იყო, ორგანიზატორი. იგი ჭუჭყსა და უწესრიგობაზე ძლიერ ბრახობდა. მეშინოდა მამის. იცოდა, რომ ლაბილური ვიყავი და საბოლოოდ ხელოვნებას ავირჩევდი.

ის თავად მაღალადა საკუთარ თავში ხელოვანსა და პოეტს. და მან იცოდა, რომ გავანადგურებდი იმას, რისთვისაც იბრძოდა, კარიკატურად ვაქცევდი. მას ჰქონდა სიბრძნე, ცხოვრებას მასწავლიდა.

ი.პ.: ქრისტიანად თვლიდა თავს?

ზ.პ.: იყო აბსოლუტურად ანტი. უყვარდა ბებია და ცდილობდა მის სწორ გზაზე დაყენებას. ბებია წმინდანი იყო. მის ცხოვრებაში მხოლოდ ტკივილი, მხოლოდ ტანჯვა იყო და, ამავე დროს, როგორი დიდებულება!... ბედნიერი იყო. ახლახან დასავლეთში მომცეს წიგნი იმის შესახებ, როგორ ვიყო ბედნიერი, ორგანიზმის თეორიის შესახებ და მისთანანი. გავიფიქრე, ბებია არასოდეს ყოფილა ბედნიერი სექსუალურად. საერთოდ მორიდებული იყო, მორცხვი... ნამდვილად დიდებული ცხოვრება ჰქონდა. მესამე ორდენის<sup>1</sup> წევრი იყო. მამა დასცინოდა. მუდმივად დამორცხვებული იყო თავისი გულითადობის გამო. მას პენსია ღარიბების დასახმარებლად არ ჰყოფნიდა. მამას ზოგჯერ ქვითრები მოსდიოდა გადასახდელად... ბებია მუდმივად თავს იცავდა, მაგრამ არასოდეს იმით, რომ უფალმა იესომ ასე თქვა... არგუმენტად არასოდეს იყენებდა რელიგიურობას, რომ ასეა საჭირო ცხოვრება. არავის აიძულებდა, მისთვის მიებადა. მიაჩნდა, რომ მათ, ვინც სხვაგვარად იქცევა, თავიანთი მოსაზრებები აქვთ. როცა მოდიან, უნდა მიიღო. როგორც ანგელოზები. არაფერს იგონებდა. არავითარი წიგნები და ლექსები. მუდამ ჩემთანაა. ფსიქოანალიტიკოსებთან რომ მივსულიყავი, ბებიას თავიდან ამომიგებდნენ.

ი.პ.: კიდევ კარგი ფროიდი ბებიებს არ მისწავდა... ეს დიდი ბედნიერებაა, შეგხვდეს სახარების ასეთი ხორცშესხმა, ასეთი კვინტესენცია.

ზ.პ.: ღიახ.

ი.პ.: მთელი სიცოცხლე ისე შეიძლება გაატარო, რომ ასეთს არავის გადაეყარო. თქვენ იცნობთ ძალიან ბევრ მორწმუნეს. სხვაშიც შეგხვედრიათ ასეთი დატვირთვა? იეჟი ზავეისკი<sup>2</sup> თავისებური, გულში ჩამწვლომი წმინდანი იყო.

ზ.პ.: ღიახ. ძალიან მიყვარდა იგი, მაგრამ მასში იყო ისეთი სხივი, რომელიც ინთებოდა და ქრებოდა. ჩემშიც არის. ამიტომ არ მინდოდა კათოლიკური პოეტი ვყოფილიყავი. არ მინდოდა, მეთაღლითა. როდესაც ის სხივი ჩემში ქრება, უნდა ვიმკრეხელო, რომ ნათელი გამოვიხმო. ბებიაში არ იყო მკრეხელობა, იყო მორჩილება. მასში ნათელი არასოდეს ქრებოდა... ბებიას უფრო მოკლავდი, ვიდრე რწმენას მოწყვეტდი. ამასთან ერთად, სულაც არ მიაჩნდა, რომ ღმერთს მისთვის რამე უნდა გაეკეთებინა, დახმარებოდა. თვლიდა, რომ ღმერთი უბრალოდ არსებობს და იგი მასთან იყო... როგორც წყალი. წყალი, რომელშიც არის ნათელი, ღრმა დინება. არ იყო უჭკუო. მე განვასხვავებ ინტელექტსა და სი-

ბრძნეს: ბებია არ იყო ინტელექტუალი. იგი ჰკვირავდა იყო. ლოცულობდა, კითხულობდა ნოვენებს<sup>3</sup>, ლოცვას ადავლენდა წმ. ფრანცისკე ასიზელისადმი... ისეთებს, ლოცვანში რომ არ არის, რაღაც პანთეისტურს? როგორც ქმნილების მადიდებელი წმ. ფრანცისკეს საგალობელი და რომელსაც ვუკითხავდი ჩემს ამერიკელ სტუდენტებს. ეს ერთადერთი მოხვდით გულზე მთელი ქრისტიანობიდან. კარგია ყველაფერი, რასაც უფალი თავისი სიყვარულით მოიცავს. მე არ მესმის, რატომ დაილუპა ჩემი მეგობარი. ბებია იცოდა, რომ არსებობს რაღაც გეგმა და რომ თვითონ ძალიან ცუდად უწყობს ხელს მის განხორციელებას. არ სურდა სამყაროს გარდაქმნა ისე, როგორც მამას, არამედ მიღება.

ი.პ.: მშურს თქვენი ასეთი აღჭურვილობა ცხოვრების გზაზე. და მაინც, როგორიც არ უნდა იყოს საწყისი წერტილი, საკუთარი გამოცდილება უნდა დაგვაროვოთ. რწმენაც კი, ან იქნებ, სწორედაც რომ, განსაკუთრებით რწმენა, ემორჩილება კრიზისის კანონს.

ზ.პ.: ეგ გამოვიარე. მინახავს, როგორ კვდიან ადამიანები. ვიცოდი, რაც არ უნდა მომხდარიყო, ბებია ზეცაში წავიდოდა. გამოვიმუშავე გულუბრყვილო მეტაფიზიკა, თუ ადამიანს გარდაცვალების მომენტში აქვს რწმენის ძალა, როგორიც ბოლომდე ჰქონდა ბებიას, მაშინ ის გააღწევს იმ საშინელი საბურველის მერე მხარეს, ხოლო, თუ გარდაიცვლება, როგორც ცხოველი, მაშინ უკვე სამუდამოდ მოკვდება. ვიცი, რომ ეს არის ჩემი წერა. დავიტანჯები, უარყოფ, ვიტყვი, რომ ვერ ვხედავ ამ საბურველს. რაღაც ღირსება მაინც მექნება შენარჩუნებული ღმერთის წინაშე... ვისურვებდი, ჩემი საკუთარი გამოცდილება დამეგროვებინა, თუნდაც ცუდი, იქნებ სულაც ღმერთის, ეკლის გვირგვინდადგმული იესოს რწმენის გამანადგურებელი. შემიძლია, მუხლებზე დავეცე, მაგრამ კათოლიკური ეკლესია, რომელიც საშინელი სიკვდილით სჯიდა ერეტიკოსებს, ახლა უარს ამბობს... და რად იქცევა?

ი.პ.: სადისკუსიო კლუბად? ადამიანები, ვინც საყრდენს ეძებენ, ტკივილით შეჰყურებენ, როგორ აკლდება ეკლესიას თავდაჯერება, როგორ ხდება ნაკლებად მბრძანებლური, ნაკლებად ავტორიტეტული, მაგრამ იქნებ ამით კიდევაც ემსგავსება იესოს, რომელიც იყო „მშვიდი და გულდა“<sup>4</sup>. იქნებ ჩვენ ჩავთვალეთ ეკლესიის განმსაზღვრელ სახედ ის ფორმა, რაც მან უფრო გვიან მიიღო?

ზ.პ.: ბავშვობაში მყავდა ტაძრის წინამძღვარი, გვარად სოკოლოვსკი. კათოლიკური ეკლესიის ნამდვილი სერჟანტი. წირვის დროს ვემსახურებოდი ხოლმე. მისი საყვარელი გამოთქმა იყო – „გაჩუმიდი, როცა მე შელაპარაკები“.

ი.პ.: ზუსტად. ბებია კი არ ჰგავდა სერჟანტს.

ზ.პ.: ჩემმა მეგობარმა, რომელიც ციხეში იყო ნაჯდომი ჩემს ლექსზე, ბატონი კოგიტო გამოსყიდვის შესახებ, მითხრა: ზბიშეკ, შენ მე რელიგიურად შემძარი. მიყვარს ეს ლექსი. კაშას4 არ უყვარს.

ი.პ.: იქ თქვენ წერთ, რომ ასე დაბლა დაშვება არ შეიძლება, რომ ღმერთს არ უნდა გამოვეზავნა თავისი შვილი. ფაქტია, რომ ხორციელი შობა ნამდვილად არის რწმენის უდიდესი გამოცდა და დამდაბლება, რომლის უარყოფის მცდელობები იყო უდიდესი მწვალებლობა: ნესტორიანიზმი, მონოფიზიტობა, დოკეტიზმი გარკვეულ წილად. თუნდაც მხოლოდ განსხეულებული, და მით უფრო ტანჯული და მომაკვდავი იესო, იყო შეუსაბამობა, ღვთიური ძალის კომპრომეტაცია.

ზ.პ.: იესო ჩემთვის ხელშესახები სახეა. ლექსში, პროცესის მარგინალზე, მინდოდა დამეწერა, რომ ებრაელები არ იყვნენ დამნაშავენი. და ეს სისხლი მათ კისერზე არ არის. სინედრიონი არასოდეს ასამართლებდა ღამით. Ius gladii (მახვილის სამართლი) რომაელების ხელში იყო.

### „შეიძლება უსახური ყოფილიყო ვნებადაცლილი“

ერთნი დიდებით კვებიან, სხვანი ასეთ დამცირებაში. მომაკვდავი ადამიანი ბევრი გვინახავს ფოტოებზე... ტოლედოში არის ელ გრეკოს გრაფ ორგანის დაკრძალვა. ერთმა ქალმა, რომელმაც შემდეგ თავი მოიკლა, დაწერა: „ჩვენი სიკვდილი დიდებაში უნდა ხდებოდეს და არა განავალში“...

ი.პ.: მიფიქრია ამაზე მამა კოლბეს წმინდანად შერაცხვისას. როდესაც ბენინის „დიდება“-ში ჩნდება ადამიანი, რომელიც მარტოობაში კვდება შიმშილით, შიშველი. გავიფიქრე, რომ ჰიტლერიზმის ყველა მსხვერპლი საკურთხეველის ბრწყინვალეობაში აღზევდა სიბნელიდან, დამცირებიდან. რომ ეს არის ნამდვილი დასასრული იმ დიდი ომის. ჰიტლერელების ჩამოხრჩობა კი არა, არამედ იმის ჩვენება, რომ სწორედ მათ მსხვერპლთან არის სიმართლე, რომ მათი სიკვდილი ნათლით მოცულია.

ზ.პ.: ადამიანებს უნდა ვუთხრათ, რომ უკეთესები არიან, ვიდრე სინამდვილეში.

ი.პ.: სხვაგვარად დაიჯერებენ, რომ იმაზე უარესები არიან, ვიდრე არიან.

ზ.პ.: ადამიანი ის არის, რაც სურს, რომ იყოს. ხორცის და ოცნების კავშირი. ლექსების წერას არ აქვს აზრი. ის მხოლოდ იმისთვისაა, რომ ვიღაც გადაარჩინოს, დაიხსნას, გარკვეული აზრით. ზოგჯერ ქუჩაში რომ მივდივარ, აქ თუ პარიზში, თავში გამიელვებს ხოლმე, რომ ჩემ შემდეგ არაფერი დარჩება.

ი.პ.: თვითონვე უარყოფთ ამას თქვენი მწერლობით.

ზ.პ.: უდიდესი იმედგაცრუება ვარ ჩემთან მოსული ადამიანებისთვის: არ ვარ პოეტი. ჩემთან ყოველი შეხ-

ვედრა იმედგაცრუებაა. ხალხს წარმოუდგენია, რომ ვარ საოცრად კულტურული, დიდი თავით, ბერძნებს კკითხულობ...

ი.პ.: განსაკუთრებით დასაწყისში, მიმართავდით აპოლონს, ათენას, მარკ ავრელიუსს, წერდით მეფე მიდასის შესახებ, არიონზე, ბერძნულ ლარნაკებზე, ტროაზე, ნიკეზე, რომელიც ორჭოფობს... ხმელთაშუაზღვისპირეთში მოგზაურობა თავდაბლად, ან იქნებ ჭირვეულად, ბარბაროსის ბაღში ყოფნად მონათლეთ. სულ ახლახანსაც, რატომ „კლასიკოსები“-ს წერისას ანტიკურობის დიდი გაკვეთილი ჩავკვიტარეთ: ხელოვნება სიღრმისეული და მამაკაცური უნდა იყოს.

ზ.პ.: ეს დაკავშირებულია იმ საფრთხესთან, რაც კულტურას ემუქრება. კულტურა შენაძენია და არა მემკვიდრეობა. ახალი ენის შესწავლაა. მარსზე გამგზავრება კი არ არის, არამედ ჩვენი ცივილიზაციის სათავეების გააზრება. ლათინურად კკითხულობ. ახლახან უნივერსიტეტში ბერძნულის სწავლა მინდოდა, მაგრამ არ მიმიღეს. მე გრამატიკა მჭირდება. გული მწყდება, რომ არ ვიცი ებრაული... ერთმა რეცენზენტმა კულტურული ჭიანჭველა მიწოდა.

ი.პ.: თავად ბრძანეთ, რომ არ ხართ პოეტი, აბა, ვინ ხართ?

ზ.პ.: ადამიანი, რომელსაც არ აქვს, მაგალითად, მკურნალობის ან ჭურჭლის სარეცხი ფხვნილის გამოგონების უნარი. სურს იმოქმედოს, ვინმეს დაეხმაროს, რომ მეტ ადამიანამდე მიაღწიოს, ვიდრე ეს ბებიაჩემმა შეძლო. „ლიტერატურობა“ არასოდეს მისწავლია. ვერ ვიტან კაფეებს. მაგალითად, აი, იმას ლიტერატურულ კავშირში. ვერ ვიტან იქაურ საუბრებს სულზე. მე მატერიის სფეროში ვცხოვრობ...

ი.პ.: ეგ სულის სფერო კი არა, ასოთა სფეროა.

ზ.პ.: ბიოლოგიით ვსაზრდობ, კკითხულობ ცხოველების, ხეების, ფრინველების შესახებ, ფიზიკაზე, კვარკებზე... ანუ ლიტერატურა შეიძლება ყოფილიყო რაღაც, რომ არა ის, რაც არის.

ი.პ.: ხომ არ გრძნობთ, რომ აქ, ჩვენთან, აღმოსავლეთში, მიუხედავად ყველაფრისა, ის უფრო მეტს ნიშნავს და აკეთებს, ვიდრე დასავლეთში? იქ ყველაფრის თქმა შეიძლება, მაგრამ არაფერი მოახდენს შთაბეჭდილებას. ამიტომ აქ ყოფნა ღირს.

ზ.პ.: დიას. დიას, ვიცი, რომ აქ არის რაღაც რეზონანსი. აქ ისე ვარ, როგორც ვიოლინო ბუდეში.

ი.პ.: რა კარგი შედარებაა (მაპატიეთ, ოსტატო!), განსაკუთრებით, თუ ძველებურ ვიოლინოს ელექტროვიტარას შევადარებთ.

ზ.პ.: აქ ძველთაძველი ხალხია. აქ კითხულობენ. ვიცი, რომ მყავს უცნობი მკითხველები. არის რაღაც ერთობა იმას შორის, რასაც ვწერ და ვინც ვარ. ეს დასავლეთში დაკარგულია. ჩემმა მეგობარმა, ტედ ჰიუზმა ერთხელ ლუდხანაში მითხრა (საშინელი ალკოჰოლი!): მისმინე, ზბიგნევე, შენ შეგიძლია, დაწე-

რო წვნი, რომლის გამოც დაგიჭერენ. მე შემიძლია, დავწერო ინგლისის დედოფლის საწინააღმდეგო და ამისთვის ფულსაც გადამიხდიან. ამ ჯეელს ჩემი შურდა. ეს ჩემთვის აღმოჩენა იყო. მაგრამ უნდა ვაღიაროთ, რომ რაღაც კონცხზე ვცხოვრობთ.

ი.პ.: სად? კეთილი იმედის?

ზ.პ.: არა, ცუდი იმედის ... მაგრამ ოცი წლის შემდეგ, დასავლური ცივილიზაციის რიტმში შესვლით, როცა ტელევიზორში სიშიშველე დასაშვები გახდება და ვინც უფრო ჭკვიანი იქნება, მეტი მანქანა ექნება და ა.შ. მივალწვეთ იმას, რომ სხვა ქვეყნებს დავემსგავსებით. ადამიანებისთვის ეს იქნება მოთხოვნილებების დაკმაყოფილება (და დაუკმაყოფილებლობა). ჩემთვის ეს ბევრს არაფერს ნიშნავს... ჩემი აზრით, სამყარო ენტროპიისკენ მიექანება.

ი.პ.: პოტენციალების გათანაბრებისკენ. და ეს სიკვდილია.

ზ.პ.: და ეს სიკვდილია.

ი.პ.: რისი გადარჩენაა საჭირო? ამჟამინდელი სიტუაცია ხომ რაღაცას მაინც შველის? მთელი მისი არასრულფასოვნებით, მოუქნელობით...

ზ.პ.: უცნაური არასრულფასოვნების და საოცარი მოწყობის შედეგად რელიგია აქ უდიდეს როლს თამაშობს. მე ძალიან იშვიათად დავდივარ ტაძარში; ვთვლი, რომ ლოცვა ტყეშიც შეიძლება. საერთოდ, იშვიათად ვლოცულობ. ჩემი გულმზურვალეობა და სიამაყე გამოცდილებით დაითრგუნა. არ მაქვს გულთბილობა, სიკეთე, მიღების უნარი, რაც ბებიას ჰქონდა, უმთავრესის აქცეპტაციის, რაც ჰქონდა ჩემს ოსტატს, პროფესორ ელზენგერგს. იგი მრავალი რელიგიის ადამიანი იყო, მრავალი ფილოსოფიის... ადამიანის ფილოსოფიას მისდევდა, ვარშავა-ლვოვის ლოგისტების სკოლის წინააღმდეგ გამოვიდა. მე თავს ვიცავ ქვეყნიერებისაგან, რომელიც დგება. როგორი იქნება ფასეულობათა ტაბულა? თუ ჩაქრება მეტაფიზიკური კითხვები ცხოვრების აზრზე, ქვეყნიერებაზე, რობოტების თაობა შეიძლება მოვიდეს. შევხვედრივარ ასეთ ადამიანებს ამერიკაში. მე ეს ძალიან მტკიავს. თუმცა ვწერ ლექსებს, რომლებიც არ არის ძალიან კათოლიკური, ამ პრობლემატიკით ვცოცხლობ. სხვაგვარად არც ღირს ცხოვრება ისეთი ვინმეს შემთხვევაშიც კი, როგორიც მე ვარ, რადგან ვიცი, რომ ვერ გავალწევ იმ საბურველის მეორე მხარეს... ვცდილობ...

ი.პ.: ბევრ ესქატოლოგიურ ლექსს წერთ. მაგალითად, ოღონდ ანგელოზი არა.

ზ.პ.: მაგრამ ესეც... პროვოკაცია! გაიგეთ, ბოლოს და ბოლოს, ცხოვრებაში, რამის გასაკეთებლად, ორი ფრთაა საჭირო. ბებია ცალფრთიანი არსება იყო, საოცარი, სრულყოფილი, მე კი ეშმაკიც მყავს. აი, უფალ ღმერთს, სწორედაც რომ, ვერ ვხედავ, მაგრამ ვშრომობ, რომ იგი შევქმნა, და მაქვს პოლიტიკა, და

ჩემი ცუდი ხასიათი, და ვისურვებდი, ისტორიაში ვაჩვენოთ, რომ ტოლერანტობა კარგია, მე თვითონ კი არატოლერანტული ვარ... რამე რომ გააკეთო, ინკვიზიტორი უნდა იყო და შენმდობი.

ი.პ.: თქვენი ლექსები შემობრუნების, ან თუნდაც ძიების, საწინააღმდეგოდ მეტყველებენ. ჩვენებური ეშმა, მღვდლები და გლეხები, მალახოვსკის ხრამი, ეკლესიის თავი...

ზ.პ.: ეს დაცინვა არ არის.

ი.პ.: არა, არა, ცხადია. მაგრამ ეს მოტივები ხომ არ ხდება უკვე თქვენთვის, ან თუნდაც მკითხველისათვის, მხოლოდ რეკვიზიტები, პოლონური პეიზაჟის ელემენტები, ფოლკლორის ძეგლები ... ვშიშობ, ისინი უკვე ფუნქციონირებენ არა რელიგიურად, არამედ მხოლოდ საერო, ხალხოსნური ფორმით.

ზ.პ.: არ ვიცი. არ მეხერხება აბსტრაქტული საუბარი, მხოლოდ სახეებით. ამიტომ არ ვარ თეოლოგი.

ი.პ.: არც მე. ამიტომ შევეშვით ამას. მაგრამ თქვენ ქრისტეს „პროცესი“ გადაგაქვთ პოლიტიკურ სიბრტყეში. „მოხსენება სამოთხიდან“ არის კონკრეტული რეალობის აღწერა. ვფიქრობ, რომ, პირველში ერთგვარი განკონფესიებით, მეორეში კი რელიგიური მეტაფორიზმით, გსურდათ თქვენი გზავნილის ტევალობის გაზრდა. დრამაში „პოეტის რეკონსტრუქცია“, თუ საკუთარ თავს აიგივებთ პოეტთან, ჰომეროსთან, საუბრობთ ღმერთზე... ღმერთზე?:

**„მიმზიდველი**

**როგორც ყველაფერი რაც არ არსებობს“**

ზ.პ.: არასოდეს დამიწერია, რომ ღმერთი არ არსებობს. არასოდეს!

ი.პ.: ეს მართალია – შემდეგ კი:

**„პატივის მიზანმიმართული**

**შენი არ ყოფნის**

**სსქუღზე შხმებით“**

ხოლო ზემოთ წერთ, რომ ადამიანების ყვირილის თოკი ცარიელ მარყუჟად ბრუნდებოდა დედამიწაზე, რომ:

**„არც სისხლი**

**არც კვალი**

**არც სსქულის აზრი**

**შეუძლებელია, რომ შემხნა ღმერთი.“**

– ამ ერთხელ ვიქნები დოგმატიკოსი: – ეს თეოლოგიურად კორექტულია.

ზ.პ.: მე თეოლოგიის საწინააღმდეგოდ ვწერ. მე შემიძლია, ეს დავწერო.

ი.პ.: მაგრამ ბიბლიას ორივენი ვეთანხმებით.

ზ.პ.: ო, დიახ! ჩემი საყვარელი წიგნი რუთის წიგნია. მოთხრობა ქალზე, როგორ შეუყვარდა, გათხოვდა და იყო ბედნიერი. ეს რაღაც მინიშნებაა. ვფიქრობ, რომ უფალი საუბრობს ყველაფრიდან. რომ არსებობს. მე მას ვკარგავ, მაგრამ მიმაჩნია, რომ, თუ იგი ამდენ

ნიშნის მიგზავნის, ანუ ვინ მიგზავნის? ბებია?

ი.პ.: ვფიქრობ, რომ თითქმის ყოველთვის ეს ხდება იმ ადამიანების მეშვეობით, ვისაც ვუყვარვართ. მიუხედავად იმისა, ცოხცლობენ აქ თუ უკვე იქ. რუთის წიგნი... სიმშვიდის, ბედნიერების რელიგია... თქვენს მონატრებაში ქრისტიანობა არის სწორედ ასეთი რელიგია, აღსავსე შეგუებით, ნდობით, რწმენით განვითარების ძალსა და მორალურ პროგრესში, როგორცაა ხედავდნენ მას XV საუკუნის ჰუმანისტები, ან იქნებ, როგორც მიქელანჯელოს და სემპ შაჟინსკის 7 შემდგომი თაობები, მასში ხსნის დრამას ხედავთ,?

ზ.პ.: ის, რის შესახებაც საუბრობთ, მე მირტყამს... ეს უნდა იყოს უდიდესი დრამა, რომელიც ჩვენ ღირსებას გვძენს. არა, მე არ მსურს იოლი შეწყალება, ამიტომ არ დავდივარ აღსარებაზე. მე არ ვაღიარებ ადვილ შენდობას.

ი.პ.: დმერთს უფლება აქვს, იყოს გულმოწყალე.

ზ.პ.: ოდესღაც ვესაუბრებოდი ერთ ურწმუნოს (ეს ჩემთან საშინელი სიტყვაა), სასწაულ ადამიანს, რადგან ის ყველაფერს აკეთებს საკუთარი ბედნიერების საწინააღმდეგოდ... დიახ! შეინარჩუნო ამბოხების მთელი მხურვალეობა, მწვალებლობა, და, ამავე დროს, რწმენა, რომ ეკლესია არის ეკლესია და თუ იქ არ შევდივარ... ეს ნიშნავს: არ მსურს, ვიცრუო.

1. მესამე ორდენი – კათოლიკური მრევლის, დაოჯახებული ადამიანების, ერთობა. საერო და საეკლესიო წესრიგის ურთიერთკავშირი.
2. იეჟი ზავეისკი (Jerzy Zawieyski) – პოლონელი მწერალი, კათოლიკური საზოგადო მოღვაწე.
3. ნოვენები – კათოლიკური ლოცვის ერთ-ერთი ფორმა
4. კაშა – ზბიგნეჟ ჰერბერტის მეუღლე კატაჟინა ჰერბერტი
5. ტედ ჰიუზი (Edward James Hughes) – ინგლისელი პოეტი
6. ელზენბერგ (Henryk Elzenberg) – პოლონელი ფილოსოფოსი
7. სემპ შაჟინსკი (Mikolaj Sep Szarzyński) – პოლონელი პოეტი რენესანის და ბაროკოს ეპოქების მიჯნაზე.

*პოლონურიდან თარგმნა რუსუდან კიკაღვიშვილი-დომუხოვსკიმ*



## ზბიბნეჟ ჰიბბიხი

### ჩვენებური ეშმა

1

მეთე საუკუნის დასაწყისში დასავლეთიდან მოვიდა. ენერგიასა და მოსაზრებებს თავიდანვე აფრქვევდა. ყველგან მისი ჩლიქების ბაკუნი ისმოდა. ჰაერში ბელზებელის სუნი ტრიალებდა. ეს უმწიკვლო ქვეყანა, უფრო ჯოჯოხეთის ვიდრე ცის მახლობელი, მისთვის თითქოს აღთქმული მიწა იყო. ხალხის უმწიფარი სული შავი ცეცხლით ნათლობას თავადვე ითხოვდა გორაკებზე სამრეკლოები ირწვოდნენ. ბერები თავგებივით დასუნსულებდნენ სათლობით იღვრებოდა ნაკურთხი წყალი

2

სასახლეები და ქალაქები არენდით ალქიმის მაგისტრებს და მაგის შარლატანებს გადასცა. თავად ათივე ბრჭყალი ჯანსაღ ხორცში ჩაასო ხალხს – გლენკაცობას. სხეულში ღრმად აღწევდა, თუმცა კვალს არ ტოვებდა. დედისმკვლელები აშენებდნენ აღთქმულ სალოცავებს. მრუშ-მეძავეები ყელს იღვრებდნენ. ეშმაკით შეპყრობილები სულელურად იცინოდნენ. ანგელოზებს კუნთები უღუნდებოდათ. ადამიანები ჩლუნგ სათნოებაში ვარდებოდნენ.

3

ძალიან სწრაფად მოიშორა გოგირდის სიმყრალე. თივის უწყინარი სურნელის ფრქვევა დაიწყო. ცოტა არ იყოს სასმელსაც მიეძალა. საერთოდ დაკნინდა. ბოსელში შესული ძროხებს კულებსაც კი ვერ დაუგრეს. ღამ-ღამობით დედაკაცების ძუძუს კერტებსაც კი აღარ აწვალეს. მაგრამ ყველას წინ გაისტუმრებს. ჯიუტი როგორც სარეველა, ზარმაცი როგორც დაბლური.

### ჟამნი III

უფალო,  
დაგვეხმარე შევექმნათ ნაყოფი  
სიტყვების სუფთა ხატება  
ერთმანეთს შეახვედრე  
აისი – დაისი  
ზღვის ტალღებიდან დაიხსენი  
დვრინი სუფთა სიღრმეების და  
კიდევ გოგონა  
ბრმა როგორც ბედისწერა  
ბელკანტო – მომღერალი გოგონა

### ოღონდ არა ანგელოზი

სიკვდილის შემდეგ თუ ნიავექარის ბილიკებით მოარულ მშრალ ნაპერწკალად გადაქცევას დაგვიპირებენ – ამბობებაა საჭირო. ჰაერის წიაღში, ყვითელი დიდების ჩრდილში, სამარადჟამო განსვენება რა ბედენაა, ორგანოზომილებიანი გუნდების ბუტბუტში.  
ქვაში უნდა ჩასახლდე, ხეში, წყალში, კარიბჭის ღრეჩოში. უმჯობესია იატაკის ჭრაჭუნნი იყო, ვიდრე გამაოგნებლად გამჭვირვალე სრულყოფილება.

### მოხსენება სამოთხიდან

სამოთხეში სამუშაო კვირა ოცდაათ საათს გრძელდება  
ხელფასები მაღალია, ფასები მუდმივად ეცემა  
ფიზიკური შრომა არ ღლის (ნაკლები მიზიდულობის გამო)  
ხის ჭრა აქ ისეთივე რამეა რაც საბეჭდ მანქანაზე წერა  
საზოგადოებრივი წყობა სტაბილური მთავრობა გონიერი  
სხვა ნებისმიერ ქვეყანას სამოთხე ნამდვილად სჯობნის

თავდაპირველი ჩანაფიქრი სხვაგვარი იყო  
სხივმოსილი წრეები ქორალები და აბსტრაქციის საფეხურები  
მაგრამ ვერ მოხერხდა სხეულის სულისაგან  
სრული გამოწვილვა და ცად აღიოდა  
ცხიმის წვეთებით და ხორცის ნართით  
დასკვნების გამოტანა გახდა საჭირო  
აბსოლუტის მარცვალი თიხის მარცვალს უნდა შერეოდა  
კიდევ ერთი გადახვევა დოქტრინიდან უკანასკნელი გადახვევა  
ეს მხოლოდ იოანემ განჭვრიტა: ხორციელი მკვდრეთით აღდგომა

უფალს ხედავენ მხოლოდ მცირედნი იგი არსებობს სულით სუფთათვის  
დანარჩენი კი წარდგნებსა და სასწაულებზე ისმენენ გზავნილებს  
ღმერთს ოდესმე ყველა დაინახავს  
როდის მოხდება ეს არავინ იცის

ახლა კი შაბათის შუადღის თორმეტზე  
როცა საყვირები ტკბილად ღმუიან  
ფაბრიკებს ტოვებს ცის პროლეტარიატი  
ილღიაში ვიოლინოსავით უხერხულად ამოდებული ფრთებით

## ბატონი კოგიტო გამოსყიდვის შესახებ

არ უნდა გამოეგზავნა შვილი  
ძალიან ბევრმა ნახა  
ძის დალურსმნული ხელები  
მისი ჩვეულებრივი კანი

სურნელი მისი შიშის  
არ შეიძლება ასე დაშვება  
დაბლა  
დაძმობილება სისხლით

წერილ არისო ასე  
ერთობათა შორის უარესი  
ჩვენი ერთობისთვის

არ უნდა გამოეგზავნა შვილი  
უჯობეს იყო ემეფა  
მარმარილოს ღრუბლებიან ბაროკოს სასახლეში  
გაოგნების ტახტზე  
სიკვდილის კვერთხით


ძალიან ბევრმა ნესტომ  
სიამით შეისუნთქა

## ვარაუდები ბარაბას თემაზე

რა დაემართა ბარაბას? ვკითხულობ არავინ იცის  
ჯაჭვი შეხსნეს და გამოუშვეს ნათელ ქუჩაში  
საითაც უნდა იქით წავა მარჯვნივ წინ მარცხნივ  
ბუქნას დაუვლის სინარულით დაიფივლებს რა ენაღვლება  
იმპერატორი საკუთარი თავის ხელების  
უზენაესი უფალია თავისი სუნთქვის  
ვკითხულობ რადგან გარკვეულ სახით ამ საქმეში გახვეული მეც ხო ვიყავი  
ბრბოში ჩათრეული პილატეს კარის წინ აკი მეც სხვებივით  
ვყვიროდი გაუშვი ბარაბა ბარაბა გაუშვი  
ყველანი ყვიროდნენ ჩემი ღუმილი მარტოსული  
არას შეცვლიდა გარდაუვალი არ გადივლიდა

ბარაბა კი შეიძლება დაუბრუნდა თავის ბანდას  
მთებში ისევ ისე კლავს და გულდანდობით მარცვავეს  
ან იქნებ მეთუნეობაში დასაქმდა  
და ბოროტებით გასვრილ ხელებს  
თიხის ძერწვაში იწმენდს  
იქნებ მეთულუხე, მენახირე ან მევანშეა  
გემების პატრონი – ერთ-ერთით პავლე მიცურავდა კორინთელებთან  
ან – რაც გამორიცხული სულაც არ არის –  
რომაელების კმაყოფაზე მყოფი ჩამშვები  
აი ამას ჰქვია წუთისოფლის თამაში  
ბედ-იღბალი ფორტუნას ღიმილი

ნაზარეველი კი  
მარტო დარჩა  
არჩევანის გარეშე  
მკაფიო  
სისხლიანი  
კვალით



მამაცი ნაზარი

(ნაწყვეტი ზღაპარ-რომანიდან)

სომხურიდან თარგმნა მაყვალა გეურქოვა-საკიანმა

მკრტიჩ სარქისიანი (1924-2002) – გამოჩენილი სომეხი პოეტი, პროზაიკოსი და პუბლიცისტი. მას ჰქონდა მნიშვნელოვანი და მეგობრული კავშირები საქართველოსთან და ქართველ კოლეგებთან: კონსტანტინე გამსახურდია, იოსებ ნონეშვილი, ნოდარ დუმბაძე, გრიგოლ აბაშიძე, ჯანსუღ ჩარკვიანი, გიორგი ციციშვილი, მორის ფოცხიშვილი და სხვანი.

მ. სარქისიანმა შექმნა მემუარები შემდეგ თემატიკაზე: კ. გამსახურდიას „ოსტატთა შორის ოსტატი 1991, სტატიები“ ილია ჭავჭავაძე და სომხეთ-საქართველოს ძმობა, 1978“, ნოდარ დუმბაძის „მარადისობის კანონი“ და სხვა. მან სომხურად თარგმნა ვ. აბაშიძის, ვ. გაფრინდაშვილის, მ. მაჭავარიანის, მ. არაკვის ლექსები. მ. სარქისიანის ნაწარმოებები არაერთხელ ითარგმნა ქართულად და დაიბეჭდა ჟურნალ-გაზეთებში. 1987 წელს გამოიცა მისი წიგნი „მისჯილი ბედი“ (მოთხრობები და ზღაპრები). მწერლის 60 წლის იუბილესთან დაკავშირებით აგრეთვე გამოიცა საინფორმაციო ბუკლეტი მ. სარქისიანის შემოქმედების შესახებ.

კეთილი დილა გაგიტენდეთ თქვენცა და ნაზარა-შენსაც. მამალმა სამჯერ ყვილით სოფელს მზის ამოსვლა აუწყა, ის კი მხოლოდ მესამე ყვილის შემდეგ ამოიწვრა. ქვეყანამაც თავისი ჩვეული ხმაურით გაიღვიძა. ნახირი სოფლიდან მიმდგრებიისაკენ, საძოვრებისაკენ წარეკეს, რომელთაც რაინდული სიამაყითა და ნახირში თავისი მიჯნურების თანხლებით გათამამებული მოზვერი წინ გაუძღვა. მამალმა შურით შეხედა მას და ქანდარიდან დედლები ჩამორეკა, გარეთ გამოუშვა საქექადა და საარშიყოფ.

ნაზანი უკვე დიდი ხნის ამდგარი იყო. თხა ნახირს შეურია. სახედარს ერთი იღლია ბალახი დაუყარა. ახლა კი ტახტზე ნახევრად შიშველმა დაიწყო საკუთარი თავის წესრიგში მოყვანა. ნაზარს გაეღვიძა, მაგრამ ლოგინიდან ადგომა ეზარებოდა. აქეთ-იქით გვერდს იცვლიდა და თავს იმძინარებდა. ნახევრად ღია თვალებით ცოლს ათვალიერებდა: „ღმერთი ყველა სიკეთეს ერთს არ აძლევს. შეუძლია მზესაც შეეკამათოს: მზეო, შენ ნუ ამოხვალ, მე უნდა ამოვიდეთ“. მშვენიერია, მაგრამ მხოლოდ საალერსოდა და სასიყვარულოდაა დაბადებული. ღმერთს მისთვის დელობა ჩამოურთმევია და მხოლოდ ქალობა დაუტოვებია. ისიც შენ გერგო წილად, ახ, შე ნახევრად ბედნიერო და ნახევრად უბედურო ნაზარ. რა ეშველება შენს კეთილშობილ გვარს, გამგრძელებელი რომ არა ჰყავს?... ვინ უნდა გააღვიძოს შენი კერიის ცეცხლი შენს შემდეგ?... ვაი, შე უნაყოფო ნაზარ!“ – შემდეგ ხმადაბლა ჩაიჩურჩულა: – კარგი ხარ ნაზან, მაგრამ მე რა?..

ნაზანმა ხმა არ გასცა. თმებს იწნავდა და ფიქრობდა, თუ დღეს რით ერჩინა ოჯახი. თავიანთ ბოსტანში, რომელიც მთის ფერდობზე იყო, მწვანელი, ბოლოკი და კიტრი ჰქონდა დათესილი. საჭირო იყო წასვლა და დაკრეფა. არ უნდოდა ნაზარისთვის ეთქვა, რადგან ნაზარი თვითონ არ წავიდოდა და მასაც არ გაუშვებდა. იეჭვიანებდა. ეტყვიოდა, რომ

ფანოსის გოგოსთან ერთად წადიო. გოგონა ტერმარუქესთან (მღვდელი) წერა-კითხვას სწავლობს. ყველი, ერბო და ფქვილიც გათავებულა... ნაზარი კი მაგაზე სულაც არა ფიქრობს. ეგეთი ქმარიც დაემარხე. სად გაგონილა, ცოლმა ქმარი შეინახოს!..

- ნაზარ, ნაზარ...
- მიინავს, ნაზან, სიზმარში ვარ...
- ღმერთმა კეთილად აგინდინოს სიზმარი, ნაზარ...
- გვირგვინით თავზე მეფე ვარ, ნაზან, ხელს ნუ მიშლი, – ნაზარი ლოგინში წამოჯდა, – შე ოჯახამ ენებულო, რომ არ დაგეძახა, გვირგვინს არ დაგვარგავდი. რატომ არ დამაცადე მეფედ დაგეძღარიყავი... ბაღდადის ხურმასა ვჭამდი. ინდურ, დაშაქრულ ჩაისა ვსვამდი. შვიდი ცოლი მყავდა... კარგი და, ვთქვით ავდექი, საჭმელი რა გაქვს...
- შავი ჭირი და ღვთის ცეცხლი.
- როგორ თუ...
- შავი ჭირი და ცეცხლი. ბოსტანში წადი, კიტრი და მწვანელი მოიტანე, რომ საჭმელი რამ გვქონდეს. თუ არ წახვალ, შენ შავი ჭირი და ცეცხლიც გეყოფა. მაგით დაკმაყოფილდი...
- კაცო, მართალი უთქვამთ, რაღა, ცოლი რომ კარგი რამე იყოს, ღმერთსაც ეყოლებოდა. ქალობატონო, შენ ჯერ მეფის ტახტიდან ჩამომაგდე, ეგ არ გეყო, რომ ახლაც გინდა, რომ მეფე ბოსტანში წავიდეს? ეგ რა ჭკვიანური და მისაღები რამაა?..
- კარგი, მიწა კი დავაყარე მაგ შენს მეფე თავს, შენ არ მიდინარ, ნება დართე შენს დედოფალს მაინც, რომ თვითონ წავიდეს.
- ეგ ვინაა ჩემი დედოფალი? შენ? – სახე დაღრიჯა ნაზარმა და უფერული თვალები დაცინვისგან გაუელმდა. – შენ? ჩემთან ერთად უნდა გენახა ჩემი სიზმარი, რომ დარწმუნებულიყავი, თუ როგორია დედოფალი... თორემ ნაზანი დედოფალი... დედოფალი არა ერთი, თხის კული...
- ნაზარს ერთი გადარეული სიცილი აუვარდა.



იცინოდა და ჩაბჭირებული გორაობდა ლოგინში. სიცილისაგან იხრჩობოდა. თვალებიდან ცრემლი სდიოდა, გეგონება ვიღაც უღუტუნებდა.

– ნაზანი დედოფალი, ჰა, ჰა, ჰა, ჰა...

– ჭირი და გადაყოლა შენ. ეგ როგორ, ნაზარი მეფე იქნება, ნაზანი კი დედოფალი არა? აი, შე ცხვირის ტყირპო, საქონლის სატკივარო, არ გეყო?... ნაზანი გაბრაზდა. ხელში მატყლის გასაწკები

ჯოხი აღმოაჩნდა. ნაზარმა შიშისაგან საბანი თავზე წაიფარა და გაყუჩდა. ჯოხმა საბანი კარგად გაწკიპა, მტკერი აადინა. საბანქვეშიდან ისმოდა ნაზარის გოდება და მუღარა იმდენ ხანს, ვიდრე ნაზანი დაწყნარდა.

– დავმარხე შენი მეფე თავი, შემეშინდა საბანი არ დახეულიყო, თორემ მე შენ ისეთ მეფედ გაქცევდი, რომ შარშანდელი მიცვალებულებისათვის შეგენატრა...

– კარგი, ნაზან ჯან, – წყნარად თქვა ნაზარმა, – ამჯერად, შენი გულისთვის დაგთანხმდი, რომ წკეპლა მეჭამა, რათა დაწყნარებულიყავი. სხვა დროს აღარ ელოდო თანხმობას... ვაჟკაცურად ვიცემე, რომ ქალური სიბრაზე განგედევნა შენგან და ხელი არ შემლოდა ჩემს მამაკაცობას...

ნაზანი მას აღარ უსმენდა. თავის საქმეს შესდგომოდა. ეზოში ისმოდა ცოცხის რბილი მოსმის ხმა. ნაზარაშენის მინდვრებზე განთიადს ცვარი მოეფინა, ახლა კი მზის საშუალებით მივიდა ასხამდა მათ. მთებისაკენ მიმცურავი ბურუსი ორთქლდებოდა, ერეოდა ცის სილურჯებს. თონეების ბოლი ცისკენ იჭიმებოდა, პურის მომაჯადოებელ სურნელთან ერთად. ერთ უცოდველ მზეს თავისი სხივები ფეხების მსგავსად ჩამოეკიდა მთებიდან ძირს და მდინარის ვერცხლისფერ წყალში იბანდა. კეთილი დილა დასთენებოდა ნაზარაშენს.

– ნაზაან...

– რა იყო ნაზარ?

– რა იყო და... იმას ვამბობ, რომ რა კარგი იქნებოდა არა, რომ ქვეყანაზე მუდამ დღე იყოს?..

– მაშინ როდისღა ჩამაღლდებოდი დასაძინებლად, შე უსაქმურო?

– შენც თქვი რაღა. ვისაც ძილი უნდა მუდამაც იპოვის დროს დასაძინებლად. მე ვამბობ, რომ მუდამ დღე ყოფილიყო, მაშინ მშიშრების, ქურდების და ავაზაკების რიცხვი შემცირდებოდა, მეგელი და ნადირი ხალხს გზებზე აღარ დახვდებოდა. მართალს არ ვამბობ?..

– მართალია, მერე?..

– ქვეყანაზე ცხოვრება გაადვილდებოდა. არ მიყვარს ბნელი საქმეები. აი, მაგალითად, მე უკვე ვიფიქრე, რომ ცოტა რამე საქმეები, ესე იგი, ფული და სიმდიდრე ჩავიგდოთ ხელში. ახლა შენ დამეკითხები: – საიდან? ვისგან?.. ინდოეთიდან მომავალი ქარავენებისაგან, რომლებსაც მოაქვთ ოქრო და ვერცხლი, შალი და აბრეშუმი, ქიშიში და ხურმა, ბრინჯი და ნუში, რა არ გინდა. უნდა გავმარცხო, მოვიტანო და ავაგო ჩვენი სახლი. გვეყო, ასე ნახევრად მშიერი და შიშველი რომ ვართ... მაგრამ შენ იცი თუ რატომ ვიგვიანებ მაგ საქმეს? ბნელი დამისა მეშინია. შენ იცი თუ ვისი მეშინია? ხალხისა. ვაითუ, სიბნელეში მათ ვაგნო რამე. ქონების წართ-

მევა, ეგ არაფერია. ბევრი აქვთ, გაუშვი, ცოტაც ჩვენ გვერგოს. მაგრამ ეგ ხალხი რა დამნაშავეა, რომ თან გაიმარცხონ და თანაც დაიხოცონ? მე ჩემი ხელის სიმდიდრე კარგად ვიცი, ნაზან, და არ მინდა, რომ უდანაშაულო სისხლი დაიღვაროს. გადაწყვეტილი მაქვს, რომ ქარავენის გასაძარცვად მხოლოდ მთვარიან ღამეს გავიდე, რომ ღვთით ნაბოძებ სინათლის ქვეშ ერთმანეთში არ ავურიოთ ხალხი და ნაძარცვი. ჩემი სიტყვა კარგად დაიმანსოვრე, ნაზან. შენ ვაჟკაცთან გაქვს საქმე...

ნაზანი უსმენდა მეუღლეს, მაგრამ რა ეპასუხა? ნაზარს კარგად იცნობდა. სულ ახლახან გატყეპა ქმარი, მან კი ეს ცემა ვაჟკაცობად ჩათვალა, თითქმის გამირობის სადარ რამედ და ახლა დგას რა ცოლის თავსზემოდან, ლაპარაკობს ქარავენის გამარცხაზე ისეთი თვითდაჯერებით, რომ თითქოს მთელი თავისი სიცოცხლე სწორედ ქარავენის ძარცვა ყოფილიყოს მისი საქმიანობა და სამსახური.

– ისიც გითხრა, ნაზან, ჩემი მამა-პაპისეული ხმალი ხომ იცი, აი, ის, რაღა, ამბრის უკან რომ ვინახავ, ეგ ჩვეულებრივი ხმალი არ არის, არამედ ზღაპრული ხმალია. ცეცხლით კი არა, ელვით არის გამოწვრილობილი და აღმასს ყველივითა სჭრის. მაგას ჩემი მარჯვენის ძალაც მიუმატე... ერთი სიტყვით, მინდა ერთ დღეს წავიდე ქარავენის გასაძარცვად და თუ ღმერთმა ხელი მომიმართა, კაცი არ შემომაკვდა, მაგის შემდეგ დავიწყებ მაგ საქმიანობას. ჩემი ძალის, მამაცობის ერთი ნაწილის დახარჯვის გზა და საშუალება მექნება, თორემ ასე, მეშინია ჩემი ძალა და მამაცობა დამიჟანგდეს და ერთ დღესაც ნახავ, რომ შენი ნაზარი ქვეულა ამ ჩვენი მეზობლის, ფანოსის მსგავსად, ჩვეულებრივ ბოსტნის მრწყველ კაცად...

ნაზანმა ამოიოხრა, არ იცოდა რა ეპასუხა. იძულებული იყო შეკითხვა მიეცა:

– ღმერთმა რომ ხელი მოგიმართოს, ნაზარ, როდის გადიხარ გასაძარცვად?

– მე ხომ გითხარი, მთვარიან ღამეს ველოდები მეთქი.

– ამაღამ რომ მთვარიანი იყოს, წახვალ? – დაცინვით უთხრა ცოლმა.

– ვნახოთ, ვნახოთ, – მოიღუშა ნაზარი, – თევზს წყალში ვერ შეაფასებ. არის ისეთი მთვარიანი ღამეც, რომ ბნელ ღამეზე უფრო უბნელესია. მე ჩემს ნანდომ ღამეს ველოდები...

– შენი ნანდომი ღამე არასოდეს არ დადგება, – სთქვა ცოლმა, – ჩემი დღე კი არასოდეს არ გათენდება. სიტყვით ქვეყნის ბატონ-პატრონი ხარ, საქმით კი ქვეყნის ტვირთი. ცოლმა იმუშაოს, რომ შენა ჭამო... ცოლი მუდამ გვერდითა გყავდეს, რომ არ შეგეშინდეს. ცოლმა გცემოს, შენ კი ვაჟკაცივით, მამალივით იყოყლოჩინო, ცოლმა დამარხოს ეგ შენი უსაქმური თავი...

– წიწილებს შემოდგომით ითვლიან, – მკერდი ამაყად წინ წამოსწია ნაზანმა, – ტყუილა აგინებ და სწყევლი შენ შენს ნაზარს. კარგი, წადი საჭმელი გაამზადე, თორემ მუცელში უკვე თავგები მიხტან...

\* \* \*

ნათელ დილას მოჰყვა ცხელი შუადღე. ჰაერი გაცხელდა და დამძიმდა. ხის ფოთლები მოშვებუ-

ლი დაეკიდნენ, ძაღლის ყურებივით. ყველა სულდგმული ჩრდილს ეძებდა და ჩრდილქვეშ აფარებდა თავს; დაეცარიელებინათ სოფლის ორღობები და მინდვრები. ასპარეზი ბუზებისთვის დაეტოვებინათ. სახედრის ფაღონით თავქვეშ ამოდებული, ნაზარი თუთის ხის ჩრდილქვეშ ფშვინავდა. არ ვიცით, თუ რა სიზმარს ხედავდა ის, რადგან ნაზარი აწკლავუნებდა სქელ ტუჩებს, თავისუფალ გზას აძლევდა რა ცხვირსა და ცინგლებს, რომლებიც, ერეოდა რა ოფლს, ეღვრებოდა სახიდან და ცხვირპირიდან. ბუზებსაც ეგ უნდოდათ. მთელი ძალით დააცხრნენ მის ცხვირ-პირს. მიხინარეს თითქოს მოუსვენრობა დაეტყო. გაურკვეველი ხმები ამოუშვა ყელიდან. მოძრაობის რამოდენიმე ცდაცა ჰქონდა, მაგრამ ბუზები ეხვეოდნენ ერთთავად. ნაზარმა ხელი ასწია მოსაგერიებლად, მაგრამ ის მოწყვეტილივით დაუვარდა მკერდზე. დაუსჯეულად დარჩენა ბუზებს უფრო ათამამებდა. ნაზარმა თვალები გაახილა, სმენა დააბა. სახე ბუზებით ჰქონდა მოფენილი, ბზუილისაგან კი ენშობოდა ყურთასმენა.

– ვაიმე, მე თქვენი... – და ორივე ხელი დაირტყა სახეზე. გარტყმაზე მთლად გამოფხიზლდა. მას მოჰყვა საშინელი ყვირილი, – ვაი, ვაი, ვაი...

ცოლი სახლიდან გარეთ გამოვარდა.

– რა დაგემართა, კაცო?..

ნაზარი იჯდა გაოცებისაგან ფართოდ გახელილი თვალებით და უყურებდა თავის წინ დაყრილ უთვალავ ბუზს, რომლებიც გაენადგურებინა ერთი ხელის მოქნევით და ახლა გაოცებისა და სიხარულისაგან ყვირილით ცდილობდა დაეთვალა თავისი მსხვერპლის რაოდენობა და ვერას გზით ვერ ახერხებდა.

– ეს რა იყო, კაცო?.. ეს როგორ მოხდა? ერთი, ორი, სამი, ოთხი, ხუთი, ათასი... და ეკარგებოდა ანგარიში. – გეუბნებოდი რა, ნაზან? გეუბნებოდი, რომ ერთ დღეს ჩემთვის ზარალის მომყენებლის თავს საშინელ დღეს დაგაყრი-მეთქი. არა გჯეროდა. ახლა შენი თვალთა ნახე. ბუზებმა არ გამიშვეს, დამეძინა. იძულებული გავხდი, მაგათი მთელი გვარ-ტომეულობა გამეგზავნა იმ საიქიოს. საწყალი ბუზები, საწყალი ბუზები. ძალიან ძვირად დაგიჯდათ, თქვენი აკაკობა. შეგეშალათ, ნაზარი სხვასთან აგერიათ...

– ცხვირ-პირი გაიწმინდე, სირცხვილია, – ყურადღება არ მიაქცია რა ქმრის ნათქვამს, უბწყინა ცოლმა, – პირიდან ლორწო გდის, ბუზების საკვებად ქცეულხარ და ახლაც გაიჟივით რაღაც სისულელებსა როშავ...

ნაზარის სიმხნევე იმდენად დიდი იყო, რომ ნაზანის შეურაცხმყოფელი სიტყვები ვერც კი გაიგო. ცოლის საყვედური ქარივით უქროდა ყურსუკან და არც კი ხვდებოდა მის სმენას. ის თავის მსხვერპლთან იყო. ითვლიდა, ითვლიდა და ათასამდე მიღწეული, თუ არმიღწეული, ჩერდებოდა. მეტის დათვლას ვეღარ ახერხებდა და ათის შემდეგ ვარდებოდა ათასის ფარგლებში. მას ღვინით გაბრუებულის გარეგნობა ჰქონდა. თვალები უელავდა გადარეული ალისაგან. ყვიროდა, ცეკვავდა. შემდეგ ისურვა, რომ ტერ-მარუქე – მღვდელი მოსულიყო. უნდოდა, რომ თავისი სახელი სახარების მინდვრებზე მინაწერი ენახა, რადგან იქ ჩაწერის უფლებას იხვეჭდა მხოლოდ საგანგებო ადამიანი. თვითონ სწორედ მაგათ რიცხვს ეკუთვნოდა. რამდენს ცდილობდა, მაგრამ

ვერაფრით გაეხსენებინა ისეთი ადამიანი, ვისაც ერთი დარტყმით ათასი სულიერი არსება გაეწვიტა, როგორც თვითონ შეძლო. ცოლს შეეშინდა, ეგონა, ქმარი ჭკუაზე შეიშალა, დასაბძელ გიჟად იქცა, მაგრამ მალე დაწყნარდა, რადგან ნაზარი არა მართლ არავის ვნებდა, არამედ ყოველი ყვირილისა და წივილის შემდეგ მას ეხვეოდა და ჩაფ-ჩუფ ჰკოცნიდა... და ბოლოს დაწყნარებული დაჯდა, ხელახლა თუთის ხის ქვეშ გაიჭიმა, თავი ფალანზე ჰქონდა დადებული, მზერა კი – ცისკენ მიპყრობილი.

– ნაზანჯან, ახლა კი წადი, ტერ-მარუქეს დაუძახე, – სთხოვა ცოლს ლმობიერად, – ამ საქმეში ღმერთის ხელიც ურევია. შენ სხვა რამ არ იფიქრო, შენი ნაზარი უკვე გზას დაადგა...

ნაზანმა შეხედა რა აღფრთოვანებულ ნაზარს, მიუხედავად იმისა, რომ მას კარგად იცნობდა, მაინც ერწმუნა მის ნათქვამს და წავიდა მღვდლის დასაძახებლად. „ვინ იცის? – თავისთვის ლაპარაკობდა გზად მიმავალი ნაზანი, – ამბობენ, რომ მასეთებს ბედი სწყალობთო. მეც ხომ ვხედავ, რომ ეს ნაზარი ყოველთვის დიდ-დიდ საქმეებზე ლაპარაკობს. ხან ქარავანსა დარცვაგს, ხან მეფეა ჯდება, ხან ეშინია, რომ ქვეყანა არ დაანგრიოს, ააოხროს. ამ კაცს მხოლოდ ქვეყანასთან აქვს საქმეები, უბრალო რამეების თავი არა აქვს...

როცა ნაზანი ტერ-მარუქესთან ერთად ეზოში შევიდა, ნაზარს თავისი მსხვერპლი რიგზე დაელაგებინა და თითების კეცვა-გახსნით, ვინ იცის მერამდენედ, ცდილობდა დაეთვალა, მაგრამ აღწევდა რა ათს, ჩერდებოდა ბედნიერი და გაოცებული.

– ეგ რა გმირობა ჩაგიდენია, შვილო ჩემო? – თქვა მღვდელმა და თან წვერები ჩამოისწორა, – შენმა ცოლმა მითხრა, რომ საშინელი სისხლისღვრა ყოფილა აქ. აბა, ერთი მიჩვენეთ, ვნახო ეგ რა სისხლი დაღვრილა...

– მამაო, – ალაპარაკდა ნაზარი, – ღმერთის წინაშე დამნაშავე ვარ. მაპატიე, ჩემს ცოდვებს შეგება მიეცი, – და ასლუკუნდა, – მიძიმე ხელი მაქვს. ღმერთის გაჩენილები მოვსპე, მთელი გვარი. ახლა ვუყურებ ამათ ლეშებს და გული მეფლითება, უცოდველი სულიერები იყვნენ, შეცდნენ და მოვიდნენ ჩემ გასალიზიანებლად და, აი, შედეგი, საწყლები უსულოდ ყრიან, ვაი, ვაი, ვაი...

ნაზარი სლუკუნებდა და შემმოწმებელი თვალით უყურებდა მღვდელს სახეში, ეძებდა რა საპასუხო გამოვლინებას. მღვდელი უყურებდა ნაზარს და მის მსხვერპლს, თან გამამხნეველ სიტყვებს ბუტბუტებდა. მათი მაყურებელი ნაზანიც იცრემლებოდა. ბუზების გაწყვეტის იშვიათ შემთხვევას ჰქონიყო ადგილი.

– გამხნევედი, შვილო ჩემო, – ბოლოს და ბოლოს, ალაპარაკდა ტერ-მარუქე, – გამხნევედი იმით, რომ შენ არ წამოიწყე ეს სისხლისღვრა, შენ თავდამსხმელი კი არა, მსხვერპლი ხარ. ეგ ერთი, მეორეც, ბუზები მუდამაც ადამიანის მტრები იყვნენ და მათი დასჯის შენი ცდა და მოქმედება თავისთავად ღმერთის სასიამოვნო მოქმედებაა და, ბოლოს, აქ, ჩვენ თვალწინ მომხდარა უმაგალითო მამაცობა, რომელსაც დიდი მნიშვნელობა აქვს თაობებისათვის, მაგრამ მოდით, ჯერ დავთვალოთ მსხვერპლი და აღვწუსხოთ მატთანეში...

ტერ-მარუქემ დაიწყო თვლა.

— ერთი, ორი, სამი, ათი... ათასი, შვილო ჩემო, — გაცხადებული მიუბრუნდა ნაზარს, — თვალები დამსუსტებია და ანგარიშს ვუწერე, მაგრამ ნახული იმდენად გასაოცარი და იმდენად უმაგალითოა, რომ ეს შემთხვევა ღირსია ცალკე აღნუსხვისა. აი, შენ, მამაცო ნაზარ, იმსახურებ, შენი საკუთარი დროშა გქონდეს, რადგან ქვეყანა მოვალეა გაგიცნოს შენცა და შენი მამაცობაც.

ნაზანი გაცხადებული უსმენდა ტერ-მარუქეს და ალერსიანად უმზერდა თავის მეუღლეს, თითქოს პირველად ხედავდა მას. „ეს რაები ხდება ქვეყანაზე? — ფიქრობდა ნაზანი, — ღმერთო ჩემო, ეს სასიკვდილე ნაზარი ახლა მამაცია თუ შშიშარა?... ამის შემდეგ, როცა ამდენს აქებს მღვდელი მის მამაცობას, საპირფარეოში ისევ მე უნდა წავიყვანო თუ თვითონ წავა?... ახ, ნაზარ, ნაზარ, ნეტა ეს ყველაფერი მართალი იყოს. ჩვენც რაიმეს პატრონი გავხდეთ“...

— შვილო, — მიუბრუნდა ტერ-მარუქე ნაზანს, — იპოვე ერთი თეთრი ნაჭერი დროშისათვის.

ნაზანმა ეძება, ვერაფერი იპოვა. არა ჰქონდათ. ნაზარი აქეთ-იქეთ ეცა. მანაც ვერაფერი იპოვა. ტერ-მარუქემ ჯიბიდან ამოიღო თავისი მოზრდილი ხელსახოცი და საზეიმო მღვდლობაში გაფინა კუნძზე. საწელურიდან ამოიღო ტყავის პორტმანეში შავი მელნით სავსე შუშა და საჩვენებელი თითით დაიწყო წერა: „დაუმარცხებელი ნაზარი, მამაცი ნაზარი, ერთი დარტყმით მოსპო ათასი“...

— აჰა, შვილო ჩემო, აღვნიშნეთ საუკუნეებისთვის...

ნაზანმა მოიტანა მატყლის საწკეპი ჯოხი, რომელიც ხმარებისაგან პრიალებდა, მაგრამ არა იმდენად მატყლის წკეპლისგან, რამდენადაც ნაზარის ცემისაგან და სიამოვნებით გაუწოდა ტერ-მარუქეს. ფალასი დაამაგრეს ჯოხზე და დროშა დაჰკიდეს სახლის შუბლზე. ნაზარი მღვდლვარებისაგან ალულულდა და ბლუკუნებდა, მაგრამ მას ფიცის სათქმელი სიტყვები ჰქონდა, რომლებიც ყელში გასჩხეროდა.

— მამაო, — ასლუკუნდა ის, — შენ რომ არ გითხრა, მა ვილას ვუთხრა. მე ვიცოდი, რომ ბოლოს ასე უნდა მომხდარიყო. ძალ-ღონე ჩემში მაჭარავით დუღდა და გადმოსვლა უნდოდა. როგორც კი გამოვიდა, ნახეთ არა? თუ რა განსაცდელად იქცა ამ ქვეყნის თავზე, ამ ბუნების თავზე. ახლა რამდენადაც ჩემს მამაცობას დროშის სახე აქვს და მთელი ქვეყანა დაინახავს, მამაო, გეფიცები, თუ ქარავანი გავძარცვო, შენი წილი აუცილებლად გარეუნო. ვინც მოიტყუოს, ღმერთმა დასწყევლოს. ეს ერთი. მე თუ მეფე გავხდები, გპირდები, ჩემი სასახლის მღვდლად გაგხადო. თუ ტყუილს ვამბობ, მეფის გვირგვინი თავზე დამემხოს. დამიჯერე, მე ძუნწი არა ვარ. ჩემს შესახებ ჯერ კიდევ ბევრს მოისმენ... მამაცი ნაზარი ვარ, ვირის თავი ხომ არა ვარ.

საზეიმო განყოფილება დასრულდა. ბლუდით ხელში გამოჩნდა ნაზანი: კიტრი, და ნესვი, ყველი და დოქით ღვინო (მეზობლებისაგან ნასესხი) საზეიმო ვითარებაში დადო მეუღლისა და მღვდლის წინ და მორიდებულად გვერდზე გადაგა, რათა იქვე ყოფილიყო, მათი სურვილების შესასრულებლად. ნაზარმა გაცხადებული თვალებით შეხედა ცოლს, „საიდან

ამდენი რამეო“? — ამბობდა მისი თვალები. „კარგი ქმრისთვის ქალი სულსაც არ დაიშურებს“ — ამბობდა ნაზანის თვალები. „ვაი, შენს ნახ წელს კი ვენაცვალე, ამაღამ ევ ლერწამა წელი უნდა დავიმორჩილო...“ — თავისთვის ფიქრობდა ნაზარი. ტერ-მარუქემ ჭიქა ასწია:

— შენი საღვთო იყოს, მამაცო ნაზარ, მარჯვენა მძლავრი, მოქნევა აუცდენელი, უზიფათო გზა გქონდეს... ღმერთი იყოს შენი მფარველი, რომ სიკეთემ და გამარჯვებამ შენგან სახე არ იბრუნოს, შენი საღვთო იყოს...

— გაამოს... — იქუხა ნაზარმა და სავსე ჭიქა მწყურვალევიტ მოსრუპა. სახე მოღრეცა, თვალები გაუელამდა. ღვინო მიედინებოდა რა თავისი გზით, უცხელებდა შინაგან ორგანოებს ნაზარს. თავიც გაუცხელებდა და აზროვნებაც უფრო მეტად გაუნახდა.

— მამაო, შენ ყოვლისმცოდნე კაცი ხარ, დამარიგე, მირჩიე, როგორ მოვექცე ქვეყანას? გავუშვა, რომ იარსებოს თუ მოვსპო?..

— გაუშვი ქვეყანამ იარსებოს, ნაზარ, ქვეყანა ღმერთის შექმნილია, გაუშვი იარსებოს, შენ კი მართე ეს ქვეყანა. მასე უკეთესი იქნება, ღმერთისთვისაც და კაცისთვისაც სასიამოვნო...

— რომ არ დამიგღონ ყური? რომ არ დამექვემდებარონ?

— შეაშინე. ნახევარი გაწყვიტე, ნახევარმა გაუშვი იცოცხლოს. მამაცებისათვის საზღვარი მათი იარაღია...

— კარგად ამბობ, გენაცვალე სულში, მაგრამ რომ ჟღერება დავიწყო, მეშინია, უკვე ვეღარ შევჩერდე და მეორე ნახევარიც გავფლიტო, მოვათავო. მაგაზე რას იტყვი?..

— ყველა რომ გაწყვიტო, ვილასთვის უნდა იყო მეფე, ნაზარ?..

— მართალს ამბობ, მამაო. არა, საჭირო არაა, ნუ მივაჩვენებ ხელს ჟღერაზე. გაუშვი, იცოცხლოს ხალხმა, იმუშაოს, ჩვენც ვისიამოვნოთ...

ნაზარი მთვრალი, ლულულდით წყვეტდა ქვეყნის ბედ-იღბალს. ტერ-მარუქე დაბინდული თვალებით უმზერდა, ამოწმებდა ნაზანს და თვალის კი უყო. გაბრაზებული ნაზანი შინ შევიდა და იქიდან შინდის ხის მძიმე კომბალით ხელში გამოვიდა, თან ფიქრობდა: „ამ გაფუჭებულ მღვდელს მე ხომ უნამუსო არა ვგონივარ? კომბალი თავზე უნდა დავამტვრიო, ერთი ამას უყურე... ის არ ეყოფა, რომ შშიერი ნაზარი გადარია, ახლა ჩემი გასულელეობაც უნდა“?

ტერ-მარუქემ ნაზანს ჩანაფიქრი გაუგო და დაიჩუტა: „ეს გადარეული ქალი თავს გამიტყუავს, ცოდვილად ჩემი გახდომის მიზეზი გახდება. ფრთხილად, ტერ-მარუქე, ფრთხილად, გუთანი ქვას მოხვდება, მერე ვაი შენი ბრალი“... ამის შემდეგ ნაზანისკენ ერთიც არ გაუხედავს. ნელ-ნელა ბინდი დაეშვა ნაზარაშენის თავზე. შემდეგ, ერბოკვერცხვიტით, ერთმა მშვენიერმა სინათლემ გადმოიხედა არჯასარიდან ქვემოთ; ერთი კეთილი, სასიამოვნო ნიავი დაეშვა მთებიდან და გააგრილა მთვრალი და ბედნიერი მამაკაცები, რომლებიც ერთიმეორეს გადაკიდებულები მღეროდნენ ნაზარის გმირობისადმი ტერ-მარუქეს მიძღვნილ სიმღერას.



სპარსულიდან თარგმნა  
ალექსანდრე ელერდაშვილმა

## რჩეული იგავები „ბუსთანთან“

\* \* \*

ცეკვა-თამაში გამართეს ერთხელ მუტრიბთა დასებმა  
და როკვით მათ შეუერთდა ფერიის მსგავსი არსება.

აღელდა ხალხი, გზებისგან ზოგი დაბლაც კი დაეცა,  
ხოლო ფერიას სანთლისგან კაბაზე კალთა დაეწვა.

შეწუხდა ამით ის ტურფა, ხალხს რომ ეგონა ფერია,  
თუმცა თაყვანისმცემელმა უთხრა მას –  
„არაფერია“...

შენ მხოლოდ კალთა დაგეწვა... ამით წაგერთვა  
შეება და  
მე შენი მზერით წამერთვა მთლად შეება, რაც რამ  
მებადა“.

მიჯნური თუ ხარ, შენს სატრფოს უნდა მიენდო  
საგსებით –  
სიყვარულს მაშინ შეიცნობ, თუ გიყვარს მთელი  
არსებით.

\* \* \*

წყურვილით სიკვდილის პირას მისულმა კაცმა  
ინატრა:  
„ნეტავი ზღვაში დავიხრჩო!“ – სხვა კაცმა ასე  
მიმართა;

„მართლაც სულელი ყოფილხარ – შენ ვითომ  
ხსნას მიაგენი?!  
თუ კვლები, გინდ ზღვამ დაგახრჩოს, გინდ უწყლოდ  
დამრეს ბაგენი“...

უთხრა: „არაო! მე განა წყურვილის მოკვლა მწადია,

მსურს, წყლის სამყაროს შეერწყას სიცოცხლე,  
რაც მამადია.

წყალთა სიღრმეში აღარსად შემაწუხებდა  
წყურვილი  
და იმ სიღრმეთა ხილვა ჩემი ნება და სურვილი“.

შეყვარებულიც ასეა – ის მისთვის განწირულია,  
რომ სიყვარულში ჩაძირვა ენატრებოდეს სრულიად.

სამოთხე მაშინ დაგხვდება, სანატრელი და სარგები,  
შენ ჯოჯოხეთის გზა-კვალზე ერთხანს  
თუ დაიკარგები.

მთესველთან შრომა და ჯაფა თავიდან თავს  
თუ მოიყრის,  
მერე იხარებს, როდესაც თავის მოსავალს მოიმკის.

მას შეუძლია ნადიმის მთელი სისრულით შეგნება,  
ვისაც ჯამების ტრიალში ბოლო სასმისი ერგება.

\* \* \*

მისრეთში კაცი ცხოვრობდა ღარიბი, მაგრამ კეთილი,  
სულ ჩუმად იჯდა, შეუცნობ ღუმელში  
გამოკეტილი;

ზოგი მას შორით უმზერდა, ზოგი ახლოსაც ბედავდა  
და, ვით ფარვანა სანთელში, სინათლეს ყველა  
ხედავდა.

მაგრამ ერთ ღამეს აწეწეს მისი არსება ფიქრებმა  
და დაიჩვილა: „ამდენი ღუმელი განა იქნება?!“

მგონი, არასწორ საქმეს და სურვილებს  
გავუტაცვივარ,  
ჩუმად მყოფს ვინ მიმიხვდება, რომ მე ჭკვიანი  
კაცი ვარ?!“

ალაპარაკდა და ვაი! – მოყვარეა თუ მტერია  
დაფრთხა და ყველამ გაიგო, იგი როგორი შტერია.

მისრეთში ყოფნა წაუხდა, გარს მოესივნენ  
ბრიყვები...  
წავიდა... ერთი მეჩეთის თაღს წააწერა სიტყვები:

„მე ჩემი თავი სარკეში ერთხელ მაინც რომ მენახა,  
ვიტყოდი – სჯობდა ღუმელი კვლავ დიდხანს  
შემომენახა...“

სახეზე მაჩნდა ნათელი და ჭკუით გავააუგე,  
სხვას რა მოვთხოვო, როდესაც ჩემს თავს თავად  
ვერ გავუგე“...

.....

უტვინომ რაგინდ სიტყვებით იკეკლუცოს და  
იკარგოს,  
სიბრიყვეს ვერ დამალავს და სჯობს სადმე  
გადაიკარგოს.

გონიერისთვის დუმილს თუ სიდარბაისლის ფასი  
აქვს,  
ბრიყვისთვის არის საშველი – მაღავს მის  
ბრიყვეულ ხასიათს.

### საუბარი ქალების შესახებ

ქალი თუ მორჩილების და კარგ თვისებათა მქონია,  
მის ქმარს, გლახაკიც რომ იყოს, თავი ხელმწიფე  
ჰგონია.

ჩათვალე – ბედნიერებას კარი შენ ფართოდ შეუღლე,  
თუ სახლში გელის წყნარი და მოსიყვარულე  
მეუღლე.

ნაწვალები და ნატანჯი თუკი ხარ მთელი დღე  
რამით,  
ტკივილი დაგიაძლება კარგი ცოლისგან შენ ღამით.

კაცს სახლში თანამეცხედრედ თუ საყვარელი  
ქალი ჰყავს,  
ღმერთი სულ მასთან იქნება და განზე არსად  
გარიყავს.

თავმდაბალი და დამჯერი ქალის ქმარს ვეტყვი  
– იცოდეს,  
რომ სამოთხეში ატარებს იგი მთელ თავის  
სიცოცხლეს.

საწუთრომ იმ კაცის გულში სიმრუშე ვერსად  
გარია,  
ვისთვისაც ცოლი ქალი და ერთგული მეგობარია.

თუ ქალი ენატკბილია, ხმა აქვს საამო და ნაზი,  
შენ რას დაეძებ მის სახეს – მახინჯია თუ  
ლამაზი?!

კარგ გარეგნობას, გჯეროდეს, ჯობია კარგი ბუნება,  
სათნო ქალს ნაკლიც რომ ჰქონდეს, ეს ნაკლიც  
გესალბუნება.

ფერიის მსგავსიც რომ იყოს, თუ სულით არის  
სატანა,  
იმ ქალთან ძალზედ ძნელია, ძმობილო, თავის

გატანა.

ცოლმა ქმრის ხელით ძმარიც კი, ვით ჰალვია, ინდა  
იგემოს...  
ცოლს თუ ძმარი სწვეთს სახიდან, მით ქმარს  
მოუწევს, იგვემოს.

კარგ ცოლ-ქმარს ვერაფერს ავნებს საწუთროს  
ზაკვა და შარი...  
ღმერთო, ქმარს შენ თუ უშველი, თუ ცოლი არის  
ამარი.

ყვავთან თუთიყუშს ვინც ჩასვამს ერთ გალიაში,  
შეცდება,  
რადგან იქიდან გაფრენას ორივე ძლიერ ეცდება.

ეცადე, თანამეცხედრეს სიტკბოთი შეეზიარო,  
თუ არა, თანახმა იყავ, სულ უბედურმა იარო.

\* \* \*

ერთ ღამეს ცუდად მეძინა – დილით მეზავრობა  
მელოდა,  
ჰოდა, გავეყვი ქარავანს... გზა განველეთ უსაშველო  
და

ერთ უდაბნოში დაგვატყდა თავზე ისეთი ქარბუქი,  
მზის დაბნელებას ჩიოდა ბერი იყო თუ ჭაბუკი.

იქ ჩვენ გოგონაც გვახლდა და რომ ქოლდა ქარი  
ამარი,  
მამას სახიდან მტვერს და ბუქს სწმენდა თავისი  
თავშალით.

მას უთხრა მამამ: „შენ, ჩემო მოსიყვარულე ასულო,  
ჩემ გამო შენი წვალება ამ ქარში სჯობს  
დაასრულო:

ავდარი მძლავრობს, ჩემთვის მზე უფრო და უფრო  
ბინდდება,  
შენი პატარა თავშალით მტვერი არ გაიწმინდება“

ბევრი გრიგალი გადივლის საწუთროს არემარეში  
და ჩვენგან შთენილ ნამცეცებს გაფანტავს ოთხივ  
მხარეში.

მსახვრალი ქარი ხალხს სდევნის მათკენ გაწვილი  
ენებით  
და სამარისკენ მიქრიან ცხენივით ჭენებ-ჭენებით.  
ღრომ თუ სადავე წარსტაცა, უსასოდ რჩება  
მხედარი –  
დაღმა მგორავი აღარ არს ის უკან გამომხედავი.

მახიამ ჰავაშვილი



იტყვის ღუმილი

იტყვის ღუმილი ჯერ ვერთქმული გრნობის არიას,  
გითქვამ პაემანს, და შენ მაწვდი ფერმკრთალ  
ლიანებს,

პირველ ნახვისას ბოდიშს გიხდი, ჩემო ძვირფასო,  
რომ ყველა რჯულის ქალის მსგავსად –  
დავიგვიანე.

გამოგიგონე წიგნში, სადაც არსად ეწერე,  
გიძლენი ბარათებს, სხვებისათვის ვერსად საჩინოს,  
ყოველდღე სუნთქვას ვაყოლებდი სულის ნაწილებს,  
ოღონდაც ჩემი წარმოდგენა გადავარჩინო.

პირველი თოვლის ფანტელები დამადნა თმაზე,  
შენ ალბათ წახვალ, როგორც მიჰყავთ გემებს  
თოლია,

ვფიქრობ და ჩემი ნაბიჯები ცოტათი გისწრებს  
და მხოლოდ ერთი ნაკვალევი რჩება თოვლიანს...

გამოგიგონე, ასე ურცხვად გამოგიგონე,  
და დაძვინჯე სევდისფერო, სისხლად მაჯიდან,  
ის ჩიტი მინდა ყოფილიყავ, კამარას რომ კრავს  
და ყოველ ღილით საკენკს კენკავს ჩემი ფანჯრიდან.

მე, ვერშემდგარი მსახიობი, ვდგავარ სცენაზე,  
და ჩემივე თავს ვერ ვუმტკიცებ, რომ არ ეწერე  
იმ წიგნში, სადაც მოხეული კიდებიდან,  
გამოუყვიათ თავი უკვე დამჭკნარ ენძელებს.

გაზაფხულდება, შეეხსნებათ კვირტებს საკინძე,  
ამოუყვება ყოჩივარდა დაღლილ ბილიკებს,  
გამოგიგონე, მაგრამ ისევ ბავშვურად გჩემობ,  
და კვლავ ვაგროვებ ყვითელგულა შენთვის  
გვირილებს.

გამოგიგონე, დიას, ისევ გამოგიგონე,  
შემდეგ პაემანს კალენდარზე ვნიშნავ იებად,  
წინასწარ გეტყვი, ალბათ ისევ დავიგვიანებ,  
მაგრამ იცოდე, ქალი ვარ და მეპატიება...

ბავშვობა დავტოვე

საკუთარ ცხოვრების თავადვე მწერალმა,  
ბავშვობა დავტოვე ბებიის კალთაში,  
ბუნხართან ზღაპრების მოსმენით მძინარემ  
მოდილო სულით და პატარა ასაკით.  
დავტოვე სეზონი ვაშლის და ატმების,  
ბავშვობა დავტოვე დაორთქლილ შუშებზე,  
პატარა თითებით დახატულ ფიგურებს  
ვიხსენებ, ღიმილით გადაკრულს ტუჩებზე.  
ვიხსენებ მთელი დღე უღრუბლო დროებას,  
ოცნებით მრავალჯერ ასაკში გავცვალე,  
დიდობას ვნატრობდი პატარა გოგონა,  
რად გინდა, დროებას თავისი აცაღე.  
დღეს უკვე დიდი ვარ, უღრუბლო ცა მინდა,  
ველარ ვთხოვ ბებიას ნაწნავი მომიწნას,  
სადღაა ფრთები და სადღაა სილაღე,  
ზაფხულის სუნი და ბავშვობა მომინდა.  
ბავშვობა მინდა და დღეს ისევ ბავშვი ვარ,  
რა მოხდა, წაქცევის მერე რომ ვიტირო,  
რა მოხდა, ჯოხიან კანფეტის გულისთვის  
ბევრჯერ რომ გაკოცო და აღარ ვიდილო.  
საკუთარ ცხოვრების თავადვე მწერალმა,  
ბავშვობა დავტოვე ბებიის კალთაში,  
ბუნხართან ზღაპრების მოსმენით მძინარემ  
მოდილო სულით და პატარა ასაკით.

მალე ქალურობა

თითქოს გონებაში ღმერთი არ მყოლია,  
თითქოს ცხოვრებასაც თავად ვიგონებდი,  
თითქოს განუწყვეტლივ ლექსში დავებედი  
იმას, რაც არ იყო მხოლოდ სტრიქონებში.  
თითქოს უბინაო ბინას ვთხოულობდი,  
თითქოს მიჭირდა და გრძნობებჩაკირული,  
ისევ მარტოდმარტო ქუჩას შევეხიზნე,  
თითქოს დავბრმავდი და მაინც თვალხილული –  
ხალხში უიშელოდ ფერებს დავებედი,  
იმას, რაც არ იყო ასე თვალსაჩინო,  
ხათრით ცხოვრებას და ცრემლებს შევეჩვიე,  
წლები გავიდა და როგორ გავარჩიო –  
როდის ვიცხოვრე და როდის ვარსებობდი,  
ალბათ შუალედი არის დანარჩენი,  
როდის მიხაროდა ხალხთან სიახლოვე  
და ეს ყველაფერი არის განაჩენი –  
იყო ძლიერი და მალე ქალურობა,  
წლები წარმავალი აღარ ბრუნდებიან.  
შემოდგომისფერი, გოგოს ოცნებები,  
ქალის, გაფრენილი წეროს გუნდება.  
შორია სითეთრე ფიქრის და ოცნების,  
ნოემბრის ფერებსაც სიცივე დაერთო,  
გავიდა წლები და მე ჯერაც არ ვიცი,  
ვინ ვარ და რა მინდა, ან სად ვარ საერთოდ.

## რა დამაბერებს

რა დამაბერებს, როცა სული დღემდე კიაფობს,  
მერე რა, თუკი შემითეთრდა ღერი, ტიალი,  
რა დამაბერებს, როცა გული ტალღებს მიაპობს  
და სასიცოცხლო აღმომხდება ისევ ღრიალი.

რა დამაბერებს, როცა ვცეკვავ დღემდე ლექსებთან,  
გამოვიცეკვებ რიტმას, რითმს კი თავსაც დაუკრავ,  
მახლობელ კართან მოღიმღე ცელიან მამრებს  
მარჯვენა ხელსაც ღვინის ჭიქით, ნაზად აუუკრავ.

რა დამაბერებს, როცა გული ისევ მიგალობს,  
მერე რა, თუკი თვალთა უპეს შეუჩნდა ჯარი,  
მოდი, სიცოცხლეც, ერთხელ კიდევ ძლიერ დაბერე,  
რომ მავან სიკვდილს მიუხურთთ ამაღამ კარი!

რა დამაბერებს, როცა ტუჩებს ღიმილი სცხნათ,  
და ნაოჭები მიყვებიან გარდასულ ამბავს,  
აკანკალებულ ხელებზე კი გაჩენილ დარდებს  
დრო, დღეებზე მიწყობილი ზღაპრებს მიქარავს.

რა დამაბერებს, როცა მტკივა ძველი იარა,  
ახალგაზრდობა! რამე სევდა-დარდი კი არა,  
თითქოს წამივით წუთისოფლის წინ ჩამიარა  
და ამ სახეზე უღმობელად გადაიარა.

რა დამაბერებს, როცა ისევ მეღიმღეობა,  
ტუჩის კუთხესთან გაჩენილი სიბერის ღარით,  
რა დამაბერებს, როცა ვიცი ჩაკეტილია,  
ჩემ უკან მდგომი შეუბრალო სიკვდილის კარი.

რა დამაბერებს, როცა სული ბავშვის მაქვს ისევ,  
როცა შიშებს მგვრის მოხუხუნე ხმაური ქარის,  
შებინდებისას თვალები რომ მიფართოვდება  
და საწოლის ქვეშ ვიმალები ამხელა ქალი.

რა დამაბერებს, როცა სევდა დაღლილ გულიდან,  
ცდილობს ბავშვობა გამოისხას ისევ კვირტებად,  
რა დამაბერებს, როცა დღემდე მიყვარს სიცოცხლე,  
ეს რომ იცოდე, ამას რომ გრძნობდე, გაგიკვირდება!..

## ლექსივით ითქვა

ბუხართან იდგა გარდაცვლილი ზამთრის სურნელი,  
და დეკის ჩაის ვაყოლებდი უამრავ კითხვას,  
განა რა იყო ეს ცხოვრება, წუთისოფელი,  
რომ ერთ სტროფშიაც ჩაეტია, ლექსივით ითქვა..  
სამყაროსხელა ღიმილიდან სულ ცოტას გთხოვდი,  
შენ კი იმ დღიდან ყველა წამი წლებად მითვალე,  
განა რა იყო ჭაღარაში ამხელა ტვირთი,  
რომ ოცნებებიც უიმედო გზად ჩამითვალე.  
ჯერ გაუკვალავ ბილიკებზე შერჩენილ თოვლის  
სინაზეს ჰგავდა მოგონება, რომელიც არ ღირს  
დასავიწყებლად, შესანახად, ანდა უბრალოდ  
გასახსენებლად, როცა ფიქრობ ყველაფრით

დაღლილს –

ალარც სიჭრელე გაგახარებს გაზაფხულის და  
ალარც ფოთლების მოქარგული ფერადი ფარჩა,  
მაშინ, როდესაც სიზმარ-სიზმარ გამოიზოგავ  
სურნელს იმისას, ვინც შორიდან არა და არ ჩანს.  
ბუხართან იდგა გარდაცვლილი ზამთრის სურნელი,  
გაუხელიათ ზეცისფერი თვალი ენძელებს,  
წლები გავიდა და მე დღესაც, დღესაც არ ვიცი,  
იმ დროს რისთვის და ასე ძლიერ რატომ გეძნელი.  
ბუხართან იდგა გარდაცვლილი ზამთრის სურნელი,  
თითქოს ფიქრებიც ძველებურად გახუნდებიან,  
ბილიკ-ბილიკ და სტრიქონ-სტრიქონ გადავწერ  
დღეებს,  
რომლებიც უკან აღარასდროს დაბრუნდებიან.

## ნინო ახსენაშვილი



\* \* \*

*ნინო ქუთათელაძეს*

ლილილოების ლილინზე  
ღმერთი ძირს ჩამოსულიყო,  
ცის თალის ცისფერ ღიობში  
ღვთის ხილვის ღირსი ვინ იყო?!  
ღამემ ღამურას ფერები  
არ დაიშალა, დაღამდა...  
და მაინც ნათლის იმედად  
ცას მთვარე ამოღალანდა.  
მზიანი ღამე ვითა ვთქვა,  
სიტყვა მიმძიმებს ბაგეს,  
უბრალოდ, ვიტყვი სიყვარულს,  
სათქმელს რომ აბადაგებს.  
ლილილოების ლილინზე  
ღმერთი ძირს ჩამოსულიყო.  
ცის თალის ცისფერ ღიობში  
ღვთის ხილვის ღირსი ვინ იყო?!

### ლექსი

ლექსი ჩიტივით  
ღამაჯდა მხარზე  
და თითქოს ფრთები  
მომცა საფრენად;  
მეც რა მინდოდა,  
მხრები გავშალე,  
ფრთებქვეშ მოვიგდე  
ზეცის საფირი.  
დიდხანს ვილაღე  
ღრუბლებთან ასე,  
აღარ მახსოვდა  
სხვა არაფერი...  
და მერე, როცა  
დაშვება ვცადე,  
ვეღარ ვიპოვე  
ძველი ნაპირი.

## ნიხოლოზ ახსენიძე



თუ

სული დაგკარგე,  
რად მინდა ხორცი,  
თუ დრო არა მაქვს  
ამ ქვეყნად მოცდის...  
უწყლოდ ჭურჭელი  
რის მაქნისია...  
რაც გამაჩნია,  
ის თუ სხვისია.  
სხვა თუ განაგებს  
ჩემს აზრს და ჭკუას,  
რასაც ვქმნი, შევქმნი,  
ის სხვისი თუა.  
თუ სხვის ნებაზე უნდა ვიცინო,  
თუ სხვის ნებაზე უნდა ვიტირო,  
თუ სხვისი ჟინი  
უნდა ვასრულო,  
თუ სულის ტანჯვა  
მაქვს უსასრულო,  
თუ სულ დაგკარგე  
ჩემი არსება,  
ჩემი აზრი და  
იდეალები,  
თუ ჩემი ჭკუით  
არ შეყვარება,  
ჩემი ღირსებით  
არ ვეყვარები –  
რა არის აზრი  
სიცოცხლის მაშინ,  
მუდამ თუ ვრჩები  
პატარა ბავშვი,  
არ მაქვს არაფრის  
არა უფლება,  
სანატრელი მაქვს  
თავისუფლება?!  
თუ სული დაგკარგე,  
რად მინდა ხორცი...



## ცა იწევს მაღლა

*წინაპართა ხსოვნას*

ბებრის ციხეზე,  
რომ გავხედავ,  
ცა იწევს მაღლა!  
ციხის კედლებთან ხმაღ-ჩაჩქნის  
ჯახანი მესმის.  
ო! როგორ მინდა, ჩემმა სისხლმა  
არ იგრძნოს დაღლა,  
თუნდაც წამლეკოს ნიაღვარმა  
მოვარდნილ ლექსის.  
ო! წინაპარო, – საძირკველო  
მომავალისა,  
შენი ამაგით გადმოგცქერის  
ჯვრის მონასტერი,  
შენი მარჯვენა საქართველოს  
ღმერთმა აღირსა, –  
თან აშენებდი, თან გაუჟუჟე  
მომხველური მტერი.  
ღღეს კვლავ უტევენ ჭილყვაები  
ძვირფას მამულეთს,  
სისხლი ნაყივლი ჩვენს ძარღვებში  
იქნებ ჩაგვისხა,  
ღღევანდელ დღეგმას ღირსეულად  
მაშინ გაუუძლებთ,

## მისაღმება

ნაჩუქარი წუთი მაქვს,  
არ გამკილოთ, გეთაყვა,  
ფიქრებს ღამე უთია  
და ოცნება მზეს აჰყვა.  
ოქროს ბაღის კარებთან  
ეტლით ჩამომატარებს,  
ერთად მივესალმები  
ჩემი ქვეყნის პატარებს.  
ბაღის ყველა კუთხეში  
ფრიალებენ ალმები,  
ყველა ჩემს მასწავლებელს  
კრძალვით მივესალმები.  
ტკბილად გალობს ბუღბუღლი,  
შაში ამბობს მეორეს,  
ყველას მივესალმები...  
ნაცნობსა და მეგობრებს.

თუ კაცი ქულზე ისევ ისე  
აბჯარს ავისხამთ,  
თუ ჩვენში ისევ გამოჩნდება  
დიდი დავითი,  
თუ ჩვენში ისევ გაბრწყინდება  
დიადი თამარ!  
ქადაგადა ვარ გადმომღვარი, –  
კაცი დავიწვი,  
ნატვრის თვალს ვეძებ, ხეზე შემჯდარ  
ელიოზს ვგავარ.  
ვეძებ და ვეძებ და კაცს ქულზე  
ვიწვევ და ვიწვევ!  
ნატვრისთვალს შენში თუ მოვძებნი,  
სულო ნათელო!  
რამდენჯერა ვთქვი, ვიმეორებ ისევ და  
ისევ,  
შრომით და ბრძოლით გადარჩება  
ღღეს საქართველო.  
ბებრის ციხეზე,  
რომ გავხედავ,  
ცა იწევს მაღლა,  
ციხის კედლებთან ხმაღ-ჩაჩქნის  
ჯახანი მესმის,  
ო! როგორ მინდა, ჩემმა სისხლმა  
არ იგრძნოს დაღლა,  
თუნდაც წამლეკოს ნიაღვარმა  
მოვარდნილ ლექსის.

## ფიქრი სურამის ციხესთან

ვიცი, მეც ლანდი გავხდები ქვეყნის,  
უბირო წამის უტყვი ხატება  
სულ დიდი-დიდი, ოსტატის ხელით  
ერთ პატარა ქვას მიეხატება.  
ცოტა ხნით იღენს ალალი ცრემლი,  
მერე დრო მოწყვეტს იმის სათავეს,  
მე იმას ვნატრობ, სახელი ჩემი  
სიცოცხლეშივე რომ არ გათავდეს.  
მთებზე მოჯარდა შავი ღრუბლები –  
გულზე დამედო ტყვიისფერ დარდად,  
მჯერა, რომ ქვეყნად კვლავ დავბრუნდები  
ლურჯთვალა იად, მაისის ვარდად.  
მომეფერება მზე და ფუტკარი  
გარდამქმნის თაფლად, გარდამქმნის ფიჭად,  
არ დამიხუროთ ეზოს ჭიმკარი,  
იქნებ დავბრუნდე პატარა ბიჭად.

## მაინც არასდროს ვკვდები

მიზანთან რომ ვარ ახლოს, –  
როცა აყვავდა მთები...  
ვკვდები, რაც თავი მახსოვს...  
მაინც არასდროს ვკვდები.  
რა მომკლავს, თუ ძმა ხარ, ნეტავ?  
ამ მთის, ამ ბარის პატრონს,  
კაშკაშა მზეს თუ ვხედავ,  
ყოველ დღე სიცოცხლეს ვნატრობ,  
უკან მომყვება კვალში  
ორი ბოკვერი ლომის,  
გული მაქვს ცეცხლის ალში,  
სურვილი თუ მაქვს შრომის.  
სული მალღლება ისე,  
ვით ცისარტყელა ცაში.  
ხელჩანთიანი ისევ  
ვათენ-ვაღამებ გზაში.  
ჩემი სამშობლოს მთა-ბარს  
შემოვევლები თავზე,  
კრძალვით შევხედავ ნაბარს  
წინაპრის ნაფუძარზე.  
მიზანთან რომ ვარ ახლოს,  
როცა აყვავდა მთები,  
ვკვდები, რაც თავი მახსოვს,  
მაინც არასდროს ვკვდები.

## მე რას გავაწყობ

მე ხშირად გხედავ, დგახარ და მიძნერ  
თვალებს დავხუჭავ და მაინც გხედავ,  
გადავაცოლე დრო, ჟამი ფიქრებს  
მოახლოებას მაინც ვერ ვხედავ.  
თვალების სხივი თოკს წნავს უჩინოს,  
ნაქსობი ბადით გულს შენკენ ქაჩავს,  
ცოდოა, ცეცხლი არ გაუჩინოს,  
ისედაც დაჭრილს მთლიანად დაწვავს.  
ნეტავ რას მიზამს შავი თვალები,  
ჩასაფრებული ჩემს სასთუმალთან...  
იმის სიღრმეში ჩავიკარგები,  
მე რას გავაწყობ მღელვარე ზღვასთან.



## კიდეც ერთი ახალი წიგნი

„მოგონებები მამაზე“ – ასე ჰქვია მედია მელიას „მოგონებარში“ დაბეჭდილ წიგნს, რომელიც პოეტ იაკობ მელიას ცხოვრებასა და შემოქმედებას ეხება. განხილვა-შეფასება ეძღვნება მოგონებებს მამაზე – იაკობ მელიაზე.

მედია მელია საინტერესოდ გადმოსცემს, როგორ ყალიბდებოდა მამის ცხოვრება. ყველგან და ყველგან იგრძნობა ცოცხალი კავშირი, ტრადიციის ცხოველმყოფელობა. წიგნში წარმოდგენილია და ყურადღების ცენტრში დგას პიროვნების განსწავლვით დაკავშირებული პრობლემები. წარმოდგენილია პოეტის ცხოვრებისეული გარემოებანი, სულიერი ყოფა, ის თავისებურებანი, ის წარუშლელი კვალი, რომელიც იაკობ მელიას ბობოქარმა ცხოვრებამ, ნათელმა, პიროვნულმა თვისებებმა დატოვა. დაუვიწყარი რჩება შემოქმედის, როგორც უაღრესად კეთილშობილი, მაღალზნებრივი, ნათელი და სპეტაკი სახე.

პუბლიცისტიკის ჟანრი – „მოგონება“ თავისებურ ჟანრად ითვლება, რადგან ჟანრი – ჰიბრიდია – წერ წარსულსა, აწმყოსა და მომავალზე.

რა შეადგენს ამ წიგნის უმაღლეს, უკეთილშობილეს სინამდვილეს? ცხადია, სულიერი მხარე, ე.ი. გრძნობა, გონება, ნებისყოფა. საზგასმულია როგორ ენერგიულად მიისწრაფოდა პოეტი თვითმყოფობი საკენ, ეროვნულობისაკენ. ავტორი საკმაო სისრულით მიმოიხილავს პოეტის ცხოვრებას, აშუქებს მოგონებებს, გამოუქვეყნებელ ლექსებს, თარგმანებს, სიმღერებად ამღერებულ ლექსებს, რეცენზიებს, საიუბილეო თარიღების აღმნიშვნელ მილოცვებს. უყურადღებოდ არა აქვს დატოვებული საოჯახო ალბომი, რომელიც ერთ მთლიანობაში კრავს წიგნს.

ჩვენ მიზნად არა გვაქვს ამ წიგნის ინტერპრეტაცია. იგი იმსახურებს სულ სხვა დამოკიდებულებას, ვიდრე განმარტებაა. იგი იმსახურებს ვეზიაროთ და შევუერთდეთ მის პათოსს. მით უფრო, რომ თითოეული თავი თავისთავადი აზრობრივი რიტმითა და კილოთია დაწერილი. დაე, იდინოს დრომ და მოიტანოს ახალი მოთხონილებანი.

ლუიზა ბონკოვა-ხვიჩია,  
ფილოლოგიის მეცნიერებათა დოქტორი,  
საპატიო პროფესორი

# ღიღინა ქიხიშვილი-სახინთხაიშვილი



## ქართული საკაზმით შეზავებული ამბავი

„თუ ტოლერანტი ხარ, ძლიერიც უნდა იყო. სუსტმა, უპირველეს ყოვლისა, ტოლერანტობა უნდა დაივიწყოს, თავად რომ გადარჩეს“.

ოთარ ჭილაძე

„რა არის სიკვდილი ვარდა იმისა, რომ გაშიშვლებული დგახარ ქარში და ღნები მზეში“.

ხალილ ჯიბრანი

ამ დღეებში ირანსა და მის ბირთვულ იარაღზე ანალიტიკოსთა გამუდმებულმა საუბრებმა – აგბარი გამახსენა, რომელიც წლების წინ ჩემი მეგობრის დაბადების დღეზე გავიცანი. მისმა თანაკურსელმა დიდის ამბით წარმოგვიდგინა: – გაიცანით, ჩემი მდგომური აგბარი; სხვათა შორის, ირანიდანაა, ისფაჰანიდან – ნორმალური, წესიერი ადამიანია!.. წინათ თუ ცხვირს ავებზეუბდით მაინც, ახლა არც შაჰ-აბასი გაგვხსენებია, არც ფერეიდანი... არც შაჰის კარზე აღზრდილი კახეთის მეფე როსტომ-ხანი... არც სხვა რაიმეს მტკიცებასა და გულში მჯილის ცემას მოვყოლილვართ; ყველანი ავხმაურდით; დალის ათასი ქვეტექსტითა და იუმორით, შეზავებული კითხვები დავაყარეთ: – ო, ო, სასიამოვნოა, სასიამოვნო!.. ბოლო წლებში ხელოვნურად თავსმოხვეულ „ტოლერანტობას“ – ყურებადღე გაბადრულები კიდევ უფრო ღირსეულად ვთამაშობდით... და, თითქმის მაშინვე, ქართულად საუბარს თავი მივანებეთ და რუსულად ავტიტინდით?!

განათლებამიღებულმა, პროფესიით დიასახლისმა, სულ რომ ტელევიზორს მისჩერებია, მატრაკვეცა ელზამ ვერ მოისვენა, ვიდრე უაზროდ თავი არ მოიწონა: – იცით, სულ ახლახან, ერთ-ერთი ქართველი

პოეტი იხსენებდა, თურმე თეირანიდან ორი მეგობარი ჩამოსვლია; ბაზარში წასულან, რაღაც-რაღაცები უყიდათ და – კარტოფილიც გაავალოთო; კახელ ძია კაცს კარტოფილი დააფასებინეს, თან ერთმანეთში სპარსულად ლაპარაკობენ. რა ენაზე საუბრობთ? – გამყიდველს უკითხავს; რომ გაუგია – სპარსულადო, – არა ვყიდი, საცა გინდათ იქ წადით... შაჰ-აბასის შთამომავლებს მე კარტოფილს არ მივეყიდი!.. გასწით, გამეცალეთ აქედან!.. გაგონილით გოცებულ-პირდაღებულები (ქართველმა მასპინძელმა „ტექსტი“ სიტყვასიტყვით უთარგმნა) ხელებსლა შლიდნენ და თავიანთ წინაპარს მსუბუქად შეუკურთხეს კიდევ...  
ირანელმა მდგომურმა ესლა დასძინა: – და, და ბივატ ტაკიე ვეში ტოჟე, ჩტო დელაც... – გაღმებულმა აქეთ-იქით ყურება დაიწყო, თითქოს ჩვენს შორის მომხრეებს ეძებდა. ეს ყოველივე სასაცილო და თანაც სატირალი გახლდათ...

ის-ის იყო ხმამალალ სიცილს მოვრჩით, რომ პოეზიით შეპყრობილმა – თხელ-თხელმა, კოპწია მემამ კისერს ზემოთ დამაგრებული ხშირი თმის ბუღული სარჭით მკვიდრად დაიმაგრა, თვალთა ეშმაკუნები კიდევ უფრო გააცისკროვნა და სუფრის წვერებს ნახი ხმით მოგვმართა:

– ხალხნო! ლაღოს ლექსს შეგახსენებთ, რაც მახსოვს იმას ვიტყვი; გეხვეწებით, არ შემაწყვეტინოთ-რა?!..

– როგორ გეკადრებათ ქალბატონო მემამ, ჩვენ ასე გვიცნობთ?! – მრავალმნიშვნელოვნად გადმოგვხედა თამადამ... – თუ შეიძლება, ცოტა ხნით გა-ყურდით!..

მემამ უკვე თავის სტიქიაში გახვეულიყო; დეკლამაცია კარგად გამოხდოდა, ის, ხომ, სულ მსახიობობაზე ოცნებობდა... – „საღამოს, როცა შუქთა შურდულით / ათინათინდა ვარსკვლავთ ჭავლეთი, / შენ შემეფეთე და ჩამჩურჩულე: / აღმოსავლეთი, დმოსავლეთი. / საიდან გაჩნდი, საიდან მოდი? / შენი ამბავი გავიგო მინდა. / მე პოეტი ვარ და ქუჩის ლოთი, / შენ კი მაისის ვარდივით წმინდა. / რა გინდა ჩემთნა, პირველყოფილი / სუნთქვა გათრთოლებს უცხო კაცისა, / თუ სისხლი გზიბლავს კეთილშობილი / რუსთაველის და სააკაძისა. / მე თბილისიდან გაქცევა მსურდა, / შენ კი თბილისში ჩამოხველ, ქალო, / ვინ მოგასწავლა ანთებულ გულთან, / ფერეიდნულო აღმასის თვალო? / საით იყავი, ან ვინ გიყვარდა? / მითხარი რამე, მიამბე რამე! / მერე წვედიეთ, ჩამოვჯდეთ მტკვართან / და გავათეთროთ თბილისის ღამე... / მე – შთაგონებით მთვრალი და ხელი, / გეტყვი, რა იყო ჩვენ წარსული, / შენ მოიღერე ჯეირნის ყელი / და გამაგონე შენი სპარსული... / ახლა ერთია ჩემი სურვილი / თან წამიყვანე მგზავრი გვიანი, / გახელებული ტრფობის წყურვილით, / შენზე ოცნებით კაეშნიანი. / ვნახოთ ირანი და თეირანი, / ფერეიდანი, ძველი თავრიზი, / იქ მიმიყვანე მულამ მტირალი / შენი მიჯნური უცხო დავრიში. / და, როცა მოვკვდე, სიკვდილი იცან, / უკანასკნელად კვლავ გამახარე... / მოძებნე ჩემი სამშობლო მიწა / და დამწვარ გულზე გადამაყარე. / დადგება მაშინ

მთვარის საათი, / წუთით ვარსკვლავნიც დაიძინებენ, / ჩვენი რუსთველი, თქვენი საადი / ჩემს სამარესთან იშარებენ. / მე წამოვდგები, კვლავ აენთება / ცის ლაჟვარდებში ვარსკვლავთ ჭავლეტი, / მე ხელებს გავშლი და შეერთდება /დასავლეთი და აღმოსავლეთი“... / — ქების კორიანტელს ბოლო არ უჩანდა... თამადა „ბორჯომის“ ბოთლზე ჩანგლის მონოტონური კაკუნით ცდილობდა თანამეინახეების დამშვიდებას.

... ჩვენ წინ ორმოცდაათ წლამდე, საშუალოზე მაღალი, ახალგაზრდა შავგვრემანი კაცი იჯდა; ოღონდ, არა ჩვენებურად შავგვრემანი, მისი სახის კანს სხვანაირი სიმუქე დაჰკრავდა. სწრაფად მოძრავე წაბლისფერი თვალები თბილად და კეთილგანწყობით უციმციმებდა; ჩვენც მეტი რა გვიინდოდა, ხან რას ვთავაზობდით და ხან რას — მაგიდა ათასნაირი ნუგარით იყო სავსე. მივირთმევდით, ენად გაკრეფილები ერთმანეთს თითქმის არ ვუსმენდით, მოკლედ — ჩვენებურად ვცელქობდით; თუ არ ჩავთვლით მასპინძლის ვაჟს და მის ოთხ მეგობარს, უმეტესობა ხომ ქალები ვიყავით — იუბილარის მეგობრები, მეზობლები, ახლო ნათესავები. ბოლოს დასასხლისის ნახელავი მარწყვის ტორტიც გამოჩინდა მაგიდაზე და, რა თქმა უნდა, მოზრდილი ნაჭერი პირველს, მოულოდნელ სტუმარს, აგბარს ერგო.

აგბარი ბევრს არ ლაპარაკობდა, ჭამითაც ისე რა, მორიდებულად იკმაკნებოდა. უფრო, კონიაკის წრუპებითა და მასში მობანავე ყინულის ბურთულებით ირთობდა თავს; ინტერესით მოგვჩერებოდა, ყველაფერს აკვირდებოდა, გულისყურით გვისმენდა; ცდილობდა სიტუაციას მორგებოდა.

ცოტა ხანში, კონიაკით შეთამამებული, საყველპურო რუსულით ალაპარაკდა კიდევ: — ოთხმოცდაათიანებში რუსეთში ჩავედი, იქიდან — უკრაინაში, ხარკოვში გადავედი... მიუხედავად იმისა, რომ ისფაჰანში კარგად ვცხოვრობდი, გული მუდამ სხვაგან მიმიწევდა; მინდოდა თავი ბიზნესში გამოემცადა... წინ და უკან სიარულის შემდეგ, ჩემს ორ თანამემამულესთან ერთად, საქართველოში ჩამოვედი... სამშობლოში — დედა, და-ძმა მყავსო, მგონი ცოლიც ახსენა — აღარ მახსოვს... თბილისი ძალიან მომეწონა, ხალხი, საქმესაც არა უშავს-რა, კარგი პირი უჩანსო... განათლებული არ ეთქმოდა, თავს უფრო ცხოვრებისეული გამოცდილებით იწონებდა; ვერ გაეგო, რატომ იყო ჩვენი მოსახლეობის დიდი ნაწილი ასე გაღატაკებულ-გაუბედურებული... ახსნას შევეცადეთ, თუმცა მისი მწირი რუსულის გამო, ეს ძალზე ძნელი აღმოჩნდა; რამდენიმე ათეულ ქართულ სიტყვას, რაღაცნაირად რბილად წარმოთქვამდა. საკუთარ ქართულზე თავად ელიძებოდა; ჩვენ თავგამოდით ვუმტივცებდით, თუ გინდა უცხო ენა ისწავლო, შეცდომებით წარმოთქმის არ უნდა შეგრცხვესო...

აქამდე საეჭვოდ გატრუნულმა ასმათმა, მისი „უცოდინრობით“ შეწუხებულმა თუ სასმელით შეთამამებულმა, სუფრას თვალი მოავლო, გუდას პირი მოხსნა, და: — თქვენმა პერსონამ ისფაჰანში დაბადებული მწერლის აჰმად ვაზინის მშვენიერი მოთხრობა,

„ზღაპარი — თავგადასავალი“ გამახსენა, რომელიც თქვენს ქალაქში 1983 წელს ლიტერატურის ინსტიტუტის ბიბლიოთეკაში მომხდარ შემზარავ ხანძარს ეძღვნება, რომლის დროსაც 85 ათასი საუკეთესო წიგნი დამწვარა... — იმედია, ეს მაინც იცის — ჩაილაპარაკა დუღლუნით; — რაოდენ გასაკვირიც არ უნდა იყოს მოთხრობის დასაწყისიც კი მახსოვს: „იყო და არა იყო რა, ღვთის უკეთესი რა იქნებოდა... არც მკითხველი იყო, არც ბებო იყო... ვიყავით მე, ოცი-ოცდაათი გვერდი ზღაპარი და ერთი წიგნის გამყიდველი ბატონი. მის თავზევით ეკიდა ლამაზი აბრა, რომელზედაც ეწერა: გთხოვთ, წიგნებს ნუ აურევთ! როდესაც მაღაზია ხალხით იყო სავსე, ამ აბრას ყურადღებას არავინ აქცევდა. მკითხველები... წიგნებს არჩევდნენ და ურევდნენ...“ — აი, როგორ ვკითხულობთ და ვიმახსოვრებთ... თქვენ კი, თქვენ... — და ასმათის მონოლოგით გამტკნარებულ აგბარს ბიჭები შემოემშველნენ: — რა ვალდებულია, ყველაფერი წაკითხული ჰქონდეს და თანაც ახსოვდეს?! ჩვენთან რა, ბევრსა აქვს წაკითხული მაგალითად, თუნდაც შიო არაგვისპირელის, ეგნატე ნინოშვილის ნაწერები, ანდა... და, საერთოდ, მოვეშვათ რა ამ ჩვენი ცოდნა-წიგნიერებით ზედმეტ კეკლუცობას...

— ხო, გასაგებია! კარგით, კარგით, გავიგე! ყველაფერი გა-ვი-გე!.. — ასმათმა ჭიქა ასწია — გაგვიმარჯოსო! — დაიძახა და... მაგიდაზე ხმაურით დადგა.

ნინო ჩამოვარდნილი უხერხულობის განმუხტვას შეეცადა და რუსთაველს მოუხმო... თუმცა, ესეც წყლის ნაყვას დაემსგავსა... — არა! რას ვამბობ, კითხვასთან მთლად ასე მწყრალადაც არ იყო; მახსოვს, ჰუმანგ გოლშირის მცირეტიანიანი რომანი „უფლისწული ეპთეჯიბი“ ახსენა...

სუფრის წვერებს აყოლილი ნელთბილად ვილიძებოდი; გულმა ვერ მომიტოვინა, შენიშვნის მიუხედავად თავი გამოვიდე, დაა: — ჩემო ძვირფასებო, ჭკვიანებო, კარგებო, გეაჯებით — მომისმინეთ!

— დაწყნარდით! მოთოკეთ ემოციები, ჩვენს ფილოსოფოსს რაღაც საინტერესოს მოყოლა სურს, იქნებ მოუუსმინოთ?! — აბა, გისმენთ, დროზე დაიწყე; თორემ, როგორც იტყვიან „ყელი გაშრა!“ გისმენთ, აბა ჰე! — ღიმილით შემომიბღვირა ხათუნამ.

— ვფიქრობ, ჩემი მონაცოლი ჩვენს სასაუბრო თემას, რაღაცნაირად, შეავსებს და მოუხდება კიდევ; ერთგან გრიგოლ რობაქიძე იხსენებს: „... 1916 წელს, როგორც სამხედრო მოხელე, სპარსეთში მოვხვდი. ეს ჩემი ცხოვრების შემობრუნების წერტილი იყო, მესოპოტამიის ზღურბლამდე მივადწიე და მქონდა შეგრძნება, რომ საუკუნეთა სვლაში სამშობლო ვიპოვე. ისტორიკოსები ვარაუდობენ — ქართველთა უძველესი, პირველსამშობლო ქალდეა იყო. მიწის შეგრძნება ჩემში ყოველთვის განსაკუთრებით იყო გამოხატული — ის ირანის ზეგანზე რაღაც კონსმიურად იქცა; მზე აღარ იყო ჩემთვის უბრალო ასტრონომიული მოვლენა, ზორასტრის ქვეყანაში ნიცემეს „ზარატუსტრა“ მქონდა თან. ფორდოუსის, ჰაფიზის, ომარ ხაიამის ქვეყანაში „დივანი“. სრული-

ად შემთხვევით თან მქონდა მესამე წიგნიც: ნაწყვეტები ბაბილონური ეპოსისა — „გილგამეშისა“. ამან გადაწყვიტა ჩემი მწერლური ბედი. ირან-მესოპოტამიურ მიწაზე წამოიმართნენ პირველსამყაროს გოლიათური ფიგურები და სურათები. მთელი ჩემი არსებით ვიგრძენი, რომ ჩემი პოეტური ფესვები აქ იყო. ამ დროს თავს დამეხსნა ირანული კოსმიური სურათი: საშინელი გვალვა, მზის რისხვა, ლიანგის გმინვა...“ — სტუმარს, ჩემს ნათქვამს სიტყვასიტყვით, რუსულის კარგი მცოდნე, ანდრო უთარგმნიდა; მეტი დამაჯერებლობისათვის ორივე ხელსა და სახის მიმიკას ოსტატურად იშველიებდა; დასასრულს, მოწონების ნიშნად, ტაში შემოჰკრეს, ჯერ ხმადაბლა, მერე უფრო ხმამაღლა შემოსძახეს: „რერო, სულ არ მოვალ ამ ქვეყანას, რერო!..“, „ღალე, ღალე, დი-ვლი-ღალაღალე, ჩემო ლამაზო სამშობლო, შენ კი გენაცვალე!“

ამ ულოდნელმა „ღირსეულ-ღირიულმა“ გადასვევამ მანონი სხვა გუნებაზე დააყენა; არც აცია, არც აცხელა წამოდგა, არტისტული მიხვრა-მოხვრით, დაყენებული, სერიოზული სიფათით როიალს მიუჯდა, კლავიშებს თითებით გადაუარა და რაც ყველაზე უკეთ გამოსდიოდა ის დაუკრა: „ოჰო, მუდამ არის, ყველგან არის ზაზუნა ჩემთან ერთად...“ — ბეთჰოვენის ამ თითქოსდა უწყინარმა, სევდიანმა მელოდია მბინა სხვანაირი სისავსით აავსო... დაკრულმა ყველა თავის ალაგას დასვა...

— აი, ეს მესმის! ყოჩაღ, მანონ, ყოჩაღ! რა უმტკივნეულოდ ჩააქრე ჩვენი ქართული, მამაპაპური ალტკინება!.. კაროჩე, მაგარი ვინმე ხარ!

— სიტყვით თაზო გამოვიდა!..

ამ ამბის შემდეგ დიდი დრო გავიდა; ერთხელაც ჩემი მეგობარი, ჩვეულებრივ, ტელეფონით შემომეხმინა. ერთმანეთის მიკითხვ-მოკითხვის, ტელევიზიის შოუების გულის ამრევ, ერთფეროვან ტაკიმასხ-არაობაზე საუბრით გული რომ ვიჯერეთ, ხმაშეცვლილმა მკითხა:

— აგბარი ხომ გახსოვს?

— აგბარი?! — უცებ აზრზე ვერ მოვედი, მერე დალი ახსენა და...

— კი, კი მახსოვს; როგორ არის, რა ისმის?

— ეჰ, რაღა როგორ არის, ორი კვირის წინ გარდაცვლილა ის უბედური, ისა...

— რას ამბობ, როგორ თუ გარდაცვლილა; როდის, რატომ, რა დაემართა?! — კითხვები სეტყვასავით დავაყარე.

— ოჰ, რა ვიცი, რა ვითხრა, საიდან დავიწყო; ამ წინებზე დალიმ დამირეკა — სარეცხის მანქანის კარგი ხელოსანი ხომ არ იციო... რალაცნაირად შეწუხებული ჩანდა... მერე ესლა მომიყვა: — თურმე, მაგათი სამეგობრო-სანაცნობო რომ იკრიბებოდა, მარტო კიანიაკს და ჭაჭის არაყს სვამდნენ; ესენი ხომ ტრადიციულად, როგორც ვიცი, ამნაირ სასმელებს მიჩვეულნი არ არიან; თუმცა, ამას ანგარიშს არ უწევდნენ... წესად ჰქონიათ, ასეთი პურობების მერე, „ჭრელ აბანოში“ წასვლა — ცოდვების ჩამოსაბანად... ერთ-ერთი თავყრილობის შემდეგ, ეს წერასატანილი, კარგად გატრეტილი შინ რომ მი-

სულა, ცუდად გამხდარა... ერთის მაგიერ გულის რამდენიმე აბი მიუღია; ეტყობა, ამან კიდევ უფრო გაუუარესა მდგომარეობა... როგორღაც ის კი მოუხერხებია, რომ დალისთვის დაურეკავს (დალი, ხომ გვერდით კორპუსში ცხოვრობს!..), მიშველეთ! ცუდადა ვარ, სული მეხუთება, ვინჩობი, ჰაერი არ მყოფნის, გულის მხარეს უსაშველო ტკივილი მაქვს... თურმე, შუალამისას მორიგი შეტევა მოსვლია, რალაცნაირად გათენებადღე გაუძლია... როგორ შეიძლებოდა ამდენი დროის დაკარგვა?! დალის სამეზობლო ფეხზე დაუყენებია. სასწრაფოს მანქანას თან გაჰყოლია; ეტყობა აღსასრულის მოახლოებას გრძნობდა: — ტიროდა, დედას უხმობდა... დალის ჩურჩულნარევი, უმწეო ხმით ეხვეწებოდა — თქვენს სალოცავებს შევევდრეთ, იქნებ გადამარჩინონ... ექიმების მცდელობის მიუხედავად, მიყვანიდან რამდენიმე საათში გარდაცვლილა, მწვავე ინფარქტის დიაგნოზით... ნეტა, ეს არ მენახათ — წუხდა აცრემლებული დალი... ძმასა და რამდენიმე მეგობარს წაუსვებნებიათ სამშობლოში...

ალარ ვუსმენდი; ყურმილიდან წყვეტილად ისმოდა: — ალო, ალო!.. წამიერად განათებულ ცაზე ელვა უხსენებელივით გაიკლანა, ფანჯარა მივხურე... მართლაც, რომ სადაურსა სად წაიყვან; ძალიან შემეცოდა ეს ბედს აყოლილი, დედისა და მახლობლების ნატრული კაცი, რომელიც ახლა უკვე სამუდამოდ ჩაზუტებოდა მშობლიურ ნიხანის, ფოშქუპისა და რუბარუს ტყეებს; ზაგროსის, სარაბის, შაჰანის, ჰინიკუშისა და ქოთანის მთებს; ელბრუსის მთაგრეხილსა და მდინარე არაქსს, დეშთი ქვერის მარილიან უდაბნოს...

მაგიდას მიუჯექი, გაზეთის რედაქტორისათვის შეპირებული წერილის წერა გაავარძელე; ... სოფელ კუმისში, და არა მარტო ამ სოფელში, ადგილობრივ მწყემსებს საქონელი საბალახოდ ვერ გაურეკიათ, რადგან რამდენმე ასეული ჰექტარი მიწა, მათ შორის საძოვარიც, ვილაც არაბს შეუსყიდია და იქ შესვლის უფლებას არ აძლევთ; სოფელში იმასაც ყვებინა, რომ ცოტა ხანში არაბების რამდენიმე ოჯახი აპირებს ჩამოსვლას და აქ დასახლებასო. სამართლებრივი გზით ვერაფერს გავხდით, — გვესაუბრება ამ სოფლის მკვიდრი გოგა ბ-ი — არადა საქონლის გარეშე სოფელი გაგონილა?! შეიგნეთ, ახლა სხვა დროაო! — გვინდა, მაგრამ ვერ ვიგნებთ, ვერა! ასე დაუნდობლად, შეუბრალებლად როდემდე უნდა ვაჯიჯგინოთ, ჩვენივე ხელშეწყობით, „მოყვრულად“ შემოსულ მტერს ჩვენი გასაწყობებული, დაუძღვრებული, დაუცველი მიწა-წყალი, როდემდე?! თან ვიის? — არაბებს, თურქებს, ჩინელებს, სპარსელებს... ათას ოხერსა და მამაძალს!..

— ძნელია, გოგასა და მისი თანასოფლელების გადარწმუნება, რადგან კარგა ხანია, რაც ჩვენს ქვეყანაში სამშობლოსადმი ერთგულების ნაკლებობაა...

ჩემი საყვარელი მწერლის თქმისა არ იყოს: — დრო კი მიქრის, მიქრის, მიქრიალებს, როგორც ხელებში ჩამტვრეული ჭურჭლიდან წყალი...

სულ ეს იყო; და განა ცოტაა ეს?!



ეკას მისტერია

...ქალი – საწყისი სიყვარულისა!.. საწყისი პირველყოფილი, უწონადო მდგომარეობის...

– ოდესღაც მართო ღრუბლები ამშვენებდა ცას, ოდესღაც მზემ გამოანათა, მზე შემოვიდა ადამიანების გულში.

ქალი მთელი თავისი სიდიადით – სიცოცხლის, თავისუფლების საწყისს დაატარებს და ატარებს ყველაფერს საკუთარ სულში უსულობის წასაშლელად.

ყველა – ფერია მასში!

ამიტომ ყველა-ფ(ე)რის მოცემა შეუძლია შენტვის!..

...ის ქალია და წინასწარ არასდროს იცი, რას გიმზადებს, ადამ!..

– არასდროს იცი, როდის გაგიშვებს სიმარტოვის დასალიერში, არასდროს იცი, როდის დაგტოვებს თავისთან, მარტოობის დასავიწყებლად, არასდროს იცი, როდის „გამიშვლდება“ შენტვის, არასდროს იცი, როდის შეიმოსება იდუმალებით, არასდროს იცი რას მოგცემს, ან რას წაიღებს შენგან...

– იქნებ სულის ყვავილების ჩუქებას გიპირებს, შენ კი მოუთმენლობის გამო მზერა სადღაც, შორს, უსაშველოდ შორს გადაგაქვს, რადგან იმ უმნიშველო, პატარა „სასწაულს“ ეძებ მასში, რაც ყველა, სხვა, დანარჩენი ქალისგან განასხვავებს მას.

– შენ ხომ საკუთარ ფიქრებს ინახავ მისთვის, რომ გაანდო და გაენდო ბოლომდე. იქნებ არც ენდობი მას?... იქნებ საკუთარ თავზე მეტადაც ენდობი, არავინ იცის, შენ გარდა...

– ის ქალია და შენგან ელის იმ ერთ ფერს, რომელიც ყველა-ფერს შეცვლის მის ცხოვრებაში, ყველა-ფერს დახატავს შენთვის და არასდროს დაჭირდება საშლელი, ცუდი მოგონებების წასაშლელად, რადგან შენ არ დაუტოვებ ცუდ მოგონებებს!..

– მხოლოდ მასთან შეგიძლია აღმოაჩინო, რომ ისევ მორცხვი ხარ, ადამ!..

– პირველყოფილი გონების სისუფთავეა შენი სიძლიერე და ამიტომ არ გეშინია მასთან „გამიშვლების“, არ გეშინია იყო ის, ვინც ხარ!..

– ადამიანი ყოველთვის ეძებს, მაშინაც კი, როცა ყველაფერი აქვს, ასეთია მისი მიწიერი ბუნება.

– სულიერება და გარეგნული სილამაზე ერთად!.. ალბათ ამას ეძებ მასში და დროც მალე გადის ძიებაში...

ძველი ბერძნებიც ასე მოაიზრებდნენ სიყვარულს, ერთ ქალში გაერთიანებულს – ადამიანური, ნატურული და ბოხოქარი, შლევი ვნება!.. საამურია, არა?

– იქნებ ამაოდ დაშვრნენ ძველი ბერძნები, აფროდიტა ურანუს და აფროდიტა პანდემოს – სიყვარულისა და სილამაზის ორი სახის ქალღმერთი რომ შექმნეს; იქნებ ღმერთებიც მოკვდავთათვის მიუწვდომელს ეძებდნენ მაშინ და ახლა შენ განავრძობ ძებნას!..

– ეს დედა-მიწაა, ადამ!.. შენი სახლი!..

...დედამიწაზე – იქ, სადაც ადამიანს სულიერი სიმაღლე ალამაზებს, ფიზიკური ფერმკრთალად გამოიყურება, ფიზიკურ მშვენიერებაში მომწველელი სული კი მიწიერ მიჯაჭვულობას ვერ ასცილებია ხშირად და დღესაც „დაბობლავს“ მიწაზე, სასიმიხდილ სიმწესარეში, საკუთარი უსუსურობის დასაფარად ათას ნიღაბს ირგებს არაფრისმთქმელ სახეზე და ყველაზე კარგად შენ ამჩნევ ამ ნიღაბს, ამჩნევ და ხანდახან არ იმჩნევ ამას!..

– შენც მიწის შვილი ხარ ადამ!.. მოკვდავი, მოკვდავთა შორის!..

– გიჭირს ამდენი ქალის გარემოცვაში შენი ეკას პონა, მაგრამ უნდა აირჩიო შენი ეკა!.. დროა, აირჩიო შენი სხეულის ნაწილი, რომელიც ძილში გამოგაცალეს და სიფხიზლეშიც კი გიჭირს მისი გარჩევა, რადგან, მაცდურია თვალი, მაცდურია გრძნობები, რომელსაც თავდავიწყებამდე მიყავხარ და ირგვლივ „ყველა-ფერი“ შენი გგონია!..

– არ დაგავიწყდეს ადამ! – პირველყოფილი გონების სისუფთავეა შენი სიძლიერე!..

...სხვა დანარჩენი მირაჟია მტვრისფერ მიწაზე!..

– ყველაფერი მე-ორ-დება, მეორდება საუკუნეების განმავლობაში და მაინც არასდროს გა-ორ-დება შენ გონებაში ერთი ეკა!..

– პირველსაწყისი, სამყაროსეული გონი არ ქრება!..

უმაწკო, მიწიერი სისუსტეებისგან თავისუფალ გონებას არაფრის ეშინია!..

შენც ნუ შეგეშინდება ადამ!.. ნუ დაუწყებ ლოდინს ციურ მანანას ციდან, რადგან შენ კარგად იცი, ვინაა შუამავალი სრულქმნილ ღმერთსა და არასრულქმნილ ადამიანს შორის; ისიც იცი, რა ათავისუფლებს ღვთაებრივი წარმომავლობის სულს, მატერიალურ სამყაროში; იცი, და მაინც „გძინავს“, ფერადი სიზმრები რომ დაგესიზმროს, „გძინავს“, მიწიერი უფერულ რეალობას რომ მოარიდო თვალი.

დიდი ხანია გძინავს, ადამ!..

ძილში სიფხიზლე არაა მიწიერისთვის რთული, მაგრამ, ახლა გაღვიძების დროა!.. დროა შენი ხელით შემოსო ეკა მზის სხივებით. რა თქმა უნდა მთვარის სამი ფაზის ბუნებას ვერ შეცვლი მასში, რადგან კოსმიურია ის და „დედა-მიწის“ დაწერილ კანონებს არ ემორჩილება. მთვარის ფაზები ქალურ ბუნებაში – მატების, შევსების და კლების ფაზებიც ხომ შენზეა დამოკიდებული, ადამ!..

იქნებ ევასაც უჭირს, დაიბრუნოს პირველყოფილი, პირველქმნილი სისპეტაკე, თავისუფალი ბობოქარი სული დაიბრუნოს და ისე წარსდგეს შენ წინაშე, იქნებ შენი უყურადღებობა ან სულსწრაფობა უშლის ხელს, საკუთარ თავს დაუბრუნდეს და ისე მოვიდეს შენთან, იქნებ ევასაც „სძინავს“ და გაღვიძების ემინია ადამის მიწიერი ბუნების, მისი ადამიანური სისუსტის გამო...

– მიეხმარე ადამ, სრულყოფილი გახდეს და ისე დაგიბრუნდეს, რათა სამყაროსეული მისტერიის დასასრული მარადიული აღმადრენის ახალი დასაწყისის უპირობო აღსასრულია!..

– ჰო, მართლა, „ყველა-ფერს“ ნუ მოკიდებ ხელს, რადგან ასე „არა-ფერი“ გამოგივა, ევასაც დალუპავ და საკუთარ თავსაც გამოუტან განაჩენს ცოდვილ მიწაზე – ცოდვილ მიწაზე დარჩები ისევ და საუკუნენი გავლენ სამყაროს უსასრულობის შეგრძნების სანეტარო მოლოდინში!..

– შეცდომის დრო აღარაა, ადამ!..

– არ დაგავიწყდეს – პირველყოფილი გონების სისუფთავეა შენი სიძლიერე!.. ...ოღესადაც მარტო ღრუბლები ამშვენებდა ცას, ოღესდაც მზემ გამოანათა, მზე შემოვიდა ადამიანების გულში, ქალი კი იმიტომ შექმნა ღმერთმა, უკეთ რომ ეგრძნო მამაკაცს თავის მარტობა ფერად, ხან უფერულ, უსასრულო სამყაროში, მაგრამ, არ დაიჯერო ეს ადამ!.. – ევა შენთვის შექმნა არსთა გამრიგემ!.. შენთვის შექმნა, რათა მიწიერი ცხოვრების შემდეგ, მარადიულში გადასასვლელ გზასთან ახლოს, მისი სუნთქვა იგრძნო და ერთად გადახვიდეთ უსასრულობაში...

– საწყისი კი პირველყოფილი, პირველქმნილი მარადიული კოსმიური ევაა, სამყაროს უსასრულობის უკეთ შეგრძნობისთვის შექმნილ ადამთან ერთად!..

## წერილი ჩემი მეგობრის გამეცხრელებულ EGO -ს (ი)-რეალობიდან

განზომილებაში მოგზაურობა არც ისე რთულია, განსაკუთრებით საინტერესოა მაშინ, როცა აქ, მიწაზე ადამიანად ყოფნა ძლიერ ძნელდება. ამ შეგრძნებას აქეთ-იქით ხეტიალი ჯობია, მითუმეტეს იქ ხეტიალი, სადაც ყველას არ ხელეწიფება მოხვედრა...

შენ კი ერთხელაც ადგები და შეიძოსები უხილავი სამოსით, კარს გამოკეტავ და გზას დაადგები...

გზა ჰქვია თორემ, გვირავს უფრო ჰგავს...

ჰოდა, გზად მიმავალი მგზავრის ფიქრები სულაც არ ჩამოჰგავს გვირავის ბოლოს მიმავალის ფიქრებს...

ახლა ჯობია მოხეტიალე გერქვას, ასე უფრო გაიკვლევ გზას და გონების გრავიტაციულ მოძრაობას მინდობილი მიხვდები, რომ ცხოვრება მარტო შენი ბიოლოგიური ცხოვრების მონაკვეთად არ უნდა მიგაჩნდეს...

...განზომილებებში მოხეტიალე მგზავრი; კეთილი მეზღაპრე; გზააბნეული პილიგრიმი, ან იქნებ რომანტიკული ნატურალისტი ლოგიკოსი – რაც გსურს ის დაირქვი, მაინც ის ხარ, ვინც ხარ მოგზაურობის დაწყებიდან მოგზაურობის დასასრულამდე...

ერთხელაც, ადამიანები მიხვდებიან, რომ ყველა ადამიანი თოვლს ჰგავს, იისფერს და სუფთას, ძალიან სუფთას – აი ისეთს, წყაროს წყალს რომ ჩამოაყოლებ მზერას, გამჭვირვალეს, მოკამკამეს... ამიტომ ადამიანს ვერ შეურაცხყოფ, ტკენა კი შეგიძლია მიაყენო – ამისთვის უბრალოდ მის სულზე უნდა გადაიარო მძიმე ნაბიჯებით და სწორედ ისეთ ნაკვალევს დატოვებ, როგორც თეთრ თოვლზე ჭუჭყიანი ნაბიჯებით სიარულისას რჩება... ალბათ ოღესდაც მიხვდებიან ამას ადამიანები და შეიცვ-

ლებიან – თუმცა „ავსა კარგად ვერვინ შეცვლის, თავსა ახლად ვერვინ იშობს“.

შენ კი ერთ ადგილზე დგახარ და ფიქრებს ვერ აღწევ თავს, მეგობარო!..

ჰო, მოსაწყენია ერთ ადგილზე ყოფნა, დროც კი არ ჩერდება ერთ ადგილზე და შენ რატომ უნდა გაჩერდე?..

ისევ აგრძელებ გზას, უფრო სწორად კი მოგზაურობას განზომილებებში, უცებ უკუპროპორციულობის გრაფიკი გახსენებს თავს და შენ წინ ვერაფერს ხედავ... (ხედავ? ყველაფრის ცოდნა არც ისე სახარბიელოა ხანდახან).

ერთი შეხედვით ყველაფერი რიგზეა, მხოლოდ კუთხეა აცდენილ წრეებს შორის...

ახლა კი ყველაფრის აწონ-დაწონას იწყებ, სად ჯობია ყოფნა – იქ, სადაც ყველაფერზე ქილიკი და ყველაფრის გაფარსება შეიძლება, იქ, სადაც ყველაფერი ერთფეროვანია, თუ აქ – სადაც ცა ცისფერია, უწონადობაში ხარ და შენ სხეულს ხედავ გვერდიდან. გვერდიდან ხედავ სხეულს, უკეთ აკვირდები და ისე გაოცებს სულის სიღრმე, თითქოს ახალი გალაქტიკა აღმოგეჩინოს უამრავი ამო-უცნობი ვარსკვლავით და გრძნობ, მანამ არ მოისვენებ, სანამ თითოეულ მათგანს გულმოდგინედ არ შეისწავლი. შენ ხომ სხვანაირად არ შეგიძლია, იცი, მაინც ასე მოიქცევი, თუნდაც ამის გამო დაისაჯო – თვითგანზომილებიდან წკვარამში განდევნამდეც კი...

რასაკვირველია – იმასაც ხვდები, ევოლუციის დამამტკიცებელი არგუმენტები აქ უბრალოდ არაფერში გამოგადგება, უვარგისი ნივთივით გადაისვრი მსოფლიო სევდას დედამიწაზე დარჩენილ

ნავის ყუთში, კოსმოსში გაბნეულ მოგონებებს შეა-  
გროვებ და საჩუქრად „და-არჩევ“ მეგობრებთან...

მოგზაურობით დასვენებული, საკუთარ თავში ახ-  
ალი აღმოჩენებით დაღლილი, იგრძნობ ერთი სახის  
ენერჯის გადასვლას მეორეში – და ხვდები –  
აქაც რაღაც აირია... იგრძნობ საკუთარ სხეულში  
ენერჯის გარდაქმნას: სიყვარულიდან – სიყვარულ-  
ში, ერთგულებიდან ერთგულებაში, სიკეთიდან სიკე-  
თეში, მონატრებიდან მონატრებაში, სიცოცხლიდან  
სიცოცხლეში, გარდაცვალებიდან გარდაცვალებაში,  
დაბადებიდან დაბადებაში, სამოთხიდან სამოთხეში,  
ჯოჯოხეთიდან ჯოჯოხეთში, ტკივილიდან ტკივილ-  
ში, მოთმინებიდან მოთმინებაში, შეცდომიდან შეცდო-  
მაში, სიმშვიდიდან სიმშვიდეში, ფიქრებიდან ფიქრებ-  
ში, სევდიდან სევდაში, სინანულიდან სინანულში,  
მორჩილებიდან მორჩილებაში, სიჯიუტიდან სი-  
ჯიუტეში, პატიებიდან პატიებაში, მარტოობიდან  
მარტოობაში, ერთფეროვნებიდან ერთფეროვნება-  
ში, საინტერესოდან საინტერესოში, უინტერესოდან  
უინტერესოში, მარტივიდან მარტივში, რთულიდან  
რთულში, მელანქოლიურიდან მელანქოლიურში, სი-  
სულელიდან სისულელეში, მღელვარებიდან მღელ-  
ვარებაში, დასაწყისიდან დასაწყისში, დასასრული-  
დან დასასრულში, სიზმრიდან სიზმარში, ზღაპრიდან  
ზღაპარში...

...და ასე, დაუსრულებლად... ნეტავ, როდემდე?!

ერთი დაღლილი მგზავრი ამბობდა: „დიდი მეგო-  
ბრობა ზღაპარშია, დიდი სიყვარული ზღაპარშია,  
დღეიდან ზღაპარში გადავდივარ!“

– შენც ხომ არ გინდა ზღაპარში გადასვლა  
მეგობარო?..

იქნებ ჰკითხო საკუთარ მეს, ისიც გიპასუხებს,  
სხვა რა გზა აქვს? სად გაგექცევა? ...მაგრამ ისევ  
მოგზაურობას დაუბრუნდეთ, მაინც რა გამოვიდა ამ  
მოგზაურობიდან? ერთიდაიმავე წრეზე ტრიალებ?  
ისევ იქ ბრუნდები, საიდანაც მოხვედი?

– „ჰოპლა, ჩვენ ვცოცხლობთ!“

...და შენ ისევ ჯიუტად აგრძელებ გზას, უფრო  
სწორად კი მოგზაურობას განზომილებებში...

ერთიდან მეორეში, მეორედან მესამეში, მეშვიდე-  
ში, მეცხრეში... ისე მეცხრე ალბათ ყველაზე საინ-  
ტერესოა, ამ დროს ალბათ ყველაზე ახლოს ხარ  
ცასთან, „მეცხრე ცასთან“, აბსოლუტურად ინერტულ  
და პროსტრაციულ განზომილებაში... უკვე თვლაც  
აგერია, იმდენია განზომილება და არც მთავრდება

შენს ჯინაზე!

...ილლები, ისვენებ, ილლები, ისვენებ, ილლები,  
ილლები, ილლები...

– რა კარგია დაღლა – აი მაშინ გრძნობ, რომ  
უაზროდ არ გიხეტივარ, უაზროდ არ ამოსულა  
მზე და არც მთვარე ჩავა უაზროდ, რადგან, ამ სამყა-  
როში ყველაფერი გათვლილია, იქნებ დათვლილიც.

შენ ახლა კოსმიურ მუსიკას უსმენ და ეს  
გამშვიდებს, საღაც, გულის სიღრმეში გრძნობ  
– შენში რაღაც ახალი ხდება და აუცილებლად  
მოგიწევს პარამეტრების შემცველი უმარტივესი  
უტოლობების ამოხსნა. შენი გრავიტაციული გონ-  
ებისთვის ეს არცთუ ისე რთულია და შენც მორ-  
ჩილად – ხსნი ყველა უტოლობას.

დრო არ ჩერდება და მაინც – დროს ვერ გრ-  
ძნობ...

რაღაც გინმობს – შორეული, ახლობელი ნაც-  
ნობი განცდა, ვიღაც გინმობს, ხმა არ გესმის, მაგრამ  
გრძნობ...

– გრძნობ, დროა შენს სახლში – დედამიწაზე  
დაბრუნდე, რადგან მხოლოდ იქაა ფიქრები ცაზე  
შორი, გრძნობები „სერაფიმთა ბაგეზე უნაზესი, ფა-  
ქიზი“, იქაა შენი სევდის ნავსაყუდელი..

ყველა თავის წიაღს უბრუნებდება, რამეთუ: „რაიც  
ყოფილა, უკვე არის დიდი ხანია, და რაც აწი იქნება,  
ის უკვე იყო“... (ეკლესიასტე, 3,15)

შენ ახლა გვვიძავს, ისე, თითქოს არასდროს  
გძინებია, ხედავ ბიოსფეროს, აკვირდები და და  
ხვდები, როგორ სძინავთ გრძნობებს, მშვიდად ძინავთ  
და პირზე ღიმილით ელიან დი(ა)დი გარდასახვის  
დაწყებას...

...მოსაღამოვდა.

...იქნებ გათენდა?!

– თუმცა ეს ახლა არაფერს ცვლის, რადგან  
უკვე სახლში ხარ... გრძნობ სხეულისა და სულის  
სიმსუბუქეს და უკვე აღარც გაინტერესებს, როდის  
დასრულდება ზამთარი შენი მღელვარებისა...

ევა შენთვის შექმნა არსთა გამრიგებ!.. შენთვის  
შექმნა, რათა მიწიერი ცხოვრების შემდეგ, მარადი-  
ულში გადასასვლელ გზასთან ახლოს, მისი სუნთქვა  
იგრძნო და ერთად გადახვიდეთ უსასრულობაში...

– საწყისი კი პირველყოფილი, პირველქმნილი  
მარადიული კოსმიური ევაა, სამყაროს უსასრუ-  
ლობის უკეთ შერქმნილობისთვის შექმნილ ადამთან  
ერთად!..





წიგნი დიდ კაცზე....

„ყველაზე მეტად მაკლიხარ და მენატრები“, – ასე იწყებს ცნობილი მათემატიკოსის, საზოგადო მოღვაწის, მსოფლიო მნიშვნელობის მეცნიერის, პროფესორ ლაზო ზამბახიძისადმი მიძღვნილ საიუბილეო კრებულს მისი ქალიშვილი – ნინო ზამბახიძე. წიგნის ავტორი და შემდგენელია მისი მეუღლე ლიკა დგებუაძე.

კარგო მეცნიერო, კარგო ქართველო, კარგო კაცო! – კრებულის წერილებში უამრავი აღმატების ნიშანი, უამრავი ქათინაური მიმოუბნევიათ და უთქვამთ ყოფილ სტუდენტებს, თანაშრომლებს, მეგობრებსა და ნათესავებს.

რა მძიმე ჯვარია კაიკაცობა და რა ბედნიერებაა, როცა გრძნობ, რომ არ გატყდი, არ მოიღუნე, არ განილიე, ხელში არ შემოგადნა ის, რაც ერთხელ იწამე შენი არსებობის აზრად და მიზნად! ამიტომაც ივ. ჯავახიშვილის სახელობის თბილისის სახელმწიფო უნივერსიტეტის მაშინდელმა რექტორმა აკადემიკოსმა როინ მეტრეველმა თქვა: „ლაზო ზამბახიძე თბილისის სახელმწიფო უნივერსიტეტის სინდის-ნამუსიაო“.

ამ გამოთქმაში გარდა ჭკუისა, ბატონი ლაზოს, უანგარო, რაინდული ბუნება ჩანს თავისი ზნეობრივი მაქსიმალიზმით. მოგონებებში ვკითხულობთ, რომ ბატონი ლაზო ახალგაზრდობასაც, სტუდენტებსაც შეეწია თავისი სპეციაკი სულით. ძნელია კარგი მეც-

ნიერობა! არანაკლებ ძნელია დღევანდელობაში იყო ღირსეული ადამიანი. რამდენი რამ უნდა გადაარჩინო! შენი სულის სიღრმეში, ხელშეუხებლად შეინახო ის საუნჯე, განგებამ რომ ჩაგაბარა სასოებით. მან კი დააფასა ღვთისა და ბუნების წყალობა. იყო უნივერსიტეტის მექანიკა-მათემატიკის ფაკულტეტის დეკანი 28 წლის განმავლობაში, ალგებრა-გეომეტრიის კათედრის გამგე, ქართული საბჭოთა ენციკლოპედიის ფიზიკა-მათემატიკისა და ტექნიკის რედაქციის უფროსი სამეცნიერო რედაქტორი.

წიგნს წითელ ზოლად გასდევს ლაზო ზამბახიძის ჯანსაღი ეროვნული გრძნობა. როგორც მეცნიერი, ის გამორჩეული ბედის ოსტატია, თუ „ბედში“ გუმანსაც ვიგულისხმებთ და იმასაც, რომ ასეთი მეცნიერები თვითონ ირჩევს თავის გზას. შეიძლება ითქვას, ეს ორივე ტიტული შედგა ერთ ადამიანში.

თითოეული წერილი-მოგონება სიყვარულის ახსნაა – ძმობის გამოცხადებაა. როცა ამ წერილებს კრებულს კითხულობ, გგონია ღია სარკმლიდან რეალურ ქვეყანაში იცქირები. ვკითხულობთ წერილებს და გვგონია, წერილი წერილი არაა, მოგონება მოგონება არაა, უმაღლესი, პატარა პოემებია პროზაში. ეს მოგონებები უარყოფს ტრადიციულ ჟანრებს, ჟანრგარეშეა, განდგომია მათ. წიგნი დოკუმენტურია. დოკუმენტალობაშია მისი ჯადო და ფასი.

უფლება ჰქონდა, თავაწიულს ევლო...

გეოგრაფი, სპელეოლოგი, პრომეთეს ძღვიმის აღმომჩენი, საქართველოს დამსახურებული ჟურნალისტი, სერგეი მესხის პრემიის ლაურეატი, ფაზისის აკადემიის წევრი, ქაქუცა ჩოლოყაშვილის ეროვნული საზოგადოების საპატიო წევრი, გეოგრაფიული საზოგადოების საპატიო წევრი, წყალტუბოს საპატიო მოქალაქე...

ჯუშუბერ ჯიშკარიანს 8 აგვისტოს 80 წელი შეუსრულდებოდა.

ბატონი ჯუშუბერი ისე მოკვდა, როგორც იცხოვრა – მოკრძალებულად, ვაჟკაცურად.

ყველას როდი უწევდა მის გვერდით მუშაობა. მე კი ბედმა გამიღიმა. მისი კარი ჩემთვის მუდამ ღია იყო. პირველად მასში ერთი მკაცრი, უკარება კაცი დავინახე. შემდეგ საოცარი გარდაქმნა მოხდა და ანაზღად სხვა ადამიანი ვინილე.

ლოცვა-კურთხევას ვუგზავნი მამაზეციერს, რომ შემხვედრა ჯუშუბერ ჯიშკარიანს. ბატონმა ჯუშ-

ბერმა თვითონ გამოჰყდა თავისი არაჩვეულებრივი ბედი.

შიში რა იყო, არ იცოდა, მხოლოდ საკუთარი სისხლის თამაში აშინებდა, ალბათ, იმიტომ, რომ მხოლოდ მან იცოდა მისი უსაზღვროება.


მხედველობა დაკარგა, მაგრამ ფარ-ხმალი არ დაუყრია ამ ზღაპრულ, საკვირველ, დაუძლეველ ოპტიმისტს. ცხოვრებისათვის ბრძოლას განაგრძობდა, რაშიც გამუდმებით გვერდში ედგა ვაჟიშვილი – ლევანი.

სამართლიანობის ავადმყოფური სიყვარული გააჩნდა. ვინებრივი მუშაობისაგან დაღლა ამ რკინის სხეულმა არ იცოდა. უმაგალითოდ სიცოცხლისუნარიანი იყო. ზუსტი მეხსიერება ყოველ გარდასულ წვრილმანს აღადგენდა, არაფერი იკარგებოდა მის ხსოვნაში.

ბატონო ჯუშუბერ! გმადლობთ გრძნობის, სიკეთისა და მაღლისათვის.

# ილტოსპირელის ჩანახარები

## მისიცი ლანიშაშვილი



### ბებოჩემი და იმისი საციკველ-ჯამ-ჭურჭელი

\*(დასასრული)

ხ ო ნ ჩ ა

ზემოთ ვთქვი ბებოჩემის მამის, ბერი პატარაშვილის ვაღაფობის ილტოს ხეობაზე, სოფელ ჩაფრთაში ჩამოსახლების შესახებ. უნდა მივუბრუნდე ამ საკითხს. ბერი შეძლებული კაცი ყოფილა, მრავალშვილიანი, ცხვარ-საქონლიანი. ამბად არის დარჩენილი ხეობაზე, რომ მარტო თორმეტამდე ძალღი ჰყოლია. ეს კი იმაზე მიუთითებს, რომ ძაღლებსაგან საპატრონოც შესაბამისი ექნებოდა. სამი ვაჟიშვილი ჰყოლია ბერს და სამივენი ცხვარ-მეცხვარეობას გაჰყოლიან. რამდენიმე ათასობით სულამდე მოუმრავლებიათ. ელდარ-სამუხში აზამთრებდნენ თურმე ძმები ფარებს. გვიან, მაგრამ მაინც საბჭოთა ხელისუფლებას კულაკებად შეურაცხია და მთლიანად ჩამოურთვია ეს ავლა-დიდება. ერთი ხალხური ლექსის ორი სტრიქონია შემორჩენილი:

ცოდვა კი არი, სინიკო,  
პატარათ ბერის წინ იყო...

ეს სინიკო ერთი უბოვარი კაცი ყოფილა. კოლექტივობისას, არ ვიცი, როგორ ან რანაირად, სადღაც რაღაცაში ფეხი ბერის წინ წაუდგამს სინიკოს და ამაზე გამოუღიქვებიათ სოფლელებს. ლამაზი ქალი ყოფილა ბებოჩემი და ლამის სიბერემდე ასეთი დარჩა. მაღალი, ცისფერთვალეა, დალალებდაჭკაპნული, თეთრი პირისახისა, ლერწამივით სხეული – ასეთი მახსოვს. ცამეტი წლისა გამოუთხოვებიათ ჩაფრთიდან ჭართალაში პაპაჩემ მიხეილზე. ორი-სამი შვილი პატარებივე დახოციათ, ბოლოს ოთხი შვილის დედად შემორჩა თავის ორგზის დაქვრივებულ სიბერეს. საკმაოდ დიდხანს იცოცხლა და თან

ისე, რომ არც სმენა დაუკარგავს, არც მხედველობა, არც მეხსიერება. მისი სიცოცხლის საიდუმლოება, მე მგონი, ის იყო, რომ არ მახსოვს ხორცეულისა და მარილიანი საჭმლისთვის პირი დაეკარებინოს. თამბაქოდამოკიდებული იყო, დღე და ღამე ბურუნთს იყრიდა ცხვირში. ეს მართვინებს და მაძლებინებსო, – იტყოდა ხოლმე. და კიდევ მისი სამზარეულო საციკველი და ჯამ-ჭურჭელი. რომელიც ასე ეკოლოგიურად სუფთა იყო ყოველთვის... ჰოდა, მოვიდეთ პირველსავე სიტყვას და ამჯერად ხონჩაზე შევჩერდეთ

ხ ო ნ ჩ ა ერთი კი არა, მგონი ორი-სამიცა ჰქონდა ბებოჩემს. ხონჩაზე ბევრისა და განსხვავებული თქმა გამიჭირდება, რადგან ის, ფაქტობრივად, იგივე ხონჩა, ოღონდ შედარებით მომცრო ზომისა, დაბალფრთიანი, თხელმერქნიანი და უფრო კომპაქტური. მასალად ხინჩისთვისაც იგივე ხე გამოიყენება, რაც ხონისთვის. თუმცა დამუშავებითა და მხატვრული გაფორმებით შედარებით დახვეწილია. ბებოსეულ ერთ ხონჩას ფსკერზე წრეში ბორჯღალი ეხატა, ფრთის შიდა კიდეებიც ტვიფრ-ხატული იყო მტრედებითა და მერცხლებით, რომლებსაც ვარსკვლავები აშორიშორებდნენ ერთმანეთს. ხონჩის დიამეტრი 20-25 სანტიმეტრამდე იქნებოდა, ხოლო გადაშლილი ფრთა ალბათ 30-35 სანტიმეტრამდე გაზრდიდა მის საერთო ფართს. ერთი ხონჩა „წმინდად“ ინახებოდა, ზედ მხოლოდ სახატო ქადა-პურს, სანთელ-ჩიქილას დადებდნენ, სხვა ხონებით კი სუფრაზე ნებისმიერი საჭმლის შემოტანა-ჩადგმა იცოდნენ. ხონჩა ყოველთვის აქტიურ გამოყენებაში იყო რიგ საოჯახო და საკუჭნაო-სამზარეულო საქმიანობაში. ხონჩით მიაწვდიდნენ ან წაულებდნენ მონახულების შემთხვევაში მეზობელ-ნათესავს მისატან-საჩუქებელ პროდუქტეულობას. ზემოდან ხონჩასაც სუფთა ტილოს ნაჭერს გადააფარებდნენ, ხშირად თავისივე ხელით ლამაზად მოქრეულს. ხონჩას ბებოჩემი სხვა ჯამ-ჭურჭელთან ერთად ცხელი შრატით რეცხავდა და მალე ჩამოშრობის მიზნით გვერდულად დააყუდებდა ხოლმე.

ხონჩასთან დაკავშირებით გაგონილი ორი ხალხური ლექსი მახსენდება. ერთი ალბათ სულ მცირე ნაწვევებია რაღაც თემაზე დაწერილი ლექსისა და ასე ჟღერს:

ტაბაკ, ტაბაკ, ხონჩა-ტაბაკ,  
შინა მაქვის, შორს არ გამქ.

ხოლო მეორე სრულფასოვანი გალექსებაა და საკმაოდ იუმორისტულად ასახავს სასიყვარულო სამკუთხედის დრამას. კაცს საზამთროდ ძროხა დაკლია, კალად (ჰაერზე გასაშრობ-გასახმობად - ასეთი წესით იცოდნენ მთაში საზამთროდ ძვლიანი ნაჭრების შენახვა) გაუკიდა და როცა მოხარშავდნენ ხოლმე, ცოლი თურმე, როგორც თავად ლექსიდან ჩანს, მალულად ხონჩით უზიდავდა ამ ხორცს თავის საყვარელსა თუ წაწალს:

ე ზამთარ კარგა გავლიე,  
მართაი მკვებდის ხორცითა,  
ხარშავდის ყალად გაკიდულს,  
გამამიტანის ხონჩითა,

\*დასაწყისი იხ. „ანული“, 2, 2018. გვ. 71.

მე და მაგის ქმარ გოგალე ერთ ძროხას ერთად მოვრჩითა.

კარგად და ცხადად მახსოვს ზამთარი ჩვენს საყვარლად ძველსა და დიდ სახლში: ხონჩა იდგა საახალწლო სუფრი შუაში ნუგბარ-ნუგბარი სასუსნავებითა და ხილ-ტკბილეულით დახუნძლული და ბალღებს, უპირველეს ყოვლისა, იმისკენ გაგვირბოდა ხოლმე მაცდური მზერა...

### ტ ა ბ ა კ ი

ძმებში უფროსი ვარ. მანამდე ჩემს დედ-მამას სამი ქალიშვილი შეეძინათ ზედიზედ. მოგესხენებათ, მთაში ქალის შექმნას დიდ ვერაფერ ბედენად თვლიდნენ. მე რომ გავჩენილვარ, ყველას გახარებია და ბებოჩემს – განსაკუთრებით: „უძეოდ აღარ გადაეგება ჩემ შვილიო, – უთქვამს გალაღებულს და რაკი კვირა დილით დავბადებულვარ, დაუმატებია, – ემა ბაღლს კვირია მააქვიენეთ, ქუდ-ბედ დაენათლება, ღვთისშვილის ყისმათზე ილისო!“

კვირია, კვირაე, კვირა, ერთ-ერთი უმთავრესი ღვთისშვილია ცა-ქვეყნიერების შემქმნელი მორიგე ღმერთის კარზე, საკმაოდ დიდი და ვრცელი უფლებებით, დიდი ძალის, გავლენისა და მადლის მქონე. თუმცა ჩემმა მშობლებმა ბებოჩემის სესახელება ურყევს, მე მას მაინც ძალიან ვუყვარდი, თან დამიყოლებდა სადმე წასული, საღამოობითაც სმირად მომისვამდა თავის ოთახში მოგიზიგებ ბუხრის ახლოს და მიყვებოდა ათასგვარ საინტერესო ძველ ამბებს. განსაკუთრებით ხატ-სალოცავების, ლეკების მიერ ტყვეთა ტაცებისა და დევ-ეშმაკების ამბების მოყოლა იცოდა...

სტუდენტობისას, რამდენჯერაც არ ჩავიდოდი სოფელში, პირველ რიგში იმას მკითხავდა, თუ რამდენი წლის ვიყავი და ციცერონის კართაგენი უნდა დაინგრესავით დააყოლებდა: „უკვე კილოსა ხარ (ანუ – დროა, რომ...), შვილო, მაიყვანე ვინა, ეგრე ხავრ უნდა ჩამაჰბერდეთ“. სამწუხაროდ, ისე გარდაიცვალა, რომ ჩემს დაცოლშვილებას ვერ მოესწრო. არადა, როგორ ენტერესებოდა... სულ მახსენდება: ყვარჯნით ხელში, შავად ჩაცმულ-დახურული, ზამთა-ზაფხულ შავ ჩიქილამოხვეული, ნელი ნაბით კი არ მოდის, მოცოცავს ეზოში ჩვენი ბებერი, გადაბარჯღული, დიდი თხილის ქვეშ გამართული მაგიდისაკენ, ჩამოჯდება ხის გრძელ ძელსკამზე და იტყვის: „დაბუნდოვდეს, მაუკვდეს პატრონი ე სიბერის მამგონსა, შვილო, აღარაის თავი მაქვ, აღარაისი, კი მოვესწრებიათ აი გაზაფხულებასა... აინა, წყლა გადმამიტანე ემა ღარაიდანა, ე ტაბაკ გასარეცხ დამრჩენია გუშინ ამ გადაყრუებულს, ამასა.“

ტ ა ბ ა კ ე ბ ი ერთი კი არა, რამდენიმე ცალი ჰქონდა ბებოჩემს. ისინი, სიდიდ-სიპატარავის მიხედვით, ერთიმეორის მიყოლებით დალაგებულიც კი საოცრად ლამაზი სანახავი იყო. სულ დიდს მომდევნოები შვილებივით უსხდებოდნენ კალთაში. ზუსტად არ მახსოვს, თუმცა მათი რიცხვი ოთხი-ხუთი აუცილებლად იყო. ტაბაკი გრძელი ფორმისა იყო, ყველაზე დიდი ალბათ მეტრამდე მაინც, სიგან-

ით 40–50 სანტიმეტრი, მომდევნოები, შესაბამისად სიგრზეშიც და სიგანეშიც კლებულობდნენ. ტაბაკი უპირატესად პანტის ერთიანი ნახეთქი პლახისგან ითლებოდა თხელ ფიცრად და ოდნავი, 1-1,5 სანტიმეტრის ჩაღრმავება ჰქონდა. თავ-ბოლოში 3-4 სანტიმეტრზე გაშვებული ფრთები გადასდიოდა. ბებოჩემის ყველაზე პატარა, რუხი ფერის ტაბაკი ალბათ სირძით 30–35, სიგანით კი 18-20 სანტიმეტრისა იქნებოდა. კარგად მახსოვს, მსუბუქი, მორჩილი და რალაცნაირად მარჯვედ სახმარი საციქველი იყო, ბევრჯერ გადმომიღია ჯერ კიდევ ორქოლამდინარი ხინკალი იმ ტაბაკიდან. სხვადასხვა ფიგურებითა და ხაზებით ტაბაკის მორთვა ჩვეულებრივი ამბავი იყო, თუმცა სრულიად უფიგურო, სადა ზედაპირითაც სმირად გვხდებოდა. ტაბაკზე იცოდნენ ამოღება ცომისა, მისი დაგუნდავება, ათხელებდნენ ქადა-პურებს, ხინკლის ქერქს, ახვევდნენ ხინკალს, მიკვცავ-მიანაოჭებდნენ ანტრიას. ტაბაკზე ამოსვამდნენ მჭადს, პურს, ქადას, ამოიღებდნენ ხინკალს. ტაბაკზე აშრობდნენ ჩირეულობას. იყენებდნენ სხვა დანიშნულებითაც.

ამ ტაბაკთან დაკავშირებით დედაჩემის მიერ ნათქვაი ერთი პატარა ხალხური ლექსი მონდა მოვიტანო აქ. როგორც ამ ლექსიდან ჩანს, მთაში ტაბაკი ეტყობა საქორწინო მზითის განუყრელი ნაწილიც კი ყოფილა:

სავსენ იყნენ ჩემნ ჯალაფნი  
ჩემ მამაის ამაგითაო,  
მარტო ეთერ გაამზითვეს  
პანტის ცხრა ცალ ტაბაკითაო,  
წელმოწვეტილნ მიდიოდენ  
ცხენ-ჯორები აბარგვითაო.  
დატვირთულნი, დახნექილნი  
ათას სუბაკ-ხაბაკითაო.

### ც ხ რ ი ლ ი

შეიძლებოდა ჩემი ჩანახატების სერიის ამ თავისთვის ასეც მეწოდებინა – ცხრილ-ცხავ-საცერი. იმიტომ, რომ, არსებითად, ეს სამი სიტყვა ერთსა და იმავე ნივთს აღნიშნავს. ცხრილი კი იმითია საინტერესო, რომ უფრო არქაულია და მისი დამზადების ხელოვნებაც უფრო მეტად ხალხურ-ეთნოგრაფიულია...

იყო ზემო ჭართალაში, ე.წ. სახვესურეთოში, ერთი მოხუცი კაცი, გოგოთური. ბებოჩემთან შემოვლა იცოდა ბარისაკენ მიმავალმა. როგორ ცხადად და მკვეთრად მახსოვს ეს წარსულის ჩრდილიდან გადმოსული ადამიანი!

აგერ, თეთრი ცხენით მომდგარა ღობესთან. „ნინო! – გამოსძახის ბებოჩემს, – აბა, გამაიარ აქათ!“ – ხვესურია და ასე არაფეშურად იმიტომ უქცევს. გაეგებება ბებოჩემიც, თხორ-ნაშალის კულივით გამობმული მივდექ იმისი შავ კაბის ბოლოს. დიდი კაკლის ხის ქვეშ, ღარის წყლათან, ბექზე სხდებიან. მიკითხვ-მოკითხვის შემდეგ შინ ეპატიჟება ბებო სტუმარს. ის ურზება: „ახმეტას მიოლ, ქალო, არ მცალის დიდის ხნით გაჩერება!“ მაშინ ბებო

თავად შედის სახლში, უკან მობრუნებულს პატარა ხონჩით პური, ხაჭო, მწნილი, თიხის დოქოთ ჟიპიტაური და ყანწურა მოაქვს და იქვე ბექზე აწყობს. „დაასხ, ბალო!“ – მე მომართავს გოგოთური და მეც სასწრაფოდ ვავსებ ხარის რქას არაყით. რამდენიმე ყანწს სცლის და ისეთ ამბებს ყვება, ლამის ყურები ღოღოს ფოთლებივით ამიგრძელდნენ. სახენაკეჭნია ხევსური, სვილისფერი, ჩონა-ახალუხი აცვია, ფეხებზე აზიურები, წელზე ვერცხლის ქამარ-ხანჯალი, მძიმედ და ხმელად მეტყველებს. მერე რა რომ მეოცე საუკუნის სამოცდაათიანი წლებია, მაინც ძველ დროში ცხოვრობს, ძველებურად ჩაცმულ-დახურულია, საგმირო-სავაჟკაცო ამბებს ჰყვება, განვლილსა და ნახულს იხსენებს და ამაყობს თავისი „საცდელით“. თურმე ქაქუცა ჩოლოყაშვილთან ერთად უბრძოლია „ბალშევიკების“, „წითლების“ წინააღმდეგ... „ბაგრატივან იყვა ქაქუცაი!“ – თავდაჯერებულად ჰქვია ფრაზას. მართალია, მე ჯერ ამ გვარ-სახელისა არაფერი გამეგება, მაგრამ რომ წამოვიზრდები, მისი ნაამბობი ქვეცნობიერი ლაბირინთებიდან ანაზღად წამომიტივტივდება და აი, ასეთ ლექსად გადაიწერება ფურცელზე:

გოგოთური (ესკიზი პორტრეტისათვის)

თეთრ ცხენზე იჯდა ყოველთვის  
ნაიარევი სახითა,  
შეუძახებდა საფერხეს,  
მარდად მოსწევდა აღვირთა.  
ცხრა ათეული აევლო,  
სულ თეთრი ჰქონდა თმა-წვერი,  
მაგრამ კვლავ ხელში ეკავა  
ამაოების საცერი!..

ძველებურ შარვალ-ტალავრით, ძველებურ ქუდით, წაღებით, ჩამოივლიდა ზევიდან, – შორით ვუცქერდით ბალები.

წელს ერტყა ვერცხლის ქამარი, ზედ ხმალ-ხანჯარი ეკიდა, შეჩერდებოდა ღელესთან, დაიძახებდა ბექიდან...

გვიკვირდა მისი იერი,  
ისიც, რასაც ის იცვამდა,  
სულ სხვა დროებით ცხოვრობდა,  
სულ სხვა ადათ-წესს იცავდა.  
ეფიხვნებოდა ბებოჩემს,  
ამბებს ყვებოდნენ საოცარს,  
სულ სამ რქა არაყს დალევედა,  
ახსენებდა სალოცავს.

მერე ჭარმაგად, ყოჩაღად  
წამოდგებოდა ბებერი,  
ამხდრდებოდა ლამაზად,  
როგორც მთიელ კაცს შეჰფერის.  
დაუყვებოდა ბილიკით  
ილტოს ხეობის ნაპირებს,  
წაიძღვრებდა: „ვაჟკაცი  
მტრის დედას კვლავაც ატირებს!“  
გარდაიცვალა. დამარხეს,  
როგორც რიგია ხევსურთა,  
ცხადია, ყველა ადათი  
წესებისამებრ შესრულდა.

მაგრამ ყოველთვის თან მდევდა  
მისი ლანდი და აჩრდილი,  
მისი სულის სიმაღლე,  
იმისი სახე აჩრჩინილი.  
თურმე უბრალო არ იყო,  
ერთი შეხედვით, მარტივი,  
ჩოლოყაშვილთან იბრძოდა,  
მტკიცე, გუდანის ხატივით...  
ეტყობა, სალი კლდე იყო,  
ცხოვრებამ რომ ვერ გატეხა,  
მოკვდა, ჩავიდა საფლავეში,  
მაგრამ იქაც – კლდის ნატეხად!..

„ღამიტიყდენ, გოგოთურო, აი შენ გაკეთებულ ცხრილნი, აღარაადა ვარგიან...“ – ეშამკურად აპარებს ბებო და მოლოდინშია, რა პასუხს გასცემს გოგოთური, გაუმართავს თუ არა ახალს. „დაგიტყდეს და ახალს მაგიღებ, ქალო, ეგ რა საწუხ-საწუწუნოი ას, – ასევე ეშამკურად ეცილება ხევსურს, – კოდელ-ნინოი ხარ სწორად, მე და ჩემ ღმერთმ, თუ რამეს არ გამსჩი კაცს, ისე ხო არას შაასმევ...“

ცხრილებსა და მისთანებს სოფელში გოგოთურიც აკეთებდა და სხვა კაცებიც. მონახავდნენ დიდ, განიერ ბალამწარის ხეს, აჰყროდნენ ქერქს და სანამ ნედლივე იყო, დაამოშავებდნენ, გამოჭრიდნენ იმ ფორმითა და ზომით, როგორი და რამხელაც უნდა ყოფილყო საციქველი, მოამრგვალებდნენ და შეკერავდნენ. ქერქის ამოკერვაც და ძირზე ფხალა, კუბოკრულად დაჭვრეთილი კვადრატების გამოყვანა უკვე სხვა ხის, ლაფნისაგან ხდებოდა. ლაფნის ქერქს გააორტყავებდნენ, შიგნითა, უფრო ელასტიურ ნაწილს შეჰკონავდნენ და რამდენიმე დღით კარგად დასაღობად წყალში ჩადებდნენ, მერე ცხრილს დაუმუშავებდნენ ქვედა მხარეს, ლაფნის ვიწრო, თასმისებურ სარტყლებს გასჩხიბ-გამოსჩხიბავდნენ ისე ლამაზად, მწყობრად და პროპორციულად, რომ ნაკეთობა პრაქტიკული თვალსაზრისითაც და ესთეტიკურადაც წარმატებული ყოფილიყო.

ცხრილებიც ორი-სამი ჰქონდა ხოლმე სახლში ბებოჩემს, სხვადასხვა ზომისანი. საშუალოდ მათი რადიუსი 35-40 სანტიმეტრი თუ იქნებოდა, კედლის ბორტის სიმაღლე კი ალბათ – 8-10 სანტიმეტრი. ცხრილში სხრილავდა ბებო თავთავ-პურეულს, სხვადასხვა წვრილმარცვლოვან ბაღჩა-ბოსტნეულს, ახმობდა და დროებით, გამოსაშრობად, ინახავდა მასში ჩირეულობას.

ცხრილთან კავშირში ერთი ასეთი ხალხური აფორისტული ლექსი მაგონდება:  
გინდა ილალოს უთქომის,  
გინდაც ცხრილმ წყალი ცხრილოსაო,  
ორთავ ერთი სძე ფას-წონა,  
ვინც რამთვენ უნდა ხილოსაო.  
ნათქომს თუ საქმეც არ ახლავს,  
რა ხეირია, შვილოსაო?

ხის საციქელისა და ჯამ-ჭურჭლის გარდა, პარალელურად და ლამის დუბლირებულადაც კი ბებოჩემს სპილენძის უამრავი ნივთ-ჭურჭლეულობა გააჩნდა.

უკვე გამოქვეყნებული მასალების გაცნობისას მკითხველს გაუჩნდა შეკითხვა; მაქვს თუ არა კიდევ ბებოჩემის ნაქონი ეს ძველი ნივთები დღეს სოფელში? სამწუხაროდ, მათი დიდი ნაწილი იმსხვერპლა ხანძარმა, რომელიც გასული საუკუნის 90-იან წლებში გაუჩნდა ჩვენს მამაპაპულ სახლ-კარს ჭართალაში და ყველაფერი ფერფლად აქცია. ზოგი რამ ისე გაიბნა-დაიკარგა, ზოგი რამ კი გადარჩა და კვლავაც მოგვეძებება სახლში. უნდა გითხრათ, რომ ერთი დიდი ბედნიერება ისიც არის ხოლმე

ჩემი სოფელში სტუმრობა-ყოფნისას, როდესაც ამ ნივთებს ვუყურებ და ვეხები. ისინი პირველყოფილი ბუნებრიობისაკენ მამრუნებენ და ისე მიხალისებენ სულს, როგორც დედის ტკბილი ნანა კალთაში გატრუნულ ჩვილს... წარსულსა და სიძველეს მაინც სულ სხვა ხიბლი და თილისმა აქვს, უმისოდ მე, პირადად, ალბათ უფრო მეტად გამიჭირდებოდა სუნთქვა და შემოქმედებითი ჩალიჩი მწერლობისა და პოეზიის ხრიოკ ზეგნებზე.



## დროა, გასცდეს საქართველოს ფარგლებს

გოდერძი ჩოხელი რომ ქართული სულიერი კულტურის განსაკუთრებული მოვლენაა, ამ აზრს დრო და ხანი სულ უფრო საჩინოს ხდის.

გარდაცვალებიდან ათი წლის შემდეგ საქართველო უკეთ აცნობიერებს გოდერძი ჩოხელის, როგორც ხელოვანისა და მოაზროვნის ღირებულებას. იგი თავისი წიგნებითა და ფილმებით დღესაც მოქმედია, რადგან რასაც ის თავის დროზე გვთავაზობდა, მარტო იმ ეპოქის კუთვნილებად ვერ ჩაითვლება. დღესაც და მომავალშიც დასჭირდება ადამიანთა მოდემას, სადაც ასე აღზევებულა სიძულვილი და დაუთმენლობა!

ბოროტება მხოლოდ სიყვარულით, მიტევებით, მაღლის მოსხმით დაიძლევა – ასე სჯე-როდა გოდერძი ჩოხელს და თავისი სულის გამონაშუქით, სიტყვისა და კინემატოგრაფის ენით ამაზე ფიქრს ასწავლის კაცობრიობას.

ვერ ვიტყვით, რომ გოდერძი ჩოხელი არ ახსოვთ, ან დაფასებული არ არის თავის ქვეყანაში. მასზე დაიწერა საკანდიდატო და სადოქტორო დისერტაციები, იმართება სამეცნიერო კონფერენციები, კულტურის სამინისტროსა და ფონდ „კულტურათა დიალოგის“ თაოსნობით, 2014 წელს დაარსდა მისი სახელობის ლიტერატურული კონკურსი „ერთგულება“. ჩოხელის ნაწარმოებები მრავალგზის დაიბეჭდა ქართულად, ასევე ითარგმნა და გამოიცა რამდენიმე უცხო ენაზე: რუსულად, იტალიურად, იაპონურად, ინგლისურად. ახლახან კი, გერმანულმა გამოცემლობამაც დაბეჭდა ჩოხელის რომანი „მგელი“, რომელიც ანასტასია ყამარაულმა თარგმნა. ეს ყველაფერი დასაფასებელი და ანგარიშგასაწეია.

თუმცა, მე მგონი, მაინც ძალიან მინიმალურია იმასთან შედარებით, რასაც გოდერძი ჩოხელის ფენომენი იმსახურებს. იგი ხომ სრულიად უნიკალური მოვლენაა, რომელიც თანაბრად ძლიერია პროზასა

და კინემატოგრაფში. ამ მხატვრული ძალმოსილების ავტორი, დროა გასცდეს საქართველოს ფარგლებს, რათა უფრო ხმამაღლა ვამცნოთ მსოფლიოს, რომ მეოცე-ოცდამეერთე საუკუნეების მიჯნაზე ჩვენ გვეყვანდა ხელოვანი, რომელმაც თავისი სულის დუდილით საკაცობრიო კულტურაც გაამდიდრა.

ბოლო ათი წლის განმავლობაში ქართული კინოს ჩვენებები თუ ფესტივალები რამდენიმე ქვეყანაში გაიმართა, მაგრამ არავის გახსენებია მათში გოდერძი ჩოხელის ჩართვა. ეს ყველაზე კარგი ხერხია ნამდვილისა და ფასეულის მისაჩქალოდ, მაგრამ ჩოხელის შემთხვევაში ეს დიდი უსამართლობაა, რაზეც გვმართებს ხმის ამოღება და სიმართლისთვის თვალის გასწორება!

ჩვენ ასობით მწერალი და კინორეჟისორი გვეყავს, მაგრამ უმეტესობა ქმნის ერთნაირად კარგ პროზას და დაახლოებით ერთნაირ კინოს, ამ რუტინული კარდიოგრაფიდან დიდი ამოხტომები იშვიათად ხდება და ასეთ გამონაკლისთა სათვალავშია გოდერძი ჩოხელი.

ქვეყანას მართებს უფრო მეტი გააკეთოს მისი სახელის გასავერცოვად. კულტურის სამინისტრომ სამომავლოდ აუცილებლად უნდა იფიქროს გოდერძი ჩოხელის რეტროსპექტული ჩვენებების გამართვაზე მსოფლიოს ისეთ ცენტრებში, როგორც არის: პარიზი, ლონდონი, რომი, ბერლინი, ნიუ-იორკი, ტოკიო. ამასთან, საჭიროა კლასიკურ ენებზე წინასწარ გამოიცეს ჩოხელის რჩეული პროზისა და პოეზიის თარგმანები, რათა მოხდეს მისი, როგორც მრავალმხრივი ხელოვანის მთლიანობაში აღქმა.

გაოცებას გადაჩვეული სამყარო კი ამით ხელახლა აღმოაჩენს დიდ ქართველ ხელოვანს გოდერძი ჩოხელს და საქართველოს!

ბიორბი ლალიაშვილი



### „შეიყვარეთ სიყვარული“

1992 წლის 5 დეკემბერს მარჯანიშვილის ქუჩაზე მდებარე ალექსანდრე ნეველის ტაძარში სრულიად საქართველოს კათოლიკოს-პატრიარქი ილია II სამღვდელთაგანსთან ერთად წესს უგებდა 30 წლის მანძილზე საქართველოში მოღვაწე დიად ბერს, სქემარქიმანდრიტ ვიტალის (სილორენკო). პატრიარქმა შენდობის ღირსება წაიკითხა და ფურცელი დეკანოზ პავლე კოსაჩს გადასცა, რათა მამა ვიტალისთვის ხელში ჩაეღო. ამ დროს გარდაცვლილი ბერის ხელის დიდი თითი გაიშალა, მღვდელმა ღირსების ფურცელი მის ხელისგულზე დადო და ხელი ისევ შეიკრა. თვითონ! „იმდენად თავზარდაცემული ვიყავი, – იხსენებდა მამა პავლე, – რომ მოულოდნელობისგან წამოვიყვირე: „თვითონ გამომართვა!“ – და მხოლოდ მოგვიანებით მივიღე ეს ფაქტი ჩვეულებრივად – ის ხომ არაამქვეყნიური ადამიანი იყო.“

„თვითონ აიღო!“ – დამიდასტურა გვერდით მდგომმა მღვდელმა მიქაელ დიდენკომ.

უწმიდესმა პატრიარქმა თანხმობის ნიშნად უსიტყვოდ დაიქნია თავი და მსახურება განაგრძო. მღვდელმსახურთა ეს რეაქცია დაფიქსირდა დიდი ბერის დაკრძალვის ვიდეოგადაღებით. გარდაცვალებამდე რამდენიმე წლით ადრე მამა ვიტალიმ ერთ თავის სულიერ შვილს უთხრა: „დების ცრემლებისთვის საფლავიდანაც კი გამოვიწვდი ხელს“. მაშინ ამ სიტყვებს ყურადღება არავინ მიაქცია...

\* \* \*

1928 წელს კრასნოდარის მხარის სოფელ ეკატერინოვკაში დაიბადა ჩვილი, რომელსაც ვიტალი უწოდეს. ჯერ კიდევ მისი მუცლად ტარებისას დედა ასე ღიჯობდა: „იმერთო, ისეთი ბავშვი მომეცა, რომელიც სასურველი იქნება შენთვისაც და ადამიანებისთვისაც“. მან სიზმარში ორი ნათელი მზე იხილა და გაუკვირდა: „საიდან ორი მზე?“ პასუხად ჩაესმა: „ერთი მზე შენს საშობაში“. რვა დღის ჩვილი ნათლობისას იღიმებოდა, ემბაზში კი ფეხზე დადგა.

როცა გამართულად კითხვა ისწავლა, მისი საყვარელი საკითხავი წიგნი სახარება გახდა – თან დაჰქონდა და ყველას უკითხავდა. ღირსებისთვის განსაკუთრებული ადგილები ჰქონდა. სწავლასთან ერთად, კოლმეურნეობაშიც მუშაობდა და ოჯახს ეხმარებოდა.

თანასოფლელებს ვიტალი უყვარდათ. ბავშვობიდან გონიერებითა და განსაკუთრებული მგრძობიარობით გამოირჩეოდა. სოფელში დიდხანს იხსენებდნენ ასეთ შემთხვევას: ტრაქტორისტმა მიტოვებულ კარ-მიდამოზე გაიარა, მაღალ ბალახში ჭავერ შეაჩნია და შიგ ჩავარდა. მანქანა გაიჭვია – ვერც წინ მიდიოდა და ვერც უკან. ტრაქტორისტი გარშემო უვლიდა და იგინებოდა. ამწე მანქანის დახმარებას აპირებდნენ, მაგრამ მორწმუნე ქალებმა პატარა ვიტალის მოყვანა ურჩიეს. ყველას ეჭვი ეპარებოდა, რომ სუსტი ბიჭუნა რამეს შეძლებდა. ვიტალიმ სამჯერ შემოუარა ტრაქტორს, ჯვარი გადასახა და ტრაქტორისტს ღიმილით მიმართა: „გასწი, ახლა დაიძვრება!“ „თავი დამანებე, შენთვის არ მცალია!“ – უპასუხა მან, მაგრამ, საკუთარი სურვილის წინააღმდეგ, ბუზღუნით დაჰყვა რჩევას და მანქანისკენ გაემართა. როგორც კი შეეხო და დაქოქა, ტრაქტორი სულ ადვილად ამოვიდა ორმოდან...

ვიტალიმ სკოლაში მხოლოდ 6 კლასი დაამთავრა, შემდეგ კი ტაგანროგში მწირის ღვაწლი იტვირთა... გარკვეული ხანი მან გლინის უდაბნოში გაატარა, შემდეგ კი წინამძღვარმა, მისმა სულიერმა მოძღვარმა კავკასიაში გაგზავნა. ღამით მამა სერაფიმემ და მამა ანდრონიკემ იგი სამონოხვნედ აღკვეცეს. ამის შემდეგ მამა ვიტალი სოხუმში, იქიდან კი მაღალმთიან ბარგანში გაემგზავრა. 1958 წელი იდგა...

ეგვიპტის უდაბნოს მსგავსად, კავკასიის მთებიც უძველესი დროიდან ასკეტური მოსაგრეობის ადგილი იყო. აქ შეუდგა ის ღვაწლს, რომელიც 10 წელი გავრძელდა მეტისმეტად მძიმე და ფიცხელ პირობებში. მისი, ჯერ კიდევ მწირობის პერიოდში შერყეული ჯანმრთელობა აქ კიდევ უფრო გამწ-

ვაკდა, მაგრამ ამან ის ვერ შეაჩერა. ამას ისიც ემატებოდა, რომ მათი საცხოვრებელი ადგილიდან აუცილებლობისთვის ჩამოსვლა და შემდეგ კვლავ უკან დაბრუნება დიდ სიძნელეებთან იყო დაკავშირებული – სხვა ყველაფერთან ერთად, 33 მდინარის გადალახვაც უწევდათ.

\* \* \*

გასაოცარი იყო მამა ვიტალის სიმდაბლე, მიტევებისა და სიყვარულის უნარი.

ერთხელ ერთმა ძმამ, რომელიც სხვა მინდორზე მოსაგრეობდა, მამა ვიტალის პურის გამოცხობა და მისთვის მიტანა დაავალა. ვიტალიმ პური გამოაცხობ, მაგრამ რადგან დანარჩენი ძმები სოფელში იყვნენ წასულები, მას კი ჩექმები არ ჰქონდა, ფეხებზე ნავთი შეიზილა და ფეხშიშველმა იარა თოვლში, წყალში, ქვებზე. ასე გაიარა რამდენიმე კილომეტრი და მივიდა იმ ძმასთან, მან კი დახედა პურს და თქვა, ასეთს არ შევჭამო. ვიტალი ხმაამოუღებლივ გამობრუნდა და უკან წამოვიდა.

ეს რომ შეიტყო, ერთ-ერთი ძმათაგანი აღშფოთდა და უთხრა, ამ „თავხედთან“ მეტად ნუ წახვალ, რაზეც მამა ვიტალიმ უპასუხა: „არა, ბერებს ასე არ უსწავლებიათ ჩემთვის, ისინი მარიგებდნენ: თუკი შენთან მოვა ძმა და დახმარებას გთხოვს, გადადე შენი საქმე და დაეხმარე, ემსახურე მას, როგორც ქრისტეს.“

ასე გაგრძელდა 10 წელი. 1969 წელს ძველ-მანებში შემოსილი მამა ვიტალი თბილისში მიტროპოლიტ ზინობთან (მაჟუგა) ჩამოვიდა. როდესაც დაკონკილ კაბას ხდიდნენ, აღმოაჩინეს, რომ თითქმის სხეულზე შეზრდილ ჭაჯვს ატარებდა. ასე დაიწყო მისი მსახურება თბილისში. მამა ვიტალი გამუდმებით იღვევებოდა მილიციისგან, ამიტომ მისი შესენაკე და მომვლელი, სქემილუმენია სერაფიმა (დიაჩენკო, დაკრძალულია სამთავროს მონასტრის ეზოში) მუდამ მალავდა და ასე ცდილობდა მის გადარჩენას. თუმცა, არაერთხელ მიუყვანიათ ის მილიციაში, სადაც სცემდნენ... ბერი კი ამ დროს მათთვის ლოცულობდა...

საკუთარი თავის უარყოფი ბერი მუდამ მზად იყო სხვის დასახმარებლად. მამა ვიტალის ერთი სულიერი შვილი ძალზე მძიმე ცხოვრებისეულ სიტუაციაში აღმოჩნდა. იგი ტაძარში ღვთისმშობლის ხატის წინ დადგა და შეევედრა, მისთვის გზა ეჩვენებინა. უცებ მას მხარზე ვიღაც შეეხო. შემობრუნებულმა დაინახა, რომ მის წინ მამა ვიტალი იდგა და მკაცრად ეუბნებოდა: ნუ გააკეთებ იმას, რაც ჩაიფიქრე, თორემ ძალიან ინანებ – და სწრაფად წავიდა. ქალმა შენიშნა, რომ რომ მამა ვიტალის უცნაურად ეცვა: პიჟამა, ხალათი და საშინაო ფეხსაცმელები. ყველამ იცოდა, რომ ამ დროს ბერი მოსკოვის პროსპექტზე მდებარე ბინაში იყო ჩაკეტილი და, უბრალოდ, ფიზიკურად არ შეეძლო სადმე გასვლა.

\* \* \*

თბილისში ბევრმა იცის ამ შემთხვევის შესახებ: შეიარაღებული კონფლიქტის დროს ღიღუბის სარკინიგზო სადგურის ახლოს იდგა ასაფეთქებელი ნივთიერებებით სავსე ვაგონი, რომელიც სამხედრო რაკეტების სამიზნე იყო. მთელი დასახლება დიდი საფრთხის წინაშე დადგა. როდესაც აფეთქებები დაიწყო, მამა ვიტალიმ ფიოდოროვის ყოვლადწმიდა ღვთისმშობლის ხატი აიღო და ორი მონაზვნის თანხლებით წავიდა ქუჩის ბოლო მალაღ, ღია ადგილას. გვერდით მდგომებს მან მხოლოდ ლოცვის წარმოთქმა დაავალა. თავად მალაღ ასწია ყოვლადწმიდა ღვთისმშობლის ხატი, ძლივს ასწრებდა ჯვარი გადაესახა სასიკვდილო ჭურვებისთვის, რომლებიც ჰაერში ფეთქდებოდნენ დასახლებიდან მოშორებით და უკან, მთებში ბრუნდებოდნენ, ისე, რომ ადამიანებს ზიანს არ აყენებდნენ.

\* \* \*

ერთხელ ტაძრის დარაჯმა ღამით დაინახა, რომ მთელი ტაძარი ხალხით იყო სავსე. „როგორ შევიდნენ შიგნით, – გაიფიქრა მან, – ეკლესია ზომ დაკეტილია?“ ამ დროს მამა ვიტალი საკურთხეველში კვეთას ასრულებდა და აქ ისინი „იღვნენ“, ვისაც იგი იხსენიებდა.

განსაკუთრებით უნდა აღინიშნოს მამა ვიტალის მოსახსენებლების შესახებ. ეს იყო რამდენიმე სქელი წიგნაკი, სადაც ეწერა ასობით ადამიანის სახელი, რომლებსაც მამა ვიტალი ყოველდღე იხსენიებდა. მიცვალებულთა მოსახსენებელი იწყებოდა ივერიის, ქართლის, კახეთის, აფხაზეთის, იმერეთის და ძველი დროს სხვა ქართველ მეფეთა სახელებით...

მამა ვიტალი მუდამ სხვის დახმარებას ცდილობდა. ღიღუბის მონასტრის ჭიშკრის მიღმა ყრიდა ხოლმე ხურდა ფულს სწორედ იმ დროს, სკოლისკენ მიმავალ ბავშვებს უნდა გამოეცვლოთ; ღობის მიღმა ყრიდა სარეცხის სამაგრებსაც კი, რათა გამკვლელებს აეღოთ და ამით მაინც დახმარებოდა; ჯიბეში მუდამ ეღო ხურდა ფული და კანფეტები, რომლითაც მასთან მომსვლელს ან გზად შემხვედრს უმასპინძლდებოდა; არაერთხელ ყოფილა შემთხვევა, როცა მას უკანასკნელი სამოსი გაუხდია და სხვისთვის მიუცია – დედა სერაფიმა წამიერად თვალს მთარიდებდა თუ არა, შემობრუნებული აღმოაჩენდა, რომ ბერი ფეხშიშველი, უმარვლოდ, ცარიელი ანაფორის ამარა იდგა. არიგებდა საოჯახო თუ საყოფაცხოვრებო ნივთებს და შინ დაბრუნებულ დედა სერაფიმას სახლი ცარიელი ხვდებოდა; ხოლო თუ სახლში ჩაკეტავდნენ (მისი უსაფრთხოებისთვის, მილიციისგან დასაცავად), მეხუთე სართულიდან თოკით უშვებდა ნივთებს და გამკვლელებს ატანდა. თან საოცრად ხარობდა, თუკი ვინმესთვის რაიმეს ჩუქებას შეძლებდა.

\* \* \*

მამა ვიტალიმ წინასწარ იცოდა თავისი გარდაცვალების დრო. მან დიდუბის მონასტერში თავისი საქმეები დაასრულა და მოსკოვის პროსპექტზე მდებარე ბინაში (სადაც დედა სერაფიმასთან ერთად თითქმის 20 წლის განმავლობაში გიგინეიშვილების ოჯახში ცხოვრობდა) წასვლა გადაწყვიტა. ამ ოჯახმა ბერი ვიტალი და სქემილუმენია სერაფიმა თავის ჭერქვეშ შეიფარა და მამა ვიტალისთან ერთად ოცი, დედა სერაფიმასთან ერთად კი 35 წელი გაატარა. ამ ოჯახმა სწეულებისას მოუარა მათ და ორივე მათ ბინაში გარდაიცვალა.

სქემარქიმანდრიტ ვიტალის მოწამებრივი გზა მისი სიცოცხლის 65-ე წელს მთავრდებოდა. როდესაც ბერი ძალიან ცუდად ხდებოდა, დედა სერაფიმა პატრიარქს ურეკავდა და ისიც აუცილებლად ან რაიმეს უგზავნიდა, ან თავად მოდიოდა. ამ დროს მისი უწმიდესობა ყოველთვის ამხნივებდა მამა ვიტალის. შევიდოდა და გასხვიოსნებულს გაუღიმებდა: „მამა ვიტალი, ყველაფერი კარგად იქნება!“ როდესაც უწმიდესი ოთახიდან გამოდიოდა, ემჩნეოდა, როგორ განიცდიდა, მაგრამ მამა ვიტალის ამას არასოდეს აჩვენებდა.

1992 წლის 1 დეკემბერი იყო, 18 საათი და 45 წუთი. მის სანახავად უკანასკნელად მობრძანდა უწმიდესი პატრიარქი ილია, რომელიც მისი მოძღვრის, მიტროპოლიტ ზინობის გარდაცვალების შემდეგ მამა ვიტალის ეუბნებოდა აღსარებას. ამჯერად უწმიდესი საყვარელ მოძღვართან გამოსამშვიდობებლად მოვიდა. ბერის ოთახიდან გამოსულმა ოჯახის დიასახლისს, ლეილას უთხრა: „თქვენ არ იცით, ვინ დაგკარგეთ...“

უწმიდესი პატრიარქის გადაწყვეტილებით სქემარქიმანდრიტი ვიტალი ალექსანდრე ნეველის ტაძრის ეზოში დაკრძალეს, რათა ყველას შესძლებოდა მის საფლავთან მისვლა და ნუგეშის მიღება დიდი ბერისგან, რომელიც გარდაცვალების შემდეგაც ეხმარება ყველას, ვინც მას გულით მიმართავს. უამრავი ადამიანი იღებს კურნებასა თუ ათასგვარ შეწვევნას განსაცდელის ჟამს, მის საფლავთან კი მუდამ არიან გასაჭირში მყოფნი და მკურნებელნი. ბერიც, როგორც სიცოცხლეში, მუდამ მზადაა ყველას დასახმარებლად. ადამიანები ყვებიან თავითი განსაცდელების შესახებ, რომლებიც მამა ვიტალის სასწაულებრივი შეწვევით მოუგვარდათ (ამის შესახებ მოთხრობილი მასზე გამოცემულ წიგნებში).

## ელდარ გიორგელაშვილი, სრულიად საქართველოს კათოლიკოს-პატრიარქის მძღოლი:

„მამა ვიტალი უწმიდესთან საპატრიარქოში მოიოდა ხოლმე. თითქმის ყოველთვის თან ახლდა მისი მესენაკე, სქემილუმენია სერაფიმა (დიაჩენკო). თავად პატრიარქიც არაერთხელ მიმიყვანია მის სახლში, დიდუბეში, სადაც ის უმეტესწილად ცხოვრობდა. ზოგჯერ ბერის გარეშე დედა სერაფიმაც მოდიოდა, რომელიც უწმიდესთან შეხვედრის შემდეგ მონასტერში მიმყავდა. არაერთხელ ყოფილა პატრიარქი მოსკოვის პროსპექტზე მდებარე ბინაშიც, სადაც მამა ვიტალი ერთ ქართულ (გიგინეიშვილების) ოჯახთან ერთად ცხოვრობდა. მე მათ საუბარს არ შევსწრებოვარ, რადგან უწმიდესი მასთან პირისპირ რჩებოდა (განსაკუთრებით მამა ვიტალის ავადმყოფობისას, მოსკოვის პროსპექტზე მდებარე ბინაში). მაგრამ მისგან გამოსული პატრიარქი მუდამ სახემლიმარე იყო.“

ყველა ვგრძნობდით, რომ მას მამა ვიტალი ძალიან უყვარდა და აფასებდა. შემდეგ, მანქანაში ის მუდამ საუბრობდა თანამედროვეობის ამ დიდ ბერზე, გვიყვებოდა მის ცხოვრებაზე, მისი სიყვარულის უდიდეს უნარზე. ამბობდა, რომ ის ნამდვილი ბერი იყო – შინაგანად და მოწოდებით, როგორც უნდა იყოს ჭეშმარიტი მოსაგრე, რომელიც ამ გზას შეუდგა. იხსენებდა მისი უშურველობის შესახებ, იმას, რომ ბერი სრულიად და სავსებით არამომხვეჭელი იყო – თუ რაიმეს მისცემდნენ, მუდამ სხვისთვის ემეტებოდა. სულ ცდილობდა, ყველას დახმარებოდა, რითაც შეეძლო – მატრიალურად იქნებოდა ეს თუ სულიერად, ლოცვით. ყვებოდა, როგორ ეხმარებოდა მამა ვიტალი ყველას – ნაცნობსაც და უცნობსაც, ჯიბეში მუდამ კანფეტები ელო და ბავშვებსაც და დიდებსაც იმით უმასპინძლდებოდა, როცა ქუჩაში გამოდიოდაო. უწმიდესმა ისიც გაიხსენა, რომ თურმე არაერთ უცნობ ადამიანს გასაჭირის ჟამს მისგან ამანათები მიუღია, რომელშიც ყოველთვის ზუსტად ის ნივთები იდო, რაც სჭირდებოდათ. ბერის სენაკში მუდამ ანთია სანთლები და ის მთელი სამყაროსთვის ლოცულობსო, – ამბობდა პატრიარქი.“

\* \* \*

მამა ვიტალის დიდუბის საკანეში დღემდე განუწყვეტლივ ანთია სანთლები მთელი სამყაროსთვის, მისი ლოცვითი კანონიც უწყვეტად აღესრულება ბერის ანდერძისამებრ და მამა ვიტალიც მყოფობაც ხელშესახებად იგრძნობა...





## ნოდარ წულეისკირი – „თუთარჩელა“

### რეცენზიული ესე

ნოდარ წულეისკირი კოლხური ცივილიზაციის სათავეში ღრმად ჩაფეხვებული მითოსიდან საქართველოს მე-20 საუკუნის ღამეულ ცაზე კვლავ გამოჩენილი თუთარჩელაა.

მატარებლის ბორბლების ხმაურით შემოდის პერსონაჟთა ცხოვრებაში ახალი ყოფის იდუმალებით აღსავსე ცხოვრება. ქალაქიდან სოფელში მიმავალ კალანდარიებს ის თუთარჩელა მიაცილებს, ქართული ცნობიერების საწიერს მითიდან ხალხური სიმღერის ჰანგებში სათუთად რომ შემოუნახავს. მთვარის მარადიული რეალობის გაუხუნარი მარადიულობა კოლხური აზროვნების სიტყვიერ განზომილებაში „თუთარჩელაში“ გაახმოვანა მოდგმათა მოდგამი.

ყოფიერების იმ ეტაპზე ნოდარ წულეისკირის თანამედროვე საქართველო რომ იყო (მე-20 საუკუნის მეორე ნახევარი), გენეტიკური ქართველი, წარსულით ნაკვები, ზნეობრივი სულიერებით გაჯერებული, შინაგანი კულტურით უმკლავდებოდა ყოფით სირთულეებს.

გუგუ და ანინა განათლებულ ახალ თაობას განეკუთვნებიან, ექიმები საკალანდარიოს მკვიდრთა ჯანმრთელობას დაჰფოფინებენ. ცოლ-ქმარს ურთიერთ სიყვარული უმსუბუქებთ ცხოვრებას. მათში მითოლოგიის ფესვებიდან ამოყლორტილი ახალი ადამიანის ზნეობრივი სახე ავითარებს ყოველდღიურობის მორალურ კრელოს.

გუგუს მხატვრულ სახეში განათლებისა და კოლხური გენეტიკური კოდის სრული ჰარმონიაა. რომანის ტინარებში ექიმბაში ბაბუას გახსენება, პირდაპირი ხანით გვარის მემკვიდრის ღირსებებს ავსებს. გარდა პროფესიული, ასევე სხვა კეთილშობილურ თვისებათა თაობებში განშლადობის სწორუპოვარი მაგალითიცაა.

ფრთხილობს ავტორი პერსონაჟთა მხატვრული სახეების შექმნისას. ყოველ მათგანს შინაგანი სისათუთე გამოეხატება, ისეთი, უჩინად რომ დაატარებენ და ოდიდან გვარის გამორჩეულობას რომ განსაზღვრავს. კალანდარიების გვარზე

რომანის დაწერა უდიდესი პასუხისმგებლობაა იმ პირველ წინაპართა წინაშე, ვინაც თავიანთი ერთობა კალანდას დაუკავშირეს, ამით ამქვეყნად საიდუმლო მისია შეგნებულად დაისახეს და კოლხურ სინამდვილეში ადამიანისა და კოსმიური სამყაროს თანამშრომლობის იდუმალი აქტის ტრანსშეთანხმება კალანდას სახელობის გვარის – კალანდარიების – შექმნით დაავკირგვინეს.

მოქმედება ვითარდება მედეას ველზე. მედეას ბაღს ხშირად სტუმრობენ კალანდარიები. მითიურ ფონზე განფენილი კალანდარიების ცხოვრება მე-20 საუკუნის უღმერთო ეპოქაში იმ უძველეს სიბრძნეს ეყრდნობოდა, მედეას ჯადოქრობად რომ შემორჩა მახსოვრობას. ჩვენამდე მოღწეული საზრისით ამ სიტყვის კეთილზმოვანებისა რა მოგახსენოთ, მაგრამ მცენარეთა იდუმალმცოდნეობით მედეამ საფუძველი დაულო მედიცინას. მიუხედავად ურთიერთგამომრიცხავი თქმულებებისა, მედეას დღემდე არ დაუკარგავს ხიბლი. ბრძენია იგი იმდენად, რამდენადაც შეუცნობი განზომილებიდან გამოჰქონდა ბუნების საიდუმლო.

შინაგანი დრამატიზმით გამოხატავს ნ. წულეისკირი თავის დამოკიდებულებას დროში გამოსატყული რიგი სიმუხთლეების მიმართ. აშკარაა მისი ცნობიერი მიდრეკილება კოლხური ცივილიზაციის სათავისაკენ. მწერლის ჩანაფიქრის ამიკითხვა დღეს შესაძლებელია და გახმოვანება, მითუმეტეს, აუცილებელი.

სენტემენტური მხატვრული პასაჟებით მწერალმა მეტად სათუთი თემები – ცოლქმრობა, დედაშვილობა, მამაშვილობა, მეგობრობა, სიყვარული, ოჯახური ტრადიციები, კალანდარიების გამორჩეულობა, ახალი დროის მანკიერება ქვეყანაში შექმნილი ვითარების შესაფერის ჩარჩოში მოხდენილად ჩასვა, მაგრამ მხატვრული ტილოს ფერთა გამოცდილ მჭვრეტელთათვის კი გადაჭიმა თვალშეუწვდენი სამხერეთი მედეას ბაღიდან თუთარჩელამდე. ეს კალანდარიების გვარის საიდუმლო მარშრუტია

მიწიურიდან ზეციურში გადასასვლელად. მედეას ბაღში გასვლა ყოველდღიურობისაგან გადაღლილი სულის განწმენდაა, ბიწებაშერთული გონების გასხვივოსნება.

ვერ ტოვებენ კალანდარიები საკალანდარიოს. ეს სისხლის ძახილია, ეს სულიერი გენეტიკის იდუმალი ხმაა თითოეულის გონებაში რწმენად გარდაქმნილი. დრომ ამ გვარსაც შეურყია სიმტკიცის ბურჯი. ძველ თაობას სჯერა იმისა, რაც იყო დღემდე, ახალს კი უჭირს ძველზე დამყნობა. ასეთ დროს გამოცდილი გონება უნდა ჩაერიოს და ისე შეცვალოს ვითარება, არც ერთის თავმოყვარეობა რომ არ შეილახოს, რაც მთავარია, გვარის, ოჯახის საუკუნოვანი ტრადიციები შენარჩუნდეს.

გუგუ არა მხოლოდ სხეულის მკურნალია, არამედ კლანდარიების გვარის ზნეობრივი სახე, მათი სულიერი ღირებულებების დამცველი, ბაბუისა და მამის კოლხური დიდებულების მტკიცე რგოლით წარსულის აწმყოსთან შეძკრავი.

მწერალმა გუგუს სახით კლანდარიების საიდუმლო გენეტიკისა და ახალი დროის მეცნიერული ცოდნის სინთეზით გონებამდიდარი პიროვნება წარმოუდგინა მკითხველს. ყველაზე ნიშანდობლივი ისაა, რომ მას მიმართავენ არა მხოლოდ სამკურნალოდ არამედ ოჯახური თუ სხვა უთანხმოებების მოსაგვარებლადაც. ის ამ მისიას არანაკლებ აღასრულებს, ვიდრე მისი წინაპარი – ბაბუა, საუკეთესო ექიმბაში და კეთილგონიერი მრჩეველი. გუგუ, თანამედროვე ენაზე რომ ვთქვათ, ფსიქოლოგის როლშიც ევლინება სოფელს. ეს ფსიქოლოგია ცოტათი განსხვავებულია, ვიდრე მეცნიერული და ძირითადად ემყარება კლანდასთან დაკავშირებულ შემეცნებით მენსიერებას, რაც პიროვნული აზროვნების გაჯანსაღებით, სულიერად ჯანმრთელი საზოგადოების მყარი ერთობის გარანტია. გუგუს შინაგანი სამყარო კოსმიური მენსიერებისა და აკადემიური განათლების ნახავია. ასეთი ახალგაზრდები ესახებოდა მწერალს იმ ავადსახსენებელი დროის მკურნალად.

კომუნისტური წნეხი, უღმერთობით განწირული ზნეობა, ძველსა და ახალს შორის გაჩნირული აზროვნება მე-20 საუკუნის ეპოქალური მახასიათებლები გახლდათ. ნ. წულეისკირის შინაგანი და გარეგანი ხედვის კონტრასტული სურათების წარმოსახვას თუთარჩელა აწესრიგებს: „თუთარჩელაში თვლემს ახლა საკალანდარიო... მთვარე ახლა ოქროს ტახტზე ზის და წითელგვიმიან ჭებში ისე იმზირება, როგორც სარკეში“. მწერლის რწმენაში თუთარჩელა ახალ დროშიც ყველაფერს ხელავს, წითელი გვიმები და თანამედროვეობის სხვა მატერიალური სიკეთეები ვერ შეაფერხებს მის კოსმიურ მისიას. ადამიანი დაშორდა კლანდას, მაგრამ კლანდა არ შორდება კლანდარიებს.

ცივილიზაციის მატერიალური ღირებულებები ქართულ სამყაროზეც აისახა, მაგრამ სიცოცხ-

ლისადმი და მიწისადმი სიყვარული არ შეცვლილა, თუმცა მხოლოდ იმათში, ვისაც ჯერ კიდევ შემორჩათ საკალანდლო მისტიკური ცნობიერება.

„გამოჩნდა თეთრი მთა“ – გუგუს ცოლის აღმადრენაა, ამერიდან მეუღლესთან ერთად საკალანდარიოში რომ უნდა დაიდოს ბინა. მატარებლიდან „თეთრი მთის“ გამოჩენის მოლოდინი, უხსოვარ დროში, კილობნიდან გაფრენილი მტრედის მერამდენე ცდის შემდეგ ზეთისხილის რტოთი დაბრუნების პარალელური აღქმა დროის ფარდ მოვლენათა შესაბამისად. კაცობრიული გონით აღქმული აღმადრენაა მიწასთან მიჯაჭვულობისა, კერიაში დაბრუნებისა, ფესვისა და ძირის მოუშლელობისა, ცხოვრების ახალი ეტაპის დაწყებისა.

ლამის მატარებელით შინმომაველ კლანდარიებს თუთარჩელა მიუძღვება. ცოლ-ქმრის ფიზიკური ხედვა და სულიერი მრწამსი ერთი ფოკუსიდან ჭვრეტენ აწმყოს. მწერლის აზროვნების კონცენტრაცია წარსულსა და მომავალს ახლანდელ დროში აერთებს. კლანდარიებს თან ახლავთ შვილი, რომელსაც ჯერ ძინავს. ის სენიაა დიდებული წინაპრისა, გარდასული კოლხური დიდება რომ დააკვირვინა და სათავე დაუდო ერთიან საქართველოს, გზა გაუხსნა ფარნავაზის ძლევაძოსილ მეფობას. ქუჯი ერთიანი ქვეყნის სათავედან თემდაბლობის, ზეციურთან შერთული თავისუფლების, კოლხური სინამდვილის არა მხოლოდ მეფე, არამედ თუთაში – ქურუმიც იყო. კლანდარიების პატარას მისი სახელი ჰქვია და არც ისე შემთხვევით, ასეთ გადაწყვეტაში დევს მწერლის მთავარი სათქმელის საიდუმლო. ეროვნული ენერჯის სათავე იმ დროში ევლდება ნ. წულეისკირს და ეს პატარა ქუჯი კი წარსულიდან მომავალში გადასროლილი იმედაა, ახალმთავარეობის, ახალკლანდობის, ეროვნული ენერჯის განახლების იმედი.

მოქმედება რომანში მითოლოგიის გარსითაა შეფუთული. მართალია იცვლება დრო-ჟამი, მაგრამ უცვლელია უნივერსალური ღირებულებები. მასთან წინაყარმა მწერალმა თუთასთან განუყრელობა და თეთრ მთის გავლით მედეას ბაღში დაბრუნება აუცილებელ პირობად დაუდო თანამედროვე ადამიანს ეროვნული ენერჯის შესავსებად.

საკალანდარიოში დაბრუნების მოლოდინში ადრეგავიძებული ცოლ-ქმარი თეთრი მთის გამოჩენას დარაჯობენ, მათ პირმშოს – ქუჯის კი სძინავს – „ეძინოს ცოტა ხანს“ – თანამედროვე ქართველი დედის გაფრთხილებაა შვილისადმი, რომელსაც წარსულში თავგანწირვის ველიდან, მომავალში თავგანწირვამდე ძალების აღდგენა სჭირდება. „გაიღვიძე?“ – ეკითხება მამა, პასუხად – „მაჩვენეთ ჩემი საკალანდარიო“ – ქუჯის (ეროვნული ენერჯის) მომავალში გამოღვიძების წინაპირობაა.

რომანის ყოფითი ეპიზოდების მხატვრული ქარგაში შესანიშნავად იკვეთება გუგუს სახე, ის მემკვიდრეა კლანდარია თუთაშებისა. ღირებულებათა გადაფასების ტკბილ-მწარე ყოფა საფრთხეს

უქმნის მომავალს. გუგუ შინაგანი მოწოდებით ეხმიანება ყველა სათაკილო სიტუაციას და გააქტიურებული გენეტიკა თუთაშებისა რეალიზდება დროში.

ცოლ-ქმრის დიალოგში ხშირად გაიგონებთ- „ჩვენი, გუგუ, ჩვენი,“ რაც ერთარსს – ქმნის, ევას ადამის წილში დაბრუნების, პირველყოფილი სიყვარულის, განუყოფელი მთლიანობის, სულიერი ჰარმონიის წიაღში შემეცნებითი აღმაფრენის მისტიკური განცდაა. ხოლო გუგუს პასუხად – „ჰო, ჩვენი, ჩვენი“, უფალთან ადამის მიქცევის თანდაყოლილი გენეტიკური წყურვილის დაოკება. თანამედროვე კალანდარიებში, მართალია, გარადაქარდა თუთაშების ცოდნა, მაგრამ მძლავრობს ქვეცნობიერი და არ აძლევს მივიწყების საშუალებას.

მწერალმა რომანში წარმოაჩინა მე-20 საუკუნის ცივილური სამყაროს ქართველის ცნობიერ-შემეცნებითი გონის ჭრელი რელიეფი, არც ისე სახარბიელო, მაგრამ არც ისე უიშელო. გუგუ კალანდარია-თუთაშების მეძკვიდრეობას ამართლებს, ცოლი ანინა მედეას ველზე თავს კარგად გრძნობს და წინაპრის შეცდომისგან გვერდის ავლით თვალს უსწორებს ცხოვრებას (არ დახვდა გვანის), ცოლ-ქმრის ერთობას მტკიცედ კრავს ახალი მომავლის ქუჯი.

რომანი თანამედროვე ენაზე „ტრიდე ფორმატში“ ავითარებს ქართული ეროვნული სულის უზენაეს ცნობიერ გონთან იდუმალი კავშირის შემეცნებით ეპიზოდებს.

ცოლ-ქმარს არ სძინავს, ისინი ფხიზლობენ და თუთარჩელათი ზვერავენ სივრცეს. არაფერია ამ სამზერეთში იმაზე მნიშვნელოვანი, ვიდრე „თეთრი მთის“ გამოჩენა. „გამოჩნდა“ – მოასწავებს საკალანდარიოში შესვლას. ის კი თუთას შვილთა მამულია, თუთას კოსმიური მისიის მიწიერი განზომილებაა. სათავეა იდუმალ-შემეცნებითი გონიერებისა, დვრიტაა ეროვნული სულიერებისა. ცოლ-ქმრის მოუთმენლობა თეთრი მთის სახილველად, საკალანდარიოში დაბრუნების, იდუმალმცოდნეობის წიაღში დაბრუნების და იქ დამკვიდრების გადამდები სიხარულია, მწერლის სულიერი მოძრაობის გაცოცხლებული რეალობაა.

ეპოქის ყოფითობის სიღრმისეულ სიბნელეში თუთარჩელას შერთული სული მწერლისა ჭემ-მარიტად მიიკვლევს გზას და მისი პერსონაჟებიც ღირსეულად უმკლავდებიან სირთულეებს.

მწერალი მეცნიერებას და მიღწევას ყოველს სათავესთან აკავშირებს და ეს სათავე თუთაშების – მთვარის კაცების ცოდნა იყო კოსმოსს შერთული გონით მოპოვებული. „თუთაშს შეეძლო წინასწარ ეთქვა თუ რა მოუვიდოდა ადამიანს. თუთაში უშეცდომოდ მკითხაობდა როდის ამოვარდებოდა ქარი, როდის გაწვიმდებოდა, მოსალოდნელი იყო თუ არა

მკაცრი ზამთარი, მზის დაბნელება, წყალდიდობა“. ჩვენამდე, გარდასულ დროთა ადამიანებს ჰქონდათ ურთიერთობა გარე სამყაროსთან სულიერი წვდომის დონეზე. მწერლის თანამედროვენი, ქურუმთა ეპოქებიდან შორს, ქვეცნობიერი არხებით კვლავ და კვლავ ურთიერთობენ იდუმალ განზომილებებთან. მწერლის სულიერ-შემეცნებითი გონი აწმყოდან ებებს პირველსაწყისს, აუძღვრეველ სათავეს.

ძველ ცოდნას, ქურუმთა საიდუმლოს, თუთაშების ცნობიერ დონეს, იდუმალ შემეცნებათა წვდომის უნარს, ყოფიერების ჭეშმარიტი არსის ხიბლს მწერლის შინაგანი სამყარო შეუპყრია და არა არს მისთვის უფრო მართალი გზა, ვიდრე საკალანდარიოში დაბრუნება და თუთაშების ცხოვრების წესია.

ნ. წულეისკირისათვის საკალანდარიო ახალმთვარეობის მარადიული ციკლია, წრიული დინამიკა სრულმთვარეობისა, იმავე სათავედან იწყებს ახალ წრებრუნვას, ეს კანონიკა შეუვალა და, გამომდინარე აქედან, მწერლის აზრით, საზოგადოებრივი ცნობიერების გამრუდება დროებითია.

„თქვენზე უკეთესი დიასახლისი და ოჯახის პატრონი ვინ იქნება,“ – ეუბნება ქალაქელი რძალი დედამთილს და ამით ყველაფერია ნათქვამი, მყარია ძველი გამოცდილი თაობა, საიმედო დასაყრდენია მომავლისათვის, რამე თუ მხოლოდ შვილიშვილი ჰპირდება დახმარებას, – „მაშინ მე მოგეხმარები“, შვილიშვილის შეთავაზება კალანდარიების ოჯახის ყოველდღიურობაში ახალი ხელის შემშველელის შორსგამიზნული პირობაა. ახალ ქუჯის, კალანდარიების მომავალს, იქ, ერთიანი ქართული სახელმწიფოს სათავეში რომ უდევს წილი, ამ გაუსაძლის საუკუნეშიც, ძველ ნაშენზე მოუწევს დავაჟვაცება და ასე შეძლებს მომავალში გაჭრას. ქუჯიმ წრთობის გარკვეული პერიოდი უნდა გაიაროს, მანამდე ახალი დროის კალანდარიები ცხოვრების გამოცდას შეეჭიდებიან.

ჯაჭვებასნმული გუგუს თვითგვემა მძიმეა გარშემოცხვითათვის, მაგრამ საბედნიეროა დასასრული. ცნობადარუნებულ გუგუს სიხარული შემოაქვს ოჯახში. სჯერა მწერალს თვითგვემის აუცილებლობისა და ჯაჭვებმული თუთაშების შემეცნებითი თავისუფლებისა. მთავარია, არ მოვწყდეთ ეროვნულ ძირებს.

ნოდარ წულეისკირის ცნობიერი და არაცნობიერი ერთბაშად ხმინაობს. რომანის ალუზიური მითოლოგიურ-ისტორიული ფონი ააშკარავებს ეროვნული ენერჯის სათავეს. მწერლის საქართველო კი ჭეშმარიტ საკალანდარიოდ უნდა იქცეს. აი, მაშინ გამოიღვიძებს ქუჯი და ახალმთვარეობას ახალი ეროვნული ენერჯით აღივსება საქართველო, თუთარჩელაა ამის თავდები.


რომანის სიღრმიდან დღემდე მოისმის ნოდარ წულეისკირის მუდარაშერთული თხოვნა:

„დამანახეთ ჩემი საკალანდარიო!“



მოგონებათა

სკივრიდან



ცოტა ხნის წინათ, ჩვენი საერთო მეგობრის, ცნობილი სპელეოლოგის, საქართველოს დამსახურებული ჟურნალისტის, „პრომეთეს“ მღვიმის აღმომჩენის ჯუმბერ ჯიშკარანის დაბადების 80 წლისთავზე, მღვიმის შესასვლელში მისი მემორიალური დაფის გახსნასთან დაკავშირებით, მე და პაატა ნაცვლიშვილს ერთად მოგვიწია მეზავრობამ თბილისიდან წყალტუბომდე. მეგობრებს, ბუნებრივია, სალაპარაკოს რა გამოგვილევდა და ისე ჩავედით ადგილამდე, არც კი გავგვივია. მემორიალის გახსნის ცერემონიალის დაწყებამდე პაატამ თავისებური დაბეჯითებით რამდენჯერმე გამიმეორა – რამდენი რამ იცი ისეთი, რაც სხვამ არ იცის, ბევრი რამ გინახავს, უამრავ კარგ ხალხს მოსწრებიხარ და გქონია ურთიერთობა, სულ უმნიშვნელო, უცნობი შტრიხი რომ არ დაკარგო ამა თუ იმ პიროვნებაზე, ესეც დიდი საქმე იქნება და აუცილებლად უნდა დაწერო, რადგან დმერთმა დიდხანს გაცოცხლოს, მაგრამ რომ აღარ იქნები, ეს ყველაფერი დაიკარგებაო.

სიმართლე რომ ვთქვა, ამის თაობაზე მეც ხშირად მიფიქრია, უფრო სწორად, ვიცი, რომ ოჯახის არქივში შემონახული მასალის საფუძველზე, ჩვენი დიდი ოჯახისა და წინაპრების ღვაწლზეა სათქმელი. პაატას ნათქვამმა კი – რასაც მე მიყვები, ასეთი პატარ-პატარა ისტორიები გაიხსენეო, სტიმული მომცა, გამათამამა კიდეც და დამიჯდა ჭკუაში მცირე ეპიზოდები ჩემი ცხოვრებიდან საზოგადოების სამსჯავროზე გამოვიტანო, რაც, ვფიქრობ, გამოაჩენს ინტერესს დირს თუ არა მათი გაქვეყნება.

გავიხსენებ ერთ ადრინდელ ეპიზოდს. ზუსტად არ მახსოვს, 1969 თუ 1970 წელი იყო, თიანეთში დიდ სახალხო ზეიმში მონაწილეობისათვის თბილისიდან თითქმის ყველა ცნობილი ხელოვანი და მოღვაწე – მსახიობები, რეჟისორები, მომღერლები, მწერლები, პოეტები, მეცნიერები მიიწვიეს. მათ შორის იყო ჩემი მამიდაშვილი, საქართველოს სახალხო არტისტი ტარიელ საყვარელიძე, რომელსაც ელენე ყიფშიძესთან ერთდ უნდა წარმოედგინა ნაწყვეტი სპექტაკლიდან „მაია წყნეთელი“. ტარიელს ახალი ნაყიდი ჰქონდა მსუბუქი ავტომანქანა „გაზ-21 „ვოლგა“ და ბავშ-

ვივით ეხალისებოდა საჭესთან ჯდომა. დამირეკა, გამაფრთხილა, რომ თიანეთში უნდა გავყოლოდი „მეგზურად“ და გამომივილიდა (თიანეთს და მის შემოგარენს უკვე კარგად ვიცნობდი, რადგან წინა წლებში, როგორც ახალგაზრდა მეცნიერმა-გეოლოგმა, გეოლოგიური ინსტიტუტის დირექტორ-აკადემიკოს პეტრე გამყრელიძესთან ერთად ვიშუშავე ამ რაიონში).

დათქმულ დროს ტარიელმა მომაკითხა, გავუარეთ ქალბატონ ელენე ყიფშიძეს და გეზი თიანეთისაკენ ავიღეთ. თბილისს რომ გავცდით და ტრასაზე გავედით, ტარიელმა ქ-ნ ლენას იმ ნაწყვეტის რეპუტიციის გავლა შესთავაზა, რომელიც თიანეთის კულტურის სახლის სცენაზე უნდა გაეთამაშებინათ.

– „დიდო მეფეო“ – დაიწყო მაია-ელენე ყიფშიძემ. – „რაო, მათე ბიჭო! – შეაგება სიტყვა ერეკლე-ტარიელმა და გავხდი საოცარი გარდასახვის, დიდებული სანახაობის მოწმე. ჩემ თვალწინ ცოცხლდებოდა ბედკრული საქართველოს ისტორიის ერთ-ერთი ტრაგიკული ფურცელი და ისეთი გრძნობა დამეუფლა, თითქოს მეც მე-18 საუკუნის საქართველოში ვცხოვრობდი. მეფე ერეკლესა და მაია წყნეთელის დიალოგი ბუნებრივად, საკმაოდ დამუხტულად წარიმართა, ვტკბებოდი დიდი არტისტიკის მაღალი ხელოვნებით და უეცრად... ხანგრძლივი პაუზა.

– დამაიწყდა! პატარა ბავშვივით დარცხვენილმა, ჩვეული მანერით განაცხადა ქ-მა ლენამ.

– არ გადამრიო! – აბუბუნდა ტარიელი და მთხოვა ჩანთაში პიესის ტექსტი მომეძებნა. ტარიელის ლამაზი კალიგრაფიით გადაწერილი ტექსტი ამოვაძვრინე ჩანთიდან და ის ადგილი მოვინახე, სადაც ქ-ნი ლენა „დამუხრუჭდა“.

ერეკლე მეფისა და მაია წყნეთელის დიალოგი თავიდან დაიწყო. დამევალა, ტექსტისთვის თვალი მედევნებინა და შეცდომის შემთხვევაში მსახიობები შემეჩერებინა. დიალოგი კვლავ მშვენივრად დაიწყო და უფრო დამუხტულად წარიმართა, მაგრამ ისევ იმ ადგილას, სადაც პირველ ცდაზე შეყოვნდა, ქ-მა ლენამ კვლავ „ვაი“ დაიძახა და არ გამლახო,

მოულოდნელობისგან გაოგნებულ ტარიელს მიმართა. ბევრი რომ არ გავაგრძელო, ეს სცენა ქ-მა ლენამ და ტარიელმა, ვიდრე თიანეთამდე ჩავიდოდით, ათჯერ მაინც გაითამაშეს, მაგრამ იმ „საბედისწერო“ ადგილას ქ-ნ ლენას ტექსტი ავიწყდებოდა. ამ გარემოებამ „საქმეში“ ჩემი ჩართვის აუცილებლობა მოითხოვა და სუფლიორის ფუნქცია დამეკისრა. სცენაზე ნაწყვეტის გათამაშების დროს, კულისებში უნდა დავმდგარიყავი და იმ საბედისწერო ადგილას რეპლიკა უნდა მიმეწოდებინა ქ-ნი ლენასათვის. სიმართლეს ვიტყვი, მეც ავღელდი. ჩემს ცხოვრებაში პირველად დამეკისრა სუფლიორის მისია და იმის ფიქრში ვარ, რაიმე შეცდომა არ დავუშვა, საქმე არ გავაფუჭო.

მეფისა და მათე ბიჭის სამოსში გამოწყობილი მსახიობები სცენაზე თავისუფლად გრძნობენ თავს, მე კი კულისებში ნერვიულობისაგან ცივმა ოფლმა დამასხა.

– „დიდო მეფეო“ – შემართებით დაიწყო ელენე ყიფშიძემ. – „რაო, მათე ბიჭო! – შეაგება სიტყვა ტარიელმა და ამაღლებულ ტონალობაში ისეთი სისხარტით წავიდა დიალოგი, რომ მაყურებელთა დარბაზში ბუზის გაფრენას გაიგონებდი. დარბაზი მონუსხული შესცქეროდა საყვარელი მსახიობების თამაშს. ტექსტს გაფაციცებული ვადევნებდი თვალს და იმ ავბედით ადგილს რომ უუახლოვდებოდი, ჩემი დაძაბულობა კულმინაციას აღწევდა. მოვიდა დრო, რომ რეპლიკა შევაშველო ქ-ნ ლენას, მოვემზადე, მაგრამ... ისეთი რიხითა და აღმაფრენით გათამაშდა ეს ადგილი, რომ დარბაზი ლამის დაინგრა ოვაციით. მაყურებელი დიდხანს არ უშვებდა სცენიდან საყვარელ მსახიობებს. მე კი კულისებში სიმწრის ოფლს ვიწმენდი და, ბუნებრივია, ვხარობდი მათი წარმატებით. ეს ყველაფერი ხომ დიდი ოსტატობის, მაღალი პროფესიონალიზმის შედეგი იყო. კიდევ ერთხელ დამეუფლა სიამაყის გრძნობა და ვიგრძენი, რომ დიდოსტატობა ნიჭთან ერთად, თავგანწირული, დაუღლელი შრომის შედეგად მიიღწევა.

სალამოს დასრულების შემდეგ, სტუმრები დიდებულ სუფრასთან მიგვიწვიეს და ქართველ ხელოვანთა ზეიმი აქ უფრო ლაღად გაგრძელდა. ბუნების წიაღში, განსაკუთრებული სისაესით კიდევ ერთხელ გაბრწყინდა ქართული ჯიშის ნიჭიერება.

თიანეთიდან, ჩვენთან ერთად, ტარიელმა ბ-ნი ნოდარ ჩხეიძე დაიმგზავრა და რაც ამ უნიჭიერესმა მსახიობმა, რეჟისორმა, ხელოვანთა არაერთი თაობის აღმზრდელმა ქ-ნ ლენასთან ერთად იოხუნჯა, პატარა-პატარა სახუმარო სცენები გაითამაშა და თავისი თავგადასავლების შესახებ გვიამბო, სიცილით დავინოცეთ. ტარიელმა სულის მოსათქმელად რამდენჯერმე მანქანა გააჩერა და თბილისამდე ისე ჩამოვედით, არც კი გავგვივია. ეს მოგზაურობა დაუვიწყარ მოგონებად დარჩა ჩემს ხსოვნაში და როცა ქ-ნ ლენა ყიფშიძეს, ბ-ნ ნოდარ ჩხეიძეს და ტარიელს ვიგონებ, უპირველესად, ამ დიდებულ ხელოვანთა იმდღევანდელი იმპროვიზებული სცენები მახსენდება ხოლმე.



## მხატვარი ნიკალას სოფლიდან

„ანეულის“ სტუმარია – თვითნასწავლი მხატვარი ბელა ლობჯანიძე

ნიკო ფიროსმანაშვილის სოფელ მირზაანში დაიბადა. ბავშვობიდან ეზიარა ნიკალას უჩვეულო სამყაროს, რომელსაც სხვა განცდა და მაღლი მოჰქონდა... მერე თავადაც გაექცა ხელი და... უკვე მრავალი საინტერესო ნამუშევრის ავტორია. ფერწერული პორტრეტები ამაღლებულად გადმოსცემს შინაგან სამყაროს და ემოციას... თანაც ისე, რომ გამახსოვრდება, საფიქრალით გავსებს...

„ნიკალას პორტრეტი 3-ჯერ დავხატე, ყველა ნახატი ვიზუალურად სხვადასხვაა, თუმცა სათქმელი ერთი აქვთ – ტკივილი, იმედი, სიყვარული“...

სწორედ ამ განცდებით იყო დამუხტული მისი უახლოესი გამოფენა ეროვნულ ბიბლიოთეკაში, სადაც მას მეგობრებმა ლამაზი საღამო არუქეს.

– ძალიან მოუსვენარი და ცელქი ბავშვი ვიყავი... – ამბობს ბელა, – თუმცა წლების მერე თითქოს საკუთარ თავში ჩავიკეტე, შეიძლება ამანაც განაპირობა ხატვის სიყვარული... ბავშვობის დღიურებში (წლების მერე წავიკითხე) ჩემი ოცნება ყოფილა, მხატვარი ვყოფილიყავი... ეს არც კი მახსოვდა...

სკოლის პერიოდიდან გასაკუთრებულად დამამახსოვრდა ჩემი მასწავლებელი ნათელა ჩიტიშვილი, რომელმაც გამილამაზა ბავშვობა... მინდა თქვენი პორტალის საშუალებით მას დიდი მადლობა გადავუხადო იმ ყველაფრისთვის, რაც ჩემთვის გააკეთა. ხატვით ბავშვობიდან ვხატავ, მახსოვს, სხეულს როგორ



**ეკატერინე ბაზერაშვილი და ბელა ლობჯანიძე**

ვიხატავდი საწერი კალმით გაკვეთილებზე, რაზეც ხშირად მტუქსავდნენ მშობლები და მასწავლებელი.

**– პირველი ნახატები...**

– ზეთით პირველად დედის თხოვნით გოგონა დავხატე... არცთუ ისე სასიამოვნო შესახედი იყო. მოგვიანებით პრომეთეს ნახატი ვიხილე, დავინტერესდი, დავუკვირდი და მისი გადახატვა ვცადე დღევანდელი გადასახედიდან მაშინდელი პრომეთე სრულებით არ ჩამოუვარდება ახალ ნამუშევრებს. მივხვდი, ხატვა შეემძლო და მას მერე უკვე ჩემი ფანტაზიით ვხატავ.

**– მირზაანში, ნიკო ფიროსმანაშვილის სოფელში გაიზარდეთ... როცა ირგვლივ ნიკალას მაღლი ტრიალებს, მაინც სხვა განცდაა...**

– დიახ, ეს აუწერელი გრძნობაა... ბავშვობიდან დავდიოდი მუხუშუმში, რომელიც თავად მირზაანშია და საათობით ვუყურებდი მის ტილოებს. რამდენადაც შეემძლო, ვიხედებოდი მის სამყაროში. როცა მის ეზოში ხარ, საოცარი განცდა გეუფლება, თითქოს შენ გარშემო ტრიალებს სამყარო. სიტყვით ვერ გადმოსცემ...

**– ნიკალას სათქმელი და ტკივილი მისი თვალბით გადმოეცით...**

– ნიკალას პორტრეტი 3-ჯერ დავხატე და ყველა ნახატი ვიზუალურად სხვადასხვაა, თუმცა სათქმელი ერთი აქვთ – ტკივილი, იმედი, სიყვარული. მინდოდა, ამის სინთეზი გამეკეთებინა... სასაცილოა, მაგრამ ხან ველაპარაკები კიდეც... ჩემი ნიკალა ბედნიერია, ცოტა სევდიანი და იმედით სავსეც, და არა ლოთი (როგორც ბევრს დაუნახავს). ლოთი ასეთ დიდ ტილოებს ვერ შექმნიდა...

**– ისტორიული სახეების პროტოტიპად თანამედროვე ადამიანებს ხშირად იყენებთ...**

– შევხედავ ადამიანს და რა გარემოშიც წარმოვადგენ, ისე ვხატავ. ზოგჯერ თემა მაქვს და პერსონაჟებს ვემბ, ზოგჯერ ისეც ხდება, რომ წარმოსახვით დახატული პერსონაჟი გამიცნია. ეს მართლაც საოცრებაა.

**– ზეთით და აკრილით ხატავთ. ასევე გრაფიკულ ნამუშევრებსაც ქმნით... მაინც რომელს ანიჭებთ უპირატესობას?**

– ზეთით უფრო კარგად გადმოვცემ ჩემს სათქმელს...

**– თქვენი ნამუშევრებით წიგნები გაფორმდა – ზვიად ნავროზაშვილის ლექსების კრებული, ეკატერინე ბაზერაშვილის „წითელი დედოფალი“...**

– უნიჭიერესმა ეკატერინე ბაზერაშვილმა წამაკითხა თავისი პოემა „წითელი დედოფალი“... საოცარი განცდა დაძეუფლა, თითქოს თვალწინ წარმომიდგა ის ყველაფერი, რაც ამ პოემაში იყო.

დიდხანს ფიქრიც არ დამჭირვებია. პოემაში ყველაფერი ისეა აღწერილი, მცირე ფანტაზია და... თვალწინ იხატება ყველაფერი... ასევე გაფორმდა ზვიად ნავროზაშვილის მშვენიერი ლექსების კრებულიც.

**– ხატვა და შთაგონება...**

– შთაგონება, რასაც მუხას არქმევენ, განუყოფელი ნაწილია ხელოვანისთვის... თუ არ გტკივა და არ გაწუხებს, მექანიკურად დახატული ვერ აღგაფრთოვანებს... გულით და სულით დახატული მნახველის გულს ეხება. ნახატმა უნდა ჩაგახედოს სიტუაციაში, იქ გამყოფოს, ნახატი უნდა გესაუბრებოდეს.

**– 4 პერსონალური გამოფენის ავტორი ხართ. ახლახან ეროვნულ ბიბლიოთეკაშიც გამოიფინა თქვენი სურათები...**

– ემოციებით დატვირთული წამოვედი. გამოფენები აუცილებელია, პირისპირ რჩები დამთვალეირებელთან, რაც მათთვის მხატვრების გაცნობის საუკეთესო საშუალებაა... ნებისმიერ კრიტიკას ვიღებ და შემდგომში სასიკეთოდ, ნამუშევრის სრულყოფისათვის ვითვალისწინებ.

**– ჰობი...**

– ძალიან მიყვარს ბუნებაში ხეტიალი, მიყვარს სიმაღლეებზე ასვლა და ჰორიზონტის ყურება.

**– სამომავლოდ?..**

– უამრავი გეგმაა... რამდენად განვანორციელებ, ვნახოთ... მინდა ტექნიკა დახვებულ და სათქმელი უკეთესად გადმოვცე.

თამარ შაიშვილაშვილი

# ბიოგრაფიული



პოეზია კოსმიური ნათება და უფლისკენ სავალი გზაა... როცა ასპარეზზე ახალგაზრდები გამოდიან, მიხარია, რადგან ვიცი, რომ ლექსის კვალზე შემდგარი კაცი ღირსეული ქართველი იქნება, ქართული ადათ-წესების, ზნეობის, მორალის მატარებელი... ამიტომ არასოდეს არ განვიხილავ ახალგაზრდების შემოქმედებას, მით უფრო, თუ ის ჯერ კიდევ მოზარდია, კრიტიკის თვალსაზრისით, ლექსის სემანტიკური მნიშვნელობით და მთელი მისი მოზაიკით... პირიქით, მათ წახალისება და „წაქეზება“ სჭირდებათ... ასე ვუყურებ გიორგი უერთაშვილის, ამ ყმაწვილი კაცის შემოქმედებასაც... მთავარია, რომ მასში არის ის ეროვნული ღვრიტა, რაც ადამიანს თავისი წინაპრებისკენ, ანუ მომავლისკენ ახედებს, რაც სიყვარულის დანიშნულებაზე და სამშობლოს სიყვარულზე მიანიშნებს...

სულაც არ გამიკვირდება, რომ გარკვეული პერიოდის შემდეგ გიორგი უერთაშვილის სახით ქართულ პოეზიას ერთი ნიჭიერი შემოქმედი შეემატება.

ჯუბა ლებელი

## მე არ ვიცი, მაგრამ...

მე არ ვიცი, მოვკვდები, თუ გადავრჩები ცოცხალი, მაგრამ მე ერთ რამეს გეტყვი, შენ თუ გინდა მომკალი!

მე არ ვიცი, შენ ოდესმე გეყვარები თუ არა, მაგრამ ვიცი, რომ ამ გრძნობამ ჩემს გულს გადაუარა.

მე არ ვიცი, თუ ოდესმე დააფასებ ლექსებს, მაგრამ გეტყვი, ჩემი გული რომ უშენოდ ვერ ძლებს!

მე არ ვიცი, თუ შენს გრძნობებს ოდესმე დავიმსახურებ, მაგრამ გეტყვი, ცხოვრებაში მხოლოდ შენთვის ვიმსახურებ.

მე არ ვიცი, სიყვარული თუ დამინდობს ცოცხალს, შეიძლება მიმაჯაჭვოს მან მხოლოდ ორ ბორბალს. მე არ ვიცი, რას მეტყვიან მშვენიერი თვალები, მაგრამ ვიცი, სიყვარულმა მე დამალო ვალები.

მე არ ვიცი, როდის მოვა საცოდავი სიკვდილი, მაგრამ მუდამ, გამუდმებით ამ სიყვარულს მივტირი. მე არ ვიცი, თუ ოდესმე შემომხედავ გრძნობებით, მაგრამ სულ შენ მეყვარები, სიყვარულით მოვკვდები.

მე არ ვიცი, მოვკვდები თუ გადავრჩები ცოცხალი, მაგრამ მე ერთ რამეს გეტყვი, შენ თუ გინდა, მომკალი!

მე არ ვიცი, შენ ოდესმე გეყვარები თუ არა, მაგრამ ვიცი, რომ ამ გრძნობამ ჩემს გულს გადაუარა.

## მე და გალაკტიონი

ლამით, როდესაც ყველამ დამტოვა, გალაკტიონი დადგა ჩემ გვერდით. იმ ღამით იყო წვიმა და თოვა და მე ვტკბებოდი ბაზით და ვერდით!

გალაკტიონი ერთადერთია, ვინც გამიგებდა ახლა მალულად... ის პოეზიის ერთი ღმერთია, ვინც ამ ტკივილებს ხედავს ფარულად!

იმედი მაქვს, მას შევხვდები ამ ცხოვრების შემდეგ, მასთან ვიცი გამოვტყდები, რადგან ჩუმი ვერ ვძლებ!

გალაკტიონს რომ ენახა ახლა ჩემი ლექსები, გულში სიცილს წარმოთქვამდა, მე აქ არ მაქვს ეჭვები.

„შენ ზღვის პირად მიდიოდი მერი“, მე ამ ლექსით განუწყვეტლივ ვძლერი. „სხივქვეშ თრთოდა შენი ნაზი ტანი“, გულში ჩამოწოლილი არს ბანი.

„სიყვარულის ბალადა“ არის ჩემი ცხოვრება, მაგრამ ერთი არ ვიცი, მოხდება საოცრება?! ჩემი ღვევი არს ერთი: „შენ მიყვარხარ მუდამ“, მე ტკივილი მომაყენა შენმა თოვლის გუნდამ!

ლამით, როდესაც ყველამ დამტოვა, გალაკტიონი დადგა ჩემ გვერდით. იმ ღამით იყო წვიმა და თოვა და მე ვტკბებოდი ბაზით და ვერდით!

თინათინი ანდრონიკიძე



სონეტები კონკიას

სონეტი – 1

ვიცი კონკიავ, შენი ღირსი არ მბაღია  
 არც მეფის კვერთხი, არც გვირგვინი და არც  
 ვერსალი,  
 ჩემი ლექსები ფეხშიშველნი, დღეს რომ დადიან,  
 მეფურ საუნჯეს ატარებენ გულით, ღმერთმანი.  
 მეც ჩემს სიყვარულს ვმოსავ ქართულ სიტყვის  
 სამოსით,  
 შენთან ვაგზავნი, გემსახუროს, შენთვის იზრუნებს,  
 გზებით დამაშვრალს, ამა ქვეყნის მტვერში  
 ამოსვრილს  
 ნუ გაუწყობი, გვედრები, ნუ შეიძულე!  
 ციური ცეცხლით გაახურე, თვალთა აბანო,  
 (ვწუხვარ, ეგ თვალნი, ამ ნაწერთა კითხვით  
 დავლაღე)  
 შენ შეიწყალე სიყვარული ჩემი საბრალო,  
 თუ რამ ბიწი აქვს, საკუთარი ცრემლით გაბანე!  
 ჩემი კონკიავ, ამის ღირსი იქნებ არცა ვარ,  
 მაგრამ განგებამ შენი ტრფობის ღირსად ჩამთვალა.

\* \* \*

ლამაზი მინდა სიკვდილიც,  
 ისეთი, რომ არ შემარცხვენს,  
 სადა ხარ, ჩემო სიკვდილო,  
 ცოცხალი თოლით მენახე!  
 თუ მეტად მომეწონები,  
 ვინ გკადროს სიტყვა ძაგების,  
 ემ დასათხრელის თოლებით  
 დაგკვლევ და... გამიხარდები!

\* \* \*

აქ ისევ ეკლის გვირგვინებს წნავენ  
 და აქვე წნავენ გვირგვინებს დაფნის,  
 უნიჭობას დაფნითა რთავენ,  
 ნიჭიერებას – ეკლით და ქაცვით...

\* \* \*

ღრუბელი, ამ ჩემს ქროლვზე,  
 უნდა იდინო, იარო,  
 ხან გზამკვლევად წინ გამიძღვე,  
 ხან გულზე გადამიარო.  
 მე ის ქარი ვარ, რო გრგვინავს,  
 ტკივილი არ დამიამო!

\* \* \*

თავს კითხვებს ვუსვან ხშირად ასეთს –  
 საიდან, ვინ ვარ?  
 ანდა: საიდან იბადება უეცრად ლექსი?  
 შევალე სიტყვის კარებსა და...  
 ვგრძნობ, უკვე შინ ვარ,  
 დალოცვილ სიტყვის კარებიდან  
 შევდივარ ღმერთში....

\* \* \*

დავრჩი უცნობი პოეტი,  
 ვით უპატრონო საფლავი,  
 აქ მხოლოდ ზეცა დამტირის  
 და ქარი მმარხავს ხარხარით.  
 არც გათენება მიხარის,  
 არც ეს უთოვლო ზამთარი,  
 მზის სხივებმაც არ აკენკეს  
 ჩემ ცრემლთა მწარე მარცვალი,  
 ველარც სამშობლო ვიცანი,  
 ჩამოდგა ეს რა ჟამ-ხანი,  
 მთებო, თქვენ მაინც მითხარით  
 რაიმე გულგასახარი!  
 აქ მხოლოდ წვიმა დამტირის  
 და ქარი მმარხავს ხარხარით,  
 დავრჩი უცნობი პოეტი,  
 ვით უპატრონო საფლავი.

\* \* \*

ნუ მოუძებნი ჩემს ლექსებს,  
 არ მოედება სადავე,  
 ხმალ დამკარ სიყვარულისა,  
 უთქმელ ლექსებად დამღვარე!  
 ნუ შემფოთლები, თერგივით  
 კალაპოტით თუ გადავე.



\* \* \*

ნიავეს ნეტა რა ეწყინა,  
დღეს აღარ მომიაღერსა?  
უმძრანად ჩამომიარა,  
გაფრინდა უცხო მხარესა.  
სასიყვარულოდ არ მიმტვრევს  
აღარვინ გულის კარებსა,  
მაშვრელი მხოლოდ ვუნდივარ  
შაფფერ ყორნებს და ყვაეებსა;  
მე ახლა მკვდართა მზეს ვგავარ,  
ცხრობაში წასულ მთვარესა,  
სიკვდილი ვერაფერს მავენებს,  
შენი სურვილი დამღევსა.  
ნიავესაც რაი ეწყინა,  
დღეს აღარ მომიაღერსა?  
სიყვარულის ღმერთს ვენაცვლე:  
მაინც საღეჭსოდ ამღესა.

### ეპიტაფია

ერთი დრო არვის შერჩება,  
იცოდეს ადამიანმა!  
მანდ ბალახს გადაუჯარე,  
აქ – ბალახმ გადამიარა.

\* \* \*

თქვენ რომ გგონიათ, ის არ ვარ...  
ამ მინდვრის ყვაილისა ვარ,  
მეც მისი ბუნებისა ვარ,  
მეც მისი გუნებისა ვარ,  
მეც მისი გენებისა ვარ...  
ვაჟაის სულსა ვფიცავარ!

\* \* \*

ის ცეცხლი უნდა დავხარჯო,  
რაც ქვეყნად დასახარჯია,  
ხანჯლითაც უნდა დავხანჯლო,  
ვინც მართლა დასახანჯლია.  
ჩემ სულთან უნდა ჩაგაწნა,  
ჩემს მიწას უნდა გაგრია,  
ნუ შიშობ, მთლად კი არ დავწვავ!  
ასეთ ცოდვაშიც მაღლია...

\* \* \*

დღე მიიღია, შუქი მოკლდების,  
და იზრდებიან აჩრდილ ლანდები.  
საქართველოსთვის თუკი მოვკვდებით,  
იქვე ხელახლა დავიბადებით.  
სიყვარულის და რწმენის მოკრებით,

ამ ქვეყნიურზე სული მაღლდების.  
ქრისტე ღმერთისთვის თუკი მოვკვდებით,  
განვიღმობით და გავუკვდავდებით.

\* \* \*

ქალავ, ეგ შენი თეთრი ყვაილი,  
ჩემი თვალებით მოფუტკრებულა...  
სურნელიცა გაქვს, სიტკბოც, მარილიც,  
გულიც ხომ ჯერ არ მოხუცებულა.  
მა გულის ხშირი ძვერა ნუ გიკვირს,  
ჩანს შენი სისხლიც ამღერებულა  
თავდავიწყების მძაფრი მუსიკით...  
და გულიც ჯერ არ დაბერებულა.  
საშველს ვერ ვპოვებ უსაშველობით,  
უბედო ბედი ახლავს ხელოვანს,  
შუქივით ამ ჩემს თვალში შემოდი,  
სისხლივით მეც შენს გულში შემოვალ.  
როგორც ცვრიანი მინდვრის ყვაილი,  
კოცნა გულ მკერდზე უნდ დაგაყარო,  
შეგიტკბო მარტო ქალი კი არა,  
შენით შევიგრძნო მთელი სამყარო.

### ისევ ციკლიდან – „ლექსები კონკიას“

არა, კონკიავ, არ გეგონო „მწყემსი ქაცვია“,  
რაკი არ მიღვას სრა-სასახლე ახლა მდიდრული,  
რაკი ღარიბთა სამოსელი ახლა მაცვია,  
მე დიდ პოეტთა გვარისა ვარ, ვარ უფლისწული.  
რომ დავიბადე, მე აკვანი ქარმა მიწია  
და მერე ბავშვი პოეტების ცრემლში მომნათლეს,  
თუმცა სამეფოს მიტოვება მეც მომიწია,  
დრო – მეფეთმეფე ჩემს საუფლოს კლიტეთ  
მომართმევს.

ჩემს სამეფოში უამრავი ღრუბლის ვერძია,  
ჩემს საუფლოში ყვაილები ხარობს მრავალი,  
ეს ცხრათვალა მზე სამეფოს ჩემის ღერბია,  
და ქარი არის სამეფოს ჩემის ალაძი.  
სად პოეზიის არნახული ციხე-კოშკია,  
ჩემი მუხები სადღეოფლოდ მოგორთავ-შეგმოსვენ,  
როცა სამეფოს დავიმკვიდრებ, მერე, კონკიავ,  
ჩემს საბრძანისში მხოლოდ შენ ერთს  
გაგადელოფლებ.

არა, კონკიავ, მე არა ვარ მწყემსი ქაცვია,  
თუმცა დღეს მფარავს ეს პატარა ქოხი – მიწური,  
თუმცა ღარიბთა სამოსელი ახლა მაცვია,  
მეფე პოეტთა გვარისა ვარ, ვარ უფლისწული...

# თამაზ შაიშვილი



## სიღნაღი

ეს ქალაქი შენი თბილი ორღანია  
და სიყვარულს გვირღილებად გზავნის...  
კარიბჭესთან გაზაფხულიც ორგვარია,  
მზის და მთვარის უსამანო მგზავრი...

ეს ქალაქი უფლის თბილი პერანგია,  
შინდის რტოზე მოწკრიალე ზარით...  
მონატრებაც ისევ ისე ფერადია,  
შეუცნობი ბილიკებით მგზავნის...

განთიადო, ნისლის ზღვაზე შემომხვდები,  
გულის გულში აყვავდება სევდა...  
სამანს იქით მარტოობის ქარებს ვხვდები,  
მე აქ მინდა – ღრუბლებში და შენთან...

ეს ქალაქი ზეციური ფერმადლია,  
გიშლი სიზმრებს – საორღანო მესას...  
გვირღილებში ფეხშიშველა ვთვლემ ადრიან –  
სიყვარული გამოძეკა შენთან...

\* \* \*

*კახეთიდან – თბილისის გზაზე*

მზე ჩადიოდა...  
ფერებნათელი  
და ჩამავალი ათინათებით  
სალამოური სილამაზით  
მამის ცრემლს ჰგავდა...  
მოხუცებულის...

მეხილვებოდა  
მზის მამაჩემი,  
თვალისჩინის  
უხსოვარ სიზმრით...  
და კომშის ფოთლებს აუხსნელი  
მუსიკა სდევდათ...

\* \* \*

ჩემი სიზმარი ორი მთვარეა,  
თბილშემოდგომის მზე და საათი...  
დარდი ფოთლებით მომთაბარეა,  
შენ გამოვიხმობ აქ მასლაათით...  
ფოთოლცვენაში დრო გაჩერდება,  
თვალის ჩეროში აპრილებს ვმალავ,  
და ჯერგაუშლელ ვარდის ჩვენებას,  
შორს მორიჟრაჟე ირეკლავს ბანა...  
შორს მირაჟი და მონატრებაა,  
იქ, ნანგრევებში მღერის ოპიზა,  
და გაზაფხულებს ცის ნამტკრევებად  
ფოთლების ქიმზე შენთვის მოვზიდავ...  
და ნატკრისთვალეებს ელვის ღელვებით  
მოამდინარებს ქარი გიჟმაჟი...  
იმ მარადისში ვერ შეგვლევი,  
ამ მარადისშიც მრჩები სიზმარში...  
და როგორც ნისლში მათრობს ყინწვისი,  
მინდა, რომ სევდას მთვარე ავუნთო...  
ხელისგულიდან დილის ნამს გიწვდი...  
გიორგობის სხივს შენთვის გზას ვუთმობ...

\* \* \*



ფერარეული თებერვალი ვარ სამანმჩენი,  
ვაზის ცრემლობას ავიდევნებ, რა გზანაჩვევი  
პეპლის საჭერით შემომხვდება აქ განაჩენი...  
მზრებაწურული ამინდით  
წვიმს მამაჩემი...

\* \* \*

ჩემს მარტობას მარტოსულად ვერა ვტოვებდი,  
სევდის გემოთი ალაზნის მზეს ვეგვარტომები...  
არ გადამიჭრა სადღეოფლო შინდის რტოები,  
ვარ თებერვალი – გაზაფხულის გემატოგენი...

## გაზაფხული

შემოდის მარტი მარტოს იერით,  
მამის ხმა ვაზებს გულზე ეკვება...  
ისე თბილია დასალიერი,  
ვით დაბინდული ხირსის მშვენება...  
ვით სილამაზე სევდამოვლილი  
ცვრიან ნისლებში რთავს სატირიფოს...  
და დედის ხელი – ცრემლგამოვლილი  
ჰგავს მჭადის გულზე ჯვარს  
ამოტვიფრულს...



## ზაზა ჩუბინიძის ნამუშევრები

---

ჟურნალ „ანუელის“ შემომწირველები:

თამარ გაბროშვილი, როზა ინანიშვილი, ნინო ჯამურაშვილი

კულტურულ-საგანმანათლებლო საზოგადოება „ანუელის“  
რეკვიზიტებია:

ს/ს „საქართველოს ბანკი“, ბანკის კოდი: BAGAGE 22

ანგარიშის ნომერია: GE81BG 0000000 306158900



\*\*\*

„ჩვენს სულს გავხვედით შიშა ქუბიანობით ავხვედული ხუნულის კბავს.  
ვპაღა, ვიხს კი გხვდება, თითოეუ ქუბიან გვიხს ალხვს ზურ, ახლა პირიქით,  
ვიპავს. და ვაი, არც ავ ალხვიანესა შორის არიან ისეთები, არც ქუბიანს რაღა  
ხელის, ვებით, ვთვლი კელთით იგანხვან იგან, ჩანახ თითოეუ-თითოეუ  
ღებდნან სხვაში“...

\*\*\*

„ღანს, ვ აგვოსგონს, ღიღის ვიღ სავთვბა, ავღანი და ვიგრაქანი, არც  
ჩვენს ირგვლივ ვაქოღოვონს ანარი იღბა. გავხვედით ვაქოღოვონს ნაკის  
საკვილგა (ვა სრვ ვაქოღოვონსა და ზანთსაკვი ვხარ კირითსაღელ), ვაგრა  
ნაკილგანს სავხვედით განღარითულგა ეს ღანს დავაკარგქ“.

*სურს ამხროვლად*



მგული – გიბიფიხილის ხნული